







同治己巳重鐫

續後漢書

師古山房藏板

Asia



是書宋廬陵蕭公諱常所著也公言行事蹟縣志皆佚惟書目載郡志藝文類書藏秘府吾鄉罕見永新尹君繼隆從虔州陳君祥麟家得之爲上海郁氏刻本亟假歸屬謀重梓嗣與杜君邦浚籌費開雕郡人士咸以先覩爲快郁刻因昭文張氏海鵬舊本校勘錯訛附札記四卷茲依校勘本授刻仍舊爲四十七卷云同治己巳夏月邑人胡芳秋桂一氏識於郡學之尊經閣



DS  
748.2  
.148  
v.1  
欽定四庫全書提要

續後漢書四十七卷宋蕭常譔常廬陵人鄉貢進士  
初常父壽朋病陳壽三國志帝魏黜蜀欲爲更定未  
及成書而卒常因述父志爲此書以昭烈帝爲正統  
作帝紀二卷年表二卷列傳十八卷以吳魏爲載記  
凡二十卷又別爲音義四卷義例一卷於蜀志增傳  
三十二廢傳四移魏志傳入漢十吳志廢傳二十魏  
志廢傳八十九多援裴注以入傳其增傳亦皆取材  
於注間有注所未及者建安以前事則據范書建安  
以後則不能復有所益蓋其大旨在乎書法不在事實  
也然其義例精審實頗得史法如魏吳諸臣本附見



二國載記之後而中有一節可名如孟宗陳表等則  
別入孝友傳杜德張悌等則別入忠義傳管寧吳範  
等則別入隱逸方技傳其體實本之晉書又曹操封  
魏公加九錫等事陳志皆稱天子命公而此乃書操  
自爲云云則本之范蔚宗後漢書本紀其他筆削亦  
類多謹嚴惟陳志先主傳稱封涿縣陸城亭侯而常  
於昭烈紀但云封陸城侯陳志建安二十四年魏延  
爲都督而常則云拔魏延爲鎮遠將軍裴注概無此  
語不知常何所本然常之所長不在考證殆偶然筆  
誤非別有典據也常成此書時嘗以表自進於朝所  
列但有本紀表傳載記而無音義至周必大序始并



音義言之或成書之後又續輯補入歟







續後漢書序

曹氏代漢名禪實篡特新莽之流亞丕方登壇自形舜禹之言固不敢欺其心矣今向千載人之好惡豈復相沿而蘇軾記王彭之說以爲塗巷談三國時事兒童聽者聞劉敗則輦蹙曹敗則稱快遂謂君子小人之澤百世不斬茲豈人力強致也與陳壽身爲蜀人徒以仕屢見黜父又爲諸葛所髡於劉氏君臣不能無憾著三國志以魏爲帝而指漢爲蜀與孫氏俱謂之主設心已偏故凡當時祫祭高帝以下昭穆制度皆畧而不書方見乞米於人欲作佳傳私意如此史筆可知矣其死未幾習鑿齒作漢晉春秋起光武終愍帝以蜀爲正魏爲篡謂漢亡僅一二年則已爲



晉炎興之名天實命之是蓋公論也然五十四卷徒見於唐藝文志本朝太平御覽之目逮仁宗時修崇文總目其書已逸或謂世亦有之而未之見也幸晉史載所著論千三百餘言大旨昭然劉知幾史通云備王道則曹逆而劉順近世歐陽修議正統不黜魏其賓客章望之著明統論辨之見於國史張棡經世紀年直以先主上繼獻帝爲漢而附魏吳於下方皆是物也今廬陵貢士蕭常潛心史學謂古以班固史爲漢書范曄史爲後漢書乃起昭烈章武元年辛丑盡少帝炎興元年癸未爲續後漢書旣正其名復擇注文之善者併書之積勤二十年成帝紀年表各二卷列傳十八卷吳載記十一卷魏載記九卷別爲音義四



卷惜乎壽疏畧於前使常不得追記英賢憲章于後以釋  
裴松之之遺恨也昔周東遷寢以微弱至春秋時僅爲王  
城而吳楚强大絲地數千里皆僭稱王聖人斷然以夷狄  
子之昭烈土地甲兵甚非周比興于漢中適與沛公始封  
國號同天時人事決非偶然孔子復生必有以處此乃爲  
首揆魏文當日之心次舉蘇氏百世之說以合習氏之論  
而證舊志之非作續後漢書序慶元六年庚申二月望少  
傅觀文殿大學士致仕益國公食邑一萬四千六百戶食  
實封五千四百戶周必大書







進續後漢書表

臣常言名義至重信古今之不渝書法匪輕雖毫釐之必  
計理不可易事固當然竊觀魯史之文仰識宣尼之志盟  
會所列敢辱天子之尊王人雖微必敘諸侯之上僭如吳  
楚爵不過子盛若威文號止稱侯蓋天常尊地常卑轉移  
不可譬履雖新冠雖敝顛倒弗容載維聖經筆削之言渙  
疾史氏抑揚之謬彼妄肆一時之意蓋莫如三國之書既  
紀曹而傳劉復貶漢而爲蜀以鬼蜮之雄而接東京正統  
以高文之胄而與孫權竝稱徒知崇僞而黜真寧識尊王  
而賤伯不可以訓莫甚於斯是用質之古人揆之公議一  
切反之於正多言守之以中爰痛闢於淫辭庶少扶於名



教恭惟皇帝陛下廣淵齊聖緝熙光明推太宗開卷有益之誠佩高廟放心莫收之戒每於經筵之暇及夫史學之傳獨全深識遠覽之明力主大公至正之道如臣末學爲時鄙儒自幼承師法於先臣有志明天下之大義凡疑似是非之際必反覆辨析其間名不假人斥垣衍帝秦之論物不失舊大少康祀夏之功非固徇管見臆決之私直欲還天理人心之正采諸儒之遺說更再世以成書小道或有可觀多見其不知量僅足廁兔園之列詎敢追麟筆之餘藏名山副在京師論次愧十年之作閱書林幸乎東觀燕閒裨乙夜之觀所有臣編次續後漢書紀表列傳載記總計四十二卷謹繕寫成八冊隨表上進以聞臣常誠惶



誠恐頓首頓首謹言



新修四庫全書

表

二



續後漢書目錄

常謹案前史藝文志謂班固史爲漢書范曄史爲後漢書昭烈繼獻帝而作其書宜曰續後漢書

帝紀二卷

第一 上下

昭烈皇帝

第二

少帝

年表二卷

第一

建安以來諸侯表



第二

章武以來吳魏表

列傳十八卷

第一

昭烈甘皇后

昭烈穆吳皇后

昭烈孫夫人

少帝敬哀張皇后

少帝張皇后

少帝李昭儀

甘陵王永

安平悼王理

太子璿

北地王謐

第二

陳登

袁渙



剛原

陸績

第三 上下

諸葛亮 子喬

第四

關羽

張飛

馬超

黃忠

趙雲 陳到

第五

龐統 子宏弟林

法正

徐庶

董和 胡齊

劉巴



第六

許靖

王商

麋竺

孫乾

簡雍

伊籍

秦宓

馬良

鄧芝

宗預

廖化

第七

陳震

董允

陳祗  
董恢

呂乂

杜祺  
劉幹

楊洪

何祗

楊

姚

馬  
勳  
馬齊

王謀

賴恭  
恭子玄何宗  
宗子雙習  
禎殷觀

董厥

樊建



第八

劉封 孟達

彭萊

廖立

李平

劉刻

馬謖

魏延

楊儀 兄慮

第九

蔣琬 劉敏

費禕

李福

第十

霍峻 子弋羅憲

王連

向朗 兄子寵

張裔



吳懿

族弟班

費詩

李朝

弟邵兄邈

第十一

黃權

子崇

李恢

王平

句扶

呂凱

王伉

馬忠

張嶷

第十二

姜維

張翼

王嗣

第十三

楊戲

許慈

胡潛



孟光

來敏

尹默

李譔陳術

卻正

第十四

譙周

黃皓

第十五

孝友

李宓

孟宗

陳表

張範

第十六

忠義

金禕

耿紀韋晃吉本本子邈邈弟穆

魏諷

傅彤

子儉

諸葛瞻

子尚

程畿



嚴顏

杜德

秦旦張羣黃強

邵疇

常播

張悌

石偉

第十七

隱逸

管寧

張琚

胡昭

焦先

扈累

石德林

杜微

五梁

劉穎

第十八

方技

李意其

周羣

張裕

吳範

魏勝

趙達

劉惔

葛衡

皇象



杜夔

馬鈞

朱建平

周宣  
趙直

管輅

吳載記十一卷

第一

孫堅

孫策

孫權

第二

孫亮

孫休

孫皓

孫登  
謝景

孫和

孫靜  
峻  
綝  
瑜  
皎  
奂  
張  
梁



孫賁

子鄰弟輔

孫翊

弟匡

孫韶

第三

劉繇

子基

士燮

弟壹子徽

太史慈

朱治

第四

張昭

子承休

顧雍

子劭劭子譚孫邵

諸葛瑾

子恪聶友

第五

張紘

秦松陳端

步騭

周昭

嚴畯

裴元元子欽桂秉



閻澤 唐門

薛綜 子瑩

是儀

胡綜 徐詳

第六

周瑜

魯肅 子淑

呂蒙

第七

程普 韓當

黃蓋

蔣欽 徐盛

周泰

陳武 子修修弟表

董襲

凌統

甘寧

潘璋

丁奉



第八

朱然

施績

朱桓

子異

呂範

子據

賀齊

孫劭

第九

潘濬

呂岱

徐原

全琮

駱統

周魴

鍾離牧

雷贊

第十

陸遜

陸抗

陸瑁

陸凱



第十一上

虞翻 子汎忠聳昂

張溫 暨艷

韋昭

王蕃 樓元

華覈

吾粲 朱捷

滕允

第十一下

趙咨

沈珩

鄭泉

馮熙

陳化

李衡 谷利

魏載記九卷

第一



曹操

曹丕

曹叡

曹芳

曹髦

曹奂

第二

曹彰

曹植

曹冲

曹仁

曹洪

曹休

曹真子爽鄧颺丁謐何晏畢軌李勝桓範

夏侯惇

夏侯淵

夏侯尚

夏侯[元]王經

第三



荀彧

董昭

華歆

郝慮

荀攸

賈詡

許攸國淵

程昱

郭嘉

劉曄

蔣濟

第四

鍾繇

子毓會

陳羣

子泰

陳矯

徐宣衛臻

盧毓

杜畿

子恕

鄭渾

第五

王朗

子肅

王弼



王粲

徐幹陳琳阮瑀應瑒劉楨吳質

衛覬

劉廙

劉劭

傅嘏

崔林

楊俊

王象

高堂隆

第六

崔劼

毛玠

鮑勛

徐邈

胡質

桓階

裴潛

何夔梁習

司馬朗

司馬芝

第七

田疇

王修



常林

吉茂沐竝時甫

和洽

楊阜

辛毗

第八

賈逵

蘇則

任峻

棗祗

張既

子緝

杜襲

趙儼

高柔

王觀

劉放

孫資

第九

張遼

樂進李典臧霸

張郃

于禁徐晃

龐德

許褚典韋閭溫龐涓

文聘

呂虔

滿寵

田豫郭淮



王浚

母丘儉欽儉子旬諸葛誕

王昶

王基

鄧艾

義例

音義四卷

續後漢書卷第一上

上海郁松年原本

宋廬陵蕭 常著

邑後學

胡芳秋

杜邦浚校梓

帝紀第一上

昭烈皇帝

昭烈皇帝諱備字元德景帝子中山靖王勝之後也勝子  
貞元朔二年封陸城侯因家於涿郡祖雄舉孝廉官至東  
郡范令父宏亦仕州郡昭烈生於桓帝延熙四年少孤與  
母販屨織席自給舍東南有桑高五丈童童如車蓋或謂  
當出貴人昭烈與諸兒戲桑下曰吾當乘此羽葆車叔父  
子敬謂曰毋妄言滅吾門也年十五母使行學與同宗劉  
德然遼西公孫瓚師事故九江太守同郡廬植德然父元



起給其資用與德然等元起妻有難色元起曰吾宗有此兒非常人也而瓚亦與友善昭烈不甚樂讀書喜狗馬音樂美丰儀身長七尺五寸垂手過膝顧自見其耳寡語言善下人喜怒不形於色好交豪俠年少爭附之中山大賈張世平蘇雙等貲累千金見而異之多遺之金以故得合其眾靈帝中平元年黃巾賊帥張角起魏郡遣入使假善道以化天下陰相連結自稱黃天分三十六部部各萬人一時俱發天下響應州郡各舉義兵昭烈帥其屬從校尉鄒靖討黃巾有功除中山安喜尉其後有詔罷免軍功爲吏者昭烈亦在遣中頃之大將軍何進遣都尉母丘毅募兵丹陽昭烈與俱至下邳遇賊力戰有功除下密丞復去



官中平末至京師會董卓之亂義兵起昭烈亦聚眾從討  
卓後爲高唐令縣爲賊所殘往奔幽州公孫瓚瓚表爲別  
部司馬使與青州刺史田楷拒冀州牧袁紹數有戰功試  
守平原令竝領平原相郡人劉平素與昭烈有隙恥爲之  
下結客刺之客不忍語之而去歲大饑民苦鈔暴昭烈外  
禦寇難內振貧乏士之至者必與同席而坐同器而食眾  
多歸焉北海相孔融屯都昌爲賊管亥所圍遣太史慈來  
告急昭烈曰孔北海知世間有劉備耶卽遣精兵三千赴  
之賊尋解散袁紹攻公孫瓚昭烈與田楷東屯齊  
獻帝初平四年曹操攻徐州陶謙遣使告急於楷楷與昭  
烈救之時昭烈有兵千餘及幽州烏丸雜胡騎又得飢民



數千人既至謙以丹陽兵數千益之昭烈遂去楷歸謙  
表爲豫州刺史屯小沛

興平元年春操引兵還夏操復遣荀彧程昱等攻豫州昭  
烈爲彧等所敗冬謙病篤謂別駕麋竺曰非劉玄德不能  
安此州謙卒竺帥州人迎昭烈昭烈固辭典農校尉下邳  
陳登進曰漢室淩遲海內傾覆立功立事正在今日此州  
殷富戶口百萬欲屈使君撫臨之昭烈曰袁公路近在壽  
春此君四世五公海內所歸宜以州與之登曰公路驕豪  
非治亂之主今欲爲使君合步騎十萬上可以輔主濟民  
成五伯之業下可以割地守境書功竹帛惟使君幸聽登  
言孔融亦謂昭烈曰袁公路豈憂國忘家者耶家中枯骨



何足介意今日之事百姓與能天與不取悔不可追昭烈  
遂領徐州陳登遣使以奉昭烈之意告袁紹紹曰劉玄德  
宏雅有信義今徐州樂戴之誠副所望也

二年二月董卓餘眾李傕郭汜相攻三月李傕脅天子幸  
其營四月郭汜攻李傕傕移天子幸北塢張濟自陝來和  
傕汜秋七月車駕東歸楊定董承等侍送八月至新豐冬  
十月郭汜遣兵來逼乘輿楊定楊奉與戰破之十一月傕  
汜等追乘輿戰於東澗王師敗績車駕幸曹陽楊定董承  
引韓暹李樂等帥師奉迎與傕等戰破之十二月車駕乃  
進傕等復來追王師大敗進幸陝北渡河至安邑是歲孫  
策始據江東



建安元年五月改元夏袁術來攻昭烈使司馬張飛守下邳自將拒術於盱眙淮陰相持累月下邳相曹豹陶謙故將也與飛相失飛殺之城中乖亂術與呂布書勸令襲下邳布卽引軍東下中郎將丹陽許耽反迎之飛敗走昭烈失其孥轉軍海西遣使與布連和布亦憤術轉餉不繼乃召昭烈還其孥復以爲豫州刺史與并力擊術昭烈屯小沛秋七月車駕至雒陽曹操表昭烈爲鎮東將軍封宜城亭侯八月操自領司隸校尉錄尙書事操殺侍中臺崇尙書令馮碩等以衛將軍董承爲輔國將軍庚申天子遷都於許冬曹操自爲司空百官總已以聽袁術遣其將紀靈等步騎三萬復來攻昭烈求救於呂布布帥步騎千餘來



援靈等聞布至皆歛兵布要靈等與昭烈釋憾遂各解去  
昭烈合兵復得萬餘人布銜之自來攻昭烈復敗因詣曹  
操操厚遇之表爲豫州牧與俱至沛收散卒給其糧益與  
之兵使東擊布

二年春袁術僭號於淮南秋曹操大敗之術走渡淮韓暹  
楊奉寇掠徐揚間昭烈要擊盡斬之

三年夏呂布復與袁術通使其中郎將高順騎都尉張遼  
來攻曹操使夏侯惇來救不利九月順破沛城昭烈脫身  
去復失其孥十月曹操自引兵助昭烈圍布於下邳禽之  
昭烈復得其孥從操還許操表爲左將軍是歲天子遣謁  
者裴茂帥諸將誅李傕夷三族郭汜爲其將伍習所殺



四年夏袁術欲繇徐州北從袁紹曹操遺其將朱靈從昭烈要擊之程昱郭嘉聞昭烈行言於操曰劉備不可縱操悔追之不及昭烈之未東也與帝舅車騎將軍董承偏將軍王服吳子蘭越騎校尉种輯等受天子衣帶中密詔誅操操未之知從容謂昭烈曰今天下英雄惟使君與操耳本初之徒不足數也昭烈謂事泄方食失匕箸時適雷震因謂操曰聖人云迅雷風烈必變良有以也一震之威乃至是耶遂與承等合謀會東出未發術病死昭烈遂據下邳朱靈等還昭烈乃殺操徐州刺史車胄留關羽守下邳身還小沛郡縣多叛操爲昭烈守有眾數萬遣孫乾與袁紹連和操使其將劉岱王忠來攻昭烈大敗之



五年春董承等事覺曹操殺承等夷其族操欲自來攻其  
下皆曰與公爭天下者袁紹也今棄紹而東若何操曰劉  
備人傑也今不擊必爲後患袁紹雖有大志而見事遲必  
不動也遂來攻昭烈敗績操收其孥并獲關羽以歸昭烈  
趣青州青州刺史袁譚昭烈故茂才也將步騎來迎因至  
平原馳使白紹紹去鄴二百里奉迎父子傾心敬之月餘  
所失亡士卒稍稍來集曹操與紹相拒於官渡汝南黃巾  
劉辟等叛操與紹紹遣辟等從昭烈徇許下關羽來歸操  
使曹仁等來拒昭烈還紹軍知紹無成陰規去計乃說紹  
南還荆州牧劉表昭烈遂將其兵至汝南汝南賊龔都帥  
眾降合數千人操使其將蔡陽來攻昭烈大破之臨陣斬



陽是歲紹與操相持於官渡紹軍大潰孫策卒弟權襲其業

六年春昭烈頓軍汝南秋曹操來攻昭烈遣麋竺等與劉表相聞表郊迎之待以上賓之禮益其兵使屯新野荊州豪傑歸之日益多表疑焉使拒夏侯惇于禁等於博望久之昭烈設伏偽遁惇等追之大爲伏兵所破昭烈嘗於表坐起如廁顧見其髀裏肉生慨然流涕還席表怪問之昭烈曰平時身不離鞍髀裏肉消今不復騎髀肉遂生日月若馳老將至矣而功業不建是以悲耳

七年夏袁紹卒其子譚尙相攻

九年秋曹操破袁尙自領冀州牧



十年曹操敗袁譚於青州殺之

十一年曹操廢齊北海阜陵下邳常山甘陵濟陰平原八王除其國

十二年曹操北攻烏丸昭烈說劉表襲許表不能用及操自柳城還表謂昭烈曰不用公言失此大機昭烈曰今天下分裂日尋干戈事會之來豈有旣哉若能應之於後則此未足爲恨也是歲始用南陽人諸葛亮

十三年夏曹操自爲丞相秋八月操殺大中大夫孔融夷其族操攻劉表會表卒其子琮代立屯襄陽昭烈屯樊九月操軍至新野琮遣人約降昭烈不虞操之卒至遂將其衆去諸葛亮徐庶等竝從昭烈過襄陽亮說昭烈攻劉琮



荊州可有昭烈曰吾不忍也乃駐馬呼琮琮懼不能去遂降於操琮左右及荊州人多歸昭烈比到當陽眾十餘萬輜重數千兩日行十餘里別遣關羽乘船數百艘使會江陵或謂昭烈宜速行保江陵今雖擁大眾被甲者少若操兵至何以拒之昭烈曰夫濟大事必以人爲本今人歸吾吾何忍棄去操以江陵有軍實恐昭烈據之乃輕軍到襄陽聞昭烈已過卽以精騎五千來追一晝夜行三百餘里及於當陽之長阪昭烈兵不利乃棄其孥與諸葛亮張飛等數十騎從間道走漢津適與羽船會得濟沔會劉表長子江夏太守琦眾萬餘人未有所鄉乃與俱至夏口先是孫權遣魯肅弔劉表二子并令與昭烈相結肅未至而操



已向荊州肅與昭烈遇於當陽因致權意且謂昭烈曰孫  
討虜聰明仁惠敬賢禮士據有六郡兵精糧多足以立事  
今爲君計莫若自結於東共濟世業昭烈喜旣至夏口卽  
遣亮隨肅詣權且請兵擊操權遣周瑜程普等水軍數萬  
會昭烈十二月昭烈以其眾會吳師及操戰於赤壁大敗  
之盡焚其舟艦操走昭烈復與吳師水陸俱進追至南郡  
時操軍復飢疫死者大半操之北走也畱曹仁等守南郡  
昭烈屯油江口表劉琦爲荊州刺史分遣諸將南徇四郡  
武陵太守金旋長沙太守韓元桂陽太守趙範零陵太守  
劉度皆舉郡降廬江營帥雷緒帥眾數萬來歸以諸葛亮  
爲軍師中郎將使督零陵桂陽長沙三郡調其租賦以充



軍實

十四年冬曹仁等敗委城北走周瑜領南郡太守屯江陵  
昭烈表孫權行車騎將軍領徐州牧會劉琦卒羣下推昭  
烈領荊州牧治公安權進其妹於昭烈

十五年昭烈會孫權於京口於是盡有荊州之地是歲權  
遣使來告欲共取蜀或以爲宜聽許吳終不能越荆以有  
蜀蜀地可爲吾有荊州主簿殷觀進曰若爲吳先驅進未  
能克蜀退爲吳所乘卽事去矣今但可贊其伐蜀而以新  
得諸郡未可發兵爲解吳必不敢越我而獨取蜀如此進  
退之計兩得昭烈從之權果輟計遷觀別駕從事

十六年春曹操自以其子丕爲五官中郎將爲丞相副益



州牧劉璋聞操將遣鍾繇等向漢中攻張魯大恐別駕從事蜀郡張松說璋曰曹操兵強無敵於天下若因張魯之資以取蜀誰能禦之璋曰吾固憂之而未知所出松曰劉豫州使君之肺腑而曹操之深讐也且善用兵若使之討魯魯必破魯破則益州強操雖來無能爲也璋然之主簿黃權固爭不可從事廣漢王累倒懸於州門以諫璋皆不納使其郡校尉法正帥兵四千人迎昭烈敕所在供奉前後賂遺以巨億計正因陳益州可取之策治中從事龐統亦說昭烈曰荊州荒殘人物凋瘁東有孫權北有曹操難以得志今益州國富兵強戶口百萬寶貨山積可借此以定大事昭烈曰今與吾水火者曹操也操以急吾以寬操



以暴吾以仁操以譎吾以正事乃可成今以小故而失信  
義於天下吾所不取統曰權變從時固非一道所能盡兼  
弱攻昧五伯之事逆取順守報之以義事定之後封以大  
國何負於信今日不取終爲人利耳昭烈遂行留諸葛亮  
關羽等守荊州自將步卒萬人入益州至涪璋自出迎張  
松使法正啟昭烈龐統亦進說可於會襲璋昭烈曰初入  
其國恩信未孚此大事不可倉卒璋推昭烈行大司馬領  
司隸校尉昭烈亦推璋行鎮西大將軍領益州牧璋於是  
益昭烈兵使擊張魯又領督白水軍昭烈并軍三萬餘人  
車甲器械資貨甚盛璋還成都昭烈北至葭萌未卽討魯  
厚施恩德以結民心是歲孫權徙至秣陵



十七年春曹操矯天子命贊拜不名入朝不趨劔履上殿如蕭何故事冬操攻孫權權遣使來告急昭烈使謂璋曰曹操攻吳吳憂危急孫氏與孤本爲唇齒又樂進在青泥與關羽相拒今不往救羽進必大克轉略州境其憂有甚於張魯魯自守之賊不足慮也乃從求益萬兵及軍資欲東行璋許兵四千餘所求皆給半張松書與昭烈及法正曰今大事垂立何爲釋此去乎松兄廣漢太守肅懼禍及白璋發其謀於是璋收斬松嫌隙始開矣璋敕關戍諸將文書勿使關通昭烈昭烈大怒召璋白水軍督楊懷高沛責以無禮斬之乃使黃忠卓膺勒兵攻璋昭烈徑至關中質諸將并士卒妻子引兵與忠膺等進至涪據其城璋使



劉瓚冷苞張任鄧賢等拒於涪瓚等皆敗退保緜竹

十八年春劉璋復使李嚴督緜竹諸軍嚴帥眾降昭烈兵益張分遣諸將平定郡縣進圍雒城諸葛亮張飛趙雲等將兵泝江定白帝江州江陽惟關羽畱鎮荊州是歲曹操自爲魏公加九錫又以其三女爲天子貴人

十九年夏拔雒城進圍成都征西將軍馬超以其眾自漢中來歸拜平西將軍圍城數十日劉璋出降遷之於南郡公安時蜀中殷富昭烈大饗士卒取城中貲財分賜將士而還其穀帛昭烈復領益州牧諸葛亮爲股肱法正爲謀主關羽張飛馬超爲爪牙許靖麋竺簡雍爲賓客如董和黃權李嚴皆璋之所信用吳懿費觀等又璋之姻戚而劉



巴輩亦宿昔之所忌恨皆處之顯任盡其器能有志之士無不競勸十一月曹操弑皇后伏氏滅其族并殺二皇子昭烈聞之發喪制服曰老賊不死禍亂未已操又自置旄頭宮殿設鐘虡是歲分廣漢爲梓潼郡

二十年春曹操自以其女爲天子皇后又矯制命已承制封拜諸侯守相孫權以昭烈已得益州來求荊州昭烈曰須得涼州當以荊州相與權怒乃遣呂蒙襲奪長沙零陵桂陽三郡昭烈帥師五萬下公安關羽入益陽秋曹操取漢中張魯走巴西孫權請和分荊州之江夏長沙桂陽東屬南郡零陵武陵西屬引軍還江州冬遣黃權帥師迎張魯未至魯已降操操還令夏侯淵張郃屯漢中郃等數犯



巴境昭烈遣張飛帥師進次宕渠與郃等戰於瓦口大敗之郃等收餘眾走南鄭昭烈亦還成都

二十一年夏曹操自進號魏王秋操殺琅邪王熙除其國二十二年夏曹操僭天子旌旗出警入蹕冬操冕十有二旒乘金根車駕六馬設五時副車又自以其子丕爲魏太子昭烈帥諸將進兵漢中遣將軍張飛馬超吳蘭屯下辨操使其將曹洪等來拒

二十三年春正月京兆金祿太醫令吉本少府耿紀丞相司直韋晃等憤曹操竊國起兵誅之不克夏昭烈分遣吳蘭雷同等入武都爲操軍所敗蘭死之昭烈次於陽平討

夏侯淵張郃

續後漢書卷第一上



續後漢書卷第一下

上海郁松年原本

宋廬陵蕭常著

邑後學胡芳秋杜邦浚校梓

帝紀第一下

昭烈皇帝

二十四年春正月昭烈自陽平南渡沔水緣山稍前營於  
定軍興勢淵等帥其眾來拒昭烈使討虜將軍黃忠乘高  
鼓譟攻之大破其軍臨陣斬淵及操所遣益州刺史趙雲  
等張郃走三月曹操帥其眾自長安入斜谷昭烈曰操雖  
來無能爲也我必有漢中矣及操至昭烈堅壁以老其師  
操軍士降者日益多乃遣將軍趙雲擊之操軍大敗墮漢  
水死者萬數夏五月操悉軍走昭烈遂有漢中遣孟達自



秭歸北攻操之房陵殺其守劓祺又遣劉封孟達李平等  
攻申耽於上庸耽舉郡降秋七月羣下上昭烈爲漢中王  
表於天子曰平西將軍都亭侯臣馬超左將軍長史鎮軍  
將軍臣許靖營司馬臣龐羲議曹從事中郎將臣射援軍  
師將軍臣諸葛亮盪寇將軍漢壽亭侯臣關羽征虜將軍  
新亭侯臣張飛征西將軍臣黃忠鎮遠將軍臣賴恭揚武  
將軍臣法正興業將軍臣李嚴等一百二十人言曰昔唐  
堯至聖而四凶在朝周成仁賢而四國作難高后稱制而  
諸呂竊命孝昭幼冲而上官逆謀皆憑世寵藉履國權窮  
凶極亂社稷幾危非大舜周公朱虛博陸則不能流放禽  
討安危定傾伏惟陛下誕資聖德統理萬邦而遭厄運不



造之艱董卓首難蕩覆京畿曹操階禍竊執天衡皇后太子竝罹弑虐剝亂天下殘毀民物久令陛下蒙塵憂厄幽處虛邑人神無主遏絕王命厭昧皇極欲盜神器左將軍領司隸校尉豫荆益三州牧宜城亭侯備受朝爵秩念在輸力以殉國難覩其機兆赫然憤發與車騎將軍董承同謀誅操將安國家克寧舊都會承機事不密令操游魂得遂長惡殘泯海內臣等每懼王室大有閭樂之禍小有安定之變夙夜惴惴戰栗累息昔在虞書崇敘九族周監二代封建同姓詩著其義厯載長久漢興之初割裂疆土尊王子弟是以卒折諸呂之難而成太宗之基臣等以備肺腑枝葉宗子藩翰心存國家念在弭亂自操破於漢中海



內事雄立風蟻附而爵號不顯九錫未加非所以鎮衛社稷光昭萬世也奉辭在外禮命斷絕昔河西太守梁統等值漢中興限於山河位同權均不能相帥咸推竇融以爲元帥卒立效績摧破隗囂今社稷之難急於隴蜀操外吞天下內殘羣僚朝廷有蕭牆之危而禦侮未建可爲寒心臣等輒依舊典封備漢中王拜大司馬董齊六軍糾合同盟掃滅凶逆以漢中巴蜀廣漢犍爲爲國所署置依漢初諸侯王故典夫權宜之制苟利社稷專之可也然後功成事立臣等退伏矯制之罪雖死無恨遂於沔陽設壇場陳兵眾羣臣陪位讀奏訖御王冠於昭烈昭烈上言天子曰臣以具臣之才荷上將之任董督三軍奉辭於外不能掃



除寇難靖安王室久使陛下聖教陵遲六合之內否而未  
泰惟憂反側疾如疾首曩者董卓首爲亂階自是之後羣  
凶縱橫殘剝海內賴陛下聖德威靈人神相應或忠義奮  
討或上天降罰暴逆竝殪惟獨曹操久未梟除侵擅國權  
恣心極亂臣昔與車騎將軍董承協謀討操機事不密承  
見陷害臣播越失據忠義不果遂使操窮凶極逆主后遇  
弑皇子被害雖糾合同盟念在奮力而懦弱不武歷年未  
效常恐殞歿孤負國恩寤寐永歎夕惕若厲今臣羣僚以  
爲在昔虞書崇敘九族庶明厲翼五帝損益此道不廢周  
監二代竝建諸姬實賴晉鄭夾輔之福高祖龍興尊王子  
弟大啟九國卒斬諸呂以安太宗今操惡直醜正實繁有



徒包藏禍心篡盜已顯既宗室微弱帝族無位斟酌古式  
依假權宜上臣大司馬漢中王臣伏自三省受國厚恩荷  
任一方陳力未效所獲已多不宜復忝高位以重罪謗羣  
寮見逼迫臣以義臣退惟寇賊不梟國難未已宗廟傾危  
社稷將墜誠臣憂責碎首之負若應權適變以寧靖聖朝  
雖赴水火所不得辭敢慮常宜以防後悔輒順眾議拜受  
印璽以崇國威仰惟爵號位高寵厚俯思報效憂深責重  
驚怖累息如臨於谷盡力輸誠獎厲六師率齊羣義應天  
順時撲討凶逆以寧社稷以報萬分謹拜章因驛上還所  
假左將軍宜城亭侯印綬於是還治成都以許靖爲太傅  
法正爲尙書令關羽爲前將軍張飛爲右將軍馬超爲左



將軍黃忠爲後將軍拔魏延爲鎮遠將軍領漢中太守鎮漢中九月曹操相國西曹掾濟陰魏諷等憤操將篡漢欲舉兵誅之事泄爲操所害是歲前將軍關羽帥師攻曹仁於樊操遣于禁等七軍救之羽大破禁軍盡虜禁等步騎三萬送江陵又斬其將龐德等梁郊陸渾羣豪皆輸款於羽時羽威鎮華夏自許以南郡縣皆應羽操懼議徙都以避之會孫權襲殺羽取荊州

二十五年春正月曹操死子丕自爲丞相魏王冬十月曹丕篡帝位於繁陽國號魏改元黃初廢天子爲山陽公或傳天子遇害王乃發喪制服時所在言祥瑞者相屬將軍孟達叛奔於魏殺副軍將軍劉封十二月曹丕遷於雒陽



是歲後將軍黃忠尙書令法正卒

章武元年春故議郎陽泉侯劉豹青衣侯向舉偏將軍張裔黃權大司馬屬殷純益州別駕從事趙祚治中從事楊洪從事祭酒何宗議曹從事杜瓊勸學從事張爽尹默譙周等上言臣謹按雒書甄曜度曰赤三日德昌九世會備合爲帝際雒書寶號命曰天度帝道備稱皇以統握契百成不敗雒書錄運期曰九侯七傑爭命民炊骸道路藉藉履人頭誰使主者元且來臣父羣未亡時言西南數有黃氣直立數丈見來積年時時有景雲祥風從璿璣下來應之此爲異瑞又二十二年中數有氣如旗從西竟東中天而行圖書曰必有天子出其方是年太白熒惑填星常從



歲星相追先漢初興五星從歲星謀歲星主義漢位在酉  
義之上方故漢法常以歲星候人主當有聖主起於此州  
以致中興時許帝尙存故羣下不敢漏言頃者熒惑復追  
歲星見在胃昴畢昴畢爲天綱經曰帝星處之眾邪消亡  
聖諱豫覩推察期驗符合數至若此非一臣聞聖王先天  
而天不違後天而奉天時故應際而生與神合契願大王  
應天順人速卽洪業以寧海內太傅許靖安漢將軍麋竺  
軍師將軍諸葛亮太常賴恭光祿勳黃柱少府王謀等上  
言曹丕篡弑湮滅漢室竊據神器劫迫忠良酷烈無道人  
鬼忿毒咸思劉氏今上無天子海內皇皇靡所式仰羣下  
前後上書者八百餘人咸稱述符瑞圖讖明驗黃龍見武



陽赤水九日乃去孝經援神契曰德至淵泉則黃龍見龍者君之象也易乾九五飛龍在天大王當龍升登帝位也又前關羽圍樊襄陽襄陽男子張嘉王休獻玉璽璽潛漢水伏於淵泉暉景燭耀靈光徹天夫漢者高祖本所起定天下之國號也大王襲先帝軌跡亦興於漢中今天子玉璽神光先見璽出襄陽漢水之末明大王承其下流授大王以天子之位瑞命符應非人力所致昔周有烏魚之瑞咸曰休哉二祖受命圖書先著以爲徵驗今上天告祥羣儒英俊考述河雒讖記咸至於廷伏惟大王出自孝景皇帝中山靖王之胄本支百世乾祇降祚聖姿碩茂神武在躬仁覆德積愛人好士是以四方歸心焉考省靈圖啟發



識緯神明之表名諱昭著宜卽帝位以纂二祖紹嗣昭穆  
天下幸甚臣等謹與博士許慈議郎孟光定禮儀擇令辰  
上尊號夏四月卽皇帝位於成都燔柴告天其祝文曰維  
建安二十六年夏四月丙午皇帝臣備敢用[元]牡昭告皇  
天上帝后土神祇漢有天下[歷]數無疆曩者王莽篡盜光  
武皇帝震怒致誅社稷復存今曹操阻兵安忍虐弑主后  
滔天泯夏罔顧天顯操子丕載其凶逆竊居神器羣臣將  
士以爲社稷隳廢備宜脩之嗣武二祖恭行天罰備惟否  
德懼忝帝位詢于庶民外及蠻夷君長僉曰天命不可以  
不答祖業不可以久替四海不可以無主率土式望在備  
一人備畏天明命又懼漢邦將湮於地謹擇元日與百僚



登壇受皇帝璽綬脩燔瘞告類于天神惟神饗祚於漢家  
永綏四海於是建元爲章武大赦天下以軍師諸葛亮爲  
丞相太傅許靖爲司徒置百官立宗廟祫祭高皇帝以下  
五月立妃吳氏爲皇后立子禪爲皇太子六月立子永爲  
魯王理爲梁王車騎將軍張飛爲其下所殺初帝憤孫權  
之襲關羽秋七月車駕東征孫權遣使納款帝怒不許權  
乃使其將陸議李異等屯巫秭歸以拒王師將軍吳班馮  
習自巫攻破異等軍次秭歸四萬餘人武陵五谿蠻夷遣  
使請助討權是歲曹丕封權爲吳王權遷於武昌

二年春正月將軍吳班陳式水軍屯夷陵夾江東西岸二  
月行自秭歸敕諸將進軍緣山截嶺營於夷道猇亭自猇



山通武陵遣侍中馬良宣慰五谿蠻夷咸相帥響應鎮北將軍黃權督江北諸軍拒吳軍且備魏寇夏六月黃氣見自秭歸十餘里中廣數十丈王師敗績於猓亭將軍馮習張南等死之鎮北將軍黃權以道梗沒於魏帝自猓亭至秭歸收合離散陸行還魚復改魚復縣曰永安八月司徒許靖薨冬十月詔丞相亮營南北郊於成都孫權聞車駕猶駐白帝大懼十二月復遣其大中大夫鄭泉來納款許之遣大中大夫宗璋如吳帝不豫漢嘉太守黃元聞之舉兵反是歲驃騎將軍馬超薨尙書令劉巴卒

三年春三月黃元犯臨邛縣遣將軍陳習討之元伏誅帝疾革丞相亮尙書令李嚴竝受遺詔輔皇太子夏四月癸



已帝崩於永安宮時年六十三遺詔百官發哀滿三日除服到葬期服如禮其郡國守相都尉令長三日便除五月梓宮至自永安秋八月葬惠陵謚曰昭烈皇帝帝寬仁大度知人善任使有高帝之風臣下雖有顯過必曲意原貸待關羽張飛如親父子一見諸葛亮違眾用之遂成帝業又性儉約嘗毀帳鉤銅以鑄錢非軍功不妄賜予以故國用不至匱乏初入益州丞相掾趙戢問於徵士傅幹曰劉元德其濟乎幹曰元德寬仁有度能得人死力諸葛亮達治知變正而有謀而爲之相關羽張飛勇而有義皆萬人敵而爲之將此三人者皆人傑也以元德之略三傑佐之何爲不濟時馬謖有盛名亮每器之帝謂亮曰馬謖言過



其實不可大用亮不以爲然後竟有街亭之敗

贊曰漢承秦慘刻之後高文以寬仁結人心淪浹旣久牢不可解雖中更禍變而人之謳吟思漢不絕于口世祖因之卒復舊物重以章帝惠及胎養培植益固靈獻之際可謂大壞極亂矣而一時英雄擁兵負固者猶以劉氏藉口昭烈父子以帝室支屬介在一隅而正位號尙數十年由先漢至是垂祀五百三代以還蓋未之有人主之結人心其效迺爾有大物者庸可忽諸

續後漢書卷第一下



...

...

...

...

...

...

...

...



續後漢書卷第二

上海郁松年原本

宋廬陵蕭 常著

邑後學 胡芳秋 杜邦浚 校梓

帝紀第二

少帝

少帝禪字公嗣昭烈皇帝子也建安二十四年昭烈爲漢中王立爲王太子及卽尊位爲皇太子策曰維章武元年五月辛巳皇帝若曰太子禪朕遭漢運艱難賊臣篡盜社稷無主格人羣臣以天明命朕繼大統今以禪爲皇太子以承宗廟社稷使使持節丞相亮授印綬敬聽師傅行一物而三善皆得焉可不勉與三年夏四月昭烈崩於永安宮遺詔皇太子曰人五十不稱夭吾年六十有餘何所



復恨第以汝兄弟爲念射君到說丞相歎卿器量甚大增脩過於所望審能如是吾復何憂勉之勉之勿以惡小而爲之勿以善小而不爲惟賢惟德能服於人汝父德薄勿效之可讀漢書禮記閒暇歷觀諸子益人意智五月卽皇帝位尊皇后曰皇太后大赦天下改元建興孫權遣其立信校尉馮熙來弔牂柯太守朱褒反益州郡大姓雍闓逐太守張裔於吳據郡勿賓越雋夷王高定亦叛秋立皇后張氏遣尙書郎鄧芝如吳

二年春務農殖穀閉關息民夏孫權遣其輔義中郎將張溫來聘秋曹丕侵吳不克而還

三年春三月丞相亮南征四郡四郡皆平改益州郡爲建



寧郡分建寧永昌郡爲雲南郡又分建寧牂柯郡爲興寧郡十二月亮還成都是歲曹丕侵吳及江而還

四年春都護李嚴自永安還屯江州築大城夏曹丕死其子叡嗣僞位是歲大司農秦宓卒

五年春將征曹叡詔曰蓋聞天地之道福仁而禍淫善積者昌惡積者喪古今常數也是以湯武脩德而王桀紂極暴而亡曩者漢祚中微網漏凶慝董卓首難震蕩京畿曹操階禍竊執天衡殘剝海內懷無君之心子丕孤豎敢尋亂階盜據神器更姓改物世濟其凶當此之時皇極幽昧天下無主則我帝命隕越于下昭烈皇帝體明睿之德光演文武應乾坤之運出身平難經營四方人鬼同謀百姓



與能兆民忻戴建位易號丕承天序補弊興衰存復祖業  
誕振王綱不墜于地萬國未靖蚤世遐殂朕以幼冲繼統  
鴻基未習保傅之訓而嬰祖宗之重六合壅否社稷不建  
永惟所以念在正救光載前緒未有攸濟朕甚懼焉是以  
夙興夜寐不敢自逸每崇菲薄以益國用勸分務穡以阜  
民財授方任能以參聽斷絕私降意以養將士欲奮劍長  
驅以討凶逆朱旗未舉而不復隕喪所謂不燃我薪而自  
焚也殘類餘醜又支天禍恣睢河洛阻兵未已諸葛丞相  
宏毅忠壯忘身憂國先帝託以天下以勵朕躬今授之以  
旄鉞之重付之以專命之權統領步騎二十萬眾董督元  
戎恭行天罰除患寧亂克復舊都在此行也昔項籍總一



張羣跨州兼土所務者大然卒敗垓下死於東城宗族如  
焚爲笑千載蓋不以義陵上虐下故也今賊效尤天人所  
怨奉時宜遠庶憑炎精祖宗威靈協贊之福所嚮必克吳  
王孫權同卹災患潛軍合謀犄角其後涼州諸國王各遣  
月支康居吳侯支富康植等二十餘人詣受節度大軍北  
出便欲帥將兵馬奮戈先驅天命旣集人事又至師貞勢  
并必無敵矣夫王者之兵有征無戰尊而且義莫能抗也  
故鳴條之役軍不血刃牧野之師商人倒戈今旂麾首路  
其所經至亦不欲窮兵極武有能棄邪從正簞食壺漿以  
迎王師者國有常典封寵小大各有品限及曹氏之宗族  
枝葉中外有能規利害審逆順之數來降者皆原除之昔



輔果絕親于知氏而蒙全宗之福微子去商項伯歸漢皆受茅土之慶此前世之明驗也若其沈迷不反將助亂人不式王命戮及妻孥罔有攸赦廣宣恩威誅其渠魁弔其殘民它如詔書律令丞相其露布天下使稱朕意焉亮出屯漢中營河北陽平石馬是歲放長水校尉廖立於汶山郡

六年春丞相亮帥諸軍攻祁山南安天水安定三郡皆降關中響震亮使參軍馬謖督諸軍與曹叡將張郃等戰于街亭謖違亮節度王師敗績亮誅謖以徇冬復出散關圍陳倉斬曹叡將王雙是歲孫權大破曹叡將曹休於石亭七年春遣將軍陳式攻武都陰平克之因定二郡夏孫權



僭號遷於建業遣使來告帝欲討權丞相亮極諫而止秋遣衛尉陳震如吳冬亮徙府營於南山下原上築漢樂二城是歲鎮軍將軍趙雲卒

八年秋曹叡使其將曹真由子午谷司馬懿由西城張郃由斜谷欲寇漢中丞相禦之於成固赤阪懿等聞王師起皆北走鎮北將軍魏延大破曹叡雍州刺史郭淮於陽谿徙封魯王永爲甘陵王梁王理爲安平王是歲輔漢將軍張裔卒

九年春二月丞相亮帥諸軍征曹叡圍祁山始以木牛運夏叡使其將司馬懿張郃拒王師六月亮與郃戰於青封殺之懿等帥眾遁去秋八月放都護李平於梓潼郡是歲



孫權敗曹叡將王淩於阜陵安漢將軍李恢卒

十年休士勸農作流馬木牛肄兵講武

十一年冬發諸軍運米於斜谷治斜谷邸閣將以討曹叡  
孫權攻曹叡合肥新城是歲南夷劉胄反將軍馬忠討平  
之

十二年春二月丞相亮帥師十萬征曹叡由斜谷出始以  
流馬運車騎將軍劉劭有罪棄市三月孝獻皇帝崩亮屯  
渭南曹叡使其將司馬懿拒王師懿畏亮不敢戰夏五月  
孫權攻曹叡合肥新城分遣其將攻淮沔秋八月丞相亮  
薨於渭南長史楊儀帥諸軍還楊儀殺征西大將軍魏延  
大赦天下以左將軍吳懿爲車騎將軍假節督漢中丞相



留府長史蔣琬爲尙書令兼總機政是歲孫權遣其侍中  
是儀來聘

十三年春正月放中軍師楊儀于漢嘉郡尋殺之夏四月  
以尙書令蔣琬爲大將軍後軍師費禪爲尙書令

十四年夏四月行幸湔登觀阪觀汶水之流旬日而還武  
都氏王符健帥眾降徙健及氏民四百餘戶於廣都

十五年夏六月皇后張氏崩秋葬敬哀皇后於南陵是歲  
車騎將軍吳懿薨

延熙元年春正月立皇后張氏大赦天下改元立子璿爲  
皇太子瑤爲安定王冬十一月大將軍蔣琬出屯漢中

二年春三月以大將軍蔣琬爲大司馬曹叡死其養子芳



嗣僞位越巂夷獠數反太守僑治安定縣

三年春使越巂太守張嶷平定越巂郡

四年夏孫權使其將全琮諸葛瑾等攻曹芳取祖中冬十月尙書令費禕至漢中與大司馬蔣琬咨議國事

五年春正月監軍姜維督偏軍自漢中還屯涪縣

六年冬十月大司馬蔣琬自漢中還駐軍於涪十一月大赦天下以尙書令費禕爲大將軍錄尙書事司馬姜維爲鎮西大將軍領涼州刺史前護軍王平爲前監軍鎮北大將軍統漢中

七年春閏月曹芳使其將曹爽夏侯[元]寇漢中鎮北大將軍王平禦之於興勢大將軍費禕帥諸軍繼至爽等遁去



夏四月安平王理薨秋九月禕還成都

八年秋八月皇太后崩冬葬穆皇后於惠陵十二月大將軍費禕至漢中行圍守

九年夏六月費禕還秋大赦天下冬十一月大司馬蔣琬薨尙書令董允卒宦人黃皓始與政

十年春以鎮西大將軍姜維爲衛將軍與大將軍費禕共錄尙書事衛將軍姜維帥師出隴西南安金城與曹芳將郭淮夏侯霸等戰於洮西涼州胡王白虎文治無戴等帥眾降遣姜維撫定居之于繁縣是歲汶山平康夷反維討平之左將軍特進向朗薨

十一年夏五月大將軍費禕出屯漢中秋涪陵屬國民夷



反車騎將軍鄧芝討平之是歲鎮北大將軍王平薨

十二年春曹芳太傅司馬懿殺其大將軍曹爽等自是政歸於懿父子其右將軍夏侯霸來降夏四月大赦天下秋衛將軍姜維帥師討曹芳攻其雍州不克將軍句安李韶奔魏是歲鎮南大將軍平尙書事馬忠薨

十三年衛將軍姜維復出西平

十四年夏大將軍費禪還成都冬復北屯漢壽大赦天下曹芳太尉王凌憤司馬懿專國欲起兵誅之不果車騎將軍鄧芝薨尙書令呂乂卒

十五年夏孫權死其子亮嗣僞位立子琰爲西河王十二月曹芳使其將諸葛誕胡遵等攻吳東興隄孫亮太傅諸



葛恪大敗之死者萬數

十六年春正月大將軍費禕駐漢壽爲魏降人郭循所害  
夏四月衛將軍姜維帥師圍南安不克是歲孫亮使其太  
傅諸葛恪攻魏圍合肥新城其武衛將軍孫峻殺恪

十七年春三月衛將軍姜維還成都加都督中外諸軍事  
大赦天下夏六月衛將軍維帥師出隴西曹芳狄道長李  
簡舉城降進圍襄武與曹芳將徐質戰大破其軍質走維  
乘勝多所降下拔河間狄道臨洮三縣民居之於緄竹繁  
縣是歲魏司馬師廢其主芳而立曹髦

十八年春正月曹髦將軍母丘儉文欽等憤司馬師專國  
起兵誅之不克衛將軍維還夏維復帥車騎將軍夏侯霸



等征曹髦俱出狄道大破其雍州刺史王經於洮西俘斬數萬人

十九年春以衛將軍姜維爲大將軍帥師與鎮西大將軍胡濟期會上邽以討曹髦濟後期不至秋王師敗績於段谷維還成都貶爲後將軍行大將軍事冬孫亮侍中孫綝殺其將軍滕允驃騎將軍呂據自爲大將軍十二月亮遣其五官中郎將刁宇來告亂是歲立子璿爲新平王大赦天下

二十年夏五月曹髦司空諸葛誕憤司馬昭專國據壽春欲討昭不行大將軍姜維聞其變帥諸軍出駱谷大赦天下



景耀元年春姜維還成都復拜大將軍景星見大赦天下  
改元吳孫綝廢其主亮而立孫休冬孫休殺孫綝

二年夏六月立子諶爲北地王恂新興王虔上黨王

三年夏五月魏司馬昭弑其主髦而立曹奐秋九月追諡  
故將軍關羽張飛馬超龐統黃忠

四年春三月追諡故將軍趙雲冬十月大赦天下

五年春正月西河王琮薨大將軍姜維帥師征曹奐王師  
敗績于侯和

炎興元年夏曹奐相國司馬昭使其黨鍾會鄧艾等寇漢  
中遣左右車騎將軍張翼廖化輔國大將軍董厥等禦之  
大赦天下改元冬司馬昭自爲晉王十一月衛將軍諸葛



瞻與鄧艾戰于緜竹王師敗績瞻死之是月國亡明年春  
帝遷于雒陽晉泰始七年崩時年六十五  
贊曰少帝任賢相則僞境懷畏一惑闇尹亂亡隨之傳曰  
存仁在所任信哉



續後漢書卷第三

上海郁松年原本

宋廬陵蕭常著

邑後學胡芳秋校梓  
杜邦浚

年表第一

建安以來諸侯表

東京之季羣雄蝟奮有地有民如古諸侯其事跡雖見於  
范曄漢史而所書類多疎略陳壽三國志又獨詳於曹氏  
覽者病於研究今自建安以來表著其事列於左方

漢

劉元德

劉璋

劉表

袁紹

袁術

孫策

曹操

呂布

豫州

益州

荊州

冀州

揚州

江東

兖州

徐州

建安

初平末為豫州

璋父焉壽初平元年

初平二年

初平四年

興平元年領

初平三年領是歲襲取

刺史尋領徐州

帝時領益詔為荊州以渤海太

元年

是歲為鎮東將

州牧興平刺史遂有

守舊韓馥

軍封宜城亭侯

元年卒詔漢南

取冀州遂

年敗揚州刺

自領司隸校州

續後漢書

卷三

一



有河北

阿遂有江東

又自爲司空

夏州爲呂布襲

璋代領益

有河北

阿遂有江東

又自爲司空

州牧

璋爲卿不

有河北

阿遂有江東

又自爲司空

至

拜大將軍

遣使脩貢詔

討袁術僭逆

擊斬韓暹楊奉

拜大將軍

遣使脩貢詔

討袁術僭逆

於徐揚間

淮南曹操

封烏程侯以

之罪

丁丑二

呂布來攻十月

走渡淮

號

初置軍師祭

據下邳爲

戊戌

與曹操攻布下

酒攻會呂布

劉備德曹

破爲操殺

拜左將軍

拜討逆將軍

破爲操殺

寅三

受帝衣帶中密

封吳王

破爲操殺

詔誅曹操會表

而用之

破爲操殺

巳四

出不果

江敗黃祖沙

分兵守官渡

破爲操殺

殺曹操徐州刺

袁紹來攻操

袁紹來攻操

破爲操殺

史車胃

罪

罪

罪

曹操來攻關羽

策爲盜所殺

董承等先受

其弟權襲其

爲所襲袁紹令

其弟權襲其

帝密詔誅曹

帝密詔誅曹

卯

爲所襲袁紹令

其弟權襲其

帝密詔誅曹

帝密詔誅曹

庚

爲所襲袁紹令

其弟權襲其

帝密詔誅曹

帝密詔誅曹



辰

辛

三

五

年

癸

五

陽表  
歸紹  
說紹  
南連  
劉  
斬操將蔡

顧軍汝南曹操  
來攻往從劉表  
于荊州表使屯  
新野豪傑歸之  
見髀肉生流涕  
敗操將夏侯惇  
于禁等於博望

田豐

劉元德來自官渡之  
奔待以上敗城邑多  
寶之禮張復擊定

五月卒

審配廢其  
長子譚立  
少子尙曹  
操攻譚尙

曹操來攻劉表以書至西平而勸譚尙兄

業先是曹袁操事泄爲操  
相拒於官渡所害劉  
策謀襲許迎德奔袁紹斬  
漢帝尋卒紹將顏良文

敗劉元德  
德奔劉表  
破袁紹  
軍

曹操下書責  
權任子周瑜  
勸權勿遣質

西攻黃祖破其舟師



未

還

弟和親

甲申

九

破袁尙自領冀州牧

乙酉

十

譚保南皮爲曹操所破遇害

使賈齊討上饒分地爲建平縣

殺袁譚

丙戌

十一

廢齊北海草陵下邳常山甘陵濟陰平原八王除其國鑿平虜泉州二渠

丁亥

十二

西攻黃祖

破烏桓柳城

戊戌

十三

曹操攻柳城元德勸劉表襲許昌表不從始用諸葛亮

尙熙皆爲公孫康所殺袁氏遂亡

己亥

以吳師大敗曹操于赤壁遂有鍾威將軍子琮立以

攻黃祖破之斬其守分欸

作園武池以肆舟師自爲



三

荆州刺史劉琦為

荆州附操  
劉琦為  
荆州刺史

子

酉

羣下推為荆州牧治公安孫

劉琦卒劉氏遂亡

丑

權進其妹權表

走曹仁敗棄城

庚

會孫權于京口於是盡有荆州之地

作銅爵臺

寅

五

辛

益州牧劉璋遣法正來迎

徙治秣陵

遣法正迎德會於涪

六

益州

德會於涪

卯

壬

曹操攻孫權權使來告急

城石頭改秣陵為建業拜不名入朝

續後漢書

卷三

三



主 始與劉璋有隙

辰

癸

亥

巳

甲

丑

午

乙

子

未

攻雒城

劉德園  
雒

作濡須塢

不趨劍履上  
殿殺荀彧  
攻濡須

廬江九江

并十四州復

春廣陵十餘

為九州自為

萬戶渡江來

魏公加九錫

歸江西遂

作金虎臺

空惟有皖城

春攻濡須

克皖城

耕藉田弒

皇后伏氏及

二皇子自

置旄頭宮殿

孫權襲奪荊州

三郡曹操取

漢中留夏侯淵

張郃守之張飛

大敗之于瓦口

取荊州三郡

以其女為獻

帝后取漢

中始置名

號侯以賞軍功



丙

三

申

丁

三

酉

戊

三

戌

己

酉

帥諸將進兵漢中

討夏侯淵張郃于陽平

斬夏侯淵趙雲等張郃走三月曹操入斜谷五月操舉軍東走遂有漢中秋羣下表為漢中王關羽敗于禁等七軍孫權襲殺

曹操攻濡須

自為魏王

以其女為公主以鍾繇為魏相國攻孫權至譙

建天子旌旗出入稱警蹕

冕有十二旒

漢太醫令吉

本等憤其竊國舉兵誅之不克

龍殺關羽取夏侯淵沒于

荆州曹操表陳以其妻

為驃騎將軍下氏為王后

荆州攻南昌帥兵趨斜谷

侯牙宜都兵敗走長安

祜歸三遂失漢中

固陵郡于禁等七軍

沒于關羽



亥

羽陷荊州

庚

冬曹丕篡位廢  
帝爲山陽公

壬

子

魏譙起兵誅  
操不克

正月死于雒

陽子丕自

爲丞相改元

延康六實漢

自立國號魏

改元黃初令

宦人官不得

過諸署令遷

雒陽



續後漢書卷第四

上海郁松年原本

宋廬陵蕭常著

邑後學

胡芳秋  
杜邦浚校梓

年表第二

章武以來吳魏表

按昭烈以建安二十四年走曹操于漢中秋羣下表爲漢中王明年操子丕篡國又明年昭烈從羣臣請卽帝位于成都改元章武初未嘗稱蜀參考旁載亦無稱蜀之文陳壽三國志卽孫曹本號名其書曰吳魏獨於昭烈之書不曰漢而曰蜀且昭烈帝室支屬系紹正統稱漢爲宜壽抑而不書而書其地豈以其所處之偏壤地之狹耶周自東遷以來諸侯强大拓地至數圻王室不絕如縷孔子作春



秋書王書正必繫之周不以周之微而遂絕之也或謂壽  
既歸晉則爲晉人晉承魏統不得不抑漢抑漢所以尊魏  
也習鑿齒亦晉人也其著漢晉春秋以昭烈上繼獻帝爲  
漢意未嘗私魏而於昭烈有所貶抑矧壽嘗事昭烈父子  
獨無舊君之義乎近世歐陽脩作五代史莊宗以晉稱唐  
則書唐李昇以江南稱唐則又書唐劉崇以河東稱漢則  
書漢劉龔以南越稱漢則又書漢未聞書莊宗以晉書昇  
以江南書崇爲河東書龔爲南越且莊宗自以上繼昭宗  
昇自謂唐之宗室劉崇蓋漢祖之弟從其所稱可也劉龔  
謬自稱漢亦從而書漢人不以爲非昭烈漢之支屬又非  
莊宗之唐劉龔之漢比奈何黜其宗國本號而稱其地哉



故常刊正其謬合而名之曰續後漢書既正其名且以孫  
曹事迹參會漢氏之紀元列之於表云

章武元

吳

魏

辛丑

先是建安二十五年曹不改元  
康多寶漢改黃初昭烈仍舊稱  
二十五年是年四月乃改今元

從武昌 置武昌郡 稱藩于  
曹丕丕封為吳王加九錫  
立太子登 天子親御六師來  
討

黃初二  
以魏郡東部為陽平郡西部為  
廣平郡 罷五銖錢 築凌雲  
臺

壬寅

一

黃武一 私改元

三

曹丕責任子不受丕遣將來攻  
將軍全琮斬魏將尹廬敗夷陵  
為西陵 遣鄭泉聘于天子  
初令選士不限年 曹休敗吳  
將呂範 穿露芝池

癸卯

三

是年五月改建興

二 敗曹仁等於濡須 遣賀齊等  
襲斬春虜其太守晉示 冬大  
子遣鄧芝來 攻江陵不克 築南巡臺于宛

甲辰

二

三 夏遣張溫聘于漢 九月曹丕  
來侵望大江曰彼有人焉乃還  
立太學制五經課試之法 置  
春秋穀梁博士 穿天淵池



乙	巳	丙	午	丁	未	戊	申	巳	酉
三		四		五		六		七	
四	冬曹丕復來侵	五	陸遜請務農 分三郡惡地為東安郡 權語陸遜徒守江東兵自足用顧坐自守可陋耳	六	陸遜等大敗曹休于石亭休憤死 改合浦為珠官郡	七	黃龍元 四月僭即尊位大赦 遷建業遣使聘于漢 天子遣陳震來	三	丞相亮來討攻武都陰平取之 改平望觀曰聽訟觀
大	築東巡臺於徐州 侵吳至廣陵臨江有天所以限南北之歎	七	先是使諸儒集類經傳號皇覽築九華臺 五月死子睿嗣偽位	太和元 行五銖錢 耕藉田	二	分新城之上庸武靈巫縣為上庸郡錫縣為錫郡 天子使丞相亮來討 曹休侵吳大敗于石亭 丞相亮斬王雙			



庚	戌	辛	亥	壬	子	癸	丑	甲
八	九	十	十一	十二	一	二	三	四
二	三	四	五	六	七	八	九	十
立都講祭酒 築東甌隄 遣 衛溫入海求夷洲	夏野蠻成繭 由拳野稻生改 為禾興縣 敗魏王淩於阜陵 會稽嘉禾生 遣潘濬呂岱 平定武陵蠻夷	嘉禾元	攻合肥縣	圖合肥	丞相亮來討遣司馬懿拒王師	青龍元 青龍見摩陂改摩陂為龍陂	治許昌宮起景福承先殿	丞相亮以王師來討殺大將張



寅	乙	卯	丙	辰	丁巳	戊	午	未
三		十四		十五		延熙元	二	
四		五	鑄大錢一當五百	六	徙山越置平地	赤烏元 鑄當千大錢	二	城沙羨 南夷反呂岱討平之
三	遣使以馬易珠璣翡翠於吳大 治洛陽宮起昭陽太極殿	四	置崇文觀	景元初 以建丑之月爲正 改太和曆 爲景初曆 省錫都	二	置汝陰郡 司馬懿大破遼東	三	正月死子芳嗣僞位 復以建 寅爲正



庚申 辛酉 壬戌 癸亥 子 丑 寅 卯 辰 巳 午 未 申 酉 戌 亥

三 四 五 六 七 八

三 開倉賑民

四 諸葛瑾取柁中 太子登卒 秋城邾

五 立子和為太子 改禾興為嘉興縣

六 諸葛恪敗魏將謝順 扶南國 獻樂人 司馬懿帥師入舒

二 吳朱然圍襄陽之樊城司馬懿拒之 以太牢祀孔子以顏回配 三 遣曹爽等犯漢中大將軍費禪要爽歸路爽等敗走

八 鑿句容中道自尔其至雲陽西

漢書

卷四

四



卷四

丑	丙寅	丁卯	戊辰	己巳	庚午
	九	十	十一	十二	十三
城	九 罷當干錢	十 改作太初宮	十一 朱然城江陵新宮成	十二	十三 廢太子和立子亮為太子 遣軍十萬作堂邑涂塘魏王 昶等來攻遣賊烈拒之昶等走
七 吳朱然侵相中以太牢祀孔子	八 分河東之汾北十縣置平陽郡	九	嘉平元 司馬懿與曹爽爭權夷爽等八 族自是政歸懿父子	二 王昶敗吳將施續于江陵	

辛	未	壬	申	癸	酉	甲	戌	乙	亥
酉	未	丑		未		未		未	
太元元 冬祀南郊	二月改神鳳 四月改建興 四月權死子亮嗣偽位 太傅諸葛恪作東興大堤以制魏人 十二月恪大破魏諸葛誕等於東興	二 三月恪伐魏兵多疫死引還 孫峻殺恪	五 吳諸葛恪圍合肥大將軍姜維以王師來討圍南安	正元元 秋司馬師廢芳而立髦 大將軍姜維來討圍襄武	二 母丘儉等舉兵誅司馬師不克 大將軍姜維來討大敗雍州刺史王經于兆西	二 魏大將文欽帥眾降			
三 王凌憤司馬懿竊國欲起兵誅之不克	四 使胡遵諸葛誕等侵吳大為吳所破								



丙子 丁丑 戊寅 己卯 庚辰 辛巳

五

二十

景耀元

三

四

太平元

孫綝殺滕固呂據自為大將軍

甘露元

二

以長沙東部為湘東郡西部為衡陽郡會稽東部為臨海郡豫章東部為臨川郡弭密中覬矢

二

諸葛誕憤司馬昭竊國舉兵誅之不克

永安元

三

司馬昭殺諸葛誕等

誅

四

二 置九卿官

三

作浦里塘以會稽南郡為建安郡分宜都置建平郡

景元元

司馬昭弑髦而立曹芳

四

遣使巡行風俗

二

巳 壬 午 癸 未

五

夏改炎興

五

六  
分武陵為天門郡尋分交州為廣州  
陽年秋休死孫和之子  
皓嗣偽位又十五年為晉所滅

四

夏司馬昭使鍾會鄧艾犯漢中  
又明年晉興曹氏遂亡

三  
大將軍姜維以王師來討

常既以正統繫之昭烈且刊正舊史之謬合其書而名之  
曰漢識者是之或謂近世司馬公光作厯代編年以漢傳  
於魏魏受之漢不得不取魏且謂昭烈于漢族屬疎遠是  
非難辨不可與光武晉元比不得紹漢氏遺統常謂不然  
曹操幽主弑后漢之賊也子丕世濟凶德以羿莽之心而  
竊舜禹其代漢也雖其弟植與其黨蘇則等且不直之名



禪而實篡謂之傳受可乎昭烈雖疎屬要爲帝室之胄舉漢之人皆知其爲景帝之後雖操父子所謂盜憎主人者亦無一語謂其非是則是非之際亦何難辨之有今不以正統繫之帝室之胄而乃歸之篡國之賊其可哉晉習鑿齒作漢晉春秋起光武終於愍帝以昭烈上繼獻帝而晉承之且謂魏雖受漢禪尙爲篡逆至晉文帝克益州乃爲漢亡而晉興而廣漢張栻之論亦謂獻帝雖廢昭烈以正義立蜀漢統未墜地也要盡末年而止二子之論云爾故備著之

續後漢書卷第五

上海郁松年原本

宋廬陵蕭 常著

邑後學

胡芳秋  
杜邦浚

校梓

列傳第一

后妃諸王

昭烈承衰亂之餘庶事草創嬪嬙之制闕焉未備方是時公族轉徙四方疏封亦鮮陳壽復攢而不書是以後世無傳焉姑因其舊而附益之

昭烈甘皇后沛人昭烈臨豫州駐小沛納以爲妾昭烈數喪嫡室常攝內事從至荊州生少帝會曹操軍至追及於當陽長阪時昭烈倉卒與后母子相失賴趙雲衛護得免后薨葬南郡章武二年追諡皇思夫人徙葬于蜀未至而



昭烈崩丞相亮言皇思夫人履行脩仁淑謹其身大行皇帝昔爲上將嬪配作合載育聖躬大命不融大行皇帝篤義垂恩思念皇思夫人神柩在遠特遣使者奉迎會大行皇帝崩今皇思夫人神柩已到又梓宮在道園陵將成安厝有期臣輒與太常臣賴恭等議記曰立愛自親始教民孝也立敬自長始教民順也不忘其親所由生也春秋之義母以子貴昔高皇帝追尊太上昭靈夫人爲昭靈皇后孝和皇帝改葬其母梁貴人尊爲恭懷皇后今皇思夫人宜有尊號以慰寒泉之思輒與恭等按諡法宜曰昭烈皇后詩曰穀則異室死則同穴故昭烈皇后宜與大行皇帝合葬惠陵臣請太尉告宗廟布告天下太常具禮儀別奏



制曰可

昭烈穆吳皇后陳畱人兄懿少孤懿父與劉焉有雅故從焉入焉有異志而聞善相者相后當大貴遂爲子琰納后琰死焉寡居昭烈旣定益州而孫夫人還吳羣下勸昭烈聘后昭烈疑與琰同族法正進曰論其親疏孰與晉文之於子圉於是納后爲夫人建安二十四年立爲漢中王后章武元年夏五月策曰朕承天命奉至尊臨萬國今以后爲皇后遣使持節丞相亮授璽綬承宗廟母天下皇后其敬之哉建興元年五月少帝卽位尊后爲皇太后稱長樂宮延熙八年崩葬惠陵

昭烈孫夫人權妹也昭烈爲荊州牧權稍畏之進夫人以



固好夫人剛猛有諸兄風侍婢百餘人皆執刀侍立昭烈每入心常凜凜又多將吳吏卒縱橫不法昭烈以牙門將軍趙雲嚴重命主內事權聞昭烈西征大遣舟艦迎夫人夫人欲將太子還吳諸葛亮使趙雲張飛勒兵斷江太子乃得留

少帝敬哀張皇后車騎將軍飛長女也章武元年納爲皇太子妃建興元年立爲皇后十五年崩葬南陵

少帝張皇后敬哀皇后妹也建興十五年爲貴人延熙元年春正月立爲皇后策曰朕統承大業君臨天下奉郊廟社稷今以貴人爲皇后使行丞相事左將軍向朗持節授璽綬勉脩中饋恪肅禋祀皇后其敬之哉炎興後隨帝北



遷延陽

少帝李昭儀不詳所出入宮爲昭儀國亡司馬昭欲以漢  
宮嬪賜諸將之無妻者昭儀曰我不能二三屈辱乃自殺  
贊曰事以正立以權濟蓋權者所以濟正之不及苟無事  
乎權雖一於正可也昔晉文公僑處于秦欲因秦而反國  
故秦伯納懷嬴而不敢拒何則有求於人勢不得不從不  
然則事何由濟此豈得已哉昭烈之納吳后方疑而未決  
法正乃援晉文之事以贊其成是所謂逢君之惡者也且  
夫婦人倫之始不可以不正匹夫且不可違禮況人主乎  
晉文之權以濟事已不能逃議者之譏今內不偏於勢外  
無事乎權奈何踵其違禮之失以權而廢正哉古者一正



君而國定昭烈之不能定天下其無賢臣以正之與余觀趙雲以同姓之嫌不冝娶趙範之嫂其所守之正有漢廷諸公不能及者使其得與末議必能詆正之謬而納君於正矣書曰僕臣正厥后克正詎不信然

甘陵王永字公壽昭烈庶子也章武元年六月使司徒靖立爲魯王策曰小子永受茲青土朕承天緒繼統大業邇道稽古建爾國家封於東土奄有龜蒙世爲藩輔嗚呼惟彼魯邦一變適道風化存焉人之好德世茲懿美王其秉心率禮綏爾士民是饗是宜其戒之哉後以所封邑踰遠建興八年徙甘陵初永惡宦人黃皓皓旣用事譖之於帝帝稍疎永不得朝請者至十餘年炎興後遷洛陽永嘉之



亂永孫[元]奔蜀李雄封爲安樂公使奉漢祀

安平悼王理字奉孝與永異母章武元年六月使司徒靖立爲梁王策曰小子理朕統承漢序祇順天命遵脩典秩建爾于東爲漢藩輔惟彼梁土畿甸之邦民狎教化易導以禮往悉乃心懷保黎庶以永爾國王其敬之哉建興八年改封安平延熙七年薨諡曰悼子哀王[允]嗣十九年薨子殤王承嗣二十年薨景耀四年詔曰安平王先帝所命三世早夭國嗣頽絕朕用傷悼其以武邑侯輯襲王位輯理子也炎興後東遷于雒

太子璿字文衡少帝子也母王貴人延熙元年正月策曰在昔帝王繼體立嗣副貳國統古今常道今以璿爲皇太



子昭顯祖宗之威命使行丞相事左將軍朗持節授印綬  
其勉脩茂質祇恪道義咨詢典禮敬友師傅斟酌眾善翼  
成爾德可不務脩以自勗哉鍾會之變爲亂兵所害時年  
三十九璿弟瑤延熙初封安定王瓚十九年封新平王譔  
景耀二年封北地王恂新興王璩上黨王琮延熙十五年  
封西河王景耀五年薨

北地王譔景耀二年封炎興元年冬帝將從譙周之策譔  
怒曰若理窮勢屈便當父子君臣背城一戰同死社稷以  
見先帝地下可也帝不納是日譔哭于昭烈之廟先殺其  
妻子而後自殺左右無不爲涕泣

續後漢書卷第五



續後漢書卷第六

上海郁松年原本

宋廬陵蕭 常著

邑後學

胡芳秋杜浚邦

校梓

列傳第二

陳袁邴陸

陳登字元龍下邳人從祖球靈帝時太尉與劉邰陽球謀誅宦官不克父珪沛相登博覽載籍雅善屬文自少有扶世濟民之志年二十五舉孝廉除東陽長養耆字孤視民如傷徐州牧陶謙表爲典農校尉謙卒別駕麋竺帥州人迎昭烈昭烈猶豫未行登進曰漢室陵遲海內傾覆立功立事正在今日鄙州殷富欲屈使君撫臨之今日之事百姓與能天與不取悔不可追昭烈從其言登與其僚卽日



遣使詣袁紹曰天降災沴禍及鄙州州將殂殞大懼姦雄  
一旦乘隙以貽盟主憂今奉故平原相劉府君以爲宗主  
永使百姓知有依歸方今寇讐縱橫不皇釋甲謹遣下吏  
奔告於執事其後昭烈東擊袁術呂布乘虛襲下邳珪欲  
遣登詣許下布不許會曹操以王命拜布左將軍布大喜  
遣登行登見操因言布勇而無謀宜早圖之操曰非卿莫  
究其情卽增珪秩中二千石拜登廣陵太守臨別執其手  
曰東方之事便以相付始布因登求徐州牧登還布怒拔  
戟斫几曰卿父勸吾協同曹操絕婚公路今吾所求無一  
獲而卿父子竝顯重爲卿所賣耳登不爲動容徐曰登見  
曹公言養將軍如養虎當飽其肉不飽則將噬人公曰不



如君言譬如養鷹飢則爲用飽則颺去其言如此布意乃  
解登至廣陵明審賞罰宣布威信百姓畏而愛之嘗使功  
曹陳矯詣許謂曰許下議論待吾不足足下試察之還以  
見誨矯還曰聞遠近之論頗謂明府驕而自矜登曰夫閨  
門雍睦有德有行吾敬陳元方兄弟淵清玉潔有禮有法  
吾敬華子魚清脩疾惡有識有義吾敬趙元達博聞強記  
奇逸卓犖吾敬孔文舉雄姿傑出有王伯之畧吾敬劉元  
德所敬如此何驕之有餘子瑱瑱亦焉足錄哉後郡爲孫  
權所圍復使矯求救于曹操操遣兵赴之吳軍退登預設  
間伏勒兵追躡大敗之加伏波將軍遷東城太守廣陵吏  
民懷其德闔郡隨之遣不止到郡未幾卒時年三十九荆



州牧劉表嘗與昭烈其論當時人物坐有許汜者曰元龍  
湖海之士豪氣不除昭烈謂表曰欲言非此君爲善士不  
宜虛言欲言是元龍名重天下昭烈謂汜君言豪寧有說  
邪汜曰昔遭亂過下邳見元龍元龍無客主之意久不相  
與語自上下大牀臥使客下牀臥昭烈曰君有國士之名今  
天下大亂君父蒙塵望君憂國忘家有救世之意而君求  
田問舍言無可采是元龍所譁也如小人欲臥百尺樓上  
臥君於地何但上下牀之間耶表大笑昭烈因言曰若元  
龍文武膽志當求之於古耳造次莫得比也其爲一世推  
仰如此

袁渙字耀卿陳郡扶樂人父滂漢司徒純素寡欲不言人



之短時諸公子多越法度而渙獨恬靜舉動以禮郡辟功曹姦吏皆自引去昭烈爲豫州舉渙茂才後從袁術呂布敗術於阜陵爲布所拘布與昭烈有隙使作書詈辱之渙不可強之弗許布大怒脅之以兵曰爲之則生不爲則死渙色不變笑曰渙聞惟德可以辱人不聞以罵使彼固君子耶且不恥將軍之言彼誠小人耶將復將軍之意則辱在此不在彼矣且渙他日之事劉將軍猶今日之事將軍也如有一旦去此復罵將軍可乎布慚而止布死從曹操操雖善用兵而殘民以逞因言於操曰夫兵者凶器也不得已而用之鼓之以道德征之以仁義兼撫其民而除其害夫然故可與之死可與之生自大亂以來民之欲安甚



於倒懸然而暴亂未息者何也意者政失其道歟渙聞世  
亂則齊之以義時僞則鎮之以朴世異事變不可不察也  
夫制度損益此古今不必同者也若夫兼愛天下而反之  
以正雖以武平亂而綏之以德誠百王不易之道也古之  
所以得其民者公旣勤之矣今之所以失其民者公旣戒  
之矣然而民未知義惟公所以訓之則天下幸甚操善其  
言除沛南部都尉時初募民開屯田民多逃亡渙謂操曰  
夫民安土重遷易以順行難以逆動宜順其意樂之者乃  
使不欲者勿強操從之百姓大說遷梁相存問鰥寡高年  
表異孝子烈婦嘗曰世治則禮詳世亂則禮簡全在斟酌  
之間耳方今雖擾攘難教化然在吾所以爲之爲政宗教



訓恕思而後行外溫柔而內能斷以病去官百姓思之後  
遷丞相軍祭酒所得祿賜親故家無贏餘終不問貲產乏  
則取於人不爲噉察之行時人服其清時有傳昭烈凶問  
者僚屬皆賀渙以嘗爲昭烈所舉吏獨不賀居官數年卒  
操後聞渙昔嘗拒呂布問其從弟敏渙勇怯何如對曰渙  
貌若和柔至臨大節處危難雖賁育不能過四子侃寓奧  
準侃清粹有父風準字孝尼忠信公正不恥下問惟恐人  
之不勝已以世方多虞故不求聞達著書十餘萬言論治  
世之務爲易周官詩傳及論析五經滯義聖人之微言傳  
於世從子亮貞固有學行疾何晏鄧颺等浮虛著論譏切  
之



邴原字根矩北海朱虛人少與管寧俱以操尚稱州府辟  
名皆不就黃巾之亂將家屬入海居鬱洲山中孔融爲北  
海相舉原有道原以黃巾方熾去家之遼東歲中往依原  
居者數百家游學之士授經不絕後遁還鄉里太守公孫  
度曰邴君所謂雲中白鶴非鶡鷄之網所能羅也旣還乃  
築精舍講述詩書禮樂聚徒常數百時鄭元以博學洽聞  
注釋典籍故儒雅之士集焉原以高遠清白頤志淡泊口  
無擇言身無擇行故英偉之士趨焉海內清議每謂青州  
有邴鄭之學曹操辟爲司空掾原女蚤亡會操愛子倉舒  
亦夭歿操欲求合葬原辭曰合葬非禮也原之所以自容  
於明公明公之所以待原者以能守訓典而不易也若聽



明公之命則是凡庸也明公焉以爲哉操乃止徙丞相徵事崔烈爲東曹掾記遜曰徵事邴原議郎張範皆秉德純懿志行忠方清靜足以厲俗貞固足以幹事所謂龍翰鳳翼國之重寶舉而用之不仁者遠轉五官將長史閉門自守平原少善飲自行學不飲者八九年單步負笈師事潁川陳寔涿郡盧植陳畱韓子助臨別人以其不飲饋以米肉原曰本能飲但以荒思廢業故斷之耳今當遠離可以飲餞於是終日不醉嘗爲孔融計佐融愛一士對客輒稱美之後以忤意更欲殺之僚屬皆爲請其人亦叩頭流血而融意不解原於坐獨不言融謂曰眾皆請而君獨不何也原對曰明府於某本不薄常言此吾子也歲終當舉之



朝吏辱愛未有在其右者今乃欲殺之明府愛之則引而方之於子惡之則推之欲危其身原愚不知明公之所以愛惡融曰某吾成就之擢用之今負恩施善則進之惡則誅之固君道也往者應仲遠爲泰山太守舉一孝廉旬月而殺之賞罰勸沮何常之有原曰仲遠舉孝廉而殺之其義焉在夫孝廉國之俊選也舉之若是則殺之非也若殺之是則舉之非也語云愛之欲其生惡之欲其死旣欲其生又欲其死是惑也仲遠之鄙甚矣明府奚取焉融曰吾直戲耳原曰君子于其言出乎身加乎民言行君子之樞機也安有欲殺人而可以爲戲者哉融無以對原之守正類此



陸績字公紀吳郡吳人父康廬江太守績六歲見袁術於九江術饋客橘績懷三顆拜辭墮地術謂曰陸郎作賓客而懷橘乎績跪對曰欲歸遺母術大奇之孫策在吳張昭張紘秦松爲上客共論四海未泰當用武而平之績年少下坐厲聲曰昔管夷吾相齊桓公九合諸侯一正天下不以兵車孔子曰遠人不服則脩文德以來之今論者不務道德懷取之術而惟尙武績雖童蒙竊所未安昭等異焉績風度雄偉博學多識雖星厯之書無不研究虞翻舊齒名德龐統荆楚碩望皆與友善孫權辟爲奏曹掾以直道見憚出爲鬱林太守加偏將軍績素病蹙又意在儒雅非其志也雖有軍事著述不廢作渾天圖注易釋元皆傳於



世豫知亡日乃爲辭曰有漢志士吳郡陸績幼敦詩書長  
玩禮易受命南征遭疾罹厄命也不幸嗚呼悲隔又曰從  
今以去六十年車同軌書同文惜不見也年三十二卒子  
宏叡俱仕吳至大官

贊曰登之達識渙之正論原之不詭隨賢於時輩遠矣方  
昭烈之從違未決而登勉之以王伯之業呂布之傲狠明  
德而渙拒之以大義原卻非禮之殉而曹操不能強非明  
達正直能若是乎績之言論英發能於穉齒篤信好學亦  
佳士也登爲漢臣未始他仕績擯南徼死不忘漢袁邠二  
子雖嘗爲操所辟直迫於勢耳豈本心哉故表而出之不  
與荀華等竝列云



續後漢書卷第七上

上海郁松年原本

宋廬陵蕭常著

邑後學胡芳秋校梓

列傳第三上

諸葛亮

諸葛亮字孔明琅瑯陽都人司隸校尉豐之後也父珪泰山郡丞亮蚤孤從父元往依劉表亮從至荊州元卒遂家於南陽隆中少與潁川徐庶石韜汝南孟建游學三人務爲精熟亮獨觀其大略嘗晨起從容抱膝長嘯而謂三子曰卿等可至郡守刺史庶等問其所志笑而不答身長八尺每自比管仲樂毅躬耕隴畝好爲梁父吟時人莫測也惟與庶及崔州平友善而重龐德公每獨拜牀下德公亦



稱之爲臥龍建安十二年昭烈在荊州訪世事於司馬徽徽曰腐儒俗士豈識時務識時務者在乎俊傑此間自有伏龍鳳雛昭烈問爲誰曰諸葛孔明龐士元也徐庶見昭烈于新野昭烈器重之庶謂昭烈曰諸葛孔明臥龍也將軍豈願見之乎昭烈曰君與俱來庶曰此人可就見不可屈致將軍宜枉駕顧之昭烈遂詣亮凡三往乃見因屏人語曰漢室傾頽姦臣竊命主上蒙塵孤不度德不量力欲信大義於天下而知術淺短遂用猖獗至於今日然志猶未已君謂計將安出亮曰自董卓以來豪傑竝起跨州連郡不可勝數曹操比于袁紹則名微而眾寡然操能克紹以弱爲强者非惟天時亦人謀也今操擁百萬之眾挾天



子而令諸侯此誠未可與爭鋒孫權據有江東已歷三世  
國險而民附賢能爲之用此可與爲援而不可圖也荊州  
北據漢沔利盡南海東連吳會西通巴蜀此用武之國而  
其主不能守此殆天所以資將軍將軍豈有意乎益州險  
塞沃野千里天府之土高祖因之以成帝業劉璋闇弱張  
魯在北民阜國富而不知存卹知能之士思得明君將軍  
旣帝室之胄信義著于四海總覽英雄思賢如渴若跨有  
荊益保其巖阻西和諸戎南撫夷越結好孫權內脩政理  
天下有變則命一上將將荊州之軍以向宛雒將軍身帥  
益州之眾出于秦川百姓孰不箪食壺漿以迎將軍者乎  
誠如是則伯業可成漢室可興矣昭烈曰善於是情好日



密關羽張飛等不說昭烈曰孤之有孔明如魚之有水也願諸君勿復言時年二十七劉表愛其少子琮而長子琦不自安問計於亮亮不對他日與亮升高樓捐階而問之亮曰君不見申生在內而危重耳在外而安乎琦感悟求出守江夏明年表卒琮立會曹操南侵琮遣使迎降而不以告操兵至宛昭烈始聞之亮說昭烈曰攻琮荊州可有也昭烈不忍乃引去操追急昭烈遂至夏口亮曰事急矣請奉命求救於孫將軍時權擁眾柴桑觀望成敗亮說權曰海內大亂將軍據有江東劉豫州亦收眾漢南與曹操並爭天下今操已并羣雄遂破荊州故豫州至此將軍量力而處之若能以吳越之眾與之抗衡不若早與之絕若



不能按兵束甲北面而事之今將軍外託服從之名內懷  
猶豫之計事急而不斷禍至無日矣權曰苟如君言劉豫  
州何不遂事之乎亮曰田橫齊之壯士猶義不辱況劉豫  
州王室之胄英才蓋世眾士慕嚮若水之歸海事之不濟  
此乃天也安能復爲之下乎權勃然曰吾不能舉全吳之  
地十萬之眾受制于人吾計決矣非劉豫州莫可當操者  
然豫州新破之後安能抗此虜乎亮曰豫州軍雖敗於長  
阪今戰士還者及關羽水軍精甲萬人劉琦合江夏戰士  
亦不下萬人曹操之眾遠來罷敝聞追豫州一口一夜行  
三百餘里此所謂強弩之末不能穿魯縞故兵法忌之曰  
必蹶上將軍且北方之人不習水戰又荊州之民附操者



偏兵勢耳非心服也今將軍誠能命猛將統兵數萬與豫州協規同力破操必矣成敗之機在於今日權大悅卽遣周瑜程普魯肅等水軍三萬隨亮詣昭烈并力拒操大破之於赤壁昭烈遂收江南以亮爲軍師中郎將使督零陵桂陽長沙三郡租賦以充軍實孫權遣使請脩好昭烈欲往亮以爲不可昭烈固欲往至則周瑜果請畱之權不從昭烈歸歎曰天下知謀之士所見略同如此十六年益州牧劉璋遣法正迎昭烈使擊張魯亮與關羽畱鎮荊州昭烈自葭萌還攻璋亮與張飛趙雲等沂江西上定白帝江州江陽十九年與昭烈會圍成都成都平昭烈領益州牧以亮爲軍師將軍署左將軍府事於是竝用羣才各當其



任政頗尙嚴法正謂亮曰高祖入關約法三章秦民歸德  
宜緩刑弛禁以慰新附亮曰秦政苛急天下土崩故高祖  
因之以寬濟劉璋闇弱自焉以來文法羈縻互相承奉德  
政不舉威刑不肅蜀士人士顓權自恣君臣之分漸以陵  
替弊實由此吾今威之以法法行則知恩限之以爵爵加  
而知榮榮恩竝濟上下有節爲治之要於斯著矣昭烈進  
兵漢中亮常居守足食足兵乃表楊洪爲蜀郡太守調度  
皆辦亮之用人惟其才能不論資歷先後西士皆服其能  
盡時人器用二十四年昭烈敗曹操於漢中亮帥羣下上  
昭烈爲漢中王曹丕篡漢羣下請稱尊號昭烈未之許亮  
曰曹氏篡漢天下無主大王劉氏苗裔紹世而起乃其宜



也昭烈於是卽帝位策亮爲丞相曰朕遭家不造奉承大統兢兢業業不敢康寧思靖百姓懼未能綏於戲丞相亮其悉朕意毋怠輔朕之闕助宣重光以昭明天下君其勗哉亮以丞相錄尚書事假節張飛卒後領司隸校尉章武三年春車駕駐永安不豫召亮屬以後事謂曰君才十倍曹丕必能安國終定大事嗣子可輔輔之如其不才君可自取亮泣涕曰臣敢不竭股肱之力效忠貞之節繼之以死帝又爲詔敕皇太子曰汝與丞相從事事之如父建興元年封武鄉侯領益州牧事無巨細皆決於亮於是引一時名士如蔣琬劉劭張裔等皆入丞相幕府又妙簡舊德使佐益州以秦宓爲別駕五梁爲功曹杜微爲主簿譙周



爲勸學從事時南中諸郡皆叛亮以新遭大喪未卽加兵  
自昭烈駐永安吳人懼復遣使來輸款會昭烈崩至是遣  
使聘吳閉關息民務農殖穀曹丕使其僞司徒華歆移書  
於亮亮不荅作正議以示人其略曰昔世祖創迹舊基奮  
羸卒數千摧新莽強旅四十餘萬於昆陽之郊據道討淫  
不在眾寡及至曹操以其譎勝之力舉數十萬之眾救郤  
於陽平勢窮慮悔僅能自脫深知神器不可妄獲旋軍未  
至感憤而死軍誠曰萬人必死橫行天下昔黃帝整卒數  
萬制四方定海內而況以數十萬之眾據正道而臨有罪  
可得而干擬哉三年始帥師南征四郡詔賜金鈇鉞一具  
曲蓋一前後羽葆鼓吹各一部虎賁六十人進兵越雋所



在戰捷遂斬雍闓高定惟孟獲收闓餘眾以拒獲素爲夷  
夏所服亮募生致之旣禽釋縛使覩營陣之間謂曰此軍  
何如獲曰向不知虛實故敗今直易勝耳亮笑而縱之使  
更戰七縱七禽而亮猶遣獲獲止而不去曰公天威也南  
人不復反矣遂至滇池四郡皆平卽其渠帥而用之或以  
諫亮亮曰若畱外人則多畱兵兵畱則無所食一不易也  
如夷新傷殘父兄死喪畱外人而無兵必生禍患二不易  
也又夷累有廢殺守將之罪自嫌釁重若畱外人終不相  
信三不易也今吾欲不畱兵不轉餉而綱紀麤定夷漢麤  
安不亦可乎乃悉收其豪傑孟獲等以爲官屬軍資所出  
國以富饒終亮之世夷不復反十二月還成都治兵講武



以圖興復方是時田疇闢倉廩實法度脩立軍旅整暇工  
械技巧物究其極吏不容姦人懷自厲強不侵弱朝會不  
譁道不拾遺風俗一變五年亮帥諸將將征曹叅命長史  
張裔參軍蔣琬統畱府事辟尹默來敏爲軍祭酒霍弋姚  
伷等皆入幕府亮以帝富於春秋忠邪未辨深維根本至  
計臨發上疏曰先帝創業未半中道崩殂今天下三分益  
州罷弊此誠危急存亡之秋也然侍衛之臣不懈於內忠  
志之士忘身於外者蓋追先帝之殊遇欲報之於陛下也  
誠宜開張聖聽以光先帝遺德恢宏志士之氣不宜妄自  
菲薄引喻失義以塞忠諫之路也宮中府中俱爲一體陟  
罰臧否不宜異同若有作姦犯科及爲忠善者宜付有司



論其刑賞以昭陛下平明之理不宜偏私使內外異法也  
侍中侍郎郭攸之費禪董允等此皆良實志慮忠純是以  
先帝簡拔以遺陛下愚以爲官中之事事無大小悉以咨  
之然後施行必能裨補闕漏有所廣益將軍向寵性行淑  
均曉暢軍事試用於昔日先帝稱之曰能是以眾議舉寵  
以爲督愚以爲營中之事悉以咨之必能使行陣和整優  
劣得所親賢臣遠小人此先漢之所以興隆也親小人遠  
賢臣此後漢之所以傾頽也先帝在時每與臣論此事未  
嘗不歎息痛恨於桓靈也侍中尙書長史參軍此悉貞亮  
死節之臣也願陛下親之信之則漢室之隆可計日而待  
也臣本布衣躬耕南陽苟全性命於亂世不求聞達於諸



侯先帝不以臣卑鄙猥自枉屈三顧臣於草廬之中咨臣  
以當世之事由是感激遂許先帝以馳驅後值傾覆受任  
於敗軍之際奉命於危難之間爾來二十有一年矣先帝  
知臣謹慎故臨崩寄臣以大事也受命以來夙夜憂歎恐  
託付不效以傷先帝之明故五月渡瀘深入不毛今南方  
已定兵甲已足當獎帥三軍北定中原庶竭駑鈍攘除姦  
凶興復漢室還於舊都此臣所以報先帝而忠陛下之職  
分也至於斟酌損益進盡忠言則攸之禪允之任也願陛  
下託臣以討賊興復之效不效則治臣之罪以告先帝之  
靈若無興德之言則責攸之禪允等之咎以彰其慢陛下  
亦宜自謀以咨諏善道察納雅言深追先帝遺詔臣不勝



受恩感激今當遠離臨表涕零不知所言遂行屯於沔陽  
亮以轉餉回遠使子喬親帥諸將子弟運於谷中六年正  
月亮在漢中將進師丞相司馬魏延曰夏侯楹曹氏壻也  
怯而無謀願假延精兵五千負糧五千直從褒中出循秦  
嶺而東當子午而北不過十日可至長安比東方相合聚  
尙二十餘日而公從斜谷來亦足達如此則一舉而咸陽  
以西可定也亮以爲從坦道平取爲正不用延計揚聲由  
斜谷取郿使趙雲鄧芝爲疑軍據箕谷曹叡使其將曹真  
來拒亮身帥諸軍攻祁山戎陣整齊號令明肅魏人以貽  
烈旣崩數歲寂然無聞是以略無預備卒聞亮出關中響  
振南安天水安定三郡皆應亮曹叡大懼其下不知所爲



郤西至長安遣張郃等拒王師亮使馬謖督諸軍在前與  
郃戰於街亭謖違亮節度舉措煩擾王師敗績亮屯去謖  
數里徐行引退拔西縣千餘家還漢中戮謖以謝眾爲之  
流涕時趙雲等亦敗於箕谷亮上疏自列曰臣以弱才叨  
竊非據親秉髦鉞以厲六師不能訓章明法臨事而懼至  
有街亭違命之闕箕谷不戒之失咎皆在臣授任無方臣  
明不知人恤事多闕春秋責帥臣職是當請自貶三等以  
督厥咎詔以亮爲右將軍行丞相事所總統如前亮之出  
眾方五萬或勸亮多發兵者亮曰大軍在祁山箕谷皆多  
於賊而不能破賊爲賊所破者此病不在兵少也在一人  
耳今欲減兵省將明罰思過校變通之道於將來若不然



者雖多何益自今以後有忠慮於國但勤攻吾之闕則事  
可定賊可滅功可躋足而待矣於是考微勞甄壯烈引咎  
責躬布所失於天下厲兵講武以爲後圖戎事簡練民忘  
其敗



續後漢書卷第七下

上海郁松年原本

宋廬陵蕭常著

邑後學胡芳秋杜邦浚校梓

列傳第三下

諸葛亮

是冬亮聞孫權破曹休魏兵東下關中虛弱上疏曰先帝  
深慮漢賊不兩立王業不偏安故託臣以討賊也以先帝  
之明量臣之才故知臣伐賊才弱敵強也然不伐賊王業  
亦亡坐而待亡孰與伐之是故託臣而不疑也臣受命之  
日寢不安席食不甘味思惟北征宜先入南故五月渡瀘  
深入不毛并日而食臣非不自惜也顧王業不可偏安於  
蜀都故冒危難以奉先帝之遺意而議者謂爲非計今賊



適罷於西又務於東兵法乘勞此進取之時也謹陳其事  
如左高帝明竝日月謀臣淵渌然猶涉險被創危而後安  
今陛下未及高帝謀臣不如良平而欲以長策取勝坐定  
天下此臣之未解一也劉繇王朗各據州郡論安言計動  
引聖人羣疑滿腹眾難塞胸今歲不戰明年不征使孫策  
坐大遂并江東此臣之未解二也曹操智計殊絕於人其  
用兵也彷彿孫吳然困於南陽險於烏巢危於邴連偏於  
黎陽幾敗北山殆死潼關況臣才弱欲以不危而定之此  
臣之未解三也曹操五攻昌霸不下四越巢湖不成任用  
李服而李服圖之委任夏侯而夏侯敗亡先帝每稱操爲  
能猶有此失況臣駕下何能必勝此臣之未解四也自臣



到漢中中間期年耳然喪趙雲陽羣馬玉闔芝丁立白壽  
劉郃鄧銅等及曲長屯將七十餘人突將無前寶叟青羌  
散騎武騎一千餘人此皆數十年之內所糾合四方之精  
銳非一州之所有若復數年則損三分之二也當何以圖  
敵此臣之未解五也今民窮兵罷而事不息則坐與行勞  
費正等而不及早圖之欲以一州之地與賊持久此臣之  
未解六也夫難平者事也昔先帝敗軍於楚當此之時曹  
操撫手謂天下已定然後先帝東連吳越西取巴蜀舉兵  
北征夏侯授首此操之失計而漢事將成也其後吳更違  
盟關羽毀敗秭歸蹉跎曹丕稱帝凡事如是難可預計臣  
鞠躬盡瘁死而後已至於成敗利鈍非臣之明所能逆睹



也遂出散關急攻陳倉曹叡遣曹真救陳倉張郃繼之會糧盡引還王雙帥騎來追亮與戰破之臨陣斬雙七年春將軍陳式攻武都陰平魏雍州刺史郭淮引兵救之亮次建威淮遁去遂平二郡詔策亮曰街亭之役咎由馬謖而君引愆深自貶抑重違君意順聽所守前年耀師馘斬王雙今歲爰征郭淮遁走降集氐羌興復二郡威鎮凶暴功勲顯著方今天下騷動元惡未梟君受大任幹國之重而久自抑損非所以光揚洪烈也今復君丞相君其勿辭夏孫權僭號議者咸欲討之亮獨曰權有僭逆之心久矣國家所以略其釁者求掎角之援也今若討之須并其土乃議中原此未可一朝定也頓兵相持坐而須老北賊得計



非算之上者昔孝文卑辭匈奴先帝優與吳盟皆應權通  
變宏思遠益非匹夫之爲忿者也今議者咸以權利在鼎  
足不能并力志望已滿無上岸之情推此皆似是而非也  
何者其勢不侔故限江自保權之不能越江猶魏之不能  
渡漢非力有餘而利不取也若大軍致討彼非端坐者也  
就其不動而睦於我我之北伐無東顧之憂河南之眾不  
卒盡匹此之爲利亦已深矣其僭逆罪未宜明也乃遣衛  
尉陳震往聘冬徙府營於南山下原上築漢城於沔陽樂  
城於成固八年亮使司馬魏延西入羌中大破曹叡將費  
耀郭淮於陽溪九年復出祁山以木牛運木牛流馬連弩  
皆亮所制也亮圍祁山招鮮卑軻比能比能等攻北地石



城以應亮曹叡使其將司馬懿屯長安督張郃費耀戴陵郭淮等拒王師懿使耀陵畱兵四千守上邽餘眾悉救祁山亮分兵畱攻而自逆懿於上邽淮耀等要亮亮破之因大芟其麥與懿遇於上邽東懿懼歛兵依險軍不得交亮引還懿隨至鹵城又登山爲營不敢戰其下謂懿曰君畏蜀如虎奈天下笑何皆請戰懿病之五月使張郃攻無當監王平于南圍自按中道向亮時漢更下者十二懿軍始陳番兵適交參佐皆言賊盛宜權畱更卒張助聲勢亮曰吾統戎行師大信爲本得原失信古人所惜更者束裝以待期妻子鶴望而計日雖臨征伐義不廢也督遣令行於是去者願畱一戰止者憤踊思致死命乃使魏延高翔吳



班與懿戰大破之獲甲首三千級元鎧五千領懿走保營  
六月亮以糧盡退師懿使張郃襲攻至木門亮與戰又大  
破之臨陣殺郃是冬亮以連年出師息民休士益農講武  
運米集斜谷邸閣三年而後用之亮之用兵出入如賓踐  
敵境而芻蕘者不蠟師止如山進退如風出征之日天下  
震動而人心不憂雖數萬之衆而所興造若數十萬之功  
所至營壘井竈園溷藩籬障塞皆應繩墨一月之行去之  
如始至經事綜物公誠之心形於文辭夙興夜寢罰二十  
以上皆親覽十二年春復悉師十萬由斜谷出始以流馬  
運遣使約孫權同時大舉四月至郿軍於渭水之南據武  
功五丈原司馬懿渡渭背水爲壘以拒王師亮每患糧運



不繼使已志不伸乃分兵屯田爲久駐之基耕者雜於渭濱居民之間而百姓安堵軍無私焉亮數挑戰懿不敢出遣遺巾幘懿患之上表請戰曹叅使辛毗仗節爲軍師以制之亮謂其下曰彼本無戰心所以固請要戰者示武於其眾耳將在軍君命有所不受苟能制吾豈千里而請戰耶相持百餘日秋會亮有疾日侵密表帝曰臣若不幸後事宜付蔣琬時帝亦遣尙書僕射李福省疾因咨以國家大計別去數日復還亮曰知君還意所問者公劉其宜也福復請亮曰文偉可以繼之又問其次亮不荅後相繼爲相皆稱賢云八月亮疾病密授長史楊儀司馬費禕護軍姜維等退師節度有星隕於營中亮薨年五十四儀整軍



以還人以告懿懿勒兵追之姜維令儀反旆鳴鼓若將北  
鄉者懿不敢進儀得結陳去入谷而後發喪秦人爲之語  
曰死諸葛走生仲達懿因觀其營壘歎曰天下奇才也遺  
令葬漢中定軍山策曰惟君體資文武明叡篤誠受遺託  
孤以輔朕躬繼絕興微志存靖亂爰整六師無歲不征神  
武赫然威震八荒將建殊功於季漢參伊周之巨勲如何  
不弔事臨垂克遇疾隕喪朕用傷悼肝心若裂夫崇德敘  
功紀行命謚所以光昭將來刊載不朽今贈君丞相武鄉  
侯印綬謚君忠武侯而有靈嘉茲寵榮景耀中詔立廟於  
沔陽初亮自表於帝曰成都有桑八百株薄田十五頃子  
弟衣食自有餘饒至于臣在外任別無調度隨身衣食悉



仰於官不別治生以長尺寸若臣死之日不使內有餘帛  
外有贏財以負陛下及薨如其所言亮爲相十四年纔兩  
赦或言其惜赦者亮曰治世以大德不以小惠故匡衡吳  
漢不願爲赦先帝亦言吾周旋陳元方鄭康成間每見啟  
告治亂之道悉矣曾不語赦若劉景升季玉父子歲歲赦  
宥何益於治不任喜怒人無怨言以公事廢李平廖立平  
聞亮薨至發憤死立亦垂涕歎曰吾終爲左袵矣嘗作八  
務七戒六恐五懼皆有條章以訓厲臣子著作郎陳壽定  
亮文集凡二十四篇又作入陣圖蓋黃帝太公丘井法也  
長史張裔嘗稱之曰公賞不違遠罰不阿近爵不可以無  
功取刑不可以貴勢免此賢愚所以僉忘其身也陳壽評



之曰亮爲相國也撫百姓示儀軌約官職從權制開誠心  
布公道盡忠竭力者雖讐必賞犯法怠慢者雖親必罰服  
罪輸情者雖重必釋游辭巧飾者雖輕必戮善無微而不  
賞惡無纖而不貶庶事精練物理其本循名責實虛僞不  
齒刑政雖峻而無怨者以其用心平而勸戒明也可謂識  
治之良才管蕭之亞匹矣壽又云應變將略非其所長論  
者不以爲然弟均官至長水校尉子瞻別見忠義傳喬字  
伯松亮兄瑾第二子也本字仲慎與兄恪俱知名論者謂  
喬才不及兄而性行過之初亮未有子以喬爲嗣旣以爲  
嫡子故易其字焉拜駙馬都尉隨亮至漢中建興元年卒  
時年二十五子攀官至行護軍翊武將軍恪爲孫峻所族



緄誅還吳爲瑾後

贊曰廣漢張弼有言三代衰五伯起而功利之說盈天下謀國者不復知正義明道之爲貴亮當漢祚之季乃能執其機而用之其言曰漢賊不兩立臣鞠躬盡力死而後已嗚呼此夏少康四十年經營宗祀而卒以配天之本心也若亮者可謂有正大之體矣觀其高臥隆中不求聞達蓋將終身焉昭烈漢室之胄而三顧之於草廬名義旣正好賢之意又篤安得不以身許之故其君臣相與一以道義而忘勢受遺之際肝膽相照無纖芥形迹何其盛也亮之恢復規模先爲根本計方建興初務農訓兵以治國事國事旣定北向致討軍旅將發拜表納忠反復曲折專以宮



中府中之事爲言且陳親賢臣遠小人之義一篇之中三致意焉而其終章尤爲切至亮之意抑淡且遠矣卽其行事而觀之絕姑息之私意本常禮之大公見善若出諸已用人各盡其才至或有罪雖素所禮遇如馬謖且流涕誅之而弗釋也故李平廖立雖被廢放沒齒無怨言蓋其於斯世所欲不存焉身爲將相三十年間家無贏餘視天下無一足以動乎中者其正大之體爲何如哉亮之奉嗣君小心恭恪一國之柄舉出其手而人不知其爲權彼懷姦稔逆竊竊窺人宗祀者雨雪見睨而謂亮敵哉至使耕者雜渭濱興圖之復已恢恢然在其目中矣天不祚漢妖星告變謂之何哉或謂亮勸昭烈取荊州爲不義而不知劉



琮既降操則荊州固魏之荊州矣惜昭烈之失此機也或  
又謂魏延之策恨其不用不知天將昌漢攘除姦逆直餘  
事耳行險僥倖非其志也嗚呼秦漢以來士狃於戰國餘  
習張子房號爲傑出者而猶未免雜以伯術若亮眞豪傑  
之士無文王猶興者使得游於洙泗講學以終之則其所  
至又當若何傳稱始亮在隆中以管樂自許予謂亮王者  
之佐豈與管樂同在功利之域者哉意傳者之誤耳拭又  
言予讀出師表見其所以告嗣君者一本於正殊非一刻  
核陰謀之說故於手寫申韓等書亦疑之方亮之一見昭  
烈也遂定取荆益之計時昭烈未有駐足之地厯觀諸國  
獨劉氏不能守荆益是誠天所資也若昭烈以荆益無忘




討賊夫誰敢不服惜其徇小不忍而妨大計故劉琰可取而不取則亮之策昭烈猶有不能盡從者也及狼狽而遁雖藉吳之力敗操赤壁然終迫於吳乃始入蜀以譎計取之予知亮於此蓋亦有不得已焉耳非草廬所以告昭烈之本意也嗟乎五伯以來功利之說盈天下如有亮堅守其正不以利鈍易不共戴天之心庶其可以言王道者雖然亮之於學爲未足故知有所未至也知有未至則心有未盡未能盡其心則於天下之事不能徧該而一貫之也開國建后大事也而奉策所立者乃亡國之宗婦以日易月後世之大失也而冢宰所贊乃因謬之禮且未踰年而改元此有以見其學之未至歟嗟乎若亮者體正大而能




充之以學吾必謂之三王之佐矣  
栢篤論君子也其言云爾

續後漢書卷第七下

















































續後漢書卷第八

上海郁松年原本

宋廬陵蕭常著

邑後學胡芳秋校梓

列傳第四

關張馬黃趙

關羽字雲長一字長生河東解人亡命涿郡昭烈起兵羽與張飛從之昭烈爲平原相以二人爲別部司馬分統部曲寢處同所恩若兄弟而稠人廣坐侍立終日周旋上下不避艱險昭烈之襲殺車胄使羽守下邳城行太守事而身還小沛建安五年曹操攻昭烈昭烈奔袁紹羽陷於操爲偏將軍禮遇良厚紹遣大將顏良攻東郡太守劉延於白馬操使張遼與羽擊之羽望見良麾蓋策馬刺良於萬



眾之中斬其首還紹諸將莫能當者遂解白馬圍操表封羽漢壽亭侯初操壯羽爲人而察其心無久畱之意謂張遼曰卿試以情問之羽歎曰吾極知曹公待我不薄然吾受劉將軍厚恩誓以共死不可背之吾要當立效以報曹公乃去遼以白操操義之及羽殺顏良操知其必去厚加賞賚羽盡封其所賜致書告辭而奔昭烈左右欲追之操曰彼各爲其主勿追也操并荊州昭烈自樊將南渡江別遣羽乘船數百艘會江陵操追至當陽長阪昭烈急趨漢津適與羽遇其至夏口初昭烈在許與操共獵獵中眾散羽勸昭烈殺操昭烈不從及是羽曰往日獵中若從羽言豈有今日之困會孫權遣兵佐昭烈拒操操敗走昭烈收



江南諸郡以羽爲襄陽太守盪寇將軍駐江北昭烈西定益州以羽都督荊州事羽聞馬超來降書與諸葛亮問超人才可誰比亮知羽意荅曰孟起兼資文武雄烈過人一世之傑鯨彭之徒當與益德竝驅爭先猶未及髯之絕倫超羣也羽美鬚髯故亮謂之髯羽省書大悅以示賓客羽嘗爲流矢貫左臂創雖愈每陰雨骨常疼醫曰矢鏃有毒毒入於骨當破臂作創刮骨去毒此患乃除羽便伸臂令劈之時適會諸將飲食臂血流離而割炙飲酒言笑自若昭烈王漢中拜前將軍是歲帥師攻曹仁於樊操遣于禁等督七軍救仁會大霖雨漢水溢羽乘水力戰大破之殺其將軍龐德虜禁等步騎三萬送江陵於是梁郝陸渾諸



豪皆受羽節度威震華夏操懼議徙許都以避其銳先是  
孫權爲子求婚於羽羽不許詈辱其使權大怒又南郡太  
守糜芳在江陵將軍傅士仁屯公安皆素恨羽輕已羽之  
出芳仁給軍資不悉相應羽言當治之芳仁不安於是孫  
權陰誘芳仁芳仁使人迎權而操遣徐晃等救曹仁羽不  
能克引軍還權已據江陵盡虜其將士妻子羽軍遂潰權  
遣軍要擊之於臨沮與其子平俱遇害追諡壯繆子興嗣  
興字安國少有令聞丞相諸葛亮器之弱冠爲侍中中監  
軍卒子統嗣尙公主官至虎賁中郎將卒無子以興庶子

彝嗣

張飛字益德涿郡人少與關羽俱從昭烈羽年長數歲飛



兄事之曹操入荊州昭烈奔江南而操卒至使飛將二十騎爲後拒飛據水斷橋瞋目橫矛曰身是張益德可來決死敵無敢近者昭烈得免既定江南以爲宜都太守征虜將軍封新亭侯徙南郡昭烈入益州還攻劉璋飛與諸葛亮沂江西上分定郡縣至江州獲璋巴郡太守嚴顏義其爲人釋之引爲賓客所過戰克與昭烈會於成都益州平賜諸葛亮法正關羽與飛金各五百斤銀千斤他物稱是領巴西太守曹操破張魯畱夏侯淵張郃守漢川郃別督諸軍下巴西欲徙其民於漢中進軍宕渠蒙頭盪石與飛相拒五十餘日飛帥精卒萬餘人從他道要郃山路險隘郃軍前後不相及遂大破之郃棄馬獨與其麾下十餘人



從間道走南鄭巴土遂安昭烈王漢中拜右將軍假節章武元年遷車騎將軍領司隸校尉進西鄉侯策曰朕承天序嗣守洪業除殘靖亂未燭厥理今寇虜作害民被荼毒思漢之士延頸鵠望朕用憫然坐不安席食不甘味整甲誓師將行天罰以君忠毅侔蹤名虎名宣遐邇故特顯命高墉進爵兼司于京其誕將天威柔服以德伐叛以刑稱朕意焉詩不云乎匪疚匪棘王國來極肇敏戎功用錫爾祉可不勉歟初飛雄毅威猛亞於關羽曹操謀臣程昱等咸稱羽飛萬人之敵羽善待卒伍而驕士大夫飛愛敬君子而不卹小人昭烈嘗戒之曰卿刑殺旣過差又曰鞭撻健兒而令在左右此乃取禍之道也飛猶不悛昭烈伐吳



飛當帥兵萬人自閬中會江州臨發爲其帳下督張達范  
强所殺持其首順流奔吳飛營都督表報昭烈昭烈聞表  
至曰噫飛死矣後追諡曰桓長子苞早卒次子紹嗣官至  
侍中尚書僕射苞子遵爲尚書從諸葛瞻於緜竹戰死  
馬超字孟起扶風茂陵人伏波將軍援之後也父騰靈帝  
末與邊章韓遂等起兵於西州後與遂不和求還京師於  
是召爲衛尉以超爲偏將軍封都亭侯領騰部曲復與遂  
合從進軍至潼關曹操與遂超單馬會語超負其勇陰欲  
突前執操而不克遂帥諸戎擊隴上郡縣隴上郡縣皆應  
之殺涼州刺史韋康據冀城自稱征西將軍領并州牧督  
涼州諸軍事康故吏楊阜姜敘等合謀擊超超奔漢中依



張魯魯不足與計事內懷於邑聞昭烈圍劉璋於成都密書納款昭烈聞之曰我得益州矣乃遣人迎超而潛以兵益之超既至令引軍屯城北城中震怖未逾旬而成都潰以超爲平西將軍督臨沮因封前都亭侯昭烈王漢中拜左將軍假節章武元年遷驃騎將軍領涼州牧進封叅鄉侯策曰朕以不德獲繼至尊奉承宗廟曹操父子世載其罪朕用慘怛疚如疾首海內怨憤歸正反本暨於氏羌率服獯鬻慕義以君信著北土威武竝昭是以委任授君抗颺虓虎兼董萬里求民之瘼其明宣朝化懷柔遠邇肅謹賞罰以篤漢祚以對于天下二年薨時年四十七臨終上疏曰臣門宗二百餘口爲曹操所害略盡惟有從弟岱當



爲微宗血食之繼漢託陛下餘無復言追諡曰威子承嗣  
岱位至平北將軍陳倉侯超女配安平王

黃忠字漢升南陽人荊州牧劉表以爲中郎將與表從子  
磐同守長沙之攸縣曹操克荊州假行裨將軍昭烈南定  
諸郡忠遂委質從入蜀自葭萌還攻劉璋忠常先登陷陳  
勇冠三軍益州旣定拜討虜將軍建安二十四年擊夏侯  
淵於漢中定軍山淵眾銳甚忠推鋒直前帥厲士卒金鼓  
震天聲動山谷淵軍大敗臨陣斬淵遷征西將軍昭烈王  
漢中欲以爲後將軍諸葛亮曰忠之名望素非關馬之倫  
今班爵遽同馬張在近親見其功尙可喻指關遙聞之恐  
必不說得無不可乎昭烈曰吾當自喻之賜爵關內侯明



年卒諡曰剛子敘早歿無後

趙雲字子龍常山真定人身長八尺儀觀雄偉從昭烈主  
騎兵昭烈詣袁紹密遣雲募兵得數百人皆稱劉左將軍  
部曲隨至荊州曹操追昭烈於當陽長阪昭烈倉卒棄其  
孥雲身抱弱子保持甘后皆得免昭烈之敗有言雲北去  
者昭烈以手戟撾之曰子龍不棄我也頃之雲至從平江  
南爲偏將軍領桂陽太守代趙範範寡嫂樊氏有國色範  
欲以歸雲雲曰相與同姓卿兄猶吾兄固辭不許或勸雲  
納之雲曰範迫降耳心未可測天下女不少範竟遁去先  
是雲與夏侯惇等戰於博望生獲夏侯蘭雲與蘭同鄉里  
白昭烈活之以蘭明法律薦爲軍正昭烈入益州領雷營



司馬時孫夫人驕豪吏卒縱橫昭烈以雲嚴重令典內事  
會孫權遣人迎夫人夫人欲將子禪還吳雲與張飛勒兵  
斷江乃止昭烈自葭萌還攻劉璋召諸葛亮亮帥雲與張  
飛俱沂江西上平定郡縣至江州分遣雲從外水上江陽  
與亮會於成都成都既定爲翊軍將軍時議欲以成都中  
廬舍及城外園池田桑分賜諸將雲駁曰霍去病以匈奴  
未滅無以家爲今國賊非但匈奴未可求安須天下大定  
各反桑梓歸耕本土乃其宜耳益州人民初罹兵革田宅  
皆宜還之令安居復業然後可以得驩心昭烈從之夏侯  
淵之敗曹操爭漢中運米北山下數千萬囊黃忠以爲可  
取雲兵從之忠過期不還雲將數十騎輕行出圍迎視忠



等爲操前鋒所擊方戰其大眾奄至勢偪遂前突其陣且  
鬪且卻操軍散復合雲陷敵還趨圍張翼欲閉門拒守而  
雲更大開門偃旗息鼓操軍疑有伏引去雲擂鼓震天以  
强弩於後射之操軍大駭自相蹂踐墮漢水死者萬計明  
旦昭烈至其營視昨戰處曰子龍一身都是膽也作樂張  
飲至暝軍中號雲爲虎威將軍孫權襲荊州昭烈大怒欲  
討之雲諫曰國賊乃曹操非孫權也且先滅魏而吳自服  
操身雖斃子丕篡盜當因眾心早圖關中居河渭上流以  
討凶逆關東義士必裹糧策馬以迎王師不應置魏先吳  
兵勢一交不得卒解也昭烈不聽遂東征畱雲督江州王  
師敗績於秭歸雲進兵至永安吳軍已退建興元年爲中



護軍征南將軍封永昌亭侯遷鎮東將軍五年夏從諸葛亮駐漢中明年亮出師揚聲由斜谷出曹叡將曹真帥眾拒王師遣雲與鄧芝等往當之而身攻祁山雲芝兵弱失利於箕谷然斂眾固守不至大敗軍還貶鎮軍將軍初街亭軍退兵將相失亮問鄧芝箕谷之退部伍何爲整一芝曰雲身自斷後軍資什物略無所棄雲有軍資餘絹亮使分賜將士雲曰軍事無利何爲有賜請悉入赤岸府庫須十月爲冬賜亮大善之七年卒景耀四年詔曰雲昔從先帝功績旣著朕以幼沖涉道艱難賴恃忠順濟於危險夫諡所以敘元勲也外議雲宜諡大將軍姜維等議以爲雲昔從先帝勞績顯著於天下遵奉法度功效可書當陽之



役義貫金石忠以衛上君念其賞禮以厚下臣忘其死死  
者有知足以不負生者感恩足以隕身謹案諡法柔賢慈  
惠曰順執事有恪曰平克定禍亂曰平應諡曰順平初昭  
烈時惟法正見諡建興以來諸葛亮功德蓋世蔣琬費禕  
荷國之重亦見諡陳祗寵待特加殊獎夏侯霸遠來歸順  
故復得諡於是關羽張飛馬超龐統黃忠及雲皆得追諡  
時論以爲榮子統嗣官至虎賁中郎督行領軍次子廣牙  
門將從姜維戰沓中歿於陣有陳到者字叔至汝南人自  
豫州從昭烈名位亞於雲俱以忠勇稱建興初官至永安  
都督征西將軍封亭侯楊戲嘗贊二人云征南厚重征西  
忠克統時選士猛將之列



贊曰羽飛萬人之敵勇有餘而知不足迹其行事皆有國  
士之風然羽剛而自矜飛暴而少恩此其所以敗也超去  
危卽安轉禍爲福忠帥厲士卒直前無對雲雖虎臣其所  
建明通達國體如還田宅以繫民心畱軍資以須冬賜舍  
吳而專事魏有諸葛亮念所不到者若其不納趙範之兄  
嫂以遠同姓之嫌律已之嚴如此方時諸將其最優乎

續後漢書卷第八

續後漢書

卷八

歲甲寅轉輸為輸忠帕亂士卒直前無撓雲龍其祖  
士之風烈而自領派暴而少恩此其祖以規也夫去  
其曰來乘萬人之嫡更育籍而映不呈其其事皆育國



續後漢書卷第九

上海郁松年原本

宋廬陵蕭常著

邑後學胡芳秋杜邦浚校梓

列傳第五

龐法徐董劉

龐統字士元襄陽人少未知名潁川司馬徽有知人之鑒統往見之徽采桑於樹上坐統樹下終日其語徽甚異之稱統當爲南州士之冠冕從父德公雅重之常目統爲鳳雛諸葛亮爲臥龍司馬徽爲水鏡後郡辟爲功曹性好人倫喜成就人每所稱述多過其才人或怪而問之對曰當今天下大亂雅道陵遲善人少而惡人多方欲興風俗長道業不美其譚則聲名不足慕不足慕則爲善者少矣今



拔十失五猶得其半而可以崇邁世教使有志者自勵不  
亦可乎吳將周瑜助昭烈取荊州因領南郡太守瑜卒統  
送其喪還吳吳人聞其名及西還竝會昌門陸績顧劭全  
琮皆往統曰陸子可謂駑馬有逸足之力顧子可謂駑牛  
能負重致遠也或問統若子之言陸優於顧乎曰駑馬雖  
精所致一人耳駑牛一日行三百里所致豈一人之重哉  
謂全琮曰卿好施慕名有似汝南樊子昭雖知力不多亦  
一時之佳士也劭謂統卿名知人吾與卿孰愈統曰陶冶  
世俗甄綜人物吾不及卿論帝王之祕策覽倚伏之要最  
吾似有一日之長劭與績復謂曰使天下太平當與卿共  
料四海之士厚相結而別昭烈領荊州統以從事守耒陽



令縣頗不治免官吳將魯肅遺昭烈書曰龐士元非百里之才也使處治中別駕之任始當展其驥足耳諸葛亮亦言之於昭烈昭烈與語大器之以爲治中從事親待亞於亮遂與亮竝爲軍師中郎將統說昭烈曰荊州荒廢人物殫盡難以得志今益州國富兵強戶口百萬可因之以定大業會劉璋遣法正迎昭烈昭烈遂行統從入益州劉璋與昭烈會於涪統進計曰今因此會便可執之則將軍無用兵之勞而坐定一州也昭烈不可璋旣還成都昭烈當爲璋北征漢中統復請陰遣精兵晝夜兼行徑襲成都璋旣不武又素無備大軍卒至一舉便定此上計也楊懷高沛璋之名將各擁強兵據守關頭聞數有牋諫璋遣將軍



還荊州將軍可云荊州有急欲還救竝使束裝作歸計二  
子喜將軍此去必乘輕騎來見將軍因執之乃向成都此  
中計也退還白帝連引荊州徐圖之此下計也若沈吟不  
去將致大困昭烈然其中計卽斬懷沛還向成都所過輒  
克於涪大會置酒作樂謂統曰今日之會可謂樂矣統曰  
伐人之國而欲以爲歡非仁者之兵也昭烈醉怒曰武王  
伐紂前歌後舞非仁者邪卿言不當宜速起於是逡巡引  
退昭烈尋悔追還復坐統初不顧謝飲食自若昭烈曰向  
者之論孰爲失統曰君臣俱失昭烈大笑宴樂如初進圍  
雒縣統帥眾攻城中流矢卒時年三十六昭烈痛惜之言  
則流涕拜其父議郗遷諫議大夫諸葛亮親爲之拜追賜



統爵關內侯謚曰靖子宏字巨師剛簡有臧否以傲尙書令陳祗爲祗所抑終於涪陵太守統弟林以荊州治中從事參鎮北將軍黃權軍征吳軍敗沒於雒陽

法正字孝直扶風郿人祖真有清節高名號[元德]先生建安初天下饑饉正與同郡孟達俱入蜀依劉璋久之爲新都令後爲軍議校尉旣不見任又爲其州邑俱僑客者所謗益州別駕張松與正相善度璋不足與有爲常竊歎息松於荊州見曹操操不禮焉還勸璋絕操而自結昭烈璋問誰可使者松乃舉正旣還爲松稱說昭烈有雄略密謀協規願共戴奉而未有機會後璋聞曹操欲攻張魯於漢中大懼松遂說璋宜迎昭烈使之討魯璋復令正銜命正



既宣旨因獻計於昭烈曰以明將軍之英雄乘劉牧之懦弱張松州之股肱響應於內然後資益州之殷富馮天府之險阻以此成業猶反掌也昭烈然之泝江而西與璋會涪北至葭萌南還取璋從事廣漢鄭度說璋曰左將軍縣軍襲我兵不滿萬士眾未附野穀是資軍無輜重其計莫若盡驅巴西梓潼民內涪水以西清野高壘靜以待之彼至請戰勿許師老糧匱不過十旬勢必自走走而擊之必成禽耳昭烈聞而心惡之以問正正曰終不能用無憂也璋果如正言謂其下曰吾聞拒敵以安民未聞動民以避敵也於是黜度不用其計及軍圍成都蜀郡太守許靖將踰城降事覺不果璋以亡在朝夕故不誅靖璋旣稽服昭



烈以此薄靖不用也正謂昭烈曰天下有獲虛譽而無其實者許靖是也然方今始創大業天下之人不可戶曉靖之浮稱流播四海若其不禮天下之人以公爲賤賢也宜加敬待以眩遠近追昔燕王之待郭隗以示好賢之意昭烈於是厚禮靖以正爲蜀郡太守揚武將軍外統都畿內爲謀主一食之德睚眦之怨無不報復二十二年正說昭烈曰曹操一舉而降張魯定漢中不因此勢以圖巴蜀而畱夏侯淵張郃屯守非其知不逮而力不足也必將內有憂偏故耳今策淵郃才略不勝國之將帥舉兵往討則必克之既定之後廣農積穀觀釁伺隙上可以掃滅寇敵尊獎王室中可以蠶食雍涼廣拓境土下可以固守要害爲



持久之計此蓋天以與我時不可失也昭烈善其策乃帥諸將進兵正亦從至漢中二十四年昭烈自陽平南渡沔水緣山稍前營於定軍興勢淵帥眾來爭其地正曰可擊矣遂大破之淵等授首昭烈王漢中拜尙書令護軍將軍明年卒時年四十五昭烈爲之流涕者累日諡曰翼賜其子邈爵關內侯官至奉車都尉漢陽太守昭烈嘗與曹操戰不利宜退而昭烈大怒無敢諫者矢下如雨正乃前立昭烈曰孝直避箭正曰明公親冒矢石況小人乎昭烈乃曰孝直與汝俱去諸葛亮與正雖好尙不同以公義相取亮每奇正知術昭烈旣卽尊位將東征孫權以復關羽之恥羣臣諫皆不從章武二年王師敗績亮歎曰法孝直若



在必能諫主上不東行就復東行必不至於敗

徐庶字元直潁川人初名福少任俠好擊劍中平末爲人報仇爲吏所執問其姓字絕口不言吏乃於車上立柱維磔之而其黨共篡取得脫於是感激折節學問遂通經旨與同郡石韜相親愛初平中四方兵起乃與韜南客荊州復與諸葛亮友善昭烈屯新野一見器之因薦亮於昭烈及曹操至樊與亮從昭烈南奔操急追獲其母庶辭昭烈而指其心曰本欲與將軍共圖王霸之業者以此方寸之地耳今失老母方寸亂矣請從此辭遂詣曹操丕時爲中郎將韜爲典農校尉後亮出隴右聞庶與韜仕皆不達歎曰彼誠多士邪何二人不見用也後數年病卒



董和字幼宰南郡枝江人董卓之亂舉族避地益州劉璋以爲牛鞞江原長成都令蜀土富貴俗尙侈靡貨殖之家侯服玉食昏葬踰禮至傾貲以給和躬率以儉惡衣蔬食防遏驕僭爲之軌制風化大行然縣豪強憚其嚴明說璋轉和爲巴東屬國都尉吏民老弱相攜丐留者數千人璋聽留二年還遷益州太守其清約如故與蠻夷從事務推誠心南土愛而信之昭烈定蜀召爲掌軍中郎將與諸葛亮並署左將軍大司馬府事可否相濟共贊庶務尋卒和外收殊俗內幹機衡二十餘年死之日家無儋石之儲亮後爲丞相教與羣下曰夫參署集眾思廣忠益也若遠小嫌難相違復曠闕多矣違復而得中猶棄敝屣而獲珠玉



然人心苦不能盡惟徐元直處茲不惑又董幼宰參署七年事有不至至於十反來相啟告苟能慕元直之十一幼宰之殷勤納忠於國則亮可少過矣又曰昔交州平屢聞得失後友元直勤見啟誨前參事於幼宰有言則盡後從事於偉度數有諫正雖愚性鄙暗不能悉納然與此數子終始好合亦足以明其不疑於直諒也其追思之如此偉度者姓胡名濟義陽人爲亮主簿後除中典軍封成陽亭侯累遷右驃騎將軍和子允自有傳

劉巴字子初零陵烝陽人少知名荆州牧劉表連辟及舉茂才皆不就表卒曹操至荆州昭烈奔江南荆楚之士從之如雲而巴獨北詣操操辟爲掾使招納零陵桂陽長沙



會昭烈已定三郡巴不能反遂適交趾諸葛亮追謂曰劉公雄才蓋世據有荆土莫不歸德天人去就已可知矣足下欲何之巴曰受命而來事不克成乃當還北足下何言耶昭烈深恨之後從交趾至蜀會昭烈定益州稽首謝罪負昭烈不之責亮數稱薦之昭烈辟爲左將軍西曹掾張飛嘗詣巴巴不與語飛恚忿亮謂巴曰飛雖武人敬慕足下劉公方收合文武以定大事足下雖天資高亮宜少降意巴曰大丈夫處世當交四海英雄如何與兵子語乎昭烈聞之怒曰孤欲定天下而子初耑亂之其欲還北假道於此豈欲成吾事耶又曰子初才知絕人如孤可任用之非孤難獨任也亮亦曰運籌帷幄之中吾不如子初遠矣



若提枹鼓會軍門當與人議之耳初昭烈攻劉璋與士眾約事定府庫百物孤無與焉及拔成都士爭赴府藏取寶物軍用不足昭烈以爲憂巴曰易耳但當鑄直百錢平諸物價令吏爲官市昭烈從之數月府庫復實昭烈王漢中拜尙書後代法正爲尙書令躬履清儉不治產業又自以歸附非素懼見猜嫌恭默守靜退無私交非公事不言昭烈建大號凡諸文誥策命皆其所作章武二年卒

贊曰統正見理之明料事之審一時謀臣無出其右昭烈肇基王業訖承大統實二人之力使天假之年與諸葛亮同心輔政混一之功日月可冀不幸蚤世惜哉庶抱負經濟之術所施未究萬一身爲親屈流落僞境觀其以王伯

之略自許則其中之所存者未易涯涘使得效其所長其所成就當如何耶和約已率下巴清儉靜退皆時良臣巴舍昭烈而詣曹操奔走交趾閒關萬里途窮勢蹙然後委質其趨向之際殆叵測云



續後漢書卷第十

上海郁松年原本

宋廬陵蕭常著

邑後學胡芳秋杜邦浚校梓

列傳第六

許廉簡伊秦馬鄧宗

許靖字文休汝南平輿人少與弟劭俱有人倫之鑒而不相能劭爲郡功曹排擯靖靖以馬磨自給楚國蔣濟常論劭衰貶不平故拔樊子昭而抑許文休劉曄曰子昭拔自牧豎年至耳順退能守靜進能守敬濟曰子昭誠自貞潔然觀其插齒牙樹頰胾吐脣吻似非文休敵若文休者大較廊廟器也劉翊爲汝南太守舉爲計吏察孝廉除尙書郎典選舉靈帝崩董卓秉政以漢陽周芝爲吏部尙書與



靖進退天下之士沙汰穢濁顯拔幽滯進用潁川荀爽韓融陳紀等輩爲公卿郡守時拜尙書令韓馥冀州牧侍中劉岱兖州刺史潁川張咨南陽太守陳留孔伋豫州刺史東郡張邈陳留太守而遷靖巴郡太守不就補御史中丞馥等到官各舉兵誅卓卓怒語恚曰諸君言當拔用善士卓從君計不欲違天下人心而諸君所用人至官還來相圖卓何用相負遂害恚靖從兄陳相瑒又與伋合規靖懼奔伋伋卒依揚州刺史陳禪禪卒吳郡都尉許貢會稽太守王朗與靖有舊故往依焉靖收卹親黨經紀振贍出於仁厚孫策渡江皆走交州靖身坐水濱先載附從疎親悉發乃從後去見者莫不歎息旣至交州太守士燮厚加敬



待陳國袁徽亦寓交州與尚書令荀彧書曰許文休英才  
偉士知略足以計事自流宕以來與郡士相隨每有急難  
常先人後已與九族中外同飢寒其紀綱同類仁恕惻隱  
不能一二陳之耳鉅鹿張翔銜王命使交部乘勢召靖靖  
拒而不許靖寓書曹操曰世路戎夷禍亂遂合驚怯偷生  
自竄蠻貊契濶十年吉凶禮廢昔在會稽得所貽書詞旨  
款密久要不忘迫於袁術方命圯族津途四塞雖馳心北  
風欲行靡由正禮師退衛丘前進會稽傾覆景興失據遭  
時困危無所控告浮涉滄海經歷東甌閩越之國行經萬  
里不見漢地漂泊風波絕糧茹草旣至南海與領守兒孝  
德相見知足下西迎大駕巡省中嶽承此休問且悲且喜



欲附奉朝貢使自獲濟通歸死闕庭而荊州水陸無津交  
部驛使斷絕欲上益州復有峻防雖仰瞻光靈延頸企踵  
何由假翼自致哉昔營上翼周仗鉞專征博陸佐漢虎賁  
警蹕今足下扶危持顛爲國柱石秉師望之任兼霍光之  
重五侯九伯制御在手自古及今人臣之尊未有及足下  
者行之得道則社稷用寧行之失道則四方散亂國之安  
危在於足下百姓之命懸於執事自華及夷密密注望足  
下任此豈可不遠覽載籍廢興之由榮辱之機棄忘舊惡  
寬和羣司苟得其人雖讐必舉苟非其人雖親不授以甯  
社稷以濟下民事立功成則繫音于管絃勒勲于金石願  
君勉之翔恨靖之不己從得靖所寓書投之水後劉璋使



人招之遂至蜀璋以爲巴郡廣漢太守南陽宋忠與蜀郡  
太守王商書曰文休倜儻瑰偉有當世之具當以爲指南  
尋代商爲蜀郡太守建安十七年漢立皇子熙等爲王靖  
聞之曰將欲歙之必固張之將欲取之必固與之其曹操  
之謂乎昭烈克益州以靖爲左將軍長史及王漢中以爲  
太傅章武元年拜司徒策曰朕獲奉洪業君臨萬國夙宵  
皇皇懼不能綏百姓不親五品不遜汝作司徒其敬敷五  
教在寬君其勗哉秉德無怠稱朕意焉靖雖年踰七十愛  
獎人物誘掖後進清談不倦丞相亮等皆爲之拜二年薨  
子欽先卒欽子游景耀中爲尙書王商者字文表廣漢人  
劉璋辟爲治中從事靖至蜀見而稱之曰使商生於中州



雖王景興無以加遷蜀郡太守成都禽堅有孝行商表其墓追贈孝廉又爲嚴君平李仲元立祠脩學廣農百姓便之在郡十年建安十六年卒

麋竺字子仲東海朐人家世貨殖僮客萬人資產鉅億徐州牧陶謙辟爲別駕從事謙卒竺奉謙遺命迎昭烈於小沛建安元年呂布乘昭烈之出拒袁術襲下邳虜其家室昭烈轉軍廣陵海西竺於是進其妹爲昭烈夫人奴客二千金帛萬計以助軍資于時匱乏賴以復振後曹操表竺贏郡太守竺弟芳彭城相皆去官從昭烈昭烈將適荊州遣竺與孫乾先與劉表相聞尋爲左將軍從事中郎益州平拜安漢將軍班在軍師將軍之右竺雍容篤厚而幹商



非其所長故昭烈待以上賓之禮而未嘗有所統御然賜  
子優渥莫與爲比芳字子方爲南郡太守與關羽有私憾  
以城叛迎孫權羽由是覆沒竺面縛請死昭烈慰諭以兄  
弟罪不相及竺慚恚發病歲餘卒子威官至虎賁中郎將  
威子照虎騎監自竺至照皆便弓馬善射御云孫乾者字  
公祐北海人昭烈領徐州辟爲從事昭烈之去曹操遣乾  
自結於袁紹後復與竺俱使劉表皆如意指益州平自從  
事中郎爲秉忠將軍見禮亞於竺頃之卒

簡雍字憲和涿郡人少與昭烈有舊昭烈至荊州雍與麋  
竺孫乾俱爲從事中郎常爲談客往來使命昭烈入益州  
劉璋見雍甚重之昭烈圍成都遣說璋璋卽與雍同輿出



城歸命益州平拜昭德將軍優游諷議而性簡傲跌宕侍  
帝坐猶箕踞傾倚與諸葛亮以下會則獨擅一榻項枕臥  
語初無少屈時大旱禁酒釀者有刑吏於人家得釀具論  
者欲令與作酒者同罰雍侍帝游觀見一男一女行道上  
謂帝曰彼欲行淫何不收縛帝曰卿何以知之雍曰彼有  
其具與欲釀者同帝大笑而原欲釀者雍之滑稽諷諫皆  
此類也或曰雍本姓耿幽州人謂耿爲簡遂轉爲簡云  
伊籍字機伯山陽人少依其邑人鎮南將軍劉表昭烈之  
在荊州籍常往來自結表卒從昭烈南渡江又從入益州  
益州既定爲左將軍從事中郎見侍亞於簡雍孫乾等東  
使吳孫權聞其才辯欲逆折以辭籍適入拜權曰勞事無



道之君乎籍對曰一拜一起未足爲勞其機捷類此權甚  
異之後遷昭文將軍與諸葛亮法正劉巴李嚴共造漢律  
漢律之制自五人始

秦宓字子敕廣漢縣竹人少有才學州郡辟命皆不就奏  
記州牧劉焉薦儒生廣漢任安曰昔百里蹇叔以耆艾而  
定策甘羅子奇以童冠而立功故書美黃髮易稱顏回因  
知選士用能不拘長幼明矣乃者以來海內察舉率多英  
俊而遺舊齒眾論不齊異同相半此乃承平之翔步非亂  
世之急務也夫欲救危撫亂脩己安人則宜卓犖超倫與  
時殊趣震驚鄰國駭動四方上當天心下合人意天人旣  
和內省不疚雖遭凶亂何憂何懼昔楚葉公好龍神龍下

續後漢書

卷十

五



之好僞徹天何況於真今處士任安仁義直道流名遠邇  
如今見察則一州斯服昔湯舉伊尹不仁者遠何武貢二  
龔垂名竹帛故貪尋常之高而忽萬仞之嵩樂面前之飾  
而忘天下之譽斯誠往古之所重戒也甫欲鑿石索玉剖  
蚌求珠況今隨和炳然有如皎日復何疑哉誠知晝不操  
燭日有餘光但愚誠區區貪陳所見劉璋時宓同郡王商  
爲治中從事與宓書曰貧賤困苦亦何時可以終身卞和  
銜玉以耀世宜一來與府君相見宓報書曰昔堯優許由  
非不宓也洗其兩耳楚聘莊周非不廣也執竿不顧易曰  
確乎其不可拔夫何銜之有且以國君之賢子爲之輔不  
以是時建蕭張之策未足爲知也僕得曝背乎隴畝之中



誦顏氏之箴瓢詠原憲之蓬戶時翱翔於林澤與沮溺之  
等傳聽園猿之悲吟察鶴鳴於九臯安身爲樂無憂爲福  
處空虛之名居不靈之龜知我者希則我貴矣斯乃僕得  
志之秋也何困苦之戚焉後商爲嚴君平李固立祠必與  
書曰疾病伏匿知足下爲嚴李立祠可謂厚黨勤類者也  
觀嚴文章冠冕天下由夷逸操山岳不移使楊子不歎固  
自昭明如李仲元不遭法言令名必泯其無虎豹之文故  
也可謂攀龍附鳳者矣如楊子雲潛心著述有補於世泥  
蟠不滓行參聖師於今海內談詠厥辭邦有斯人以耀四  
遠怪子替茲不立祠堂蜀本無學士文翁遣相如東受七  
經還教吏民於是蜀學比於齊魯故地里志曰文翁倡其



教相如爲之師漢家得士盛於其世仲舒之徒不達封禪  
相如制其禮夫能制禮造樂移風易俗非禮所秩有益於  
世者乎雖有王孫之累有孔子大齊桓之伯公羊賢叔術  
之遜僕亦善長卿之化宜立祠堂速定其銘先是李權從  
宐借戰國策宐曰戰國縱橫用之何爲權曰仲尼嚴平會  
聚眾書以成春秋指歸之文故海以合流爲大君子以博  
識爲宏報曰書非史記周圖仲尼不采道非虛無自然嚴  
平不演海以受淤歲一蕩清君子博識非禮不視今戰國  
反覆儀秦之術殺人自生亡人自存經之所疾故孔子發  
憤作春秋大乎居正復制孝經廣陳德行杜漸防萌預有  
所抑是以老氏絕禍於未萌豈不信耶成湯大聖睹野魚



而有獵逐之失定公賢者見女樂而廢朝事若此等類焉  
可勝陳道家法曰不見所欲使心不亂是故天地貞觀日  
月貞明其直如矢君子所履洪範記災發於言貌何戰國  
譎權乎哉或謂宓曰足下欲自比於巢許四皓何爲揚文  
藻見瑰穎乎宓曰僕文不能盡言言不能盡意何文藻之  
揚乎昔孔子三見哀公言成七卷事蓋有不可默默也接  
輿行且歌論家以光篇漁父詠滄浪賢者以耀章此二人  
者非有欲於時者也夫虎生而文炳鳳生而五色豈以五  
采自飾畫哉天性自然也蓋河洛由文興六經由文起君  
子懿文德采藻其何傷以僕之愚猶恥葦子成之誤況賢  
於已者乎廣漢太守夏侯纂請爲師友祭酒領五官掾稱



之曰仲父宓稱疾臥纂與其功曹古朴主簿王普其詣宓  
宴談宓臥如故纂問朴貴州養生之具實絕餘州不知士  
人何如餘州也朴曰自先漢以來其爵位者或不如餘州  
至於著作爲世師式不負於餘州也嚴君平見黃老作指  
歸楊雄見易作太元見論語作法言司馬相如爲武帝作  
封禪之文於今天下之所共聞也纂曰仲父何如宓以簿  
擊頰曰蜀有文阜之山江出其腹帝以會昌神以建福故  
能沃野千里淮濟四瀆江爲其首此其一也禹生石紐今  
之汶山郡是也昔堯遭洪水鯀所不治禹疏江決河東注  
於海爲民除害生民以來功莫先者此其二也天帝布治  
房心決政參伐參伐則益州分野三皇乘祗車出谷口今



之科谷是也此便鄙州之阡陌明府以雅意論之何若於天下乎於是纂逡巡而退昭烈定益州辟爲從事祭酒昭烈既卽尊位將東征吳宓陳天時不利坐下大理建興二年丞相亮領益州牧迎爲別駕尋拜左中郎將長水校尉遷大司農四年卒初宓見帝系之文五帝皆同一族乃辨其不然之本又論皇帝王伯養龍之說最有理譙周少時數往咨訪記錄其言於春秋然否論文多故不載

馬良字季常襄陽宜城人兄弟五人竝有才名鄉里爲之諺曰馬氏五常白眉最良良眉有白毫故以稱之昭烈領荊州辟爲從事及昭烈入蜀諸葛亮亦繼往良畱荊州與亮書曰聞雒城已拔此天祚也兄應期贊世休道光國兆



見於此矣夫變用雅慮審貴垂明於以簡才宜適其時若  
乃和光說遠邁德天相使時閑於聽世服於道齊高妙之  
音正鄭衛之聲竝利於事無相奪倫此乃管絃之至牙曠  
之調也雖非鍾期敢不擊節昭烈辟爲左將軍掾後使吳  
謂亮曰今銜國命協睦舊好幸爲良介於孫將軍亮曰君  
試自爲文良卽草曰寡君遣掾馬良通聘繼好以紹昆吾  
豕韋之勲其人吉士荆楚之令鮮於造次之華而有克終  
之美願降心存納以慰將命權敬待之昭烈卽帝位拜侍  
中及東征吳遣至武陵招納五谿蠻夷其渠帥皆稟節制  
咸如意指會王師敗績於夷陵良亦遇害時年三十六拜  
其子秉爲騎都尉



鄧芝字伯苗義陽新野人司徒禹之後也遭亂入益州州從事張裕善相人芝往從之裕曰君年過七十位至大將軍封侯芝聞巴西太守龐羲好士往依焉昭烈定益州芝爲郫邸閣督昭烈至郫與語大奇之擢爲郫令遷廣漢太守所至清廉有治績入爲尙書先是孫權已輸款帝遣宗瑋賈禪等與相報荅會帝崩丞相亮慮權有異計芝見亮曰今主上幼弱初踐祚宜遣大使重申吳好亮曰吾思之久矣未得其人耳今始得之芝問爲誰亮曰卽使君也乃遣聘於權權語芝曰孤誠願歸心於漢然恐漢帝幼弱不克自保以此猶豫耳芝曰漢與吳奄有四州之地大王命世之英諸葛亮亦一時之傑也漢有重險之固吳有江山



之阻合此二長共爲唇齒進可并兼天下大王今若委質  
於曹丕不必責大王之入朝求太子之內侍若不從命則  
奉辭伐叛漢亦順流見可而進如此江南之地非復大王  
有也權默然良久曰君言是也遂與丕絕而遣其中郎將  
張溫來聘是歲芝復如吳權謂芝曰若天下太平二主分  
治不亦樂乎芝曰天無二日土無二王如滅魏寇之後大  
王未深識天命則戰爭方始耳權大笑曰君之誠款乃當  
爾耶權與亮書曰丁玄挾張陰化不盡和合二國惟鄧芝  
及亮北出漢中以芝爲中監軍揚武將軍亮薨遷前將軍  
軍師領兖州刺史封陽武亭侯頃之爲江州督權數與芝  
相聞饋遺不絕延熙六年就遷車騎將軍假節十一年潛



陵國人殺都尉叛帥師征之梟其渠帥百姓安堵十四年  
薨芝爲大將軍二十餘年賞罰明當善卹卒伍衣食皆仰  
於官不治私產妻子不免飢寒死之日無餘財性剛簡不  
妄交游於時人少所敬貴惟器異姜維云初芝征涪陵時  
道中見猿抱子於木杪引弓射之中其母其子爲拔箭以  
木葉塞創芝歎曰嘻吾違物之性其將死矣投其弓於水  
中未幾薨子良襲爵景耀中爲尙書左選郎後仕晉爲廣  
漢太守

宗預字德豔南陽安眾人建安中隨張飛至益州建興初  
丞相諸葛亮以爲主簿遷參軍右中郎將及亮薨孫權憂  
魏寇犯漢增巴丘守兵萬人且欲觀望勝負帝聞之亦增



永安之戍以備非常預將命至吳權問預曰東之與西誓  
猶一家而聞更增白帝之守何也預對曰臣以爲東益巴  
丘之戍西增白帝之守皆事勢宜然俱不足以相問也權  
大笑其見禮遇亞於鄧芝費禕遷爲侍中徙尙書延熙十  
年爲屯騎校尉時車騎將軍鄧芝自江州來朝謂預曰禮  
六十不服戎而卿甫受兵何也預曰卿七十不還兵我六  
十何爲不受耶芝性驕倨自大將軍費禕等皆降下之而  
預不爲屈未幾復使吳孫權握手涕泣曰君每銜命結好  
今君年長孤亦衰老恐不復相見遺大珠一斛還遷後將  
軍督永安就拜征西大將軍賜關內侯景耀元年以疾還  
成都後爲鎮軍大將軍領兗州刺史時都護諸葛瞻當國



化過預欲與俱詣瞻預曰吾等年踰七十叨竊已過所  
欠一死耳何求於年少輩而屑屑造門耶竟不往廖化字  
元儉本名淳襄陽人爲關羽主簿羽敗屬吳密表思歸昭  
烈許之因攜其母晝夜西行會車駕東征遇於秭歸帝大  
悅以爲宜都太守帝崩爲丞相參軍後爲廣武督稍遷至  
右車騎將軍假節領并州刺史封中鄉侯以果烈稱位與  
張翼齊而在預之右景耀五年姜維帥師出狄道化曰兵  
不戢必自焚伯約之謂也知不出敵而力少於寇用之無  
厭何以能久詩云不自我先不自我後今日之謂也晉初  
預化俱徙雒陽道病卒

贊曰靖萬里詒書曹操述德美且諷且勸靖名知人豈不

知操鬼蜮之雄包藏有素及西抵益州聞皇子熙等四王之封始有欲取故予之歎何知之之晚也昭烈建大號遂參佐命亦其幸會歟竺乾雍籍雍容諷議見禮於時宓以文辯稱良以正固顯芝預銜命專對抗節不撓皆一時之良云



後漢書卷第十一

上海郁松年原本

宋廬陵蕭 常著

邑後學 胡芳秋 杜邦浚 校梓

列傳第七

陳董呂二楊姚王董

陳震字孝起南陽人昭烈領荊州牧辟爲從事部諸郡從入益州爲蜀郡北部都尉尋以北部爲汶山郡復爲太守遷犍爲建興三年入拜尙書遷尙書令奉命使吳諸葛亮與兄瑾書曰孝起忠純之性老而益篤及其和合東西有可貴者還封城陽亭侯九年都護李平坐誣罔廢亮與長史蔣琬侍中董允書曰孝起前使吳爲吾說正方腹中有鱗甲鄉里以爲不可近吾以爲鱗甲者但不當犯之耳不



圖復有蘇張之事出於不意不可不使孝起知之十三年  
卒子濟嗣

董允字休昭掌軍中郎將和之子昭烈立皇太子允以選  
爲舍人轉洗馬皇太子踐祚遷黃門侍郎丞相亮將北征  
慮帝富於春秋聽斷不明以允秉心公亮欲任以宮省之  
事上疏曰侍郎董允等先帝簡拔以遺陛下至於斟酌損  
益進盡忠言則其任也宮中之事宜悉以咨之尋遷侍中  
領虎賁中郎將統宿衛士侍中郭攸之性謙順備員而已  
獻納之任允皆專之允每處事爲防制甚悉得正救之理  
帝嘗欲采擇以充後宮允以爲古者天子后妃之數不過  
十二今嬪嬙已具不宜增益固執不聽帝益嚴憚之尙書



令蔣琬領益州刺史上疏遜允與費禕又表允內侍歷年  
翼贊王室宜賜爵士以寵勲勞固辭帝既富於春秋嬖宦  
人黃皓皓便辟佞慧允常正色弼違而切責皓皓畏允不  
敢肆終允之世皓不過黃門丞允常與尙書令費禕中典  
軍胡濟等約宴集已命駕而郎中董恢詣允恢年少官微  
見允命駕逡巡求去允不許曰所以出者欲與同好游談  
耳今君已自屈方展契濶舍此之彼非所謂也卽命解轡  
其守正下士皆類此延熙六年加輔國將軍七年以侍中  
守尙書令副大將軍費禕九年卒孫宏晉巴西太守時益  
州以諸葛亮蔣琬費禕及允爲四相又號四英陳祗代允  
爲侍中與黃皓相表裏皓始與政操弄威柄遂至覆國國



人無不追思允祗字奉宗汝南人許靖外孫也幼孤鞠於  
靖弱冠知名稍遷至選曹郎有威儀多技藝挾術數費禕  
甚異之超繼允內侍呂乂卒祗又以侍中守尙書令加鎮  
軍將軍大將軍姜維雖班在祗上常帥師在外希與朝政  
祗上奉主意下接閭閻故見信愛權重於維景耀元年卒  
帝甚悼惜之諡曰忠自祗之得幸帝追憤允抗直謂爲輕  
已益重祗董恢者字休緒襄陽人從入益州以宣信中郎  
副費禕使吳孫權當大醉問禕曰楊儀魏延牧豎小人雖  
嘗有鳴吠之益然旣任之勢不得輕若一朝無諸葛亮必  
爲禍亂諸君憤憤曾不之慮此豈所謂貽厥孫謀乎禕愕  
然未能對恢曰儀延之不協益私憤耳而無黥彭難御之



心也今方掃除強賊混一函夏功以才成業以才廣若舍此不任防其後患是猶備風波而逆廢舟楫非長計也權大笑亮聞之以爲知言辟爲丞相府屬遷巴郡太守

呂乂字季陽南陽人父常送劉焉入益州道梗不得還乂少孤好讀書鼓琴初昭烈置鹽府校尉較鹽鐵之利校尉王連辟乂及南陽杜祺南鄉劉幹等竝爲典曹都尉轉新都縣竹令乃心隱卹百姓稱之課最一州遷巴西太守諸葛亮連年出師調發諸郡多不相應乂獨募兵五千人詣亮慰諭檢制無逃竄者徙漢中太守兼領督農轉給軍糧未嘗乏絕亮薨累遷廣漢蜀郡太守蜀郡一大都會戶口繁夥又亮薨之後士伍亡命更相胥冒姦僞非一乂到官



爲之防禁開諭勸道數年之中隱漏自出者萬餘口入爲  
尚書代董允爲尚書令府無滯事門無留賓又更歷中外  
治身儉約謙靖少言爲政簡而不煩號爲清能然持法刻  
深好用文俗吏故居大官名聲減於治郡延熙十四年卒  
子辰景耀中爲成都令辰弟雅謁者諸厲有文著格論十  
五篇杜祺者歷郡守監軍大將軍司馬劉幹官至巴西太  
守皆與父親善亦有當時之譽而儉素守法不及於父

楊洪字季休犍爲武陽人昭烈定益州太守李嚴辟爲功  
曹嚴欲徙郡治舍洪固諫不聽辭去嚴遂薦洪於州爲蜀  
部從事昭烈爭漢中急書發兵軍師將軍諸葛亮遂以問  
洪洪曰漢中益州之咽喉存亡之機會若無漢中則無蜀



矣此家門之禍也方今之事男子當戰女子當運發兵何  
疑時蜀郡太守法正從昭烈北行亮卽表洪領太守庶事  
皆辦尋卽真頃之轉益州治中從事帝征吳駐永安漢嘉  
太守黃元素爲亮所不善聞帝不豫舉郡反燒臨邛城時  
亮東詣永安市疾成都單虛以故元益無忌憚洪卽啟皇  
太子遣其親兵使將軍陳習鄭綽討元朝議以爲元若不  
能圍成都當由越巂據南中洪曰元素凶暴無它恩信何  
能辦此不過乘流東下冀主上平安面縛歸死如其有異  
奔吳求活耳因敕習綽於南安峽口要之習綽如其言果  
生獲元建興元年賜爵關內侯復爲蜀郡太守忠節將軍  
徙越騎校尉領郡如故五年丞相亮北屯漢中欲用張裔



爲留府長史以問洪洪對曰裔天資明察長於治劇才誠  
堪之然性不公正恐不可專任不如留向朗朗情僞差少  
使裔從行得效其器能於事兩善初裔少與洪親善裔流  
落於吳洪臨其郡裔子郁給郡吏微過受罰不少假借後  
還聞之深以爲恨與洪情好日損及洪見亮出至裔許具  
說所言裔答曰公留我了矣明府不能止時人或疑洪自  
欲爲之又疑其知裔自嫌不願裔處要職典後務也後裔  
與司鹽校尉岑述有隙亮與裔書曰君昔在柏下營壤使  
我心憂食不知味後逆流南海相爲悲歎寢不安席及其  
來還委付大任同獎王室自以爲與君古之石交也石交  
之道舉讐以相益割骨肉以相明猶不相謝也況吾但委



意於元儉而君不能忍邪論者由是明洪無私洪少不好  
學問而忠清款亮憂國如家事繼母至孝六年卒官始洪  
爲李嚴功曹嚴未去犍爲而洪已爲蜀郡洪辟門下書佐  
何祗祗有才幹舉郡吏數年爲廣漢太守而洪亦尙畱蜀  
郡是以西土咸服諸葛亮能盡時人之器用祗字君肅家  
寒窶爲人寬厚通濟軀幹魁梧初仕郡爲督軍從事時諸  
葛亮用法峻密聞祗游戲廢務欲奄至錄獄祗聞之卽夜  
張燈見囚覽其款牘及亮晨至祗應對無滯亮甚異之出  
補成都令會郫縣關宰以祗兼二縣二縣戶口繁夥切近  
都市饒諸姦穢祗發摘姦伏人以爲神無敢欺者常使人  
設算聽其讀而心計之不差勾合其精敏如此時祗朝集



坐次於洪洪嘲曰君馬何駛祇曰故吏馬不敢駛但明府未著鞭耳汶山夷人不安詔以祇爲汶山太守民夷服信遷廣漢夷復反云得前何府君乃能安我耳遷犍爲卒時年四十八

楊容字子昭丞相長史儀之族繇巴郡太守入遷丞相主簿丞相亮常自校簿書容諫曰爲治有體上下不可相侵請爲明公以作家譬之今有人使奴執耕婢典爨雞司晨犬吠盜牛負重載馬涉遠道私業無曠所求皆得雍容高枕飲食而已忽一旦盡欲以身親其役不復付委勞其體力爲此碎務形罷神困終無一成豈其知之不如奴婢雞狗哉失爲家主之法也是以古稱坐而論道謂之三公作



而行之謂之士大夫故邴吉不問橫道死人而憂牛喘  
平不言錢穀之數而云自有主者彼誠達於位分之體也  
今明公爲政乃躬理簿書流汗竟日不亦勞乎亮謝之後  
遷東曹屬典選舉卒亮爲之流涕者數日與畱府長史張  
裔蔣琬書曰掾屬喪楊容爲朝中損闕多矣

姚伷字子緒巴西閬中人昭烈定益州爲功曹書佐建興  
初出爲廣漢太守丞相諸葛亮北駐漢中辟爲掾竝進文  
武之士亮稱之曰忠益者莫大於進人進人者各務其所  
尙今姚掾竝存剛柔以廣文武之用可謂博雅矣願諸君  
各希此事以屬所望遷參軍亮薨稍遷尙書僕射時人服  
其真誠篤粹延熙五年卒伷同郡馬勲馬齊者亦知名勲



字盛衡齊字承伯勲劉璋時爲書佐昭烈定益州辟爲左將軍屬後轉州別駕卒齊爲太守張飛功曹飛薦之昭烈爲尙書郎建興中爲丞相掾遷廣漢太守亮薨爲尙書勲齊皆以才幹顯其見敬信於州里皆不如仙

王謀字元泰漢嘉人有操行劉璋時爲巴郡太守還爲州治中從事昭烈定益州以爲別駕及王漢中用荆楚宿儒零陵賴恭爲太常南陽黃柱爲光祿勲謀爲少府建興初賜爵關內侯代賴恭爲太常尋卒後大將軍蔣琬問張休曰漢嘉前輩有王元泰今誰繼之者休對曰如元泰州境亦無況鄙郡乎其爲人推仰如此恭子玄爲丞相西曹令史從諸葛亮於漢中蚤世亮與張裔等書曰令史失賴玄



爲朝中損闕多矣同時有何宗者字彥英蜀郡郫人與杜  
瓊師事廣漢任安而名聞過於瓊劉璋時爲犍爲太守昭  
烈辟爲從事祭酒援引圖讖勸進帝踐祚遷大鴻臚建興  
中卒宗子雙字漢偶滑稽談笑有東方朔淳于髡之風爲  
雙柏長蚤卒又有習禎殷觀者亦有才望禎字文祥襄陽  
人美丰儀善談論名亞龐統而在馬良之右從昭烈入蜀  
歷雒郫令廣漢太守觀字孔休荊州主簿遷別駕從事事  
見昭烈本紀

董厥字龔龔義陽人事丞相亮爲令史亮嘗稱曰董令史  
良士也吾每與之言謹恪適宜遷主簿亮薨稍遷尙書僕  
射代陳祗爲尙書令遷輔國大將軍平臺事而同郡樊建



代焉建字長元延熙二十四年以校尉使吳會孫權病不  
果見問諸葛恪曰樊建何如宗預恪曰才識不及而雅性  
過之後爲侍中守尙書令自諸葛瞻與厥建當國姜維常  
征伐在外瞻厥以維好戰無功百姓罷弊嘗表帝召維還  
爲益州刺史欲奪其兵而不果時宦人黃皓專政人爭趨  
之獨建絕不與通厥建後事晉武帝嘗問建諸葛亮之治  
國對曰聞過必改而不吝賞罰之信足感神明帝曰善哉  
使我得此人以自輔豈有今日之勞乎

贊曰震知李平之不可近允制黃皓使不得逞皆有先見  
之明而允正色弼違所益多矣身歿未幾儉佞用事至使  
人主追憤抗直謂爲輕已自古忠言難入何獨允哉又洪



正固足以集事方時多虞賴以有濟密引大體以規宰相  
仙薦才士以爲時用賢矣哉

續後漢書卷第十一

續後漢書

卷十一

卷之六

一、  
二、  
三、  
四、  
五、  
六、  
七、  
八、  
九、  
十、



續後漢書卷第十二

上海郁松年原本

宋廬陵蕭常著

邑後學

胡芳秋校梓

列傳第八

劉彭廖李劉馬魏楊

劉封本羅侯寇氏子長沙劉氏甥也昭烈至荊州未有子  
養以爲子及入蜀自葭萌還攻劉璋時封年二十餘有武  
藝氣力絕人將兵與諸葛亮張飛等泝流西上所至戰克  
遂以爲副軍中郎將初璋遣扶風孟達副法正各將  
兵二千人迎昭烈昭烈因令達并領其眾屯江陵蜀平後  
以達爲宜都太守建安二十四年遣達從秭歸北攻房陵  
殺太守蒯祺將進攻上庸昭烈陰恐達難獨任乃遣封乘



沔水下統達軍與達會上庸上庸太守申耽舉郡降遣妻子及宗族詣成都昭烈加耽征北將軍領上庸太守封鄢鄉侯以耽弟儀爲建信將軍西城太守遷封爲副軍將軍自關羽圍樊城襄陽連呼封達以兵援已封達辭以山郡初附未可動搖會羽覆敗昭烈甚恨之又封與達忿爭奪其鼓吹達旣懼罪又忿恚封遂表謝曰伏惟殿下建伊呂之業追桓文之功大事草創假勢吳楚是以有爲之士深覩歸趣臣委質以來愆戾山積臣猶自知況於君乎今王朝以興英雋鱗集臣內無輔佐之器外無將領之才列次功臣誠自愧也臣聞范蠡識微浮於江湖咎犯謝罪逡巡河上夫際會之間請命乞身何則欲潔去就之分也況臣



平鄙無元功巨勲自繫於時竊慕前賢蚤思遠恥昔申生  
至孝見疑於親子胥至忠見誅於君蒙恬拓境而被大刑  
樂毅破齊而罹讒間臣每讀其書未嘗不慷慨流涕而親  
當其事益以傷絕何者荊州覆敗大臣失節百無一還惟  
臣尋事自致房陵上庸而後乞身自放於外伏想殿下聖  
恩感悟愍臣之心悼臣之舉臣誠小人不能始終知而爲  
之敢謂非罪臣聞交絕無惡聲去臣無怨辭臣過奉教於  
君子願君王勉之遂帥所領降魏曹丕善其才美容觀以  
爲散騎常侍平陽亭侯領新城太守遣其將夏侯尚徐晃  
與達襲封達又以書招封封不從申儀復叛封封走還成  
都申耽亦降魏封旣至帝責其侵陵達又不救羽諸葛亮



亦慮封剛猛易世之後終難制御勸帝因此除之於是賜  
封死封歎曰恨不用孟子度之言帝爲之流涕達旣奔魏  
李鴻者降漢爲諸葛亮言間過孟達許適見叛人王沖亦  
來詣達言往者達之去就明公切齒欲誅達妻子賴先帝  
不聽耳達曰諸葛公見顧有本末必不爾也景仰明公不  
能已已時蔣琬費詩在坐亮謂琬詩曰還都當有書與子  
度相聞詩進曰孟達小子昔事振威不忠又背先帝反覆  
之人何足與書亮不荅亮欲誘達爲外應竟與達書曰往  
年南征適與李鴻會於漢陽承知消息慨然永歎以明足  
下平素之志豈徒空託名榮貴爲華離乎嗚呼孟子斯實  
劉封侵陵足下以傷先帝待士之義又鴻道王沖造作虛



語云足下量度吾心不受沖言追平生之好依依東望故遺此書達得書欲舉新城來歸亮至漢中復中情款申儀與達有隙密白其事司馬懿遣人諷之入朝達懼卽舉城降漢曹叡遣懿討之遂遇害

彭叢字永年廣漢人身長八尺儀觀甚偉而性傲忽惟敬同郡秦宓仕州不過書佐人有譖之於州牧劉璋髡鉗爲徒隸會昭烈入蜀歡迎說昭烈乃往見龐統統與叢非故人又適有賓客徑上統牀臥謂統曰須客罷當與卿善談客旣去統往就叢坐又責統食然後共語因畱信宿統大善之而法正亦素知叢乃共致之昭烈昭烈與語奇之數令宣傳軍事指授諸將奉使稱意識遇日隆成都旣定昭



烈領益州牧擢爲治中從事秉起徒步一朝處州人之上  
形色囂然自負諸葛亮雖外接之而內不能善每密言於  
昭烈秉心大志廣難可保安左遷江陽太守秉不悅往見  
馬超超曰卿才具秀拔謂當與孔明孝直諸人齊駕竝驅  
寧當外處小郡失人本望乎秉曰老革荒悖可復道邪又  
謂超曰卿爲其外我爲其內天下不足定也超驕族歸國  
常不自安聞秉言大驚默不敢荅具表其辭於是收秉付  
有司秉於獄中與諸葛亮書曰僕昔有事於諸侯以爲曹  
操暴虐孫權無道振威開弱其惟主公有伯玉之才可與  
興業致治故乃番然有輕舉之志會公來西僕因法孝直  
自銜鬻龐統斟酌其間遂得詣公於葭萌抵掌而譚治世



之務講王伯之義建取益州之策公亦宿慮明定卽相然  
贊遂舉事焉僕於故州不免凡庸憂於罪網得遭風雲激  
矢之中求君得君志行名顯從布衣之中擢爲國士盜竊  
茂才分子之厚誰復過此羨一朝狂悖自求菹醢爲不忠  
不孝之鬼乎先民有言左手據天下之圖右手刎咽喉愚  
夫不爲也況僕頗別菽麥者哉所以有怨望意不自度量  
苟以爲首興事業而有投江陽之論不解主公之意卒然  
感激頗以被酒脫失老語此僕之下愚淺慮所致主公實  
未老也且夫立業不在老少西伯九十寧有衰志負我慈  
父罪在百死至於內外之言欲使孟起立功北州戮力主  
公共討曹操耳寧敢有它志耶孟起說之是也但不分別



其間痛人心耳昔每與龐統共相誓約庶託足下末蹤盡心於主公之業追名古人載勲竹帛統不幸而死僕敗以取禍自我求之將復誰怨足下當世伊呂也宜與主公計事濟其大猷天明地察神祇有靈復何言哉貴使足下明僕本心耳行矣努力自愛素竟誅死時年三十七

廖立字公淵武陵臨沅人昭烈領荊州牧辟爲從事年未三十擢長沙太守昭烈入益州諸葛亮鎮荆土孫權遣使通好於亮因問士人誰相經緯者亮荅曰龐統廖立楚之良才當贊興世業者也建安二十年權遣呂蒙襲三郡立脫身自歸昭烈素識待之不淡責也以爲巴郡太守二十四年召爲侍中建興初徙長水校尉立自謂才名宜爲諸



葛亮之貳而更游散在李嚴等下常懷怏怏丞相掾李邵  
蔣琬嘗詣立計事立謂曰軍當遠出卿諸人好諦其事昔  
先帝不取漢中而與吳人爭南三郡卒以三郡與吳人徒  
勞役吏士無益而還旣亡漢中使夏侯淵張郃深入於巴  
幾喪一州後至漢中使關侯身死人無孑遺上庸覆敗徒  
失一方是羽怙恃勇名作軍無法直以意突耳故前後數  
喪師徒如向朗文恭凡俗之人耳恭作治中無綱紀朗昔  
奉馬良兄弟謂爲聖人今作長史豈能合道中郎郭演長  
從人者不足與經大事而作侍中今弱世也而欲任此三  
人難矣王連流俗苟取招克使百姓罷弊以致今日邵琬  
具白其言於亮亮表立曰長水校尉廖立坐自貴大臧否



郡士公言國家不任賢達而任俗吏又言萬人率者皆小子也誹謗先帝疵毀羣臣人有言國家兵眾簡練部伍分明則舉頭視星憤咤作色曰何足言凡如是者不可勝數羊之亂羣猶能爲害況立託在高位中人以下識真僞邪且立奉先帝無忠孝之心守長沙則開門就敵領巴郡則有闇昧闖茸之稱隨大將軍則誹謗譏訶侍梓宮則拔刃斷人頭於梓宮之側陛下卽位之後普增職號立例爲將軍面語臣曰我何爲在諸將軍中不表我爲卿尙當在五校臣荅之曰將軍者隨大側耳至於卿則正方亦未卿也且宜處五校自是怏怏懷恨詔曰三苗亂政有虞流宥廖立狂惑朕不忍刑其徙不毛之地於是廢立爲民徙汶山



郡立躬帥妻子耕殖自守聞亮薨垂泣歎曰吾終爲左袵矣後監軍姜維帥偏師經汝山因詣立立意氣不衰言論自若竟歿於徙所妻子還成都

李平字正方南陽人本名嚴少爲郡吏以才幹稱曹操入荊州時平宰秭歸乃西入蜀劉璋以爲成都令有能名建安十八年以護軍降昭烈於縣竹拜裨將軍成都平進興業將軍健爲太守二十三年馬秦高勝等起於鄴眾至數萬寇資中時昭烈在漢中平帥郡士五千人討之斬秦勝等支黨皆潰又越嶲夷帥高定圍新道平越境馳救賊皆破走加輔漢將軍領郡如故章武二年召至永安拜尙書令三年帝不豫與諸葛亮竝受遺詔輔少帝爲中都護統



內外軍事畱鎮永安建興元年封都鄉侯假節加光祿勳  
四年遷前將軍諸葛亮欲北征平當知後務移屯江州畱  
護軍陳到駐永安皆統屬於平平與孟達書曰吾與孔明  
俱受寄託憂淡責重思得同僚亮亦與達書曰部分如流  
趨舍罔滯正方性也其見貴重如此嘗與亮書勸受九錫  
進爵爲王亮復書曰吾與足下相知久矣何不復相解吾  
本東方下士誤用於先帝位極人臣祿賜百億今討賊未  
效知己未報而方寵齊晉坐自貴大非其義也若滅魏斬  
叡帝還舊都與諸子並升雖十命可受況於九乎八年遷  
驃騎將軍曹叡遣其將曹真等欲三道寇漢川亮命平將  
二萬人赴漢中表平子豐爲江州都督典平後務亮以明



年當北伐命平以中都護署府事九年春亮軍祁山平督運事會久雨糧餉不繼平遣參軍狐忠督軍成平藩喻旨呼亮還師亮承以退平聞軍還乃更陽驚云軍糧饒足何以便還欲以解其不辦之責且明亮不進之罪又表帝云軍僞退欲以誘賊亮具出其前後書疏本末平辭窮首謝罪負亮於是表平曰自先帝崩後平所在治家好爲小惠保身求名無憂國之意臣當北伐欲得平兵以鎮漢中平詰難縱橫無有來意而求以五郡爲巴州刺史去年臣欲西征令平主督漢中平說司馬懿等開府辟召臣知平意欲因此偏臣取利也是以表平子豐督主江州隆崇其遇以濟一時之務平至之日都委諸事羣臣上下皆怪臣待



平之厚正以大事未定漢室傾危伐平之短莫若褒之然  
謂平之情在於榮利而已不意平心反覆乃爾若事稽留  
將致禍敗是臣不敏言多增咎有詔削奪官爵徙梓潼郡  
後聞亮薨發病死平常冀亮當自補復度後人不能故激  
憤而歿豐官至朱提太守

劉劭字威碩魯國人昭烈在豫州辟爲從事以其宗姓風  
流善談論厚待之昭烈定益州以爲固陵太守建興初封  
都鄉侯班位亞於李平爲衛尉中軍師後將軍遷車騎將  
軍然不與國政但領兵千餘從丞相亮諷議而已車服飲  
食號爲華侈侍婢數十皆能聲樂又悉教讀魯靈光殿賦  
後與前軍師魏延不協言多虛誕亮深責之遣還成都官



位如故劉失志恍惚十二年正月劉妻胡氏入賀皇太后  
太后留之經月乃出胡氏有美色劉疑與帝私呼帳下卒  
搗之至以履搏面而後棄遣胡具以告劉坐下吏有司議  
曰卒非搗妻之人面非受履之地竟棄劉市自是大臣妻  
母朝慶遂絕

馬謖字幼常侍中良之弟以荊州從事從入蜀除緜竹成  
都令越雋太守才器過人好談兵丞相亮深加器異昭烈  
臨終謂亮曰馬謖言過其實不可大用亮不以爲然辟爲  
參軍引與談論自晝達夕建興三年亮征南中謖謂亮曰  
南中恃險遠不服久矣雖今日破之明日復反今公方欲  
傾國北伐逆賊彼知國勢內虛其叛亦速若殄殲遺類又



非仁者之心夫甲兵之事攻心爲上攻城爲下心戰爲上  
兵戰爲下願公服其心而已亮納其言赦孟獲以服南方  
故終亮之世南方不敢復反及亮軍出祁山魏延吳懿皆  
時宿將論者皆言宜爲軍先鋒而亮違眾拔謾督諸軍在  
前與張郃戰於街亭違亮節度舉措煩擾屯軍土山不下  
據城爭利裨將王平力諫不用遂大敗士卒皆潰亮進無  
所據退還漢中謾下獄死時年三十七亮自臨祭爲之流  
涕待其孤如平生蔣琬後至漢中謂亮曰天下未定而戮  
知計之士豈不惜乎亮炫然曰孫武所以能制勝於天下  
者用法明也今四海分裂兵戰方始若復廢法何用討賊  
耶



魏延字文長義陽人以部曲將從入蜀數有功遷牙門將軍昭烈王漢中徙治成都當得重將鎮漢川時議者以爲莫如張飛飛亦自許昭烈乃拔延督漢中爲鎮遠將軍領漢中太守一軍盡驚昭烈大會羣臣問延曰今委卿以重任卿居之云何延對曰若曹操舉國而來請爲大王拒之偏將十萬之眾至請爲大王吞之眾咸壯其言昭烈踐祚拜鎮北將軍建興初封都亭侯五年諸葛亮駐漢中更以延爲督前部領丞相司馬涼州刺史八年亮使領兵西入羌中與曹叡將費瑤郭淮戰於陽谿大破之遷前軍師征西大將軍假節進封南鄭侯延每從亮出輒欲請兵萬人與亮異道會於潼關如韓信故事亮制而不許延常謂亮



爲怯歎恨已才用之不盡延旣善撫士卒勇力絕人又性矜高當時皆降下之惟楊儀不假借延以爲忿若水火然十二年亮出北谷口延爲前鋒去亮營十里秋亮疾困與長史楊儀司馬費禕護軍姜維等作身歿後退軍節度令延斷後姜維繼之若延或不從命軍卽自發及亮薨祕不發喪儀令禕往揣延意延曰丞相雖亡吾等見在府親官屬便可持喪還葬吾自當帥諸軍擊賊云何以一人死廢天下事耶且魏延何人當爲楊儀所部勒作斷後將耶因與禕共作行畱部分令禕手書與已連名告諸將禕給曰當爲卿還解楊長史長史文吏希更軍事必不違命也禕出疾馳而去延尋悔追之已不及矣延使人覘儀等皆欲



按亮成規諸營相次引軍還延大怒攬儀未發帥所領徑先南歸所過燒絕閣道延儀各表叛逆一日之中羽檄交至帝以問侍中董允畱守長史蔣琬琬允皆保儀疑延儀等升山通道晝夜兼行亦繼延後延先至據南谷口遣兵逆擊儀等儀等令王平在前禦延平叱延先登曰公亡身尙未寒汝輩何敢爾延士眾知曲在延莫爲用命延獨與子數人亡奔漢中儀遣馬岱追斬之儀蹴其首曰庸奴復能作惡否遂夷延三族初蔣琬帥宿衛諸營赴難北行數十里延死問至乃還時謂延非降魏而叛漢者第欲除儀等及平日諸將素不同者且冀時論當以己代亮本指如此



贊曰兵有正有奇兩敵相向未有不以奇勝者祁山之役  
延請兵萬人由褒中循秦嶺而東當子午而北不十日可  
至長安逐夏侯楙而與亮會此蓋奇道可以必勝且楙異  
愼未嘗更事非延之敵楙既北走度魏兵不二十日不能  
西而全秦之地已爲吾有命一大將固守函谷魏兵雖至  
無能爲也然後據關以臨河南天下事定矣此投機之會  
而亮不屑爲豈仁義之師疾其譎而不正歟

楊儀字威公襄陽人建安中爲荊州主簿後從關羽爲功  
曹遣西詣昭烈昭烈與論軍國大計政治得失大說之因  
辟爲左將軍兵曹掾昭烈王漢中擢爲尙書既踐祚東征  
吳儀與尙書令劉巴不睦左遷遙領宏農太守建興三年



丞相亮以爲參軍署府事五年從亮至漢中八年遷長史加綬軍將軍亮數出征儀常規畫分部籌度糧餉不稽思慮斯須便了軍戎節度取辦於儀亮深嘉儀之才幹魏延之驍勇常恨二人之不相能不忍有所偏廢也十二年從亮出屯谷口亮薨儀領軍還又誅討延自以爲功大當代亮秉政呼都尉趙正以周易筮之卦得家人不說而亮平生謂儀狷狹意在蔣琬琬遂爲尙書令益州刺史儀至拜中軍師無所統屬從容而已初儀爲尙書琬尙書郎後雖俱爲丞相參軍長史儀每從行當勞劇自謂年宦先琬才能踰之於是怨憤形於言色時人畏其語不遜皆莫敢近惟後軍師費禕往慰省之儀對禕怨望云云又語禕曰往



者丞相既歿之後吾若舉軍北去處世寧當落度如此耶  
令人追悔不及禕密表其言十三年削奪官爵徙漢嘉郡  
至貶所復上書誹謗詞旨激切遂下郡收儀儀自殺妻子  
還成都儀兄慮字威方少有德行爲江南冠冕州郡禮召  
諸公辟請皆不屈年十七而卒鄉人號曰德行楊君

贊曰封處嫌疑之地而不知遠權勢以謀自安不救關羽  
而失荊州侵陵孟達而喪二郡其死非不幸也羨之悖傲  
立之忿躁平之反覆剡之猜忌謾之輕脫延之自用儀之  
狷狹難乎免於世矣不然如儀之才幹延之料敵可少訾  
哉



續後漢書卷十三

上海郁松年原本

宋廬陵蕭常著

邑後學胡芳秋校梓

列傳第九

蔣琬費禕李福

蔣琬字公琰零陵湘鄉人弱冠與外弟泉陵劉敏俱知名  
琬以州書佐從昭烈入益州除廣都長昭烈嘗奄至廣都  
見其邑事不理琬又沈醉大怒將加罪罰軍師將軍諸葛  
亮請曰蔣琬社稷之器非百里之才其爲政以安民爲本  
不以脩飾爲先願公加察昭烈雅敬亮乃不加罪但免官  
而已頃之爲什邡令昭烈王漢中除尚書郎丞相亮開府  
辟爲東曹掾舉茂才固推劉邕陰化龐延廖淳等亮不許

尋遷參軍亮駐漢中琬與長史張裔統留府事俄代裔爲  
長史加撫軍將軍亮數出征琬常足食足兵以給軍亮每  
言公烈託志忠雅當與吾共贊王業密表帝曰臣若不幸  
後事宜以屬琬亮旣薨拜尙書令俄加行都護假節領益  
州刺史遷大將軍錄尙書事封安陽亭侯時新喪元帥遠  
近危懼琬一旦超處羣僚之右憂喜不形於色由是眾望  
漸服延熙元年詔琬曰寇難未弭曹叡驕凶遼東三郡苦  
其暴虐遂相糾合與之乖離叡乃大興眾役還相攻伐曩  
秦之亡勝廣首難今有此變此乃天時君其治嚴總帥諸  
軍往屯漢中須吳舉動東西掎角以乘其釁又命琬開府  
明年就加大司馬東曹掾楊戲性素簡略琬與言或不時



應有讒戲於琬曰公與戲語而不時應戲之慢上不亦甚乎琬曰人心不同各如其面從後言古人所戒戲欲贊吾是耶則非其本心欲反吾言則顯吾之非所以默然是戲之快也又督農楊敏嘗毀琬曰作事憤憤誠非及前人或以白琬王者請推治琬曰吾實不如前人無可推也王者復詰詰其憤憤之狀琬曰苟其不如則事不當理事不當理則憤憤矣復何問後敏以事繫獄人爲危之琬心無適莫竟從輕比其處己待人平心類此琬以爲諸葛亮數從秦川北伐道險運艱竟不能克不若乘水東下乃多作舟艦欲由漢沔襲魏興上庸會疾作未果行而羣議咸謂有如不捷還路甚難非長策也於是遣尚書令費禕中監



軍姜維等諭旨琬承命上疏曰芟穢弭難乃臣之職自臣奉辭漢中已經六年臣旣闇弱如嬰疾疢規方無成夙夜憂慘今曹芳竊據關雒根蒂滋蔓平除未易若東西并力首尾掎角雖未能速得如志且當分裂蠶食先摧其支黨然吳期二三連不克應俯仰惟艱實忘寢食輒與費禕等議以涼州胡塞之要進退有資賊之所惜且羌胡乃心思漢如渴又昔偏師入羌郭淮破走算其長短以爲事首宜以姜維爲涼州刺史若維征行控制河右臣當帥師爲維後繼今涪水陸四通惟急是應若東有虞赴之不難由是遂還駐涪會疾劇至九年薨諡曰恭子斌嗣爲綏武將軍漢城護軍鍾會之亂與弟顯俱爲亂兵所害初琬在廣



都免官後夜夢一牛頭在門流血滂沱意甚惡之以訊占  
夢趙直直曰夫見血者事分明也牛角及鼻公字之象君  
位當至公大吉之徵也劉敏者爲左護軍揚威將軍與鎮  
北大將軍王平俱鎮漢中曹芳遣其將曹爽入寇時議者  
或曰但可守城不宜出戰彼必自退敏以爲男女布野農  
穀栖畝若縱敵人則大事去矣遂帥所領與平據興勢多  
張旗幟彌亘百餘里會大將軍費禕以大軍繼至爽等遁  
去以功封雲亭侯

費禕字文偉江夏鄢人少孤依族父伯仁自後隨從伯仁  
入蜀與汝南許叔龍南郡董允齊名時許靖喪子允與禕  
欲俱會葬允白父和請車和以鹿車給之允有難載之色



禪卽先登至葬所諸公貴人悉集車乘甚都允猶若自失而禪晏然御者還和問知之乃謂允曰吾常疑汝於文偉優劣末別也而今而後吾意了矣時立皇太子禪與允俱爲舍人遷庶子帝踐祚爲黃門侍郎丞相亮南征還百僚郊迎年位多在禪右而亮特與禪同載由是眾人莫不改觀以昭信校尉使吳孫權性滑稽諸葛恪羊衝才辭果辯論難鋒至禪辭順義篤據理以對終不能屈權甚器之謂禪曰君天下淑德必當股肱朝廷恐不得數來乃以所佩寶刀贈之禪謝曰臣不才何以堪明命然敢不以此討不庭禁暴亂也但願大王勉建功業同獎漢室臣雖駑弱終不負東顧還遷侍中亮北駐漢中辟爲參軍以奉使稱旨



頻遣至吳建興八年轉中護軍又爲司馬會軍師魏延與  
長史楊儀不相能每同席爭論延或舉刃向儀儀忿恚至  
流涕禪常喻解終亮之世各盡延儀之用者禪之力也亮  
薨爲後軍師頃之代蔣琬爲尙書令時國家多事公務煩  
猥禪識悟絕人每省閱書記舉目卽究其旨常以朝晡聽  
事其間應接賓客飲食嬉戲每盡人之歡事亦不廢遷大  
將軍錄尙書事董允代禪爲尙書令欲效禪之所行旬日  
之中事多淹滯乃歎曰人之才力相遠乃爾非吾所及也  
延熙七年曹芳使其將曹爽犯興勢假禪節帥諸軍禦之  
光祿大夫來敏詣禪別且欲共圍棋于時羽檄列驚士馬  
環甲已嚴駕矣二人對奕久之敏乃曰聊試君耳君信可



人必能辦賊禪至爽等敗走封成鄉侯蔣琬固辭州職乃復領益州刺史禪當國功名略與琬比十一年出屯漢中自琬及禪雖身在外凡朝廷施設皆遣使咨之而後行其見信任如此十四年夏還成都望氣者云都邑無宰相位故冬復北屯漢壽十五年詔令開府明年正歲大會魏降人郭循在坐禪醉甚爲循所害諡曰敬子承嗣爲黃門侍郎承弟恭尙公主爲尙書郎顯名當世蚤卒長女爲皇太子璿妃禪雅性儉素家無贏餘諸子皆布衣蔬食出入無車騎不異常人

李福字孫德梓潼涪人父權臨邛長昭烈定益州福爲書佐西充國長咸都令建興初徙巴西太守江州督揚威將



軍人爲尙書僕射封平陽亭侯時諸葛亮於武功病篤帝遣福省疾因咨以國家大計且問如公百歲後誰可任大事者曰無踰公列又問其次曰文偉奉使稱旨帝嘉之福爲人精識果銳敏於從政延熙初大將軍琬出駐漢中福以前監軍領司馬卒子驤字叔龍亦知名官至尙書郎廣漢太守

贊曰琬禕皆抱將相之器見知於諸葛亮琬德度恢洪與物無忤禕天資高邁臨事整暇因前人成規守而勿失邊鄙不聳上下和一方之先漢其曹參丙吉之徒歟

續後漢書卷第十三

...

...

...

...



續後漢書卷第十四

上海郁松年原本

宋廬陵蕭 常著

邑後學

胡芳秋校梓  
杜邦浚

列傳第十

霍王向張吳費李

霍峻字仲邈南郡枝江人昭烈至荊州峻帥部曲數百人  
歸昭烈爲中郎將昭烈自葭萌還襲劉璋畱峻守葭萌城  
張魯遣其將楊帛誘峻求共守城峻曰小人頭可得城不  
可得帛乃退後璋將扶禁向存等帥萬餘人由閬水上攻  
圍且一年不能下城中兵纔數百峻伺其怠遣精銳出擊  
大破之斬存首昭烈定益州嘉其功乃分廣漢爲梓潼郡  
以峻爲太守裨將軍在官三年卒時年四十昭烈甚悼惜

之乃詔諸葛亮曰峻旣隹士又有功於國欲親臨醑遂帥羣臣弔奠畱宿墓次當時榮之子弋字紹先爲太子舍人建興初除謁者丞相亮北駐漢中請爲記室使與子喬游處遷黃門侍郎中庶子皇太子璿好騎射出入無度弋援古義盡言規諫深得切磋之體後爲參軍庾降屯副都督又轉護軍先是永昌夷獠恃險不賓數爲寇害乃以弋爲永昌太守帥偏師討之斬其豪帥郡界寧謐遷監軍翊軍將軍領建寧太守還統兩郡事景耀六年進安南將軍聞鍾會等兵至欲赴成都帝以備敵旣定不聽及聞成都失守素服哭臨三日與巴東羅憲各保其郡後皆仕晉憲字令則襄陽人清脩自守延熙中爲吏部郎時宦人黃皓用



事人爭趨之憲絕不與通皓左遷憲巴東太守餘事見蜀史

王連字文儀南陽人劉璋時入蜀爲梓潼令昭烈自葭萌進軍連閉城不下昭烈義之不強偏也及成都平以爲什邡令徙廣都所至有政績遷司鹽校尉較鹽鐵之利歲入益饒有裨國用簡拔才能以爲掾屬如呂乂杜祺劉幹等後皆至大官遷蜀郡太守興業將軍領鹽鐵如故建興初拜屯騎校尉領丞相長史封平陽亭侯時南方諸郡不賓諸葛亮將自征之連諫以爲此不毛之地公不宜以天下之望冒險而行亮慮諸將才力相埒無所統一而連言懇至故宿留者久之連卒子山嗣官至江陽太守



向朗字巨達襄陽宜城人少師事司馬徽與徐庶龐統韓  
嵩皆友善荊州牧劉表以爲臨沮長表卒歸昭烈昭烈定  
江南使督秭歸夷道巫山夷陵四縣軍民益州旣平以爲  
巴西太守徙牂柯房陵建興初入爲步兵校尉代王連領  
丞相長史丞相亮南征朗留主後務五年從亮至漢中朗  
素與馬謖善街亭之敗謖欲亡命朗知而不舉坐免官數  
年爲光祿勳亮薨徙左將軍追論舊功封顯明亭侯位特  
進朗少時雖涉獵儒學然脫略繩檢以吏能見稱自去長  
史優游三十年乃更潛心典籍孜孜不倦年踰八十猶手  
校書刊定謬誤所藏卷袞於時爲富誘掖後進講論古義  
不干時事以是見稱上自搢紳下及童冠皆敬遇之延熙



十年薨遺令戒諸子曰傳稱師克在和不在眾此言天地和則萬物生君臣和則國家平九族和則動得所求靜得所安是以聖人守和以存以亡也吾楚國之小子蚤喪所天爲二兄所教養故其性行不隨祿利以墮今但貧耳貧非人患惟和爲貴汝其勉之子條嗣條字文豹博學多識景耀中爲御史中丞朗兄子寵昭烈時爲牙門將秭歸之役寵軍獨完建興初封都亭侯後爲中部督典宿衛諸葛亮北征表寵性行淑均曉暢軍事先帝以爲能營中之事宜以客之遷中領軍延熙三年征漢嘉蠻夷歿於陳寵弟允歷射聲校尉尙書

張裔字君嗣蜀郡成都人治公羊春秋博涉史漢許靖謂

裔幹理才敏鍾元常之流也劉璋時舉孝廉爲魚復長轉  
州從事張飛自荊州由墊江入璋授裔兵使拒飛於德陽  
陷下軍敗還成都爲璋使昭烈許以禮其君而安其人裔  
還璋乃降昭烈以爲巴郡太守遷爲司金中郎將典作農  
戰之器先是益州郡殺太守正昂耆帥雍閬恩信著於南  
土陰通孫權乃拜裔太守徑至郡閭趙超不賓假鬼教以  
惑眾曰張府君如瓠壺外雖澤而內實麤不足殺令縛與  
吳於是送裔於權會帝崩鄧芝使吳諸葛亮令芝從權請  
裔裔自至吳數年流徙伏匿權未之知也故許之裔臨發  
權問曰蜀卓氏寡女亡奔司馬相如貴土風俗乃爾耶裔  
對曰愚以爲卓氏之女猶賢於買臣之妻權又曰君還必



用事終不作田父於閭里將何以報我裔曰裔負罪而歸將委命有司若假君之靈得保首領五十八年以前父母之年也自此以後大王之賜也權甚器之裔出淡恨不能陽愚卽就船倍道兼行權果追之裔已入永安界數十里追者不能及至亮以爲參軍署府事又領益州治中從事亮出駐漢中裔以射聲校尉領畱府長史明年北詣亮咨事送者車數百兩裔書與所親曰近者戒途晝夜延接不得少休人自敬丞相長史男子張君嗣附之罷倦欲死少與犍爲楊恭友善恭蚤歿遺孤數歲裔迎至於家事恭母如己母其子旣長爲娶婦殖產使立門戶撫故舊振宗族行義甚高加輔漢將軍領長史如故建興八年卒子翬厯



三郡太守監軍翊弟郁太子中庶子

吳懿字子遠陳畱人從劉焉入益州劉璋時爲中郎將使將兵拒昭烈於涪乃詣昭烈降益州平爲護軍討逆將軍昭烈納其妹爲夫人及卽尊位夫人爲皇后除關中都督建興中與魏延入南安界破曹叡將費瑤白亭侯進封高陽鄉侯遷左將軍諸葛亮薨以懿督漢中遷車騎將軍假節領雍州刺史進封濟陽侯十五年薨族弟班字元雄大將軍何進官屬匡之子也以豪俠聞名位亞於懿昭烈時爲領軍累遷驃騎將軍假節封縣竹侯懿孫喬沒於李雄凡三十年不爲雄屈

贊曰峻連之善守蓋各忠於所事峻引古誼以諫太守連



簡才俊以爲時用朗晚好典籍爲時舊德裔蚤陷異境篤  
於行義懿雖處外戚能遠權勢以功名自全皆賢矣哉  
費詩字公舉犍爲南安人劉璋時爲縣竹令昭烈攻縣竹  
詩舉城降益州既定以爲督軍從事出爲牂柯太守還爲  
州前部司馬昭烈王漢中遣詩拜關羽爲前將軍羽聞黃  
忠爲後將軍怒曰大丈夫終不與老兵同列不肯拜詩謂  
羽曰夫立帝王之業者所用非一昔蕭曹與高祖少小親  
舊而陳韓亡命後至論其班列則韓最居上未聞蕭曹以  
爲嫌今漢王以忠一時之功隆於王室然意之輕重寧當  
與君侯齊乎且王與君侯譬猶一體同休等戚禍福共之  
愚爲君侯不宜計官號之高下爵祿之多少僕一介之使



銜命而來君侯不受拜如是便還但相爲惜此舉動恐有後悔耳羽大感悟遂受拜時羣臣勸昭烈稱尊號詩獨上疏曰殿下以曹操父子偪主篡位故乃羈旅萬里糾合士眾將以討賊今大敵未克而先自立恐人心疑惑昔高祖與楚約先破秦者王之及屠咸陽獲子嬰猶懷推讓況今殿下未出門庭便欲自立邪愚臣誠不爲殿下取也由是忤旨左遷部永昌從事建興三年從諸葛亮南征蔣琬秉政以爲諫議大夫卒於家子立仕晉

李朝字偉南廣漢郫人與弟邵及其季皆有才望時號李氏三龍州舉孝廉爲臨邛令入爲別駕從事建安二十四年羣臣上昭烈爲漢中王其文朝所作也章武三年從帝



東征吳卒於永安邵字永南昭烈定蜀爲州書佐部從事  
建興初丞相諸葛亮辟爲西曹掾亮南征畱爲治中從事  
是歲卒其季亦蚤世朝兄邈字漢南劉璋時爲牛鞞長昭  
烈領益州牧爲從事正歲大會命行酒邈讓昭烈曰振威  
以將軍宗室肺腑委以討賊元功未效先寇而滅邈以爲  
將軍之取鄙州甚爲不宜也昭烈曰知其不宜何以不助  
之邈曰非不敢也力不足耳有司請罪之諸葛亮爲請得  
免久之爲犍爲太守丞相參軍安漢將軍建興六年亮北  
征馬謖前軍敗績亮將殺之邈諫以爲秦赦孟明用霸西  
戎楚誅子玉二世不競失亮意還成都亮薨帝素服發喪  
三日邈上疏曰呂祿霍禹未必懷反叛之心孝宣不好爲

殺臣之君直以至懼其偏臣畏其威故姦萌生亮身擁強  
兵狼顧虎視五大不在邊臣常危之今亮殞歿蓋宗族得  
全西土安靜大小爲慶帝怒下獄死

贊曰曹操父子世濟凶德操旣自比周文王而不亦藉議  
舜禹人神共憤尙稽天誅四海皇皇靡所適從方是時昭  
烈以帝室之胄扶義而起南抵荆楚則荆楚之士從之如  
雲西入巴蜀則巴蜀之人望風而靡此豈人力所能至是  
哉其建大號紹正統允屬天人之望矣而詩之所陳雖幾  
於正然不達時變果足與語權哉故習鑿齒著論非之曰  
創業之君須大定而後王霸纂統之主必速踐祚以繫人  
心故更始尙存而光武舉號夫豈徼利社稷故也昭烈倡




義將以討賊賊強禍大主亡國喪二祖之廟絕而不絕苟  
非親賢孰能紹此祀漢配天非咸陽之比仗正討逆亦何  
推讓之有哉於此時也惟宜速尊有德以奉大統使民忻  
反正世睹舊物則來順者齊心附逆者同懼矣宋人裴松  
之稱爲確論詎不信然

續後漢書卷第十四

續後漢書

卷一











































續後漢書卷第十五

上海郁松年藏本

宋廬陵蕭常著

邑後學

胡芳秋

杜邦浚校梓

列傳第十一

黃李王呂馬張

黃權字公衡巴西閬中人劉璋辟爲主簿時別駕張松建議迎昭烈使伐張魯權諫曰左將軍一世英雄今召至以部曲遇之則不滿其心以賓客禮待之則一國不容兩君客有泰山之安則主有累卵之危可但閉境以俟河清璋不聽出爲廣漢長及昭烈襲取益州遣諸將分下郡縣郡縣望風景附權閉城堅守須璋稽服乃詣降昭烈以爲偏將軍曹操破張魯魯走巴中權進曰若失漢中則三巴不



振此爲割蜀之股臂也於是拜護軍帥諸將迎魯魯已還南鄭北附曹操然卒破杜濩朴胡殺夏侯淵取漢中皆權本謀也昭烈王漢中猶領益州牧以權爲治中從事及將東征吳權諫曰吳人悍而能戰又水軍順流進易退難臣請爲先驅以嘗寇陛下宜爲後鎮帝不從以爲鎮北將軍督江北軍以防魏寇而車駕駐蹕江南及吳將陸遜乘流斷圍王師敗績車駕西歸權以道梗不得還遂陷於魏有司執法白收權妻子帝曰朕負黃權黃權不負朕也待其家如初曹丕謂權曰君欲追蹤陳韓邪對曰臣受漢帝殊遇降吳不可還漢無路是以歸命何古人之慕也不善之累加侍中使之陪乘漢降人或言誅權妻子丕令發喪權



曰往與漢帝及丞相亮推誠相信必能明臣本志傳聞之言未可深信及得後問果如所言昭烈崩問至眾咸賀不而權獨否不察權有局量欲試驚之遣左右急呼權未至催者相屬官屬莫不碎魄而權容止自若後領益州刺史司馬懿淡器之問權曰蜀中如卿輩有幾人權笑而荅曰不圖明公見顧之重也懿與諸葛亮書曰黃公衡快士也每坐起歎述足下不去口延熙三年卒子崇留益州爲尙書郎隨衛將軍諸葛瞻拒鄧艾至涪縣勸瞻速行據險無令敵得入平地瞻猶豫未決崇至流涕會艾長驅而前瞻卻戰至綿竹崇帥厲將士期於必死臨陣遇害

李恢字德昂建寧俞元人仕郡督郵太守董和薦於州未



至聞昭烈自葭萌還攻劉璋恢知璋必敗乃謬稱郡使北  
詣昭烈於縣竹昭烈嘉之從至雒城遣詣漢中說馬超超  
遂納欵成都平昭烈領益州牧以爲功曹書佐主簿後爲  
亡虜誣引有司執之昭烈明其不然更遷別駕從事章武  
元年庾降督鄧方卒帝問恢誰可代者對曰人之才能各  
有長短故孔子曰其使人也器之且夫明主在上則臣下  
盡情是以先零之役趙充國以爲莫若老臣臣竊不自量  
惟陛下察之帝笑曰朕意亦已屬卿矣遂以爲庾降都督  
使持節領交州刺史治平夷縣帝崩高定恣睢於越巂雍  
闐跋扈於建寧朱褒反叛於牂柯丞相亮南征先由越巂  
而恢按道向建寧諸縣大相糾合圍恢軍於昆明時兵少



敵盛又未得亮問恢給謂南人曰官軍糧盡欲規退還吾  
中間久棄鄉里乃今得旋不能復北欲還與汝等同謀故  
以誠相告南人信之圍守稍怠於是出擊大破之追奔逐  
北南至槃江東接牂柯與亮聲勢相連南土平定恢功爲  
多封漢興亭侯加安漢將軍大軍還南夷復叛殺守將恢  
身往撲討鋤盡惡類徙其豪帥於成都賦出畝濃耕牛戰  
馬金銀犀革充給軍資國用以饒建興七年以交州屬吳  
解恢刺史更領建寧太守還居本郡後徙漢中九年卒子  
遺嗣恢弟子球羽林右部督隨諸葛瞻拒鄧艾死於綿竹  
王平字子均巴西宕渠人幼孤鞠於外家何氏隨杜濩朴  
胡詣雒陽假校尉從曹操侵漢中因歸昭烈拜牙門將裨



將軍建興六年屬馬謖先鋒謖舍水上山舉措煩擾平苦  
諫謖不能用大敗於街亭眾潰惟平所領千人鳴鼓自持  
魏將張郃以爲有伏不敢逼於是收合諸營遺棄而還丞  
相亮誅謖及將軍張休李盛奪將軍黃襲等兵平特見褒  
顯加拜參軍兼統五部進討寇將軍封亭侯九年亮圍祁  
山平別守南圍曹叡將司馬懿攻亮張郃拒平平堅守不  
動郃不能克魏延之亂一戰而敗平之功也遷後典軍安  
漢將軍副車騎將軍吳懿屯漢中又領漢中太守進封安  
漢侯代懿督漢中延熙元年大將軍蔣琬駐沔陽更爲前  
護軍署琬府事六年琬還駐涪拜前監軍鎮北大將軍統  
漢中七年春曹芳使其將曹爽帥步騎十餘萬寇漢川前



鋒已至駱口時漢中守兵不滿三萬諸將大驚或曰今力  
不足以拒敵固守漢樂二城遇賊令入比爾間涪軍足得  
救關平曰不然漢中去涪垂千里賊若得關便爲禍也今  
宜先使劉護軍杜參軍據興勢平爲後拒若賊分向黃金  
平帥千人下自臨之比爾間涪軍亦至此計之上也惟護  
軍劉敏與平意同卽施行涪諸軍及大將軍費禕自成都  
繼至魏寇潰走如平所料時鄧芝在東馬忠在南平在北  
境咸著名迹平生長戎旅手不能書而所識不過十字每  
作書皆其口授悉有意理使人讀史漢諸紀傳皆知其大  
義往往論說不失其指遵履法度言不妄發端坐竟日無  
武將之體然性頗狷狹以此損譽十年薨子訓嗣初平同



郡漢昌句扶忠勇寬厚數有戰功功名爵位亞於平官至左將軍封宕渠侯其後張翼廖化竝爲大將軍時人語曰前有王句後有張廖

呂凱字季平永昌不韋人仕郡爲五官掾功曹時雍闓等聞帝崩於永安恣睢益甚都護李嚴與闓書諭以禍福闓復書云天無二日土無二王今天下正朔有三是以遠人皇惑不知所歸其桀驁如此闓又降吳吳遙授永昌太守永昌旣在益州郡之西道路隔絕而郡太守屢易凱與府丞蜀郡王伉帥厲吏民閉境拒闓闓數檄移永昌稱說云云凱曰天降喪亂姦雄乘釁天下切齒萬國悲悼臣妾小大莫不思竭筋力肝腦塗地以除國難伏惟將軍世受漢



恩以爲當糾合部伍率先啟行上以報國家下不負先人  
書功竹帛遺名千載何期臣僕吳越背本就末乎先帝龍  
興海內望風宰臣聰睿自天降康而將軍不觀盛衰之紀  
成敗之符譬如野火在原蹈履河冰火滅冰泮將何所依  
曩者將軍先君雍侯造怨而封竇融知幾歸心世祖皆流  
芳後葉世歌其美今諸葛丞相英才挺出深覩未萌受遺  
託孤翊贊季興與眾無忌錄功棄瑕將軍若能翻然改圖  
古人不難追也惟將軍察焉凱恩威內著爲郡人所信故  
能全其節及丞相亮南征在道而闔已爲高定部曲所殺  
亮至南表曰永昌郡吏呂凱府丞王伉等執忠絕域十有  
餘年雍闓高定偏其東北而凱等守義不與交通臣不意



永昌風俗篤厚乃爾以凱爲雲南太守遷陽亭侯會爲叛  
夷所害子祥嗣而王伉亦封亭侯爲永昌太守後祥及子  
若孫世守永昌

馬忠字德信巴西閬中人幼孤養於外家姓狐名篤旣長  
改焉爲郡吏建安末舉孝廉除漢昌長獠亭之役巴西太  
守閭芝發兵五千人以補軍遣忠部送會帝還永安帝與  
語謂尙書令劉巴曰雖亡黃權復得狐篤世不乏賢也建  
興初丞相亮開府以爲門下督亮南征除牂牁太守先是  
郡丞朱褒反忠承變亂之後撫字經理甚有威惠召爲丞  
相參軍副長史蔣琬署畱府事又領州治中從事明年亮  
出祁山忠詣亮經度戎事軍還督將軍張嶷等討汝山郡



先元十一年南夷豪帥劉胄反侵擾諸郡名庾降都督張翼還以忠代翼遂斬胄平南土加監軍奮威將軍封博陽亭侯初建寧郡害太守正昂縛太守張裔於吳故都督常治平夷縣至忠乃移治味縣處民夷之間又越嶲郡亦久失故地忠帥太守張嶷開復舊郡由是就加安南將軍進封彭鄉亭侯延熙五年還朝奉詔至漢中宣於大司馬蔣琬加拜鎮南大將軍七年春大將軍費禪北禦魏寇畱忠平尙書事禪還乃歸南十二年薨子脩嗣忠爲人寬濟有度量喜詠諧忿怒不形於色然臨事能斷威恩並著以故蠻夷畏而愛之及薨莫不奔赴流涕盡哀爲之立祠張表時之名士清望踰忠閭宇素有功幹於事精敏咸繼忠後

而威譽皆不逮忠

張嶷字伯岐巴西南充國人少爲縣功曹昭烈定益州會  
山寇攻縣縣長倉卒逃去嶷冒白刃救其家卒免於難由  
是顯名州郡召爲從事時郡人龔祿姚伋位至二千石有  
當世名皆與嶷友善建興二年丞相亮北駐漢中廣漢縣  
竹賊張慕等鈔盜軍資剽掠吏民嶷以都尉將兵討之因  
以計斬慕等殲餘黨後以病困家素窶乏廣漢太守何祗  
名爲通厚與嶷初無雅故嶷乃自輦詣祗託以治疾祗傾  
資醫療數年而愈其黨道信義皆此類也爲牙門將從馬  
忠北討汶山叛羌南平四郡蠻夷皆有籌畫戰勝之功武  
都氏王符健請降遣將軍張翼往迎過期不至大將軍蔣



琰淡以爲憂嶷策之曰符健求附款至必無他變聞健弟  
狡黠又夷狄不能同功將有乖離是以稽留耳數日問至  
健弟果將四百戶北附曹叡獨健來歸初丞相亮討越嶲  
高定之後叟夷數反殺太守龔祿焦璜後太守不敢之郡  
僑治安定縣去郡八百餘里時議欲復舊郡除嶷爲太守  
嶷帥所領之郡開示恩信蠻夷頗來降附北徼捉馬最驍  
勁不承節度嶷往討之生縛其帥魏狼乃解縱告諭使招  
懷餘黨表拜狼爲邑侯種落三千餘戶皆安土共職諸種  
聞之降者日至嶷以功賜爵關內侯蘇祁邑君冬逢逢弟  
隗渠等已降復反嶷誅逢逢妻旄牛王女嶷以計原之而  
渠逃入西徼渠勇悍便捷爲諸種所畏服遣所親二人詐



降實取消息嶷覺之許以重賞使爲反間二人遂合謀殺渠渠死諸種皆安又斯都耆帥李求承昔手殺龔祿者嶷求募捕得數其宿惡而誅之始嶷以郡郭宇圯毀更築小塢在官三年徙還故郡繕治城郭夷種男女莫不效役定祚臺登卑水三縣去郡三百餘里舊產鹽鐵漆而夷徼盜據專利嶷卽帥所領奪取置長吏焉嶷之至定祚定祚豪帥狼岑槃木王舅素爲蠻夷所信服忿嶷見侵不肖自詣嶷使壯士數十直往捕至笞殺之而還其尸厚賜種類諭以狼岑之惡且曰毋得妄動動卽族矣種類咸面縛謝過嶷殺牛醺酒重申恩信遂獲鹽鐵之利漢嘉郡界旄牛夷種類四千餘戶其帥狼路欲爲姑壻冬逢報仇遣叔父離



將逢眾預度形勢嶷廉知之逆遣親近齎牛酒勞賜又令  
離姊冬逢妻達意旨離既受賜并見其姊姊弟驩說悉帥  
所領詣嶷嶷厚加賞待遣還旄牛由是輒不爲患郡有舊  
道經旄牛中至成都旣夷且近自旄牛絕道已百餘年更  
由安上地險而遠嶷遣左右齎貨幣賜路并遣路姑諭意  
乃帥兄弟妻子悉詣嶷嶷與盟誓開通舊道千里肅清復  
古亭傳奏封路爲旄牛畷毗王遣使將路朝貢帝於是加  
嶷撫戎將軍領郡如故初嶷見大將軍費禕坦率泛愛待  
信新附太過與書戒之曰昔岑彭帥師來歙仗節咸見害  
於刺客今明將軍位尊權重宜鑒前事少以爲警禕後果  
爲降人郭循所害吳太傅諸葛恪以初破魏寇大舉以圖



進取侍中諸葛瞻丞相亮之子恪從弟也嶷與瞻書曰吳主卽世嗣君幼弱太傅受寄託之重亦何容易夫以周公之親之才猶有管蔡四國流言之變霍光受任亦有燕蓋上官逆亂之謀賴成昭之明以免斯難耳昔聞吳主生殺賞罰不任下人今以垂歿之命卒召太傅屬以後事誠實可慮加吳楚剽急乃昔所記而太傅離少主履敵庭恐非良計長算也雖云綱紀肅然上下輯睦百有一失非明者之慮耶取古則今今古一也自非郎君進忠言於太傅誰復有盡言者旋軍廣農務行德惠數年之中東西竝舉誠不爲晚願深采察恪竟以此夷族嶷之先見率多類此在郡十五年邦域安靜屢表解職延熙十七年召還夷民戀



募扶輿泣涕過旄牛邑邑君襁負來迎追送至蜀郡界其  
督長相率隨嶷朝貢者百餘人嶷至拜盪寇將軍慷慨壯  
烈士人咸多貴之然性簡放時車騎將軍夏侯霸謂嶷曰  
雖與足下疎濶然託心如舊嶷荅曰僕未知子子未知我  
何云託心乎願三年之後徐陳斯言時人善其對曹芳狄  
道長李簡密書請降衛將軍姜維帥師迎之嶷初還朝時  
論以嶷老疾未能偕行嶷自請於帝願肆力中原致身敵  
庭臨發曰臣遭遇聖人受恩過重加以老病常恐一朝殞  
歿孤負榮遇天假之年得與戎事若涼州克定臣爲藩表  
守將有如未捷歿身以報帝爲之悵然姜維帥嶷等因簡  
之資以出隴西旣至狄道簡帥城中吏民出迎軍軍與曹



芳將徐質交戰疑歿於陳然其所殺傷亦過當封其長子  
瑛西鄉侯次子護雄襲爵南土越巂民夷聞疑死無不悲  
慟爲之立祠四時水旱輒祀之孫奕仕晉爲涼州刺史  
贊曰權納忠於劉璋而盡力於昭烈所謂一心事兩君而  
無嫌也雖道窮勢隔淪身異境而流言不惑非其君臣誠  
意相孚詎至是哉恢審去就之宜有先幾之見庾降之命  
慷慨請行自比充國未爲過也平料敵致勝算毋遺策凱  
忠疑綏撫邊郡感懷異俗閭外得人何其盛哉



續後漢書卷第十六

上海郁松年原本

宋廬陵蕭常著

邑後學胡芳秋校梓

杜邦浚

列傳第十二

姜維張翼王嗣

姜維字伯約天水冀人少孤與母居好鄭氏學仕郡上計掾州辟爲從事以父冏昔爲郡功曹值羌戎亂身衛郡將戰歿加維官中郎參本郡軍事建興六年丞相諸葛亮伐曹叡軍向祁山時天水太守適出按行所部維及功曹梁緒主簿尹賞主記梁虔等從行太守聞王師垂至而諸縣響應疑維等有異心於是夜亡保上邽維等覺太守去追隨至城門城門已閉不納維等相率還冀冀亦不入維等



乃俱詣亮會馬謖敗於街亭亮收西縣千餘家及維等歸  
故維與母相失魏以維本無去意故不殺其母妻但繫之  
保官亮辟維爲倉曹掾加奉義將軍封當陽亭侯時年二  
十七亮與留府長史張裔參軍蔣琬書曰姜伯約忠勤時  
事思慮精密觀其才氣永南季常諸人不如也其人涼州  
上士又曰須先教中虎步兵五六千人伯約旣敏於軍事  
又有膽氣深解兵意此人心存漢室而才兼於人畢教軍  
事當遣詣都覲主上後遷中監軍征西將軍亮薨維還成  
都爲右監軍輔漢將軍統諸軍進封平襄侯延熙元年從  
大將軍蔣琬屯漢中琬旣遷大司馬以維爲司馬數帥偏  
師西出遷鎮西大將軍領涼州刺史十年遷衛將軍與大



將軍費禕其錄尙書事是歲汶山平康夷反帥師討定之  
又出隴西南安金城與曹芳將郭淮夏侯霸等戰於洮西  
胡王治無戴等舉部落降維將其人還安處之俄詔假維  
節復出西平不克而還維自以練西方風俗兼負其才武  
欲誘諸羌胡以爲羽翼謂自隴以西可斷而有也每欲興  
師大舉禕常裁制不從與其兵不過萬人禕嘗謂維曰吾  
等不如丞相遠矣丞相猶不能定中夏況吾等乎不如保  
國撫民謹守社稷如其功業以俟能者無爲僥倖而決成  
敗於一舉若不如志悔之不及禕薨維帥師數萬人出石  
營經董亭圍南安曹芳將雍州刺史陳泰來解圍至雒門  
維糧盡還明年加督中外諸軍事復出隴西狄道長李簡



舉城降進圍襄武與曹芳將徐質交戰斬首破敵質軍敗走維乘勝多所降下拔河間狄道臨洮三縣民還十八年復與車騎將軍夏侯霸等俱出狄道大破曹髦雍州刺史王經於洮西死者數萬人經走保狄道城圍之魏軍來援維退屯鍾題明年就遷大將軍勒軍與鎮西大將軍胡濟期會上邽濟失期不至故維軍大敗於段谷眾庶由是怨譏而隴以西亦騷動維引咎求自貶降後將軍行大將軍事魏諸葛誕憤司馬昭廢主專國舉兵淮南欲誅昭昭使分關中兵東下維欲乘虛向秦川復帥數萬人出駱谷徑至沈嶺時長城積穀甚多而守兵少聞維且到眾皆皇駭昭使司馬望拒王師鄧艾亦自隴西至皆軍於長城維前



屯芒水皆倚山爲營維數下挑戰望艾不應景耀元年維  
聞誕敗乃還復拜大將軍初昭烈畱魏延鎮漢中皆實兵  
諸圍以禦外寇寇若來攻使不得入及興勢之役王平禦  
曹爽等皆承此制維建議以爲錯守諸圍雖合周易重門  
之義然適可禦敵不獲大利不若使聞寇至諸圍皆歛兵  
聚穀退就漢樂二城使寇不得入平地且重關鎮守以扞  
之有事之日令游軍竝進以伺其虛敵攻關不克野無散  
穀千里運糧自然罷乏引退之日然後諸城竝出與游軍  
并力搏之此殄寇之術也於是令督漢中胡濟卻駐漢壽  
監軍王含守樂城護軍蔣斌守漢城又於西安建威武衛  
石門武城建昌臨遠皆立圍守五年維帥師出侯和爲鄧



艾所敗還駐沓中維本羈旅託國連年攻戰功績不立又  
惡宦人黃皓恣睢專政啟帝欲殺之帝曰皓趨走小臣耳  
往董允切齒吾嘗懷之君何足介意因敕皓詣維謝時右  
將軍閭宇與皓親比皓陰欲廢維用宇維亦疑之故每憂  
懼不復還都炎興元年維上疏曰聞鍾會治兵關中規欲  
犯順宜竝遣張翼廖化督諸軍分護陽安關口陰平橋頭  
以防未然皓信巫鬼謂寇終不能自致啟帝寢其事而羣  
臣不知及鍾會將向駱谷鄧艾將入沓中然後遣右車騎  
廖化詣沓中爲維援左車騎張翼輔國大將軍董厥等詣  
陽安關口以爲諸圍聲勢比至陰平聞諸葛緒已向建威  
故駐軍待之月餘維旣爲鄧艾所敗還屯陰平鍾會攻圍



漢樂二城遣別將犯關口蔣舒開城出降傅僉格鬪而死  
會攻樂城不克聞關口已下長驅而前翼厥甫至漢壽維  
化亦舍陰平而退適與翼厥合皆還保劍閣以禦會會與  
維書達意維不荅列營守險會不能克糧運懸遠將議還  
師而鄧艾自陰平由景谷道旁入遂敗諸葛瞻於綿竹會  
帝用譙周之計而國亡且手敕維解甲維無所歸乃詣會  
於涪將士咸怒拔刀斫石會厚待維等謂長史杜預曰以  
伯約比中土名士公休太初不能過也會既誣劾鄧艾檻  
車徵艾會因率維等詣成都自稱益州牧陰懷異圖維知  
其意謂可締成其禍以圖興復乃詭說會曰聞君自淮南  
以來算無遺策晉道克昌皆君之力今復定漢威德振世



民高其功主畏其謀欲以此安歸乎夫韓信不肯漢於擾攘以見疑於既平大夫種不從范蠡於五湖卒伏劍而死彼豈暗主愚臣哉利害使之然也今君大功既立大德已著何不法陶朱公泛舟絕迹全功保身登峨眉之巔而從赤松子游乎會曰君言遠矣我不能行更言其次維曰其它則君知力之所能及無煩於老夫矣由是情好日篤維復說會誅北來諸將徐欲圖會盡坑魏卒興復漢室密表帝曰願陛下忍數日之辱臣欲使社稷危而復安日月幽而復明惟陛下察之會欲授維兵五萬人使爲前驅而會爲其將士所殺維亦遇害蜀人莫不傷之卻正著論曰姜伯約據上將之重處羣臣之右第舍敝陋資財無餘側室



無妾媵之褻後庭無聲樂之娛衣服取給輿馬取備飲食  
節制不奢不儉官給其用隨手散盡察其所以然者非以  
激貪厲濁抑情自割也直謂如是爲足不在多求凡人之  
談常譽成毀敗扶高抑下咸以維投措無所身死宗滅以  
是貶削不復料擿異乎春秋褒貶之義矣如維之樂學不  
倦清素節約自一時之儀表云維昔所與俱至漢梁緒官  
至大鴻臚尹賞執金吾梁虔大長秋皆前卒

張翼字伯恭犍爲武陽人四世祖司空皓曾祖廣漢太守  
綱皆著名迹昭烈領益州牧以翼爲書佐建安末舉孝廉  
爲江陽長徙涪陵令拜梓潼廣漢蜀郡太守建興中爲康  
降都督綏南中郎將持法太嚴不得殊俗驩心耆帥劉胄



作亂翼舉兵討之胄垂破會被徵當還僚屬咸以爲宜馳騎卽罪翼曰不然吾以蠻夷蠢動不稱職故還耳然代者未至吾方臨戰場當運糧積穀爲滅賊之資豈可以黜退之故而廢公家之務乎於是統攝不懈代到乃發馬忠因其成規卒破滅胄丞相亮聞而善之亮出武功以翼爲前將軍都督領扶風太守亮薨拜前領軍追論劉胄功賜爵關內侯延熙初入爲尙書稍遷督建威假節進封都亭侯征西大將軍十八年與衛將軍姜維俱還都維議復出軍翼與維廷爭以爲國匱民勞不宜黷武維不聽帥翼等行進鎮南大將軍維至狄道大破曹髦雍州刺史王經於洮水死者萬計翼曰可以止矣不宜復進進或毀此大功



維大怒曰爲蛇畫足維竟圍經於狄道城不能破而翼建  
異論維心雖與翼不善然常牽率偕行翼亦不得已而往  
景耀二年遷左車騎將軍領冀州刺史炎興元年與維皆  
在劍閣同詣鍾會於涪明年正月爲亂兵所害子微篤志  
好學官至廣漢太守

王嗣字承宗犍爲資中人其先延熙世以功業顯舉孝廉  
稍遷西安圍督汶山太守加安遠將軍綏集羌胡莫不從  
化諸種素傑惡者亦皆降附大將軍姜維每北征羌胡出  
馬牛羊氈毳及義穀軍國賴以有濟遷鎮軍領郡如故後  
從維北征爲流矢所中卒戎夷會葬贈送數千人皆號呼  
涕泣嗣爲人溫厚篤至與物無忤小大皆愛信之其子若



孫羌胡見之如骨肉恩德感人如此

贊曰漢之亡人皆咎維之好戰而不知其亟戰也有故蓋  
自昭烈以來無歲不用兵諸葛亮雖爲相國而身居邊閫  
建興之初南中旣定卽加兵於魏自六年至十二年凡七  
戰豈得已而不已哉琬禪繼之亦未始忘戰蓋吾戢兵自  
守彼必謂吾怯適以示弱而啟其兼并之漸耳方天下未  
定以戰爲守理固然也亮等且不能保其不戰而以議維  
可乎然則漢之亡非維之罪也帝也內不惑於黃皓外不  
偏聽於譙周遽至於亡乎鄉使維晚節之計遂行盡戮魏  
將殺鍾會而謀興復直反手耳天不祚漢謂之何哉



續後漢書卷第十七

上海郁松年原本

宋廬陵蕭 常著

邑後學 胡芳秋 校梓

列傳第十三

楊許孟來尹邵

楊戲字文然犍爲武陽人少與巴西程祁巴郡楊汰蜀郡張表竝知名戲每推祁爲冠丞相諸葛亮深知之年二十餘由州書佐爲督軍從事職典刑獄論法決疑號稱平允府辟爲主簿亮薨爲尙書右選部郎刺史蔣琬表爲治中從事史琬以大將軍開府又辟爲東曹掾遷南中郎參軍副庾隆都督領建寧太守以疾召還拜護軍監軍出領梓潼太守入爲射聲校尉所至清約不煩延熙末從大將軍



姜維至芒水戲心素不服維每醉多傲弄之辭維外寬內  
忌不能堪軍還有司承旨劾戲免爲庶人景耀四年卒戲  
性雖簡情未嘗以甘言加人過情接物書符指事其辭尤  
略然篤於故舊與巴西韓儼黎範相親厚後儼痼疾而韜  
亦以無行廢戲經紀振卹恩好如初張表字伯達有風儀  
名位俱與戲齊仕至尙書庾降督後將軍先戲卒祁字公  
宏沘字季儒亦早世戲以延熙四年著季漢輔臣贊其所  
頌述陳壽多掇取以載於漢志其或著其人而不著其事  
蓋壽崇僭僞而抑漢氏故不盡錄云

許慈字仁篤南陽人胡潛字公興魏郡人慈師事劉熙善  
鄭氏學治易尙書三禮毛詩論語建安中與許靖俱自交



州至潛雖學不該洽然卓犖強識祖宗制度喪紀五服之數皆指掌畫地有可采者昭烈定蜀承喪亂之後學業衰廢乃鳩合典籍沙汰眾學慈潛竝爲博士與孟光來敏等典掌文學爲庶事草創動多擬議慈潛更相詰難謗讟忿爭甚至角力昭烈因大會酒酣使倡優爲二子之容效其訟鬬之狀初以詞義相難尋以挺刃相向用感切之潛先歿慈後累遷大長秋卒子勛傳其業復爲博士

孟光字孝裕河南雒陽人董卓之亂入蜀博物識古研究典籍銳意三史多識漢家舊典好公羊春秋而譏訶左氏每與來敏爭此二義至於謹昨昭烈定益州拜議郎與許慈等竝掌制度建興中累遷大司農延熙九年秋大赦光



於朝顯責大將軍費禕曰夫赦者偏枯之物非治世所宜有也衰弊窮極必不得已然後乃可權而行之耳今主上仁賢百僚稱職有何旦夕之危倒懸之急而數施非常之恩以惠姦宄乎又鷹隼始擊而更原宥有罪上犯天時下違人理老夫耄朽不達治體竊謂斯法難以經久豈具瞻之高美所望於明德哉禕但顧謝蹠蹠而已光之指摘失政類此故執政重臣心不能說太常廣漢鐔承光祿勲河東裴雋年皆在光後而超據上列獨光蹭蹬蓋以此故祕書郎卻正數從光質疑義光因問正皇太子所習讀與其情性好尚正荅曰奉親虔恭夙夜匪懈有古世子風待遇羣僚舉動出於仁恕光曰如君所言皆家戶所有耳吾今



所問欲知其權略知術何如也正曰世子之道在於承志竭懽既不得妄有所施爲且知術藏於胸中權略應時而發此之有無焉可預計光解正謹敕不爲放言乃曰吾好直言無所回避每彈射利病爲世所疾省君意亦若不喜吾言然語有次今天下未定知意爲先然不可強致也此儲君讀書寧能效吾等竭力博識以待訪問如博士挾策講試以求爵位邪當務其急者正深謂光言爲然坐事免官年九十餘卒裴雋字奉先其弟潛事曹叡爲尙書來敏字敬達義陽新野人歛之後也父豔好學下士開館聚徒少厯顯仕靈帝時爲司空敏以避亂入蜀涉獵典籍善左氏春秋尤精蒼雅訓詁之學好是正文字昭烈定益



州以爲典學校尉及立皇太子擢家令建興初爲虎賁中郎將丞相亮駐漢中辟爲軍祭酒輔軍將軍以事去官尋爲大長秋復以累免後累遷光祿大夫又以過黜前後數貶斥皆以語言輕脫舉動過差時孟光亦以樞機不謹議論干時然猶愈於敏俱以耆年宿學見禮於世而敏荆楚名族東宮舊臣特加優遇故屢廢而復起後以爲執慎將軍欲其因官自警景耀中卒時年九十七子忠博學有父風與尙書向充等竝能協贊大將軍姜維維善之以爲參軍

尹默字思潛梓潼涪人益部多貴今文而不崇章句默乃游荊州從司馬徽宋忠等受古學博綜經史又專精於左



氏春秋自劉歆條例鄭眾賈逵父子陳紀服虔注說無不  
淹貫昭烈定益州以爲勸學從事及立皇太子除僕射以  
左氏傳授皇太子建興初拜諫議大夫丞相亮駐漢中辟  
爲軍祭酒亮薨還都拜太中大夫卒子宗傳其業爲博士  
同邑李譔者字欽仲父仁與默俱受學於司馬徽宋忠譔  
傳其父學又從默研究精義五經諸子無不該貫博通技  
藝算術卜筮醫藥弓弩機械之巧始爲州書佐尙書令史  
延熙元年爲太子庶子太子愛其多知甚說之然體輕脫  
好戲嘲故人不加重著古文易尙書毛詩三禮左氏春秋  
太元指歸皆依準賈馬異於鄭元與王氏曠隔初不相聞  
而其所述意旨多同景耀中卒時又有漢中陳術字申伯



亦博學多聞著釋問七篇益部耆舊傳及志仕歷三郡大  
守宋忠者字仲子南陽人其子與魏諷謀誅曹操不克父  
子俱遇害

卻正字令先河南偃師人祖儉靈帝末爲益州刺史因家  
焉父揖爲將軍孟達營督從達北去正本名纂安貧好學  
博覽載籍弱冠能屬文爲祕書吏轉令史遷郎至令淡於  
榮利自典中祕與宦人黃皓比屋三十年未嘗苟合以故  
官不過六百石乃依倣先儒假文見意名曰釋譏時謂可  
繼崔駰達旨其辭曰或有譏予者曰聞之前記夫事與時  
竝名與功偕然則名之與事前哲之急務也是故創制作  
範匪時不立流稱垂名匪功不記名必須功而乃顯事亦



俟時以行止身歿名滅君子所恥是以達人研道揆蹟索  
微觀天運之符表考人事之盛衰辯者馳說知者應機謀  
夫演略武士奮威雲合霧集風激電飛量時揆宜用取世  
資小屈大信存公忽私雖尺枉而尋直終揚光以發輝也  
今大盜未平九有未乂悠悠四海嬰丁禍敗嗟道義之沈  
塞愍生民之顛沛此誠聖賢拯救之秋烈士立功之會也  
吾子以高明之才珪璋之質兼覽博窺畱心道術無遠不  
致無幽不悉挺身致命幹茲奧祕躊躇紫闥喉舌是執九  
考不移有入無出究古今之真僞計時務之得失雖時獻  
一策偶進一言釋彼官責慰此素飡固未能輸竭忠款盡  
瀝胷肝排方入直惠彼黎元俾吾徒草鄙竝有聞焉盍亦



綏衡緩轡回軌易塗輿安駕肆思馬斯徂審厲揭以投濟  
要夷庚之赫撫播秋蘭以芳世副吾徒之彼圖不亦盛歟  
予聞而歎曰嗚呼有若云乎邪夫人心不同實若其面子  
雖光麗旣美且艷管窺筐舉守厥所見未可以言八紘之  
形埒信萬事之精練也或人率爾仰而言曰是何言與是  
何言與予應之曰虞舜以面從爲戒孔聖以說已爲尤若  
子之言良我所思將爲吾子論而釋之昔在鴻荒矇昧肇  
初三皇應籙五帝承符爰暨夏商前典攸書姬衰道缺伯  
者翼扶嬴氏慘虐吞嚼入區於是縱橫雲起狙詐如星奇  
邪蠱動知故萌生或飾真以讐僞或挾邪以干榮或詭道  
以要上或鬻技以自矜背正崇邪棄直就佞忠無定分義



無常經故執法窮而慝作斯義敗而姦成呂門大而宗滅  
韓辯立而身刑夫何故哉利回其心寵耀其目赫赫龍章  
鑠鑠車服踰幸苟得如反如仄淫邪荒迷恣睢自極和鸞  
未調而身在轅側庭宇未踐而棟折榱覆天收其精地縮  
其澤人弔其躬鬼芟其額初升高岡終隕幽壑朝含榮潤  
夕爲枯魄是以賢人君子深圖遠慮畏彼咎戾超然高舉  
寧曳尾於塗中穢濁世之休譽彼豈輕主慢民而忽於時  
務者哉蓋易著行止之戒詩有靖共之歎乃神之聽之而  
道使之然也自我大漢應天順民政治之隆皓若陽春俯  
憲坤典仰式乾文播皇澤以熙世揚茂化之醞醕君臣履  
度各守厥真上垂詢納之宏下有正救之法士無虛華之



寵民有一行之迹粲然疊疊尙此忠益然而道有隆窳物  
有興廢有聲有寂有光有翳朱陽否於素秋元陰抑於孟  
春羲和逝而望舒係運氣匿而耀靈陳沖質不永桓靈墜  
敗英雄雲布豪傑益世家挾殊議人懷異計故縱橫者歟  
披其胸狙詐者暫吐其舌也今天綱已綴德殖西鄰丕顯  
祖之宏見繫好爵於士人興五教以訓俗豐九德以濟民  
肅明祀以禱祭幾皇道以輔真雖跼者未一僞者已分聖  
人垂戒蓋均無貧故君臣協美於朝黎庶忻戴於野動若  
重規靜若疊矩濟濟偉彥元凱之倫也有過必知顏子之  
仁也侃侃庶政冉季之治也鷹揚鸞騰伊望之事也總羣  
俊之上略含薛氏之三計敷張陳之祕策故力征以勤世



援華英之不皇豈暇脩枯籜於榛穢哉然吾不才在朝累  
記託身所天心焉是恃樂滄海之廣深歎嵩嶽之高峙聞  
仲尼之贊商感鄉校之益已彼平仲之和羹亦進可而替  
否故矇冒瞽說時有攸獻譬適人之有采於市間游童之  
吟詠乎疆畔庶以增廣福祥輸力規諫若其合也則以聞  
協明進應靈符如其違也自我常分退守已愚進退任數  
不矯不誣循性樂天夫何恨諸此其所以旣入不出有而  
若無者也狹屈氏之常醒濁漁父之必醉溷柳季之卑辱  
福夷叔之高懟合不以得違不以失得不充拙失不慘慙  
不樂前以顧軒不就後以慮輕不粥譽以干澤不辭愆以  
屈紃何責之釋何飡之卹何方之排何直之入九考不移



固其所執也方今朝士山積髦俊成羣猶鱗介之潛乎巨海毛羽之集乎鄧林游禽逝不爲之渺浮魴臻不爲之殷且陽靈幽於唐葉陰精應於商時陽旰請而鴻災息桑林禱而甘澤滋行止有道啟塞有期我師遺訓不怨不尤委命恭已我又何辭辭窮路殫將反初節綜墳典之流芳尋孔氏之遺軌綴微辭以存道憲先軌而投制躋叔肝之優游美疎氏之遐逝收止足以言歸汎浩然以容裔欣環堵以恬娛免咎悔於斯世顧茲心之未泰懼末途之泥滯仍求激而增憤肆中懷以告誓昔九方考精於至貴秦牙沈思於殊形薛燭察寶以飛譽瓠梁託絃以流聲齊隸拊髀以濟文楚客潛寇以保荆雍門援琴而託說韓哀秉轡以



馳名廬敖翱翔乎元闕若士竦身於雲清予實不能齊技  
於數子故乃湛然守已而自寧炎興後從帝北遷帝慨然  
恨知正之晚晉咸寧中卒所著詩論賦之屬凡百篇

贊曰戲自視太高不以辭色假人而篤於故舊有足尙也  
其贊述時髦商較尤公賢於陳壽遠矣慈潛數子皆刻意  
經學然或以忌疾見嗤或以輕脫獲戾豈孔子所謂不得  
中行而與之者歟正方正自將實配其名魯無君子斯焉  
取斯

續後漢書卷第十七





續後漢書卷第十八

上海郁松年原本

宋廬陵蕭常著

邑後學胡芳秋杜邦浚校梓

列傳第十四

譙周黃皓

譙周字允南巴西西充國人幼孤篤學家貧未嘗問資產  
諷誦有得欣然獨笑以忘寢食研精六經尤工書札亦通  
天文而不加意諸子文章非心所好不觀也身長八尺容  
止甚朴性誠實不矯飾無造次辯論之才然潛識內敏丞  
相諸葛亮領益州辟爲勸學從事初謁亮左右皆笑其朴  
野有司請治笑者亮笑曰吾尙不能忍蔣琬領刺史徙典  
學從事尋爲太子僕轉家令帝頗出游觀增廣聲樂周上

疏曰今漢遭厄運天下分裂雄哲之士思望之時也陛下  
天資至孝喪踰三年言及涕隕雖曾閔不過也敬賢任才  
使之盡力有踰成康故天下和一小大戮力然臣願陛下  
復廣人所不能爲者理冤獄節財用遵法度夫憂責深者  
不暇盡樂先帝之志未成誠非盡樂之時願省減樂官及  
後宮所增造但素脩先帝所施下爲子孫節儉之教徙中  
散大夫猶侍太子時軍旅數起百姓彫瘁周與尙書令陳  
祗論其利害退而書之謂之仇國論其辭曰有高賢卿者  
問於伏愚子曰今國家未定上下勞心往古之事能以弱  
勝强者其術何如伏愚子曰吾聞之處大無患者常多慢  
處小有憂者常思善多慢則生亂思善則生治理之常也



故周文養民以少取多勾踐卹眾以弱斃強此其術也賢卿曰曩者項強漢弱相與戰爭無日寧息然項羽與漢約分鴻溝爲界各欲歸息民而張良以爲民志既定則難動也帥兵追羽終斃項氏豈必由文王之事乎彼方有疾吹我因陷其邊陲覬增其疾而斃之也伏愚子曰當商周之際王侯世尊君臣久固民習所專深根者難拔據固者難遷當此之時雖漢祖安能伏劍鞭馬而取天下乎自秦罷侯置守之後民罷秦役天下土崩或歲改主或月易公鳥驚獸駭莫知所從於是豪強竝爭虎裂狼分疾搏者獲多遲後者見吞今我與彼皆傳國易世矣旣非秦末鼎沸之時實有六國竝據之勢故可爲文王難爲漢祖夫民罷勞



則騷擾之兆生上慢下暴則瓦解之形起諺曰射幸數跌  
不如審發是故知者不爲小利移目不爲意似改步時可  
而後動數合而後舉故湯武之師不再戰而克誠重民勞  
而度時審也如遂極武黷征土崩勢生不幸遇難雖有知  
者將不能謀之矣若乃奇變縱橫出入無間衝波截轍超  
谷越山不由舟楫而濟孟津者我愚子也實所不及後遷  
光祿大夫位亞九列周雖不與政事以儒行見禮時訪大  
議輒據經以對而後生好事者亦就質所疑焉炎興元年  
曹奐相國司馬昭欲代魏遣其黨鍾會鄧艾等犯漢艾克  
江油至陰平時不虞艾由它道入朝議以南中七郡阻險  
斗絕易以自守欲奔南以待諸將之援而周獨立異議國



遂以亡未幾而鄧艾鍾會等皆敗又明年而魏滅有識君子莫不深恨之自晉孫綽孫盛皆精於推論者竝著說以咎周云

贊曰春秋之義國君死社稷故曰君爲社稷死爲社稷亡言不可棄社稷苟生而獨存也予觀譙周之議竊悲夫漢之所以亡而周之罪有不容誅者矣彼曹氏之賊而吾不共戴天之讐也豈有身爲萬乘之主自屈於寇讐效匹夫賤人之見忍恥以求活哉是時諸將擁兵在外尙不下數萬不浹日可檄召而至有如不捷移蹕南幸以待四方勤王之師魏兵遠來勢不久留吾躡其後或能取償焉未可知也昔高帝幾落項籍手者屢矣而卒能敗籍者不以亟



敗自沮也且鍾鄧之善用兵孰與項籍縣竹之敗孰與成  
臯之跳諸葛瞻之死又孰與太公呂后之爲楚得況斯民  
戴漢之心未已姜維之詣會諸將憤怒至拔刀斫石勢雖  
敗而人猶思奮奈何獨徇一妄書生之言效匹夫賤人之  
見遽爲亡國之舉彼周也平日議論已不右漢事出倉卒  
固宜若此此孔子所謂一言而喪邦也歟使是時復有一  
男子若北地王譔者出力爭於朝指畫利害斬周以豐鼓  
君臣一心卽厲將士背城一戰尙庶幾不亡悲夫

黃皓者宦人也不知其所從來便辟佞慧得幸少帝侍中  
董允惡其爲人皓亦畏允不敢肆終允之世官不過黃門  
丞允卒陳祗代允侍中與相表裏遷黃門令始與政竊弄



威柄無所顧憚大將軍姜維班在祇上常將兵居外皓間之於帝帝以是外敬維而內親祇故祇之權重於維尋遷中常侍奉車都尉與右將軍閻宇尤親狎謀欲廢維而用宇維亦疾其專敬帝欲殺之帝曰皓趨走小臣耳往董允切齒吾嘗恨之君何足介意維出帝敕皓詣維謝維懼其言之過乃詭說皓求沓中地種麥以避其偏皓既專政眾多附之甘陵王承帝弟也皓惡而譖之不得朝請者至十餘年祕書令卻正性方介不爲皓所喜典中祕三十年不得遷吏部郎羅憲清脩自守未嘗造其門左遷憲巴東太守侍中尙書令樊建雖不能有所糾正亦拒而不與通炎興元年夏魏司馬昭將使鍾會鄧艾犯漢中大將軍維表



帝遣張翼廖化等督諸軍分護陽安關口陰平橋頭以防未然皓信巫鬼謂寇終不能自致白帝寢其事而羣臣不知及會將向駱谷艾將入沓即始遣翼等已無及矣艾自蜀聞其姦險收繫將殺之乃潛賂艾左右得免先是諸葛瞻與艾戰於涪死焉其子尙歎曰父子荷國恩不能早斬黃皓以致覆國安用生爲馳赴魏軍而死後晉司空張華問李宓少帝何如主宓曰可次齊桓華問其故宓曰齊桓得管仲而伯用豎刁而蟲流少帝委諸葛亮而制魏用黃皓而喪國成敗一也

贊曰嗚呼自古人主寵任宦寺小則亂治大則覆國無一幸免者其始固未見其害至其末流則不可救藥何哉人



主朝夕所親昵導諛獻笑使巧側媚既有以蠱其心而又  
時進一言建一策陽示忠勤而陰持其政柄世主方且安  
之而不悟乃若外廷之臣進見有時動以禮法劘其上使  
不得少肆意於其間宦寺之任安得而不專其勢安得而  
不重是以亂亡相尋於後世況如少帝之於黃皓者哉昔  
秦之末趙高用事項籍威振諸侯章邯使請事咸陽留司  
馬門三日不得見鍾鄧之師深入漢境皓方蒙塞主聽而  
姜維諸將無所施其知力其事同一轍然則刀鋸熏腐之  
餘果可寵任也哉故東京之禍基於曹騰之說梁冀而成  
於張讓之錮鉤黨唐之衰也始於明皇之用高力士而肅  
宗之不終孝道則以李輔國代宗之再失京師則以程元



振敬宗之不克考終則以王守澄由穆宗至昭宗凡八世而爲宦寺所立者七君至自謂定策國老門生天子且相戒以毋使人主觀書恐其親近儒生知古今治亂興亡之所自而疎遠其屬世主徒以其容說之爲善孰知其禍之至此哉三代盛時初未聞有宦寺之禍非屏絕其類而不使之供掃除之役也所以制之者有其道耳周官寺人內小臣內豎之屬皆統於冢宰而宮伯宮正則又皆以士人爲之烏有如後世寵任之過也哉故備著之以爲世戒



續後漢書卷第十九

上海郁松年原本

宋廬陵蕭 常著

邑後學

胡芳秋 杜邦浚 校梓

列傳第十五

孝友

人之所重莫大於孝推以事君則爲忠故先之以孝友而忠義次之潛德之士重於爲己而無意於斯人則又次之傳曰德成而上藝成而下故以方技終焉

李密字令伯一名虔犍爲武陽人父朱提太守早亡母何他適密時年數歲感戀深重因以成疾祖母劉躬自撫養密旣長奉事以孝謹聞劉疾卽涕泣侍側未嘗解衣藥餌必先嘗而後進暇則講學忘倦師事譙周周門人方之游



夏博貫經史尤好左氏春秋州辟從事入爲尚書郎大將軍主簿太子洗馬奉使至吳孫權問漢馬多少對曰官用有餘人間自足權與羣臣汎論道義謂寧爲人弟密曰願爲人兄權曰何以言之密曰爲兄供養之日長權與羣臣皆稱善後仕晉餘事見晉史

孟宗字恭武江夏人後以避孫皓字更名仁少從南陽李肅學其母爲作厚蓐大被或問其故曰小兒無德致客學者多貧故爲廣被庶得氣類相接也宗有志於學早夜不懈肅奇之曰宰相器也初爲吳驃騎將軍朱據軍吏居營中旣不得志夜雨屋漏因起涕泣以謝其母母曰第當勉之何足泣也據聞之使爲鹽池司馬能自結網捕魚作鮓



以寄母母因還之曰汝爲鹽官而以鮓寄我非避嫌也遷  
吳令時科禁不得將家之官每得時物必以寄母不取先  
食及母亡犯禁委官奔赴已而自拘於武昌以聽刑陸遜  
表其素行力爲之請得減死初母性嗜筍方冬宗入竹林  
哀歎筍爲之生得以供母人以爲至孝所感累遷光祿勳  
孫皓五年以右御史大夫拜司空八年卒

陳表字文興吳將軍武之庶子也少知名與顧譚張休等  
並侍東宮遷太子中庶子翼正都尉兄脩旣歿表母事嫡  
母不謹表謂母曰兄不幸早世表主家事當奉嫡母母能  
爲表屈意承順嫡母者至願也若不能表當事嫡母出別  
居耳二母感悟雍睦無間言表於大義類如此餘事詳見



其父傳

張範字公儀河內脩武人性簡淡辟命無所就弟承字公先董卓之亂範與承避地揚州初範子陵承子戢皆爲山東賊所掠範徑詣賊請二子賊以陵還之範謝曰諸君相還兒厚矣夫人情雖愛其子然吾憐戢之小願以陵易戢賊義其言悉以還之袁術厚禮辟召稱病不往術亦不强屈也曹操嘗遣使迎範範留彭城遣承詣操操表爲諫議大夫操自荊州還見之於陳以爲議郎參丞相軍事非其志也操嘗令範及邴原與其子丕居守建安十七年卒承官終於丞相掾

贊曰李密孟宗俱以孝謹稱儒學顯微母之賢詎能成令



名哉密之論願爲人兄聖人復起斯言不廢而陳壽皆不爲之傳何也表以奉嫡母而悟其母範以其子而得弟之子義之感人如此哉





續後漢書卷第二十

上海郁松年原本

宋廬陵蕭常著

邑後學胡芳秋校梓

列傳第十六

忠義

金禕字德偉京兆人父旋由議郎遷中郎將出爲武陵太守卒官禕自以世爲漢臣由日磾討莽何羅忠誠顯著名節累葉憤曹操將移漢鼎有志興復遂與少府耿紀司直韋晃太醫令吉本本子邈邈弟穆等合謀誅操紀字季行少有美名爲丞相掾操甚敬異之遷侍中守少府邈字文然穆字思然以禕慷慨有日磾之風又與操長史王必善相與慕從時關羽勢方張而操在鄴畱必典兵督許下禕



與諸人定計誅必迎天子以攻操乃使邈等帥雜人及家  
僮千餘夜燒營門攻必禕復遣人爲內應射必中肩必不  
知攻者爲誰以素與禕善走詣禕大呼德偉禕家謂爲邈  
等應曰王長史已死乎卿曹事立矣必更由他路走南城  
會天明邈等眾散故敗被收將死紀大呼曰逆賊曹操恨  
吾不自主意竟爲羣兒所誤耳晃等皆遇害後十餘日必  
竟以劊死時建安二十三年正月也

魏諷字子京濟陰人才名籍甚傾動京師鍾繇素重之辟  
爲相國西曹掾常憤曹操欲篡漢潛結義勇之士與長樂  
衛尉陳禕列侯張泉等謀襲鄴誅操興復漢室未及期禕  
懼白其事爲操所害死者數十百人義士莫不憤惋



傅彤義陽人從昭烈定益州爲將軍獠亭之役王師敗績  
軍退彤斷後拒戰吳兵追及語彤令降彤罵曰吳狗安有  
漢將軍降者遂戰死詔除子僉爲左中郎果遷關中督炎  
興元年鍾會犯漢樂二城遣別將攻關口有蔣舒者初爲  
武興督御軍無法詔使代之留助守漢中舒嘗怨望會魏  
寇來攻舒欲出降乃詭謂僉曰今賊至不擊而閉城自守  
非良圖也僉曰受命保城惟全爲功今違命出戰若喪師  
負國死無益也舒曰子以保城獲全爲功我以出戰克敵  
爲功請各行其志遂帥眾出僉謂其戰也至陰平以降胡  
烈烈乘虛襲城僉格鬪而死論者嘉其父子奕世忠義後  
晉武帝詔曰漢將軍傅僉前在關城身死不顧僉父亦盡



節於漢天下之善一也豈由彼此以爲異哉昭烈之入益州有馮習休元張南文進者皆就獠亭之役二人皆戰死諸葛瞻字思遠丞相亮子也幼慧爽亮嫌其蚤成恐不爲重器年十七尙公主拜騎都尉明年爲羽林中郎將累遷射聲校尉侍中尙書僕射加軍師將軍工書強識國人追思亮咸愛其才敏每朝廷有善政雖非瞻所建明皆轉相語曰諸葛侯之所爲也故聲聞洋溢景耀四年爲行都護衛將軍與董厥竝錄尙書事司馬昭遣鄧艾來寇自陰平由景谷道旁入瞻督諸軍至涪前鋒退屯緜竹艾遺書誘瞻瞻怒斬其使遂戰歿時年三十七其長子尙歎曰父子荷國厚恩不早斬黃皓以至覆國用生何爲馳赴艾軍而



死尙弟京仕晉積官至江州刺史陳壽著瞻傳謂瞻與蔣  
厥等當國姜維窮兵於外瞻厥等不能有所匡正按孫盛  
記曰瞻厥等以維好戰無功弊國殄民表帝召還爲益州  
刺史以閻宇代維事雖不行而猶有瞻表且云壽嘗爲瞻  
吏爲所笞辱故歸過於瞻云

程畿字季然巴西閬中人也劉璋時爲漢昌長縣有賓人  
種類剛猛昔高帝以定關中時巴西太守龐羲以天下方  
亂郡宜有武備頗招集部曲有讒於璋言羲欲叛璋陰疑  
之羲聞甚懼將謀自守遣畿子郁索賓兵自助畿報曰卿  
合部曲本不欲叛雖有讒間要須盡誠若必懼罪遂懷異  
志非畿之所聞并敕郁曰我受州恩當爲州牧盡節汝爲



郡吏當爲太守效力不得以吾故有異志也義又使人告  
畿曰爾子在郡若不從太守家將及禍畿曰昔樂羊爲將  
飲子之羹非父子無恩大義然也今雖復羹吾子吾必飲  
之義知畿必不爲己用自歸於璋璋聞之遷畿江陽太守  
昭烈領益州牧辟爲從事祭酒後征吳王師敗績泝江而  
還或告之曰追兵且至宜解舟輕去乃可以免畿曰吾在  
軍未嘗爲敵走況從天子而見危廢命哉追者遂及畿船  
畿身執戟戰敵船有覆者俄而眾人至遂遇害子祁字公  
宏蚤慧而天事見楊戲傳

嚴顏史逸其字與其所從來劉璋時爲巴郡太守初璋召  
昭烈至郡顏拊心歎曰此所謂獨坐窮山引虎自衛也及



昭烈入益州還攻璋張飛與諸葛亮等分定郡縣至江州  
顏將兵拒之爲飛所獲飛呵之曰大軍至此何以不降而  
敢拒戰乎對曰卿等無狀侵奪我州我州但有斷頭將軍  
無降將軍飛怒令左右牽去斫頭顏顏色不變曰斫頭便  
斫頭何爲怒邪飛壯而釋之引爲賓客

杜德不知何許人孫權時魏遼東太守公孫淵遣其校尉  
宿舒閭中令孫綜由海道稱藩於權權大說使太常張彌  
執金吾許晏將軍賀達等將兵萬人金寶珍貨九錫備物  
乘海授淵舉朝皆諫以爲淵未可信權不聽卒遣彌晏而  
德與秦旦張羣黃强得偕行淵欲圖彌晏先分其人眾置  
諸縣以德等四人及吏兵六十人置园菟郡园菟在遼東



之北二百里太守王贊領戶二百兼可三四百人德等皆舍於民家仰其衣食積四十餘日旦與強等議曰吾等遠辱國命自棄於此與死亡何異今觀此郡形勢甚弱若合謀同心焚其城郭殺其長吏爲國報恥雖死無憾孰與偷生苟活長爲囚虜乎眾然之於是陰約八月十九夜發其日日中部中有張松者告其事贊會士眾閉城門德與旦羣強等皆踰城得脫走時羣病疽創著膝行不能前德常扶攜與俱崎嶇山谷行六七百里創益甚不復能行臥草中相守悲泣羣曰吾不幸創甚死亡無日卿諸人宜速進冀有所達空相守俱死窮谷中何益德曰萬里流離死生其之誠不忍相委乃推旦強使前德獨畱守羣采菜果食



之旦強別數日得達句驪因宣詔言有賜爲遼東所攻奪  
句驪王宮等大喜卽受詔命使人隨旦還迎羣德遣阜衣  
二十五人送德等還吳稱臣貢貂皮千枚鵠雞皮十具旦  
等見權悲不自勝權義之皆拜校尉

邵疇字溫伯會稽人仕郡爲功曹孫皓時會稽妖言章安  
侯孫奮當爲天子臨海太守奚熙與會稽太守郭誕書非  
論國政誕止白熙書不白妖言被逮惶懼無以自明疇進  
曰疇今自任其事明府何憂遂詣吏自列云不白妖言事  
由於己非府君罪吏上疇辭皓怒未已疇慮誕卒不免遂  
自殺以明誕之枉臨死致辭曰疇生長邊陲不聞教道得  
以門資廁身本郡踰越儕輩位極朝右不能贊揚盛化養



之以福令妖訛橫興干國亂紀疇以噂沓之語本非事實  
雖家誦人詠不足增損天下重器而匹夫橫議疾其醜聲  
所不忍聞欲含垢藏疾不彰之翰墨鎮躁歸靜使之自息  
愚心勤勤每執斯旨故誕屈其所是默以見從此之爲罪  
實疇之由不敢逃死歸罪有司惟天鑒裁察吏收疇喪得  
其辭以聞誕得免死猶送建安作船疇死時年四十九皓  
嘉疇節義詔郡國縣圖其形於祠宇

常播字文平蜀郡江原人仕縣主簿功曹縣長廣都朱游  
建興中爲上官誣劾逋沒官穀當論重罪播詣獄訟其寃  
受杖數千肌膚刻爛楚痛備至獄凡三徙幽囚二年每將  
考掠吏先驗問播曰但急行罰無所當問辭終不撓事竟



昭雪時主簿楊玩亦證其枉眾咸嘉播忘身爲君節義抗  
烈舉孝廉除鄴長年五十餘卒後令潁川趙敦圖其像贊  
美之

張悌字巨先襄陽人少知名善名理事孫休爲屯騎校尉  
孫皓時拜丞相晉使諸將伐吳皓使悌督沈瑩諸葛靚等  
眾三萬渡江逆之至牛渚沈瑩曰晉治水軍於蜀久矣今  
傾國大舉萬里齊力必悉益州之眾浮江而下我上流諸  
軍無有戒備名將皆死任兵寄者皆不更事少年恐瀕江  
諸城莫能禦也晉之水軍必至於此宜蓄眾力俟其至與  
之決戰若勝之則江西自清今渡江逆戰勝不可保邂逅  
摧喪則大事去矣悌曰吾恐蜀兵來至眾心駭懼不可復



整今宜渡江決戰若其敗喪則同死社稷無所復恨勝則  
北敵奔走兵勢萬倍便當乘勝南上中道逆之不憂不破  
也若如子計恐行者散盡相與坐待敵至君臣俱降無復  
一人死難者不亦辱乎遂渡江戰軍大敗諸葛靚與五六  
百人退走使過迎悌悌不可去靚自往牽之謂曰天下存  
亡有大數豈卿一人所支何自取死爲悌垂涕曰仲思此  
吾死所也我爲兒時便爲卿家丞相所知常恐不得其死  
負名賢知顧今以身殉社稷何憾邪靚復牽曳之不動靚  
流涕去行百餘步已爲晉兵所殺

石偉字公操南郡人少好學介然獨立有不可奪之志舉  
茂才賢良方正皆不就孫休初召至累遷光祿勳及皓嗣



立朝政穢亂乃以老疾乞身就拜光祿大夫吳亡建威將軍王戎親詣偉晉太康二年詔曰吳故光祿大夫石偉秉志清白皓首不渝雖處危亂廉節可紀年已逾邁不堪遠涉其以偉爲議郎加二千石以終厥世偉遂佯狂僞爲目盲不受晉爵年八十三太熙元年卒

贊曰自曹操竊國士大夫知有曹氏而不知有漢夏侯惇恥受漢官而荀彧華歆輩口談仁義以名德自居或倡弑后之謀或躬行弑逆苟可以爲曹傾漢者無所不極其至而金祿吉本耿紀韋晃魏諷之徒或以匹夫或以方技或以下僚皆憤操不軌欲蒞醢之爲興復計功雖弗就其英風義概視荀華輩直狗彘耳可同日語哉傳彤諸葛瞻父

子以身殉國世濟其美程畿不避難以求苟免劉謚恨不  
死社稷而自刃於廟蓋其忠義奮發根於天性猶百鍊之  
鋼要磨而不可滅云



續後漢書卷第二十一

上海郁松年原本

宋廬陵蕭常著

邑後學胡芳秋杜邦浚校梓

列傳第十七

隱逸

管寧字幼安北海朱虛人年十六喪父中表愍其孤貧相與贈賄皆辭不受長八尺美鬚眉與同縣邴原平原華歆友善並師事陳寔嘗與歆共鋤菜見地中有金寧揮鋤不顧歆捉而擲之以知二人優劣會天下大亂聞公孫度令行於海外遂與原及平原王烈等游遼東度虛館以候之既至廬於山谷時避亂者多居郡南而寧獨居北示無還意因山爲廬鑿坯爲室越海者皆依之旬月而成邑乃講



詩書陳俎豆飾威儀明禮遜非學者不見由是度安其賢  
人化其德邴原性剛直清議以格物度等心不安之寧謂  
原曰潛龍以不見成德言非其時皆招禍之道也密令西  
還度卒子康代爲郡陰有自王之意卑已崇禮欲以寧自  
輔而終莫敢言其後中原少安僑居者皆還惟寧晏然若  
將終焉康卒寧知遼東將亂浮海還郡康弟恭領餽贐有  
加自寧之東凡恭與其父兄所遺皆受而藏之旣西歸盡  
封以還曹丕以爲太中大夫固辭不拜子叡時華歆爲太  
尉遜位於寧叡以爲光祿勳令青州命別駕從事郡丞掾  
以禮遣寧上疏固辭自是召命相仍常以八月賜牛酒叡  
手書問青州刺史程喜寧爲守節高乎審疾疴羸邪喜言



寧有族人管貢爲州吏與寧比鄰臣常使經營消息貢言  
寧常著皁帽布襦袴布裘隨時單複出入閨庭能自任杖  
不須扶持四時祠祭輒自力改加衣服著絮巾故在遼東  
所有白布單衣親薦饌饋跪拜成禮寧少而喪母不識形  
象常特加觴泣然流涕又其居去水七八十步夏時詣水  
中澡手足窺園圃臣揆寧前後辭讓之意獨自以生長潛  
逸耆艾知衰是以棲遲每執謙退此寧志行所欲必全不  
爲守高曹芳初陶丘一孟觀孫邕王基等復上疏薦之於  
是安車蒲輪束帛加璧聘焉會卒時年八十四初寧妻先  
卒所知勸更娶寧曰每省曾子王駿之言意常嘉之豈自  
遭之而違本心哉寧常患世俗多變氏族違聖人之制非



禮命姓之意著氏族論以原世系傳元著書稱寧貌甚恭  
言甚順觀其行邈然若不可及卽之熙熙然柔而溫與人  
子言教以孝與人弟言訓以悌與人臣言誨以忠因其事  
而導之以善是以近之者無不化焉寧之亡天下知與不  
知無不悼歎醇德之所感若此王烈者字彥芳後漢書自  
有傳

張珩字子明鉅鹿人胡昭字孔明潁川人皆養志不仕珩  
少游太學復還鄉里袁紹屢辟不應徙居上黨并州牧高  
幹表爲樂平令不就遁入常山學徒數百人復遷任縣曹  
操爲丞相辟不行曹叡時求隱學之士能消災伏異者累  
上珩以老病辭廣平太守盧毓到官三日綱紀白承前致



版謁珥毓教曰張先生所謂上不事天子下不友諸侯者也豈此版謁所可賁飾哉但遣主簿奉書致羊酒而已後張掖郡言元川溢涌寶石負圖狀像靈龜嶷然盤峙麟鳳龍馬炳煥成形文字告命粲然著見太史令高堂隆上言古所未有實有魏之休命事頒列郡任令于綽密以問珥珥曰夫神以知來不追已往禎祥先見而後廢興從之此蓋當今之變異將來之符瑞也建興中戴鵲之鳥巢珥門陰珥告門人曰夫戴鵲陽鳥而巢門陰此凶祥也乃援琴而歌詩二篇旬日而卒年一百五歲昭始避地冀州亦辭袁紹之命遁還鄉里曹操爲司空屢加禮辟昭不得已應命旣至自陳一介野生無軍國之用歸誠求去操曰人各



有志出處異趣勉卒雅尚義不相屈乃轉居陸渾山中躬  
耕樂道閭里敬而愛之建安二十三年陸渾長張固被書  
調丁夫當給漢中百姓憚遠役孫狼等作亂殺縣主簿邑  
殘毀固帥吏卒依昭以居招集遺民狼等遂南附關羽羽  
給兵還侵陸渾南長樂亭相戒曰胡居士賢者也一不得  
犯其部落賴以全活者甚衆後徙宜陽曹芳正始中趙儼  
鍾毓荀顗等交薦昭有夷皓之節宜蒙召命以厲風俗會  
卒時年八十九初昭善史書與鍾繇邯鄲淳衛覲韋誕並  
有名尺牘之傳世所模楷

焦先字孝然河東人中平末白波賊起先年二十餘與同  
郡侯武陽相隨武陽年少有母先與相扶持東客揚州建



安初西還武陽詣大陽占籍先畱陝界至十六年三輔大亂失其家獨竄河渚間食草飲水無衣履大陽長朱南望見之謂爲亡士欲遣船捕取武陽語縣曰此狂癡人耳遂注其口籍給廩日五升後疫癘作人多死者縣常使埋座之童穉皆易之然其行不踐邪徑每拾遺棄不取大穗飢不苟食寒不苟衣結草爲裳科頭徒跣出見婦人則隱翳須去乃出自作一瓜牛廬淨掃其中營木爲牀布草蓐其上天寒則宿火自近呻吟獨語飢則出爲人客作飽食而已不取其直曹叡初嘗持一杖南渡淺河水輒云未可也由是人頗疑其不狂太守賈穆之官故過其廬與語不應與食不食穆謂曰國家使我來爲卿作君我食卿卿不食



與卿語卿不應如是我可不中爲卿君當去耳乃曰寧有是邪遂不復語其明年大發卒伐吳或竊問先今伐吳何如不應而謬歌曰祝魴祝魴非魚非肉更相追逐本心爲當殺牂羊更殺其殺魴邪人不知所謂會諸軍敗好事者乃推其意疑牂羊謂吳殺魴謂魏於是人皆謂之隱者議郎河東董經特高其節密往視之旣至謬爲與之有舊者謂曰阿先濶乎念共避白波時不先熟視而不言經素知其受恩於武陽因復曰念武陽不乃曰已報之矣復與語不應其後野火焚其廬因露臥會冬雪風烈酣寢不移或以爲死就視如故人莫測其意度年可百餘歲乃卒或問皇甫謐曰焦先何人也曰吾不足以知之考之於表可略而



言矣夫世之所常趨者榮味也形之所不可釋者衣裳也身之所不可離者屋廬也口之所不能已者言語也心之所不可絕者親戚也今先棄榮味釋衣服離屋廬絕親戚閉口不言曠然以天地爲棟宇閭然合至道之光出有形之表入元寂之幽一世之人不足以愜其意四海之廣不能以回其顧妙夫與三皇之先者同矣結繩以來未及其至也豈常情之所能測量哉

扈累字伯重京兆人初平中山東有青牛先生者字正方客三輔曉星厯風角鳥占常食青葙芫花年如五六十者人或識之謂已百餘歲矣時累年四十餘從正方游學謂得正方之術有婦無子建安十六年三輔大亂又隨正方



南入漢中漢中爲曹操所敗正方入蜀累與相失隨徙民  
詣鄴喪其婦曹丕初又徙雒陽遂不復娶獨居道側以甌  
甌爲障施一廚牀食宿其中晝日潛思夜則仰視星宿人  
或問之閉口不肯言至曹芳時年八九十才如四五十者  
縣以其孤老給廩日五升五升不足頗傭作以益之糧盡  
復出人與不取食不求美衣弊緼故尋卒時有石德林者  
安定人史失其名建安初客三輔長安有宿儒樂文博者  
學徒數十德林往受業研精詩書性<sub>元</sub>默十六年關中亂  
南入漢中不殖產業不畜妻孥喜讀老子五千文及諸內  
書晝夜吟誦至二十四年隨眾還長安佯狂不復識人食  
不求味冬夏常衣敝布百結體如無所勝目如無所見獨



居窮巷人與之衣食不可取郡縣以其鰥寡日給廩五升  
食不足頗出行丐不取多人問其姓字不可言號之曰寒  
貧或素與相知者往慰存之輒拜跪由是人謂不癡車騎  
將軍郭淮以意氣呼之問其所欲亦不可言因遺之脯糒  
及衣不取其衣取其脯一臠糒一斗而已後不知其所終  
杜微字國輔梓潼涪人少受學於廣漢任安昭烈定益州  
微常稱聾閉門不出建興二年丞相諸葛亮領益州牧選  
詳皆妙簡舊德以秦宓爲別駕五梁爲功曹微爲主簿固  
辭亮使輿而致之旣至見亮自陳謝亮以微瞶於坐與書  
曰服聞德行飢渴歷時清濁異流無從咨訪王元泰李伯  
仁王文儀楊季休丁君幹李永南兄弟每歎高志未見爲



恨猥以空疏統領貴州德薄任重怒焉憂慮朝廷今年始  
十八天資仁敏愛賢下士天下之人思慕漢室欲與君因  
天順民輔此明主以隆季興之功著勲竹帛以爲賢愚不  
相爲謀故自割絕不圖自屈也微自陳老病求歸亮又與  
書曰曹丕篡逆自立爲帝是猶土龍芻狗之有名也欲與  
羣賢因其邪僞以正道滅之惟君未有相誨便欲求還聞  
丕又大興勞役以向吳楚今因丕多務且以閉境勤農育  
養民物繕治甲兵以待其挫然後伐之可使兵不戰民不  
勞而天下定也君但當以德輔時耳不責君以軍事何爲  
汲汲欲求去乎其敬慕之如此拜諫議大夫以從其志五  
梁者字德山犍爲南安人以儒學節操稱由議郎遷諫議



大夫五官中郎將

劉穎廣陵人史佚其字精意典籍隱居不仕孫權聞其名召之以疾固辭其弟略爲零陵太守卒官穎往赴權知其託疾忿之急驛收錄穎素與衛尉嚴峻善峻聞馳語穎使還謝權怒免峻官而穎得免罪

贊曰易曰不事王侯高尙其事謂所重在此而不在彼也若管張數子特避世之士耳蓋所謂天地閉賢人隱者也方是時姦雄睥睨神器仇讐正士士以才知殺身者多矣之數子者屏迹山樊危行言孫卒以免禍賢矣哉





續後漢書卷第二十二

上海郁松年原本

宋廬陵蕭常著

邑後學

胡芳秋杜邦浚

校梓

列傳第十八

方技

李壽其蜀郡人有道術昭烈欲伐吳遣人迎之既至訪以吉凶意其不荅而索紙筆畫兵馬器仗十數紙已便一一手裂之又畫一大人掘地理之徑去帝不說已而出師征吳敗績而還憤恥成病遂崩人乃知畫大人而埋之者帝崩之象或云意其生於孝文帝時

周羣字仲直巴西閬中人父舒學術於廣漢楊厚名亞董扶羣少傳其父業專心候氣於庭中作小樓家富多僮常

令更直樓上望氣以告卽自視之不避晨夜故凡有氣候  
察之爲審是以所言多中州牧劉璋辟爲師友從事建安  
十二年十月有星孛於鶉尾羣以爲荊州牧將死而國亡  
明年秋劉表卒曹操取荊州而不能有十七年十二月星  
孛於五諸侯羣以爲西方專據土地者皆將失之是時劉  
璋據益州張魯據漢中韓遂據涼州宋建據枹罕其後相  
繼亡滅昭烈定蜀以爲儒林校尉昭烈欲與曹操爭漢中  
以問羣對曰當得其地不得其民若出偏軍必不利宜戒  
之時州後部司馬蜀郡張裕字南和亦明占候而天資過  
於羣諫曰不可爭漢中軍必無利後果得地而不得其民  
時遣將軍吳蘭雷銅等入武都皆沒不還於是舉羣茂才



裕私語人曰歲在庚子天下當易代人密白其言坐棄市裕又精相術每覽鏡視其面自知當刑死未嘗不擲之於地羣卒子巨頗傳其術

吳範字文則會稽上虞人以治厯數知風氣聞於郡中舉有道遭亂不行會孫權起東南範委質焉每有災祥輒推數言狀其言多驗初權欲討黃祖範曰今茲少利不如明年明年戊子荊州劉表亦身死國亡權遂攻祖卒不能克明年軍出行及尋陽範見風氣因詣船賀權兵急行至卽破祖夜亡權恐失之範曰未遠必獲至五更中果得之劉表竟死荊州分割及壬辰歲範又曰歲在甲午劉元德當得益州後呂岱從蜀還說元德部眾離散死亡且半事必



不克權以難範範曰臣所言者天道也而岱所見者人事耳昭烈卒得蜀權與呂蒙謀襲關羽近臣多以爲不可權以問範範曰得之後羽在麥城使使納降權問範竟當降否範曰彼有走氣言降詐耳權使潘璋要其徑路覘者還白羽已去範曰雖去不免問其期曰明日日中權立表下漏以待之及日中不至權問其故範曰時尙未正中也頃之有風動帷範拊手曰羽至矣須臾外稱萬歲傳言得羽後權與魏爲好範曰以風氣言之彼以貌來其實有謀宜爲之備昭烈盛兵西陵範曰後當和好皆如其言拜騎都尉領太史令權數訪其術祕之不以要者告權由是恨之初權爲將軍時範嘗言江南有王氣亥子之間有大福慶



權曰若如所言以君爲侯及爲吳王範時侍宴曰昔在吳中嘗言此事大王識之邪權曰有之用呼左右以侯綬帶範範知禮欲以厭前言輒手推不受及後論功行封以爲都亭侯詔臨出權恚其靳術削其名範爲人剛直頗好自譽然與人交有終始嘉興魏滕者同郡相善滕嘗有罪權怒甚云敢有諫者死範謂滕曰與汝偕死滕曰死而無益何用死爲範曰安能慮此坐視汝邪乃髡頭自縛詣門下使鈴下以聞鈴下曰必死不敢白範曰汝有子邪曰有曰使汝爲吳範死以屬我鈴下曰諾乃排闥入言未卒權大怒投以戟逡巡走出範因笑入叩頭流血言與涕俱良久權意釋乃免滕滕見範謝曰父母能生我不能免我於死



丈夫相知如汝足矣何用多爲建興四年病卒預知死日  
謂權曰殿下某日當喪軍師權曰吾無軍師範曰大王出  
軍臨敵須臣言而後行臣乃殿下之軍師也至其日果卒  
滕字周林祖父河內太守朗與入俊之列滕剛直行不苟  
合雖遭困厄終不回撓初亦忤策幾殆賴其母救護得免  
厯厯山潘陽山陰三縣令鄱陽太守

趙達河內人少侍學於漢侍中單甫用思精密謂東南有  
王者氣可以辟難故脫身渡江治九宮一算之術究其微  
旨是以能應機立成對問若神至計飛蝗射隱伏無一不  
中或難之曰飛者固不可校誰知其然此殆妄耳達使人  
取小豆數升播之席上立處其數驗覆果信嘗過其所知



所知爲之具食食畢謂曰倉卒乏酒肴無以敘意達因取盤中隻箸再三縱橫之乃言卿東壁下有美酒一斛又有鹿肉三斤何得言無至人情得慚曰以卿善射故相戲耳遂出酒酣飲又有書簡上作千萬數著空倉中令達算之達處如數云但有名無實其精如此達祕惜其術自闕澤殷禮皆名儒善士親屈節受學祕而不告太史丞公孫滕少師事達勤苦積年許授之而復止滕它日齎酒具候顏色拜跪而請達曰吾先人得此術欲圖爲帝王師自仕來三世不過太史郎誠不欲傳之人且此術微妙頭乘尾除一算之法父子不相語然以子篤好不倦今真以相授矣酒數行達起取素書兩卷大如手指曰當寫讀此則自解



也吾久廢不復省今欲翻閱一過數日當以相與滕如期至則陽求索驚言失之云女壻昨來必爲所竊初孫權行師每令達推步皆如其言權問其法達終不言以是見疏達嘗笑謂諸星氣風術者曰當回算帷幙不出戶牖以知天道而反晝夜以望氣祥不亦勞乎嘗引算自校歎曰吾算且盡某年月日其終矣及期而卒

劉惔字子仁平原人遭亂避地廬陵以明天官事孫輔占數顯於南土每有水旱盜賊皆先期以告無不中者輔異焉以爲軍師軍中敬事之號曰神明孫權在豫章時有星異以問惔惔曰災在丹陽權曰何如曰客勝主人至某日當得問時邊鴻作亂卒如其言惔於諸術皆善尤明太一



能推演其事窮盡要妙著書百餘篇名儒刁[元]稱美之惇  
亦寶祕其術故世無傳之者時有葛衡者字思真吳人明  
天官性機巧作渾天使地居於中以機動之天轉而地止  
上應晷度皆驗不差

皇象字休明廣陵江都人幼工書時張子竝陳梁甫能書  
甫恨連竝恨峻象斟酌其間備極其妙北方善者不能及  
也於時有嚴武子卿者吳衛尉峻再從子也圍棋莫與輩  
宋壽者占夢十不失一曹不興善書孫權使畫屏風誤落  
筆點素因就作蠅旣進權以手揮之孤城鄭姬能相人及  
吳範劉惇趙達入人世皆稱妙謂之入絕

杜夔字公良河南人以知音爲雅樂郎中平五年以疾去



官避亂荊州劉表令與孟曜爲漢帝合雅樂備表欲庭觀之夔曰今將軍號不爲天子合樂而庭作之無乃不可乎表內其言而止後表子琮附曹操操以夔爲軍謀祭酒參樂事因令創制雅樂夔善鍾律該通八音聰敏過人惟歌舞非所長時散郎鄧靜尹齊善雅樂歌師尹胡能歌宗廟郊祀之曲舞師馮肅服養曉知先代諸舞夔統研精遠考諸經近采故事教習講肄備作樂器以復先代之樂漢鑄鐘工柴玉有巧思夔令鑄銅鐘其聲均清濁多不如法數毀屢作玉甚苦之謂夔清濁任意夔玉更相是非操取所鑄更試然後知夔爲精而玉之妄也於是斥玉爲養馬士曹丕時爲大樂令協律都尉丕嘗令夔與左願等於賓客



之前吹笙鼓琴夔有難色丕不悅後以它事繫夔使願等就學夔自謂所習者雅樂仕宦有本意尤不樂竟免官卒弟子河南郤登張泰桑馥皆至大樂丞下邳陳頴司律中郎將自左延年等雖妙於音咸善鄭聲其好古存正皆不及夔

馬鈞字德衡扶風人訥於言辯而巧思絕世曹叡時爲給事中與常侍高堂隆將軍秦朗語及指南車二子謂古無有記言之虛也鈞曰古有之顧未之思耳二子哂之鈞曰空言無益不如試之於是隆等以白叡叡令作之而車成鈞嘗見諸葛亮連弩曰巧則巧矣未盡善也自言作之可令加五倍傳元著書稱之曰馬先生天下之名巧其爲時



流推許如此

朱建平沛國人善相人曹操當國召爲郎子丕爲五官將時坐客三十餘人不問己年壽又令徧閱眾賓建平曰將軍壽八十四時常見小厄願謹護之謂夏侯威曰君四十九爲牧當有厄若過此可致七十致位公輔謂應璩曰君六十二爲常伯有厄前此一年當見一白狗而旁人不見也謂曹彪曰君據藩國至五十七當厄於兵初潁川荀攸鍾繇相善攸先亡子幼繇經紀其家欲嫁其妾與人書曰吾昔與公達嘗問相於建平建平日曰荀君雖少然當以後事付鍾君吾嘗嘲之曰惟當嫁卿阿鶩矣何意此子竟爾蚤歿戲言遂驗乎今欲嫁阿鶩使得善處追思建平之



妙雖唐舉許負何以復加曹丕年四十病困謂左右曰建  
平所言八十謂晝夜也吾其決矣未幾果死夏侯成爲兗  
州刺史年四十九十二月上旬得剗疾念建平之言自分  
必死至下旬疾愈歲除宴僚屬曰吾所苦漸平明日鷄鳴  
年便五十建平之戒過矣客罷至暝疾動夜半而卒璩六  
十一爲侍中直省內歎見白狗問之眾人悉無見者於是  
數游飲自娛過期一年年六十三卒曹彪封楚王年五十  
七坐與王淩通謀死惟相王昶程喜王肅有蹉跌云又善  
相馬丕將出取馬入建平道遇之語人曰此馬今日死矣  
丕將乘馬馬惡衣香驚齧丕膝丕大怒殺之建興中卒  
周宣字孔和樂安人爲郡吏太守楊沛夢人曰八月一日



曹操當至必與君杖飲以藥酒使宣占之時黃巾賊起宣對曰夫杖起弱者藥治人病八月一日賊必除滅至期果破東平劉禎夢蛇生四足穴居門中使宣占之宣曰此爲國夢非君家事也當殺女子之作賊者頃之女賊鄭姜夷滅以蛇女子之祥足非蛇之所宜故也曹丕嘗問曰吾夢殿屋兩瓦墮地化爲雙鴛鴦此何祥也對曰後宮當有暴死者丕曰吾詐卿耳對曰夫夢者意耳苟以形言便占吉凶言未畢黃門令白宮人相殺無幾丕復問曰我昨夜夢青氣自地屬天對曰當有貴女子冤死時丕已遣使賜其妻甄氏死聞宣言而悔遣人追之不及矣復問吾夢磨錢文欲令滅而愈明何邪宣悵然不對丕固問之對曰此陛



下家事雖意欲爾而太后不聽是以文欲滅而明耳時正欲殺弟植逼於其母但貶爵秩以宣爲中郎屬太史嘗有問云吾夜夢芻狗其占若何荅曰君欲得美食耳有項出行果遇豐膳後又問云昨夜復夢芻狗何也對曰君欲墮車折腳宜戒之有項果如其言後又問復夢芻狗云何曰君家欲失火當善護之俄而火起其人乃語宣曰前後皆不夢聊試君耳何以皆驗對曰此神靈動君使言與真夢無異也又問曰三夢芻狗而其占不同何也對曰芻狗者祭神之物故君始夢當得飲食也祭神旣畢則芻狗爲車所轢故中夢當墮車折腳旣車轢之後必載以爲樵故後夢憂失火也宣之敘夢類此世以比建平之相曹叡末年



卒有趙直者亦善占夢漢前軍師魏延從諸葛亮北征夢頭上生角旦以問直直謬曰麒麟有角而不用此不戰而賊自破之象也退而告人曰角之爲字刀下用也頭上用刃其凶甚矣竟爲楊儀所殺何祇嘗夢井中生桑直曰桑非井中之物會當移植然桑字爲文四十八君壽恐不過此祇後守犍爲卒時年四十八竟如其言

管輅字公明平原人貌寢而嗜酒飲食言戲不擇非類故人愛之而不敬也父爲利漕長民郭恩者兄弟三人皆得蹙疾使輅筮之輅曰卦中有君本墓墓中有女鬼非君伯母則叔母也昔饑饉之世當有利其數升米者排之井中噴噴有聲推一大石下破其頭孤魂冤痛自訴於天於是



恩泣服罪廣平劉奉林正月中婦病困已具送終之制  
輅占之曰命在八月辛卯日申時林謂不然已而婦疾愈  
至秋而歿輅嘗往見安平太守王基基令作卦輅曰當有  
賤婦人生男墮地卽走入竈死又牀上當有大蛇銜筆烏  
來入室中與燕共鬪燕死烏去有此三怪基大驚問吉凶  
烏在輅曰官舍久遠魑魅魍魎爲怪耳兒生便走非能自  
走直宋無忌之妖將之入竈耳大蛇銜筆老書佐耳烏與  
燕鬪老鈴下耳今卦中見象而不見其凶知非妖咎之兆  
自無所憂也後竟無患清河王經去官還家語輅曰近有  
一怪欲煩作卦卦成輅曰爻吉不爲怪也君夜在堂戶有  
一流光如燕爵者入君懷中殷殷有聲內神不安解衣彷彿



徻招呼婦人覓索餘光經大笑曰誠如君言輅曰吉遷官  
之兆也其應行至頃之爲江夏太守輅嘗至安德令劉長  
仁家有鵲鳴閤屋上其聲甚急輅曰鵲言東北有婦昨殺  
夫牽引西家人不過日在虞淵之時告者至矣到暮果見  
東北同伍民來告鄰婦手殺其夫詐言西家人與夫有隙  
又至列人典農王固直所有雄雉來集內鈴柱頭固直大  
不安令輅占之輅曰吉五月必遷官至期果遷渤海太守  
輅兄孝國居斥丘輅往候之會有二客客去輅謂孝國曰  
此二人天庭及口耳之間皆有凶氣異變俱起雙魂無宅  
流魂於海骨歸於家法皆當死後數十日二人飲醉夜共  
載車牛驚下道墮漳河中皆溺死於時輅之鄰里外戶不



閉無敢爲盜清河太守華表召爲文學掾安平趙孔曜薦  
輅於冀州刺史裴徽徽辟爲文學從事一見與語便如故  
知再見轉鉅鹿從事三見遷治中尋轉別駕至十月舉秀  
才歲未盡三日京師尚書何晏召之適鄧颺在坐晏曰聞  
君著爻神妙試爲作一卦位當至三公不又問連夢青蠅  
數十集鼻端驅之不去此何祥也輅曰君侯位重山岳而  
懷德者鮮畏威者眾殆非小心翼翼多福之人又鼻者艮  
此天中之山高而不危所以長守貴今青蠅穢惡而集焉  
位峻者顛輕豪者亡不可不思害盈之數是故山在地中  
曰謙雷在天上曰壯謙則衰多益寡壯則非禮勿履未有  
損己而不光大行非而不傷敗願君侯追六爻之旨彖象



之義然後三公可至青蠅可驅也颺曰此老生之常譚輅  
曰夫老生者見不生常譚者見不譚晏曰正歲當相見旣  
還具以此語其舅夏大夫舅責輅言太切輅曰與死人語  
何所畏邪舅大怒謂爲狂悖正歲西北大風後十餘日聞  
晏颺皆爲司馬懿所殺舅氏乃服始輅過魏郡太守鍾毓  
共論易義輅言卜可知死生之日毓使筮其生月日如其  
言無差舛毓愕然曰君可畏也死以付天不以付君遂不  
復筮輅隨軍西行過母丘儉先墓倚樹哀吟人問其故輅  
曰林木雖茂無形可久碑雖美無後可守園武藏頭蒼龍  
無足白虎銜尸朱雀悲哭四危以備法當滅族不過二年  
其應至矣卒如其言延熙十八年弟辰謂輅曰司馬大將




軍待君意厚冀當富貴乎輅太息曰吾自知有命耳然天  
雖與我才不與我壽恐四十七八間不見女嫁男娶婦若  
得免此欲作雉陽令可使枹鼓不鳴路不拾遺但恐至泰  
山治鬼不得治生人耳辰問其故曰吾額無生骨眼無守  
睛鼻無梁柱腳無天根背無三甲腹無三壬此皆不壽之  
驗又吾本命在寅加月蝕夜生天有常數不可得諱但人  
不知耳是歲八月爲少府丞明年二月卒年四十八辰常  
欲從受卜相之術輅曰夫卜非至精不能見其數非至妙  
不能觀其道孝經論語足爲三公無用知之也故子弟無  
得傳其業者

贊曰天道茫昧不可致詰聖人不求知之惟知修吾之德

耳術如稗梓且或驗或否況餘人乎然數子之言時有可  
采姑存於篇亦遷史傳日者之意云











































續後漢書卷第二十三

上海郁松年

宋廬陵蕭 常著

邑後學

胡芳秋校梓

吳載記第一

威靈不君天穢厥德閤寺專制忠良屏息人被荼毒籲天  
以威羣盜乘之馴至覆國董卓首難旋被梟磔二袁劉呂  
尋亦顛踣狺狺孫曹負固弗格或阻江東或制河北爭爲  
強雄驅民鋒鏑厄會未夷虐焰滋赫昭烈草創配天立極  
混一之功匪朝伊夕天不祚漢人與世隔孫氏於國掎角  
有力不勸濟凶愈肆禍賊雖追天誅三馬伏櫪夷考廢興  
徒勞採摭列之載記附著於策

孫堅

續後漢書

卷二十三

一



孫堅字文臺吳郡富春人武之後也少以勇力聞府召署  
假尉大破會稽妖賊許昌刺史臧旻上其功詔除鹽漬丞  
徙下邳中平元年黃巾賊帥張角起於魏郡天下響應靈  
帝遣車騎將軍皇甫嵩中郎將朱雋等討之雋表堅爲佐  
軍司馬募得精兵千人從雋奮擊所向無前汝潁賊困迫  
走保宛城堅身當一面先登眾從之遂拔其城雋以狀聞  
拜別部司馬邊章韓遂擁兵涼州中郎將董卓討擊無功  
遣司空張溫行車騎將軍西討章等表堅參軍事屯長安  
溫以詔書召卓卓不時至溫責讓之卓應對不屈堅時在  
坐耳語溫曰卓不怖罪而鴟張大言宜以名不時至陳軍  
法誅之溫曰卓素著威名於隴蜀今日殺之西行無依堅



曰明公親董王師威震天下何賴於卓觀卓所言不假  
公輕上無禮一罪也章遂跋扈經年當以時進討而卓云  
未可沮軍疑眾二罪也受任無功應名稽留而軒昂自高  
三罪也古之名將仗鉞臨眾未有不斬斷以示威是以穰  
苴斬莊賈魏絳戮揚干今明公垂意於卓不卽加誅虧損  
刑威於是乎在溫不忍發堅因起出章遂聞大軍至部落  
離散皆乞降軍還議者以軍未臨敵不斷功罪然聞堅數  
卓三罪勸溫斬之無不歎息拜議郎時長沙賊區星自稱  
將軍眾萬餘人攻圍城邑乃以堅爲長沙太守克破星等  
周朝郭石亦起零桂與星相應堅越境討擊皆平之錄前  
後功封烏程侯靈帝崩董卓擅政州郡竝起義兵欲以討



卓堅聞之撫膺歎曰張公昔從吾言朝廷今無此難也於是亦舉兵荊州刺史王叡素遇堅無禮堅過殺之比至南陽眾數萬人太守張咨聞軍至晏然自若堅移檄請餉軍咨不與明日詣堅主簿入白堅南陽太守稽留義兵使賊不時討請按軍法遂斬咨於軍門一郡震慄前到魯陽與袁術會術表堅行破虜將軍領益州刺史遂治兵於魯陽城當進兵討卓長史公仇稱還州督軍糧祖道於城東門外官屬竝會卓遣步騎數萬逆戰輕騎數十奄至堅方行酒談笑敕部曲整行陳毋得妄動後騎漸益堅徐罷坐導引入城乃謂左右曰向所以不卽起者恐兵相蹈藉諸君不得入耳卓兵見堅士眾甚整不敢攻城乃引還堅移屯



梁東大爲卓軍所攻與數十騎潰圍而出堅常著赤罽幘令親近將祖茂著之卓騎爭逐茂故堅從間道得免茂因迫下馬以幘冠冢間燒柱因伏草中卓騎望見圍繞數重旣近始覺乃去堅復收兵合戰於陽人大破卓軍梟其都督華雄等或間堅於術術懷疑不給軍糧陽人去魯陽百餘里因夜馳見術畫地而言曰所以出身不顧上爲國家討賊下爲將軍家門之私仇堅與卓非有骨肉之怨也而將軍受浸潤之言遂相嫌疑術踈踏卽調發軍糧堅還屯卓憚堅猛鷙乃遣其將李傕等來請和堅曰卓逆天無道蕩覆王室今不夷汝三族縣示四境吾死不瞑目復進軍大谷拒雒九十里卓謂劉艾曰關東軍無能爲也惟孫堅



小戇頗能用。人當語諸將避之。卓徙都關中。焚燒雒邑。堅乃至雒。修復諸陵。掃宗廟。祀以太牢。引軍還屯魯陽。時關東諸郡務相兼并。袁紹遣會稽周暉來襲豫州。堅慨然歎曰。同舉義兵。將社稷。是衛逆賊。垂破而自相陵若此。誰與戮力乎。言發涕下。初平三年。術使堅攻荊州劉表。表遣黃祖逆於樊鄧之間。堅擊破之。追渡漢水。遂圍襄陽。單馬行峴山中。流矢死。年三十七。四子策。權。翊。匡。後權僭號。追諡武烈皇帝。

策字伯符。堅初興義兵。策時十餘歲。將母徙居舒。與周瑜相友善。陰結士大夫。江淮間人咸向之。堅卒。還葬曲阿。已乃渡江。居江都。舅吳景爲丹陽太守。策乃載母徙曲阿。時



年十七與呂範孫河俱就景名募得數百人時廣陵張紘  
名有智數策詣紘咨以世務曰方今漢祚中微英雄並起  
未有能扶危濟困者先君與袁氏共破董卓功業未究而  
爲黃祖所害策雖愚穉竊有微志欲從袁揚州求先君遺  
兵就舅氏於丹陽收合流離東據吳會以雪仇恥爲朝廷  
外藩因涕泗橫流紘見其忠壯乃曰君紹先侯之軌有驍  
武之名若投丹陽收合吳會則荆揚可一讐敵可報據長  
江奮威德誅除羣穢匡扶漢室功業侔於桓文豈徒外藩  
而已哉方今世亂多難若功成事立當與同好俱南濟也  
策曰與君同符合契行矣以老母弱弟付於君策無回顧  
憂遂從袁術於壽春術奇之以堅部曲還策又募得數百



人太傅馬日磾仗節安集關東以禮辟策表拜懷義校尉  
術太將喬蕤張勲皆傾心敬焉術嘗歎曰使術有子如孫  
郎亦死何恨策騎士有罪逃入術營使人就斬之詣術謝  
術曰兵人好叛當共疾之何謝也由是軍中益憚之初術  
許策爲九江太守已而更用丹陽陳紀術後欲攻徐州從  
廬江太守陸康求米三萬斛康不與術大怒遣策攻之謂  
曰前悔用陳紀今若得康廬江真卿有也策攻拔之術復  
用其故吏劉勲策益失望乃說術乞助吳景等平定江東  
表策爲折衝校尉行殄寇將軍兵才千餘騎數十匹賓客  
願從者數百人比至厯陽眾五六千渡江轉戰所向無敵  
軍令整肅百姓懷之策美丰儀好談性豁達善用人是



士民莫不盡心樂爲致死策時年少雖有位號人皆呼爲  
孫郎時揚州刺史劉繇治曲阿聞策至棄軍走諸郡守皆  
委城去遂引兵渡浙江據會稽屠東冶乃攻破嚴白虎等  
盡更置長吏策自領會稽太守復以吳景爲丹陽太守孫  
賁爲豫章太守分豫章爲廬陵郡以賁弟輔爲太守丹陽  
朱治爲吳郡太守彭城張昭廣陵陳松陳端與張紘等爲  
謀主是歲興平二年也建安初遣奉正都尉劉由五官掾  
高承奉章詣許貢獻時袁術僭號策以書責而絕之天子  
遣議郎王輔奉詔拜騎都尉襲封烏程侯領會稽太守三  
年又遣使貢方物制書拜討逆將軍進封吳侯四年袁術  
死其長史楊宏宏大將張勲等將其眾就策廬江太守劉勲



要擊悉虜之收其珍寶以歸策聞之僞與盟好時豫章上  
繚宗民萬餘家在江東策勸勲取之勲旣行策襲拔廬江  
降其眾勲獨與其麾下數百人奔曹操五年操與袁紹相  
拒於官渡策欲襲許迎天子密治兵部分諸將未發會爲  
故吳郡太守許貢客所殺先是策殺貢貢小子與客亡匿  
江邊策單騎出卒與客遇客擊傷策創甚謂張昭等曰中  
國方亂夫以吳越之眾三江之固足以觀成敗公等善相  
吾弟卽呼權佩以印綬謂曰舉江東之眾決機於兩陳之  
間與天下爭衡卿不如我舉賢任能各盡其心以保江東  
我不如卿至夜卒時年二十六權僭號追諡長沙桓王封  
子紹爲吳侯後改封上虞卒子奉嗣爲孫皓所殺



贊曰自董卓稱亂四方倡義而起者非一然皆負恃其眾  
因之以自封殖卒無一人嬰其鋒者獨堅一戰而敗之遂  
使西走修復園陵祇祀廟社此其忠義奮發豈袁劉輩可  
同日語哉惜其孤軍無繼功弗克就而其志有足尙也策  
以孤童子奮一旅之眾不奄旬而據有江東其智勇謨斷  
絕人遠矣不幸蚤世惜哉

孫權

孫權字仲謀策既定諸郡以爲陽羨長時年十五郡察孝  
廉州舉茂才行奉義校尉漢以策遠修職貢遣使者劉琬  
來錫命琬語人曰吾觀孫氏兄弟雖各才秀明達然皆祿  
祚不終惟中弟孝廉有大貴之表又最壽建安五年策卒



以事付權權哭未已長史張昭謂曰孝廉此寧哭時耶乃  
扶上馬使出巡軍是時惟有會稽吳郡丹陽豫章廬陵然  
溪險之地猶未盡從而賓旅寄寓之士以安危去就爲意  
未有君臣之分張昭周瑜等謂權可與其成大業故委心  
焉朝廷以爲討虜將軍領會稽太守屯吳待張昭以師傅  
之禮而周瑜程普呂範等爲將帥招延名士魯肅諸葛瑾  
爲賓客分部諸將鎮撫山越討不從命八年西攻黃祖破  
其舟師還過豫章使呂範平鄱陽會稽程普討樂安山寇  
太史慈領海昏韓當周泰呂蒙等爲劇縣令長十年使賀  
齊討定上饒分爲建平縣十二年西攻黃祖十三年復攻  
黃祖擒之梟其首分黥歙爲始新新定黎陽休陽縣以上



六縣爲新都郡荊州牧劉表死遣魯肅弔其二子且觀其  
變肅未至而曹操已入其境表子琮降操時昭烈欲南濟  
江與肅遇肅因傳權意昭烈進駐夏口使諸葛亮詣權於  
時曹操初得荊州形勢張甚使遺權書曰今治水軍八十  
萬眾方與將軍會獵於吳權以書示其羣臣莫不失色多  
勸權迎之惟周瑜魯肅執拒操之議意與權同乃使瑜與  
程普爲左右督各領兵萬餘人與昭烈會遇曹操於赤壁  
大破其軍操走士卒死者大半瑜等追至南郡操畱曹仁  
徐晃於江陵使樂進守襄陽時甘寧在夷陵爲仁別將所  
圍用呂蒙計畱凌統以拒仁以其兵半救寧軍以勝還權  
自率眾圍合肥使張昭攻九江之當塗昭兵不利權攻城



踰月不能克曹操遣軍來援未至權退十四年瑜仁相拒  
歲餘殺傷甚眾委城北走乃以瑜爲南郡太守昭烈表權  
行車騎將軍領徐州牧十五年分豫章爲鄱陽分長沙爲  
漢昌郡以魯肅爲漢昌太守屯陸口十六年徙治秣陵明  
年城石頭改秣陵爲建業聞曹操欲來寇作濡須塢十八  
年操出濡須輕船夜渡洲上權以水軍圍之獲三千餘人  
溺死者數千人復乘船從濡須口入操使弓弩亂發箭著  
其船船偏重乃回船復以一面受箭箭均船平乃作鼓吹  
還操望其舟船器仗軍伍整肅歎曰生子當如孫仲謀劉  
景升兒子豚犬耳權遺操書曰春水方生公宜速去別紙  
云足下不死孤不得安操語其下曰孫權不欺孤乃還初



操恐潁江郡縣爲權所略皆令內徙民轉相驚自廬江九江蕲春廣陵戶十餘萬皆渡江江西遂虛合肥以南惟有皖城十九年夏權攻皖城克之獲廬江太守朱光男女數萬口是歲昭烈定益州二十年權遣諸葛瑾從求荊州昭烈不許權怒遣呂蒙取零陵長沙桂陽三郡使魯肅以萬人鎮巴丘以禦關羽權駐陸口爲諸軍節度昭烈來攻會曹操入漢中昭烈西還尋以荊州之長沙夏口桂陽以東自予南郡零陵武陵以西歸漢權歸自陸口攻合肥不克徹軍還權與凌統甘寧等猶在津北爲曹操將張遼所襲統等以死扞權權乘駿馬越津橋得免遼問吳降人向有紫髯將軍長上短下便馬善射爲誰對曰孫仲謀遼舉軍



歎恨二十二年與曹操連和二十四年關羽圍曹仁於襄陽操遣于禁等救之羽盡虜禁步騎三萬送江陵惟城未下權憚羽得志不爲己利遂遣呂蒙襲公安獲將軍傅士仁南郡太守麋芳以郡降陸遜別取宜都守峽口以備西兵關羽還當陽西保麥城因遁去權遣潘璋等追斬羽遂有荊州操表權爲驃騎將軍荊州牧封南昌侯是歲分宜都秭歸二縣爲固陵郡二十五年操死子丕篡漢改元黃初明年四月昭烈卽皇帝位於成都建元章武權自公安遷鄂改鄂爲武昌以武昌下雒尋陽陽新柴桑沙羨六縣爲武昌郡八月城武昌冬稱藩於曹丕封爲吳王是歲天子親帥六師來討權遣陸遜等帥眾拒王師以其子登



爲太子章武二年王師敗績於獠亭初權叛漢而附曹丕  
丕遣人徵權任子權不受秋丕遣其將曹休等來攻權改  
元黃武臨江固守冬十一月大風權將呂範等兵溺死者  
數千人曹休以敢死士襲攻徐陵殺略士眾權將全琮徐  
盛追斬丕將尹廬殺獲甚眾十二月遣大中大夫鄭泉聘  
於天子改夷陵爲西陵三年曹丕將曹真分軍據江陵中  
洲改四分用乾象曆三月曹仁遣其偏將常雕等以兵五  
千乘油船晨渡濡須中洲仁子泰因引兵急攻朱桓桓拒  
之遣其將嚴圭擊破雕等餘眾遁去夏四月昭烈皇帝崩  
皇太子卽皇帝位改元建興先是戲口守將晉宗殺都將  
王直以眾叛附曹丕以爲蘄春太守數犯邊境六月權



遣賀齊等襲斬春生虜宗冬十一月天子使中郎將鄧芝來聘二年夏權遣其輔義中郎將張溫聘漢九月曹丕來攻至廣陵望大江曰彼有人焉未可圖也乃還三年冬鄱陽賊彭綺攻沒諸縣眾數萬人四年陸遜請敕諸將增廣農畝以寬民力夏曹丕死秋權帥眾攻江夏圍石陽不克分三郡惡地十縣爲東安郡以全琮爲太守討平山越冬陸遜勸施德緩刑寬賦息調權報曰法令之設欲以遏惡防邪此爲先令後誅不欲使有犯者耳君以爲太重當重諮謀務欲其可至於發調者徒以天下未定事以眾濟若徒守江東兵自足用顧坐自守可陋耳若不豫調恐倉卒不可用也於是令有司盡寫科條使郎中褚逢齎以就遜



及諸葛瑾意所不安損益之分交州置廣州俄夏舊五年  
春諸將獲彭綺韓當子綜奔魏六年罷東安郡復鄱陽太  
守周魴僞叛以誘曹叡將曹休權至皖口使陸遜督諸將  
大破休於石亭休走發病死改合浦爲珠官郡七年僭卽  
尊位於武昌改元黃龍六月天子使衛尉陳震來聘秋九  
月遷建業徵上大將軍陸遜輔太子登掌武昌留事八年  
立都講祭酒遣將軍衛溫諸葛直將甲士萬人浮海求夷  
洲及亶洲亶洲絕遠不可得至但得夷洲數千人還溫直  
以無功誅是歲築東興堤以遏湖水九年遣潘濬帥眾攻  
武陵蠻夷夏野蠶成繭由拳野稻生改爲禾興縣會稽嘉  
禾生明年改元嘉禾遼東太守公孫淵遣其校尉僞稱藩



於權權大悅十一年遣太常張彌執金吾許晏等將兵萬人九錫備物乘海授淵舉朝皆諫以爲淵不可信權終不聽淵果斬彌晏等送其首於曹叡沒其兵資權大怒欲自討淵薛綜等諫乃止是歲權攻合肥新城遣全琮攻六安皆不克十二年以歲不登寬諸逋負夏遣陸遜諸葛瑾等屯江夏沔口孫韶張承等向廣陵淮陽權自率大眾圍合肥新城時漢丞相亮以師討曹叡出武功權以魏軍必不遠出而曹叡遣司馬懿拒王師自救合肥權乃退秋以諸葛恪爲丹陽太守討山越冬復以曲阿爲雲陽丹徒爲武進是歲遣侍中是儀聘於漢十三年曹叡以馬求易珠璣翡翠瑇瑁權曰此皆孤所不用而可得馬何苦而不聽十



四年鑄大錢一當五百十五年冬諸葛恪平定山越北屯廬江延熙元年權改赤烏鑄當千大錢初權信任校事呂乙乙苛慘用法深刻自太子而下數諫權皆不納大臣由是不敢言後乙姦罪覺伏誅權引咎自責乃使中書郎袁禮謝過於諸大將因問時事所當損益二年夏城沙羨三年勸課農桑令縣治城郭起譙樓穿塹發渠以備盜賊冬開倉賑饑四年夏遣全琮侵淮南決芍陂燒安城邸閣俘其人民諸葛恪攻六安琮與魏將王淩戰於芍陂中郎將秦晃等千餘人戰死朱然圍樊諸葛瑾取柁中零陵太守殷禮言於權曰天棄曹氏當虎爭之時而幼童泣事宜自御戎取亂侮亡舉荆揚之眾使强者執戟羸者轉餉西師



出於隴右授諸葛瑾朱然大眾直指襄陽壽春困於受敵  
長安以西務對漢軍許雒之眾勢必分離犄角瓦解民必  
內應一軍敗績則三軍離心便當秣馬脂車陵陷城邑乘  
勝逐北以定華夏若不悉軍動眾循前輕舉則不足大用  
易於屢動則民疲威消時失力竭非良策也權不能用五  
月太子登卒曹芳使司馬懿救樊六月軍還陸遜城邾五  
年改禾興爲嘉興秋遣聶友陸凱等討朱崖儋耳是歲立  
子和爲太子六年諸葛恪攻六安破曹芳將謝順收其人  
民扶南王范旃遣使獻樂人是歲司馬懿入舒諸葛恪自  
皖遷柴桑懿亦尋遁七年以陸遜爲丞相八年遣陳勲將  
屯田及作士三萬人鑿句容中道自小其至雲陽西城通



會市作邸閣九年朱然攻曹芳柁中斬獲千餘罷當千錢  
十年改作太初宮徙武昌宮材瓦爲之諸將及州郡皆義  
作十一年春朱然城江陵三月宮成五月番陽言白虎仁  
十三年廢太子和立子亮爲太子遣軍十萬作堂邑涂塘  
以淹北道曹芳使王昶圍南郡王基攻西陵遣戴烈陸凱  
拒之皆遁去十四年夏改元太元十一月權祭南郊還寢  
疾徵諸葛恪爲太傅十五年二月改元神鳳四月權死時  
年七十一僞諡大皇帝

贊曰權承父兄之資勇而有謀憤曹操竊國常有討賊之  
志烏林之捷亦一時之雋功其後關羽圍襄陽降于禁威  
振北方操大懼欲徙都以避之權於是時誠能與羽協力

東西竝舉則操可圖而漢室可興今乃不然反襲殺羽以媚曹氏不能稍降意於帝室之胄而甘心臣賊昭烈之不能渾一區夏由此故也他日雖有犄角之功亦無及矣吁惜哉



續後漢書卷第二十四

上海郁松年原本

宋廬陵蕭 常著

邑後學 胡芳秋 杜邦浚 校梓

吳載記第二

孫亮

孫亮字子明權少子也權春秋高而亮最少故尤鍾愛延  
熙十三年權既廢和遂以亮爲太子十五年權寢疾徵諸  
葛恪爲太傅滕允爲太常輔太子權死亮嗣僞位改元建  
興以恪爲帝太傅允爲衛將軍領尙書事呂岱爲大司馬  
冬恪帥師過巢湖城東興使全端爲西城畱略守東城十  
二月曹芳使諸葛誕胡遵等步騎七萬圍東興王昶攻南  
郡母丘儉向武昌恪帥諸軍大破魏師於東興死者數萬



殺其將韓綜桓嘉等十六年春王昶等皆遁恪等還三月  
恪帥諸軍伐曹芳圍新城大疫兵卒死者大半秋恪引軍  
還冬孫峻殺恪於殿堂以峻爲丞相十一月有大鳥五見  
於春申十七年亮改元五鳳孫英謀殺孫峻弗克十八年  
曹髦將母上儉文欽以淮南之眾西入戰於樂嘉閏月孫  
峻及呂據畱贊帥兵襲壽春軍及東興聞欽等敗進次蒙  
皋欽詣峻降淮南餘眾數萬口來奔曹髦將諸葛誕入壽  
春峻引軍還二月峻及曹髦將曹珍戰於高亭敗績贊及  
孫楞蔣修皆死之三月使朱異襲魏安豐不克秋使馮朝  
城廣陵十二月作太廟民饑軍士怨叛十九年改元太平  
秋峻用文欽計將攻曹髦八月先遣呂據等帥軍自江都



入淮泗九月峻卒以從弟綝爲侍中武衛將軍領中外諸  
軍事綝殺呂據滕允自爲大將軍孫憲謀殺綝事泄死十  
二月使五官中郎將刁元告亂於天子二十年春以長沙  
東部爲湘東郡西部爲衡陽郡會稽東部爲臨海郡豫章  
東部爲臨川郡夏四月亮始親政綝所表奏多見詰難數  
至中書視權舊事問左右侍臣先帝數有特制今大將軍  
問事但令我書可邪亮嘗出西苑食生梅使黃門至中藏  
取蜜漬梅蜜中有鼠矢召問藏吏吏叩頭亮問吏曰黃門  
從汝求蜜耶吏曰向實求不敢與黃門不服侍中刁元張  
邠請以黃門藏吏付獄亮曰此易知耳令破鼠矢矢裏燥  
亮大笑謂元邠曰若矢先在蜜中中外當俱溼今外溼裏



燥必黃門所爲黃門首服左右莫不驚悚五月曹髦將諸葛誕以淮南之眾保壽春遣其裨將朱成稱臣上疏又遣子覲長史吳綱諸牙門子弟爲質六月使文欽唐咨全端等步騎三萬救誕朱異自虎林帥眾襲夏口夏口督孫壹奔雒陽秋孫綝帥眾救壽春次於鏊里綝使異爲前部督與丁奉等將介士五萬解圍異以糧餉不繼引還綝大怒殺異綝自鏊里還建業全緒子禕儀以其母奔魏十二月全端全懌等自壽春城降魏景耀元年令州郡伐官材亮以綝專恣與全尙劉承謀誅之事泄九月綝殺尙遣弟恩殺承廢亮爲會稽王時年十六



孫休字子烈權第六子延熙十五年封琅邪王居虎林諸葛恪秉政不欲諸王處瀕江兵馬之地遂徙丹陽太守李衡數以事侵休休請徙他郡又徙會稽景耀元年孫綝既廢亮使孫楷董朝迎休楷朝具述綝等所以奉迎之意明日遂行十月戊寅至曲阿有老父來謁叩頭曰事久變生天下喁喁願速行是日進及布塞亭武衛將軍恩行丞相事帥百僚備法駕迎於永昌亭恩奉符璽休曰將相諸侯咸推寡人寡人敢不承受羣臣以次奉引就乘輿綝以兵千人迎於半野卽日僭卽尊位改元永安冬以綝爲丞相荊州牧恩爲御史大夫衛將軍封縣侯長水校尉張布輔導勤勞爲輔義將軍封永康侯董朝封鄉侯以孫和子皓



爲烏程侯令曰丹陽太守李衡以往事之嫌自拘有司夫射鉤斬祛在君爲君其遣衡還郡絺一門五侯皆典禁軍權傾人主休恐其有變數加賞賜令曰諸吏家有五人三人兼重爲役父兄在都子弟給郡縣吏旣出限米軍出又從至於無經護者吾甚愍之其有五人三人爲役聽其父兄所欲畱者爲畱一人除其米限軍出不從頃之休聞絺逆謀陰與張布謀誅之十二月戊辰臘百僚朝賀公卿升殿令武士縛絺卽日伏誅以張布爲中軍督置學官立五經博士見吏之中及將吏之子弟有志好者令就業一歲課試差其品第加其位秩二年春備九卿官令曰管子有言倉廩實知禮節衣食足知榮辱夫一夫不耕有受其飢



一婦不織有受其寒飢寒竝至而民不爲非者未之有也  
自頃以來州郡吏民及諸營兵多違此業浮船長江賈作  
上下良田漸廢見穀日少欲求大定豈可得哉亦由租入  
過重農人利薄使之然乎今欲廣開田業輕其租稅差科  
強羸課其田畝務令優均使家給戶足足相供養則愛身  
重命不犯科法然後刑罰不用風俗可厚雖太古盛化未  
可卒致漢文昇平庶幾可及三年用都尉嚴密議作浦里  
塘黜王亮爲候官侯亮自殺以會稽南部爲建安郡分宜  
都置建平郡四年秋遣光祿大夫周奕石偉巡行風俗五  
年立子暈爲太子初休名爲四子欲使人難犯易避創爲  
奇字長曰暈字苒次曰暈字弄次曰鉅字盍次曰尅字焚



其率意類如此以濮陽興爲丞相休以興布有舊委以機務布典宮省興關軍國休銳意典籍欲盡覽百家之言又好射雉欲與博士祭酒韋昭博士盛冲論講道藝昭冲皆素切直布等恐入侍發其陰私因妄飾說以遏之又云懼妨政事休曰書籍之事患人不好好之無傷也此無所爲非而君以爲不宜王務學業其流各異不相妨也以布故竟廢講業六年夏交趾呂興等反冬曹奐相國司馬昭使其黨鍾會等犯漢天子使來告難休使丁奉督諸軍向壽春留平別詣施績於南郡議兵所向丁封孫異如沔中救漢未至而漢亡是歲炎興元年也分武陵爲天門郡七年復分交州爲廣州秋休死時年三十僞諡景皇帝



孫皓

孫皓字元宗一名彭祖字皓宗故太子和之子孫休封爲烏程侯休死子幼國人謀立長君左典軍萬彧與皓善言之於濮陽興左將軍張布遂迎立之改元元興八月以施續丁奉爲左右大司馬張布爲驃騎將軍加侍中貶休妻爲景皇后皓旣得志麤暴驕縱多忌諱好酒色小大失望布等悔之或譖於皓十一月殺興布是歲魏置交阯太守之郡明年又改甘露殺休妻朱氏又徙休四子於吳追殺其大者二人九月遷居武昌以零陵南部爲始安郡桂陽南部爲始興郡十二月魏亡是歲晉太始元年也明年皓改元寶鼎分會稽爲東陽郡分吳丹陽爲吳興郡以零陵



北部爲邵陵郡十二月復還建業二年六月起昭明宮移居之是歲分豫章廬陵長沙爲安成郡三年遣交州刺史劉俊前部督修則等擊交阯爲晉將毛炅所破皆死兵潰還合浦明年又改元建衡三年春皓舉大眾出華里母及妻妾皆行東觀令華覈等固爭乃還是歲沱潰破交阯殺晉所置守將九真日南皆還屬分交阯爲新昌郡諸將破扶嚴置武平郡鳳凰元年徵西陵督步闡闡據城降晉遣陸抗攻闡拔之三年分鬱林爲桂林郡秋改元天冊明年又改天璽會稽太守車浚湘東太守張詠不出算緡就所在斬之徇首諸郡是歲晉咸寧元年也明年改元天紀三年冬晉遣司馬伷向涂中王渾周浚向牛渚王戎向武昌



胡奮向夏口杜預向江陵王濬唐彬浮江東下同時夾伐  
皓遣丞相張悌及陶濬等帥師禦之初皓每宴羣臣皆令  
沈醉置黃門郎十人爲司過之吏宴罷奏其失大者加刑  
小者輒以爲罪後宮數千而采擇無已或剝人之面鑿人  
之眼岑昏險詖貴幸致位九列好興功役眾所患苦是以  
上下離心莫爲盡力四年春濬彬所至無不瓦解張悌等  
旣敗而陶濬自武昌還卽引見問水軍消息對曰蜀船小  
今得二萬兵乘大船戰自足擊之於是合眾授濬節鉞是  
夕眾潰皓遂降王濬是歲晉太康元年也自權至皓凡五  
十八年而亡太康四年冬皓死於洛陽

贊曰亮以童穉受制強臣身且不保其能有位哉休宥李



衡而戮孫綝可與言知矣而追殺故王不仁孰甚焉皓窮凶極惡卒隕其業非不幸也

孫登

孫登字子高權長子也權爲吳王立爲太子以諸葛恪張休顧譚陳表等侍講詩書權欲登讀漢書習近代事以張昭有師法重屈致之乃令休從昭受讀還以授登登待接僚屬如布衣之禮太傅張溫言於權曰夫庶子官最親密切問近對宜用雋德乃以表等爲中庶子權旣僭號立爲皇太子以恪爲左輔都尉休爲右弼都尉譚爲輔正都尉表爲翼正都尉是爲四友而謝景范慎刁元羊衡等皆爲賓客於是東宮號爲多士權遷建業召陸遜輔登鎮武昌



登或射獵常遠避民田不蹈苗稼至所頓息又擇空閒之地嘗乘馬出有彈丸過左右求之有一人操彈佩丸辭對不服從者欲笞之登不聽使求過丸比之不類乃釋之又嘗失盛水金馬孟覺得其人不忍致罰呼而責之敕親近勿言表陳久離定省子道有缺又陳陸遜忠勤無顧憂建興十一年權攻新城使登居守時年穀不登頗有鈔盜乃表定律令所以防禦甚得止姦之要初登所生庶賤徐夫人母養之後徐以妒廢處吳而步夫人最寵登將拜太子辭曰本立而道生欲立太子宜先立后權曰卿母安在曰在吳權默然立凡二十一年年三十三卒臨終上疏曰臣重維當今方外多虞師旅未休當勵六軍以圖進取軍以



人爲眾眾以財爲寶竊聞郡縣民物彫弊姦亂萌生是以法令煩滋刑辟過重臣聞爲政聽民律令與時推移誠宜與將相大臣詳擇所宜博采眾議寬刑減賦均息力役以順民望陸遜忠勤出身憂國蹇蹇在公有匪躬之節諸葛瑾步騭朱然全琮朱據呂岱吾粲闕澤嚴畯張承孫怡忠於爲國通達國體可令陳便宜蠲除苛煩愛養士卒撫循百姓五年之外十年之內遠者歸附近者盡力兵不血刃而大事可定也旣歿而後書聞權益以摧感言則殞涕謚曰宣子英封吳侯謝景者字叔發南陽宛人爲豫章太守有治績吏民稱之以爲前有顧劭其次卽景卒於官



孫和字子孝登與母弟也好學下士延熙五年立爲太子  
闕澤爲太傅薛綜爲少傅而蔡穎張純封備嚴維等皆從  
容侍從是時有司頗以條書問事和以爲姦妄之人將因  
事猜意以生禍心不可長也表宜絕之嘗言士人宜講修  
術學校習射御以周世務而但交游博奕以妨事業非進  
取之謂後羣僚侍宴語及博奕和以爲妨事費日而無益  
於用勞精損思而終無所成非所以進德修業積累功緒  
者也且志士愛日惜力君子志其大者何必博奕乃命侍  
坐者八人各著論以矯之於是中庶子韋昭退而論奏時  
蔡穎好奕同僚頗倣焉故因以諷之和母王夫人與全公  
主有隙會權寢疾和祭於廟和妻叔父張休居近廟邀和



過其居全公主使人謁之因言太子不在廟中專就如家計議又言王夫人見上寢疾有喜色權由是發怒夫人憂死而和寵稍衰弟霸覬覬滋甚陸遜吾粲顧譚數陳嫡庶之義理不可奪全寄楊竺又爲霸支黨譖言日至粲下獄譚徙交州遂幽閉和於是驃騎將軍朱據等率將吏泥頭詣闕請和權甚惡之竟徙和於故鄣眾咸冤之孫休時爲峻所害霸和母弟也和敗霸亦賜死

孫靜

孫靜字幼臺堅季弟也策攻會稽靜將家屬與策會於錢塘時太守王朗拒策於固陵靜曰朗負阻城守難可卒拔查瀆南去此數十里其道甚徑宜從彼據其內所謂攻其



無備出其不意者也吾當自帥眾爲軍前部破之必矣策  
曰善乃詐令軍中曰頃積雨水濁兵飲之多腹痛令趣具  
饗缶數百澄水至昏莫羅以然火便分軍夜投查瀆道襲  
高遷屯朗大驚遣故丹陽太守周昕帥兵前戰策破昕等  
遂定會稽表拜奮武校尉累遷昭義中郎將五子曷瑜皎  
與謙曷三子綽超恭恭生峻綽生緄

峻字子遠累遷武衛都尉侍中權死受遺輔政領武衛將  
軍典宿衛封都鄉侯旣殺太傅諸葛恪遷丞相大將軍督  
中外諸軍事假節鉞進封富春侯峻素無人望驕矜險賊  
多所刑殺百姓囂然孫英誅誅之事泄死孫儀邵恂等欲  
因朝會殺峻峻覺儀等自殺并殺魯育公主峻欲城廣陵



羣臣皆知其不可而莫敢言惟滕允力諫不從而功竟不就後夢爲諸葛恪所擊恐懼病發死以國事付綝

綝字子通累遷偏將軍及峻死爲侍中武衛將軍領中外諸軍事代總朝政呂據等聞之大怒與諸將連名表滕允爲丞相綝更以允爲大司馬代呂岱駐武昌據引兵還使人報允欲其廢綝綝表言允反遂殺允夷其族於是綝自爲大將軍封永寧侯負倨傲多行無禮魏將諸葛誕舉壽春請降遣文欽唐咨全端全懌等帥三萬人救之復遣朱異帥三萬人屯安豐爲文欽等援異爲魏兵所破綝於是大發軍出屯饒里復遣異帥丁奉黎斐等五萬人攻魏屯黎漿任度張震等募勇敢六千人於屯西六里爲浮橋



夜渡又築偃月壘爲魏石苞州泰所破軍欲退異復作車箱圍趨五木城苞泰復攻異異敗歸而魏將胡烈以奇兵詭道來襲盡焚異資糧絃復授兵三萬人使異死戰異不從絃斬之於鑊里而遣弟恩救誕會誕敗引還絃旣不能援出誕而貳貳士眾自戮名將人莫不怨之絃以亮始親政事多所詰難甚懼還建業稱疾不朝使弟據入蒼龍宿衛恩閹等分屯諸營欲以自固亮內嫌絃乃推魯育見殺本末責怒虎林督朱熊熊弟損不匡正峻乃殺熊損絃入諫不從亮遂與公主魯班太常全尙將軍劉承謀誅絃事泄絃殺尙承以兵圍亮召羣司議廢之皆震怖曰惟將軍令絃以亮罪頒告遠近尙書桓彝不可署名絃怒殺之彝



者長沙人階之弟也遂徵休立之綝爲丞相荊州牧食五  
縣恩等皆縣侯一門五侯皆典禁兵權傾一時自孫權以  
來未嘗有也綝奉牛酒於休休不受詣左將軍張布酒  
酣出怨言曰初廢少主時多勸吾自爲之帝非我不立今  
上禮見拒當復改圖耳布密以聞休銜之或有告綝反者  
綝懼求出屯武昌將軍魏邈說休曰綝居外必有變武衛  
士施朔告綝反有徵休與張布丁奉謀於會誅之十二月  
戊辰臘綝入賀布奉目左右縛之綝叩頭曰願徙交州休  
曰卿何不徙滕允呂據又曰願沒爲官奴休曰何不以允  
據爲奴遂斬之以其首徇於外而撫其眾曰與綝同謀者  
皆赦不問放仗者五千人夷綝三族斲孫峻之棺取其印



綏以殺魯有故也。綏死時年二十八，休恥與峻、綏同族，除其屬籍，稱之曰故峻。故綏云：「敕改葬諸葛恪。」滕允、呂據等其坐恪等遠徙者皆召還。

瑜字仲異，領丹陽太守。加綏遠將軍，從權拒曹操於濡須，說權持重，權不從，果無功。自溧陽徙屯牛渚，招納廬江二郡降附，其眾濟陰人馬普、篤，學好古，瑜厚禮之。使將吏子弟數百人受業，遂立學官，臨饗講肄，時諸將皆以軍務爲急，而瑜獨好典籍。雖在軍旅，絃誦不絕。建安二十年卒。皎字叔朗，累遷都護，征虜將軍，代程普督夏口。黃蓋及兄瑜卒，并統其軍，輕財好施，善交結，與諸葛瑾、厚、委廬江劉靖，以得失。江夏李允以眾事廣陵吳碩、河南張梁以軍旅。



而傾心親待莫不自盡嘗遣兵候獲魏邊將吏美女以進  
皎皎更其衣服送還下令曰今所誅者曹氏也其百姓何  
罪自今以往不得繫其老弱由是江淮間多歸附者嘗以  
小故與甘寧忿爭或以諫寧寧曰臣子一等征虜雖公子  
何可專行侮人邪吾值明主當輸力效死以報所天誠不  
能隨俗屈曲權聞之以書責皎曰自吾與北方爲敵中間  
十年初時相持年少今者且三十矣孔子言三十而立非  
但謂五經也授卿以大任督護諸將於千里之外欲使如  
楚任昭奚恤揚威於北境非徒逞私志而已近聞與甘興  
霸飲因酒侵陵其人其人求屬呂蒙督中此人雖麤豪有  
不如人意時然其較略大丈夫也吾親之者非私之也吾



親愛之卿疏憎之卿所爲每與吾違其可久乎人誰無過  
貴其能改宜追前愆深自咎責皎得書上疏陳謝遂與寧  
厚相結後呂蒙當襲南郡權欲令皎與蒙爲左右部大督  
蒙曰若至尊以征虜能宜用之以蒙能宜用蒙昔周瑜程  
普爲左右督部共攻江陵雖事決於瑜普自恃宿將且俱  
爲督遂至不睦幾敗國事此目前之戒也權悟謝曰以卿  
爲大督皎爲後繼襲關羽取荊州皎有力焉建安二十四  
年卒子允爲丹陽侯

龔字季明皎卒代統其眾以揚武中郎將領江夏太守遵  
皎舊迹禮劉靖李允吳碩張梁及江夏間舉等每事咨訪  
與訥於造次而敏於當官軍民稱之權攻石陽還過其軍



見其軍容甚整歎曰吾初憂其遲鈍今治軍諸將少能及者吾無憂矣拜揚威將軍封沙羨侯與亦愛樂儒生復命部曲子第就業後仕進於朝者數十人卒子承嗣

張梁者河南人初權在武昌欲遷都建業而水道二千里恐舟行有警不相及乃至夏口會百僚議之或云宜立柵夏口或言宜重設鐵鍊者權皆以爲非計時梁爲小將未知名乃越席進曰臣聞香餌引泉魚重幣購勇士今宜明賞罰之信遣將入沔與敵爭利形勢旣成彼不敢動復以精兵萬人營武昌擇知略者將之常使嚴整一旦有警應聲相赴作甘水城輕艦數千諸所宜用皆使備具如此開門延敵且不來矣權善其計卽增超其秩後以功進沔中



督

賁字伯陽父羌字聖臺堅同產兄也從堅攻伐堅死統餘  
眾還後袁術僭號棄妻子還江南時策已平吳會定豫章  
上賁領太守丹陽僮芝據廬陵策謂賁曰兄今據豫章是  
扼僮芝咽喉而守其門戶當伺其形便一舉可定也因會  
孫輔進兵周瑜爲作後援賁聞芝病如策計瑜到巴丘輔  
遂進據廬陵封都亭侯建安十三年使者劉隱奉漢帝詔  
書拜征虜將軍領郡如故在官十一年卒子鄰嗣鄰字公  
達年九歲代領豫章在郡垂二十年政績顯著召爲繞帳  
督時太常潘濬典荊州事重安長陳畱舒燮有罪下獄濬  
燮有舊憾欲殺之論者多爲燮言濬猶不釋鄰謂濬曰舒



伯膺兄弟爭死海內義之以爲美譚又有奉國舊意今君  
殺其子弟若天下一家中州士人必問仲膺繼嗣荅者云  
潘承明殺之於事何如濟意遂解燮因得免仲膺名邵燮  
父也鄰遷夏口沔中督所居任職卒子苗嗣賁弟輔字國  
儀以揚武校尉佐孫策平三郡又從討陵陽生得渠帥祖  
郎累戰有功策表爲廬陵太守後遣人與曹操相聞事覺  
權囚之數歲卒

翊字叔弼權弟也饒悍果烈有兄策風建安八年以偏將  
軍領丹陽太守時年二十先是權殺吳郡太守盛憲憲故  
孝廉嫡覽戴員亡匿山中及翊爲丹陽太守皆禮致之覽  
爲大都督督兵員爲郡丞而帳下親近邊鴻等數爲翊所



因因權出征謀害翊覽員等與其謀時諸縣令長竝會翊  
欲宴客以徐氏頗曉卜筮語徐吾明日欲爲長吏作主人  
卿試卜之徐言卦不能吉可須異日翊以長吏不宜畱久  
乃大會賓客翊出入常持刀是日被酒徒手送客鴻從後  
斫翊遂遇害鴻走入山徐氏使捕之中宿乃獲覽員歸罪  
於鴻殺之諸將皆知覽員所爲而力不能討覽入居府悉  
取翊嬪妾及左右侍御欲復取徐徐乃給之曰乞須晦日  
設祭除服時月垂晦覽聽之徐潛使人以其意語翊親將  
孫高傅嬰等高嬰等涕泣曰所以不卽死者以死無益欲  
思惟事計事計未立未敢啟夫人耳今日之事實夙夜所  
懷也乃密呼翊時親厚者二十餘人以徐言語之相與盟



誓至晦日設祭徐哭盡哀乃除服盛飾歡笑如故日覽密覘之無復致疑徐呼高嬰與諸婢羅致戶內使人報覽已除服卽吉覽入徐大呼二君可起高嬰卽共殺覽餘人卽於外殺員徐乃還衰經奉覽員首級祭翊墓舉軍震駭權亦尋至族誅覽員餘黨擢高嬰爲牙門翊子松官至射聲校尉都鄉侯翊弟匡字季佐舉孝廉未試用卒子泰曹氏甥也泰子秀爲前將軍夏口督懼爲孫皓所殺奔晉晉以爲驃騎將軍後聞皓降羣臣皆賀秀稱疾南向流涕曰昔討逆弱冠以一校尉創業後主舉江南而棄之宗廟山陵於此爲墟悠悠蒼天此何人哉皆義之

韶字公禮伯父河字伯海堅之族子出後姑俞氏後還爲



孫氏累遷將軍屯京城邊鴻之亂河責嬀覽戴員不能全  
護覽員怒曰伯海與將軍疏遠而責我乃爾討虜若來吾  
屬無遺遂殺河使人北逆揚州刺史劉馥令駐厯陽欲以  
丹陽應之會翊帳下徐元孫高傳嬰等殺覽員詔年十七  
收河餘眾繕治京城起樓櫓修器備以禦敵權聞亂從椒  
上還過定丹陽夜至城試攻驚之兵皆乘城傳令備警謹  
聲動地頗射外人權使諭之乃止明日見詔甚器之卽拜  
承烈校尉統部曲後爲廣陵太守偏將軍權爲吳王遷揚  
威將軍建德侯尋遷鎮北將軍詔御軍數十年愛養士卒  
得其死力常以警疆場遠斥候先知動靜而爲之備故鮮  
負敗青徐汝沛頗來歸附淮南潁江屯徹兵遠徙徐泗江



淮之地不居者各數百里自權西征還都武昌詔不進見者十餘年還建業乃得見權問青徐諸屯要害遠近士馬眾寡魏將姓名盡能識之身長八尺神觀瑰偉權甚悅之曰吾久不見公禮不圖進益乃爾延熙四年卒子越嗣河子桓字叔武累遷建武將軍封丹徒侯卒

贊曰貞婦烈女見於載籍博矣然能權以濟事者益鮮予觀徐氏用權歸於正致曲以遂其旨卒梟仇首遂以雪恨與夫自經於溝瀆而爲諒者有間矣雖古烈丈夫何以加之



續後漢書卷第二十五

上海郁松年原本

宋廬陵蕭常著

邑後學胡芳秋杜邦浚校梓

吳載記第三

劉繇

劉繇字正禮東萊牟平人齊孝王少子封牟平侯子孫因家焉伯父寵官至太尉兄岱字公山歷位侍中兗州刺史繇年十九從父黽爲賊所劫質繇篡取以歸舉孝廉爲郎中州辟部濟南濟南相中常侍子貪穢不法繇奏免之平原陶丘洪薦繇欲令舉茂材刺史曰前舉公山奈何復舉正禮洪曰若明使君用公山于前擢正禮于後所謂御二龍于長塗騁騏驎于千里不亦可乎後避亂淮浦詔書以



爲揚州刺史時袁術在淮南繇不敢之州欲南渡江吳景  
孫賁迎至曲阿漢加繇爲牧振武將軍孫策東渡繇奔丹  
徒泝江南保豫章駐彭澤會笮融先至殺太守朱皓入居  
郡中繇討之融敗入山爲民所殺繇尋病卒長子基字敬  
輿年十四居父喪盡禮故吏饋餉一不受丰儀秀整孫權  
愛敬之權爲驃騎將軍辟東曹掾拜輔義校尉建忠中郎  
將權稱吳王遷大司農權嘗宴羣臣騎都尉虞翻被酒忤  
旨權欲殺之基力諫得免大暑權于船樓上飲忽遇風雨  
以蓋自覆又命覆基其見禮遇如此累官光祿勳分平尚  
書事卒

士燮



士燮字威彥蒼梧廣信人其先避王莽之亂自魯國汝陽僑居交州至燮六世矣燮父賜桓帝時日南太守燮少學京師師事潁川劉子奇治左氏春秋察孝廉補尚書郎公事免官後舉茂材除巫令遷交阯太守弟壹初爲郡督郵刺史丁宮徵還京師壹侍送勤恪臨別謂曰刺史若待罪三事當相辟也後宮爲司徒辟壹比至宮已免黃琬代爲司徒甚禮遇之壹亦盡心于琬董卓之亂亡歸里燮表壹領合浦太守次第徐聞令黈領九真太守黈弟武領海南太守燮器量寬厚謙虛下士中國士人避難往依者以數百篤好春秋爲之注解陳國袁徽與尚書令荀彧書曰交趾士府君學問優博又達於從政處大亂之中保全一郡



二十餘年疆場無事民不失業羈旅之徒皆蒙其德雖竇融保河西曷以加之官事小間輒玩書傳尤精左氏春秋吾數問質傳中諸疑皆有師說又兼通尚書古今大義今欲條左氏尚書長義尚之其見稱如此燮兄弟並爲列郡雄長一州威震百蠻尉佗不能踰也時天下喪亂道路梗絕而燮不廢貢職詔拜安遠將軍封龍度亭侯建安十五年孫權遣步騭爲交州刺史騭至燮兄弟奉承節度而蒼梧太守吳巨懷異心遂斬之權加燮左將軍建安末遣子廙入質權以爲武昌太守燮與壹諸子在南者皆拜中郎將燮又誘益州豪姓雍闓等使遙東附權益嘉之遷衛將軍封龍編侯弟壹偏將軍都鄉侯燮每遣使致雜香細葛



明珠大貝琉璃翡翠瑇瑁犀象之珍奇物異果蕉邪龍眼  
之屬無歲不至壹時貢馬凡百數十匹權厚荅慰之在郡  
四十餘年建興四年卒時年九十權以交趾縣遠乃分合  
浦以北爲廣州呂岱爲刺史交趾以南爲交州戴良爲刺  
史又遣陳時代燮爲交州太守岱畱南海良與時俱前行  
到合浦而燮子徽自署交趾太守發兵拒良良畱合浦交  
趾桓鄰燮舉吏也叩頭諫徽使迎良徽怒殺之鄰兄治子  
發合宗兵擊徽乃約和各罷兵而呂岱被命誅徽自廣州  
馳至壹子中郎將匡與岱有舊岱乃遣說徽等徽與兄祗  
弟幹頌等六人肉袒奉迎岱皆斬之壹黜匡後出權原其  
罪及燮質子厥皆免爲庶人



太史慈

太史慈字子義東萊黃人也少好學仕郡奏曹史避仇之遼東北海相孔融數遣人餉遺其母時融以黃巾寇暴出屯都昌爲賊管亥所圍慈適從遼東還母謂慈曰汝與北海孔融未嘗有雅故自汝行之後贍恤殷勤過於故舊今爲賊所圍汝宜赴之慈卽單步徑至都昌圍尙未密夜伺間得入因求兵出斫賊融不聽欲待外救外救未至而圍日偪時昭烈爲平原相融欲遣人告急而城中無由得出慈請行融曰今賊圍甚密奈何對曰昔府君傾意于老母老母感恩遣慈赴府君之急以慈有可取而來今人言不可慈亦言不可豈府君愛顧之義老母遣慈之意耶事已



急矣願府君無疑于是嚴行蓐食須明便帶韃攝弓上馬將兩騎自隨各作一的持之開門便出圍下左右人甚驚慈引馬至城之塹內植所持的各一出射之射畢入門明晨復如是圍下人或起或臥射畢復入明晨復如是無復起者于是鞭馬突圍馳去比賊覺慈行已過又射殺數人皆應弦而倒故無敢追者遂到平原說昭烈曰慈東萊之鄙人也與孔北海親非骨肉比非鄉黨特以名志相好有分災共患之義今管亥暴亂北海被圍孤窮無援危在朝夕以君有仁義之名能急人之急故北海區區延頸仰待使慈冒白刃突重圍從萬死之中自託於君惟君所以存之昭烈斂容謝客曰孔北海知世間有劉備耶遂遣精兵



三千人隨慈賊聞兵至散走融益貴之曰卿吾之少友也  
事畢還見其母母曰我喜汝有以報北海也揚州刺史劉  
繇與慈同郡而未相識因渡江至曲阿見繇未去會孫策  
至或勸繇可以慈爲大將繇曰吾用子義許子將不笑我  
耶但使慈偵視眾寡獨與一騎卒遇策策從騎十三皆韓  
當宋謙黃蓋輩慈便前鬪正與策對策刺慈馬而墜得其  
項上手戟慈亦得策兜鍪會兩家兵騎來赴于是解去慈  
與繇俱奔豫章而遁于蕪湖山中稱丹陽太守時策已平  
定宣城以東惟涇以西六縣未服因進駐涇縣立屯府大  
爲山越所附策自來攻遂見執策卽解縛捉其手曰寧識  
神亭時耶若卿此時得我云何慈曰未可量也策曰今日



之事與卿共之因問進取之術荅曰敗軍之將不足與論  
事策曰昔韓信定計于廣武今策決疑于君君何辭焉慈  
曰州軍新破士卒離心倘或分散復難合聚欲出宣恩安  
集恐不合意策曰誠所望也明日日中望君來還諸將皆  
疑策曰太史子義青州名士以信義爲先終不欺策明日  
大會諸將立表視景日中而慈至策大悅卽以爲門下督  
還吳拜折衝中郎將後劉繇亡於豫章士眾萬餘人未有  
所附策命慈往撫之左右皆曰慈必北去不還策曰子義  
舍我當復誰與餞于昌門把腕別曰何時能還荅曰不過  
六十日果如期而返劉表從子磐數寇艾西安諸縣策于  
是分海昏建昌六縣以慈爲建昌都尉治海昏并督諸將



拒磐磐不敢復爲寇慈長七尺七寸美髯猿臂善射弦不虛發常從策討麻保賊于屯裏緣樓上行詈以手持樓棼慈引弓射之貫手著棼圍外萬人莫不稱善曹操聞其名遺其書以篋封之發視無所有但貯當歸權嗣事以慈能制磐遂委南方之事建安十一年卒時年四十一子亨字元復厯官越騎校尉尙書吳郡太守

朱治

朱治字君理丹陽故鄣人初爲縣吏察孝廉辟州從事從孫堅征伐有功表行督軍校尉堅死從策依袁術知術不足與乃勸策還平江東時太傅馬日磾在壽春辟治爲掾遷吳郡都尉會吳景已在丹陽而策爲術攻廬江于是劉



繇恐爲袁繇所并遂成嫌隙而策家在州下治乃使人于  
曲阿迎母及權兄弟所以供養護持者甚至治從錢塘欲  
進到吳吳郡太守許貢拒之于由拳治與戰大破之貢南  
就山賊嚴白虎治遂入郡領太守事策旣走劉繇東定會  
稽時繇年十五治舉權孝廉策死與張昭等共尊奉權  
建安七年權表治爲九真太守行扶義將軍徙食婁由拳  
無錫毘陵四縣佐定東南征討夷越封毘陵侯領郡如故  
俄拜安國將軍徙封故鄣及權王吳治進見權親迎之執  
版交拜宴贈特厚下至從行吏皆得奉贄私覲其見異如  
此初權弟翊性峭急喜快意治數諭以道義權從兄豫章  
太守貢女爲曹操子婦及操破荊州貢懼欲遣子入質治



聞之往見賁爲陳安危由是遂止性儉約雖富貴車服不加飾權優異之令督軍御史典屬城文書治領四縣租稅而已以老思鄉自表屯故鄣撫鎮山越諸父老故人莫不造門皆引與飲宴鄉黨榮之在故鄣歲餘還吳建興二年卒年六十九在郡三十一年子才嗣遷偏將軍才弟紀權妻以策女亦以校尉領兵才子琬仕至鎮西將軍  
贊曰繇資緩懦遭時多虞而處牧伯之任用違所長其敗宜也變有功于南越慈報效于北海皆賢矣哉治以舊恩身都榮寵亦其幸歟



續後漢書卷第二十六

上海郁松年原本

宋廬陵蕭常著

邑後學胡芳秋杜邦浚校梓

吳載記第四

張昭

張昭字子布彭城人少好學工屬文尤精隸書通左氏春秋博覽羣書與瑯琊趙昱東海王朗齊名弱冠舉孝廉不就時汝南王簿應劭議宜爲舊君諱議者互有異同昭著論非之其略曰論者謂起元建武以來舊君名諱五十六人後生不得協也愚竊有疑焉蓋乾坤剖分萬物定形肇有父子君臣之經故聖人順天之性制禮尙敬在三之義君實食之在喪之哀君親臨之厚莫重焉恩莫大焉誠臣



子所尊仰然親親有衰尊尊有殺故禮服上不盡高祖下  
不盡元孫又傳記四世而總服窮也五世袒免殺同姓也  
六世親屬竭矣又曲禮有不逮事之義則不諱況乃古君  
五十有六哉周穆諱滿至定王時有王孫滿爲大夫是臣  
協君也又厲王諱胡而莊王之子亦名胡其比多矣今應  
劭雖上尊舊君之名而下無所斷倡而不法將來何觀州  
里才士陳琳等皆善其議刺史陶謙舉茂材不應靈帝末  
避亂江東會孫策經略諸縣辟爲長史撫軍中郎將升堂  
拜母如比肩之舊文武之事一以委之策臨終以第權託  
昭昭率羣僚立而輔之上表漢室下移屬城中外將校各  
令奉職權悲感未視事昭曰夫爲人後者貴能負荷先軌



克昌堂構以成勲業也方今天下鼎沸羣盜滿山孝廉何得寢伏哀戚肆匹夫之情哉乃扶權上馬陳兵而出然後眾心知有所歸後爲權長史權每出征昭常居守專處左右爲謀臣後昭烈表權行車騎將軍昭爲軍師權嘗乘馬射虎虎突前攀其鞍昭變色曰夫爲君者爲能駕馭英雄驅使羣賢豈謂馳逐于原野校勇於猛獸者乎如有一旦之患奈天下笑何權笑曰年少慮事不遠以此愧君曹丕遣邢貞拜權爲吳王貞入門不下車昭謂貞曰夫禮無不敬故法無不行而君敢自尊大豈以江南寡弱無方寸之刃歟貞遽下車尋拜綏遠將軍封由拳侯昭與孫紹滕阮鄧禮等采周漢譔朝儀權于武昌臨釣臺飲羣臣大醉以



水灑羣臣曰今日酣飲醉墮臺中乃當止耳昭正色不言  
出外車中坐權使人呼昭還謂曰共爲樂耳公何爲怒乎  
對曰昔紂爲糟丘酒池長夜之飲當時亦以爲樂不以爲  
惡也權有慚色初權欲置丞相羣議歸昭權曰方今多事  
職統者責重非所以優之也後孫邵卒百僚復舉昭權曰  
孤豈于子布有愛乎領丞相事煩而此公性剛所言不從  
怨咨將興非所以益之也乃用顧雍權旣僭位昭以老病  
辭職更拜輔吳將軍班亞三司改封婁侯邑萬戶里居無  
事著春秋左氏傳解及論語注權嘗問衛尉嚴峻寧念小  
時所閱書否峻因誦孝經仲尼居昭曰峻鄙人臣請誦之  
乃誦君子之事上咸以昭爲知所誦每進見辭氣壯厲義



形于色嘗以直言忤旨久不進見後漢使來稱漢德美而羣臣莫能對權歎曰使張昭在坐彼不折自廢安復自誇乎明日遣中使勞問因召之昭避席權跪止之昭坐定仰而言曰昔太后桓王不以老臣屬陛下而以陛下屬老臣是以思盡臣節以報厚恩使泯沒之後有可稱述而意慮淺短違忤盛旨自分長棄溝壑不圖復奉帷幄然臣愚心所以事國志在忠益畢命而已若乃變心易慮以偷榮苟容此臣所不能也權辭謝焉權以公孫淵稱藩遣使張彌許晏至遼東拜淵燕王昭諫曰淵背魏懼誅遠來求援非本志也若淵改圖欲自明于魏兩使不反不亦取笑于天下乎權與反覆昭意彌切權不能堪按刀而怒曰吳國士



人入宮則拜孤出宮則拜君孤之敬君亦至矣而數于眾中折孤孤常恐失計昭熟視權曰臣雖知言不用每竭愚忠者誠以太后臨崩呼老臣于牀下遺詔顧命之言故在耳因涕泣橫流權擲刀于地與昭對泣然卒遣張彌許晏昭憤言之不用稱疾不朝權恨之以土塞其門昭復于內以土封之淵果殺彌晏權數慰謝昭固不起權因出過其門呼之昭辭疾篤權燒其門欲以恐之昭更閉戶權使人滅火駐門良久昭諸子共扶昭起權載以還宮淡自克責昭容貌矜嚴剛毅不回權曰孤與張公言不敢妄也舉邦憚之年八十一建興十四年卒遺令幅巾素棺斂以時服權素服臨弔謚曰文侯昭文章典雅爲時流所推劉表嘗



作書與孫策以示禰衡衡嗤之曰是欲使孫策帳下兒讀之耶將使張子布見之乎長子承先已封侯少子休襲爵承字仲嗣少以才學知名與諸葛瑾步騭嚴畯相友善累遷濡須都督奮威將軍都鄉侯承爲人壯毅忠謹甄識人物拔彭城蔡款南陽謝景于孤微童幼後竝爲國士款至衛尉景豫章太守又諸葛恪少時人皆奇其英才承言終敗諸葛氏者元遜也其知人類如此年六十七延熙七年卒諡曰定子震嗣休字叔嗣弱冠與諸葛恪顧譚等俱爲太子登僚友以漢書授登指摘文義分別事物竝有條章由中庶子轉右弼都尉權嘗游獵及暮而返上疏規諫權大喜之因以示昭及登卒爲侍中羽林都督遷揚威將軍



爲權子霸友所譖賜死昭弟子奮年二十造大攻車昭曰  
女年尙少何以自委于軍旅後爲將軍封樂鄉亭侯

顧雍

顧雍字元歎吳郡吳人蔡邕從朔方還嘗避仇于吳雍從  
學琴書邕歎其專敏異之曰卿必成雅器今以吾名名卿  
雍自以爲嘗爲伯喈所歎因以爲字州郡表薦弱冠爲合  
肥長轉婁曲阿上虞皆有治跡孫權領會稽太守不之郡  
以雍爲丞行太守事吏民鄉服累遷大理奉常領尙書令  
封陽遂鄉侯拜侯還寺而家人不知建興三年迎母于吳  
旣至權臨其母親拜其母公卿大夫畢會太子又往慶焉  
國人榮之雍爲人寡言語舉動以時又不喜飲酒權嘗歎



曰顧君不言言必有中每宴集一座不敢肆飲權亦曰顧公在座使人不樂其見憚如此改太常進封醴陵代孫邵爲丞相平尚書事其所選用文武將吏各隨其才心無適莫時訪民間利病及政職所宜輒密以聞若見納用歸善於上不用終不泄權以此重之然于公朝有所奏對辭色雖順而所執者正張昭言法令太密刑罰微重宜有所損權默然謂雍曰卿以爲何如雍曰臣之所聞亦如昭所言于是議輕刑久之呂乙秦博爲中書典校諸官府州郡文書因作威福遂建權酤障管之令毀短大臣排陷無辜雍等皆爲所按因被譴責後乙姦罪覺收詣廷尉雍往斷其獄和顏問狀臨出又謂曰君意豈有所言乙叩頭無所言



尚書郎懷敘面罵辱之雍曰官有正法何至于此時瀕江  
諸將多陳便宜有所掩襲權以訪雍雍曰臣聞兵戒于小  
利此等所陳欲要功名而爲身計非爲國也苟不足以耀  
威損敵不宜聽也爲相十九年年七十六延熙六年卒諡  
曰肅長子劭字孝則覽羣書少與舅陸績齊名而陸遜張  
敦卜靜等皆出其下權妻以策女起家爲豫章太守下車  
祀徐孺子墓優待其後禁淫祀小吏資稟佳者輒令就學  
擇其先進擢置右職舉善良以教風化大行初錢塘丁謂  
陽羨張秉烏程吾粲雲陽殷禮竝出微賤劭皆友之爲立  
聲譽當之豫章馬騎已發會秉疾病時送者數百人卽謝  
賓客曰張仲節疾病不能來別恨不見之暫還與訣諸君



少待其下士惟善所在類如此謂仕至典軍中郎將秉  
陽太守粲太子少傅禮零陵太守禮字德嗣禮子基以才  
學知名著通語數十篇世以劭爲知人在郡五年卒子譚  
承譚字子默弱冠與諸葛恪等爲太子四友延熙中代恪  
爲左節度上疏陳時事權輟食稱善以爲過於徐詳每省  
簿書屈指心計發摘疑謬吏不能欺薛綜爲選曹尙書固  
讓譚曰譚心精體密貫道達微才照人物德允衆望誠非  
愚臣所可越遂代綜祖父雍卒數月拜太常代雍平尙書  
事時權子霸有寵與太子和埒譚上疏請嚴嫡庶之分由  
是與霸成隙竟爲其黨全寄等所譖徙交州發憤著書新  
言二十篇其知難篇蓋自傷也後二年卒弟承字子直與



譚俱徙交州孫劭者字長緒北海人長八尺爲孔融功曹  
融稱之曰廊廟才也權初嗣事數陳便宜以爲應遣使聘  
於天子權卽從之累遷車騎長史權僭號爲丞相威遠將  
軍封陽羨侯爲張溫暨豔所誣奏辭位待罪權令復職年  
六十三歲卒

諸葛瑾

諸葛瑾字子瑜漢丞相亮同祖兄也避亂江東曲阿宏容  
見而異之薦之孫權與魯肅等竝見賓禮爲權長史建安  
二十年權遣瑾使益州通好于昭烈與其弟亮俱公會相  
見退無私面每論諫不爲梗切微見風采如有未合則含  
而及他徐復言事造端以物類相求于是權意往往而釋



吳郡太守朱治權舉將也權嘗以事望之而素加禮敬難  
自詰讓忿忿不解瑾揣知其故不敢顯陳乞以私意自問  
遂于權前爲書汎論物理因以己心遙忖度之畢以示權  
權曰孤解矣顏氏之德使人加親豈謂此耶又憤校尉殷  
模罪至不測羣下多爲之言權怒益甚與相反覆惟瑾默  
然權曰子瑜何獨不言瑾避席曰瑾與模等遭本州傾覆  
棄墳墓攜老穉在流離之中蒙生成之福不能躬相督厲  
陳荅萬一今模孤負恩惠自陷罪戾臣謝過不暇誠不敢  
有言權愴然曰爲君赦之後從攻關羽封宣城侯以綏南  
將軍代呂蒙領南郡太守駐公安會昭烈東征權求和不  
許瑾與昭烈箋曰奄聞旗鼓來至白帝或恐議臣以吳王



侵取此州危害關羽怨深禍大不宜與和此用心于小未  
畱意于大者也試爲陛下論其輕重及其小大陛下若擲  
威損忿暫省瑾言計可立決陛下以關羽之親何如先帝  
荊州大小孰與海內俱應仇疾孰當先後若審此數者易  
于反掌時有言瑾別遣親人相聞于昭烈權曰孤與子瑜  
有死生不易之誓子瑜之不逮孤猶孤之不負子瑜也予  
與子瑜可謂神交非外言所能間權爲吳王遷左將軍督  
公安假節進封宛陵侯翻以狂直流徙瑾屢爲之言翻與  
所親書曰諸葛敦仁則天活物比蒙清議雖有祁奚之救  
德無羊舌解釋難冀也瑾有容止思度人服其<sub>臣</sub>雅權嘗  
謂曰近得伯言表以爲曹丕已死毒亂之民當望旌瓦解



而更靜謐聞皆選用忠良寬刑罰布恩惠薄賦省役以悅民心其患更淡于操時孤以爲不然操之所行其惟殺伐小爲過差及離間人骨肉以爲酷耳至于將御自古少比今獻之不如丕猶丕之不如操也其所以務崇小惠必以其父新死自度衰微恐困苦之民一朝崩阻故强委曲以求民心欲以自安耳聞任陳長文曹子丹輩或文人諸生或其族黨寧能御雄才虎將以制天下乎夫威柄不專則其事乖錯昔張耳陳餘非不能親睦至于秉勢自還相賊害乃事理使然也自古及今安有四五人把持國柄而不乖離轉相蹄齧者乎强當淩弱弱當求援亂亡之道也子瑜卿但側耳聽之伯言每長于計算恐此事小短也權儻



號拜大將軍延熙四年卒初瑾柄任于吳而弟亮爲漢丞相族弟誕亦顯于魏一門三方冠蓋鼎盛天下榮之瑾雖不及亮而操行尤純美子恪先已封侯恪弟融襲爵融字叔長爲奮威將軍孫峻害恪遣兵圍融融飲藥死三子皆遇害

恪字元遜少知名有口辯權奇之謂瑾曰藍田生玉其不虛也長七尺六寸少鬚眉折頰廣額大口高聲弱冠拜騎都尉與顧譚張休等傳太子登爲賓客由中庶子轉左輔都尉天子嘗遣費禕來聘食飯作麥賦恪亦作磨賦咸稱善焉權問恪卿何如滕允對曰登階躡履臣不如允回籌轉策允不如臣恪以丹陽山險民多果勁雖前發兵徒得



外縣平民其餘深遠莫能盡徙屢請爲官出之三年可  
士四萬眾議咸以地勢險阻與吳郡會稽新都郿陽四郡  
接境幅員數千里山谷萬重其幽遠民人未嘗入通城對  
長吏皆持兵于林莽逋亡宿惡逃竄其間山出銅鐵自鑄  
甲兵俗好武習戰高尙氣力其升山越險抵突叢棘若獺  
之走淵猿狖之騰木時出爲寇每發兵討之戰則蠶至敗  
則鳥竄自前世以來不能羈也皆以爲難恪父瑾聞之亦  
以爲事終鮮濟歎曰恪不大興吾宗必大赤吾族也恪盛  
陳可以必捷拜撫越將軍領丹陽太守時年三十二恪到  
府乃移書四部屬城長吏令各保其疆界明立部伍其從  
化平民悉令屯居乃分部諸將羅兵幽阻但繕藩籬不與



交鋒伺其稼將熟輒縱兵芟刈使無遺穗舊穀既盡新田不收平民屯居略無所入于是饑窮漸出降服恪乃令曰山民去惡從化皆當撫慰不得有所拘執曰陽長胡伉得降民周遺遺舊惡民困窮暫出內圖叛逆伉縛送言于府恪以伉違教遂斬以徇以狀聞民聞伉執人被戮知官惟欲出之而已于是老幼相攜而出所得人數皆如本規恪乃自領萬人餘分給諸將權嘉其功遣尙書僕射薛綜勞軍拜威北將軍封都鄉侯恪請率眾佃廬江皖口因輕兵襲舒俘其人民而還延熙中魏司馬懿謀攻恪權方發兵應之望氣者以爲不利于是徙恪鎮柴桑嘗與丞相陸遜書曰楊敬叔傳述清論以爲方今人物凋盡守德業者不



能復幾宜于左右更爲輔車上熙國事下相珍惜又世俗  
好相謗毀使已成之器中有損累聞此喟然君子不求備  
于一人若細行不足皆宜濶略且士誠不可以苛刻論苛  
刻聖賢猶將不全故曰以道望人則難以人望人則易自  
漢許子將輩更相謗訕或成禍難非有他故惟坐克己不  
能盡如禮而責人專以正義夫克己不如禮則人不服專  
責人以正義則人不堪內不服其行外不堪其責則不得  
不相怨相怨一生則小人得容其間而三至之言浸濶之  
譖紛錯交至雖使至明至親者處之猶難于自定況已爲  
隙且未能明者乎是故張陳至于血刃蕭朱不終其好由  
此而已恪知遜以此嫌已故遂推廣而贊其旨也會遜卒



遷大將軍駐武昌代遜領荊州事久之權疾而太子少乃召恪以大將軍領太子太傅中書令孫<sub>宏</sub>領少傅權疾困召恪<sub>宏</sub>及太常滕<sub>允</sub>將軍呂據侍中孫峻屬以後事翌日權死<sub>宏</sub>素與恪不平因祕權死問欲矯詔除恪峻以告恪恪誅之乃發喪孫亮立拜太傅于是罷徵事原逋責除關稅崇恩澤眾莫不欣然初權築東興隄遏湖水後攻淮南敗以內船由是廢不復修恪以延熙十五年十月會眾於東興更作大隄左右結山築兩城各畱千人使全端畱略守之久之引軍還魏使胡遵諸葛誕等率眾七萬欲攻圍兩塢圖壞隄恪以兵四萬晨夜赴救遵等作浮橋渡陳于隄上分兵攻兩城城居高峻不可卒拔恪遣將軍畱贊呂



據唐咨丁奉爲前部時天寒雪遽與諸將會飲見贊等兵少而不甲不持矛戟但兜鍪刀楯裸身緣隄而上大笑之不卽嚴兵兵旣得上便鼓譟亂斫魏軍驚潰爭渡浮橋橋壞自投于水更相蹈藉溺死者數萬殺樂安太守桓嘉及故叛將韓綜等獲車乘牛馬騾驢各數千貲器山積振旅而還進封陽都侯加荊揚州牧督中外諸軍事恪遂有輕敵之心以十二月戰克明年欲出軍使司馬李衡說漢姜維令同舉曰古人有言聖人不能爲時時至亦不可失也今敵政在私門內外猜隔兵挫于外民怨于內自曹操以來彼之亡形未有如今日者也若大舉伐之吳攻其東漢入其西彼救西則東虛重東則西輕以練實之軍乘虛輕



之敵破之必矣維從之諸大臣咸諫恪以爲數出罷勞不聽乃著論以諭眾眾皆不以爲然然莫敢復難之者丹陽太守聶友素與恪善書諫恪曰先帝本有遏東關之志未及施行今公輔贊成大業成先帝之志寇遠自送將士憑賴威德出身用命一旦有非常之功豈非宗廟神靈社稷之福耶宜且按兵養銳觀釁而動今乘此勢欲復大舉天時未可苟任盛意私心以爲不安恪終不聽大發州郡二十萬眾百姓騷動始失人心軍圍新城攻守連月不拔士卒因暑飲水泄下流腫病者大半死傷塗地恪內維失計而恥城不下忿形於色將軍朱異有所是非恪怒立奪其兵魏知戰士疲病乃進兵恪引軍還士卒傷病流曳道路




存亡忿痛大小吁嗟而恪晏然自若出駐江渚一月圖起  
田于潯陽詔名相銜乃旋師由此眾庶失望而怨讟興矣  
秋八月軍還改易宿衛用其親近復敕兵欲向青徐孫峻  
因民之不堪命密讒于亮殺之時年五十一長子綽坐權  
子霸事恪鳩殺之中子竦長水校尉少子建步兵校尉皆  
遇害臨淮臧均表乞收葬于是峻聽其故吏改葬初權病  
召恪輔政大司馬呂岱戒之曰世方多難子每事必十思  
恪荅曰昔文子三思而後行子聞之曰再斯可矣今君令  
恪十思明恪之劣也其矜已自用類如此始恪軍還聶友  
知其將敗書與滕允曰當人強盛丘山可拔一朝羸縮人  
情萬端言之悲歎恪死孫峻忌友欲以爲鬱林太守發病

死時年三十一友字文悌豫章人也虞翻徙交州縣令使友送之翻與語大奇之書與太守謝斐爲功曹斐使至都恪善之由是知名後爲將討儋耳還拜丹陽太守


贊曰昭以純剛見憚于孫權雖不及相而所立有可稱者惜夫委質非其所君子所不與不然其汲黯蕭望之流亞歟雍瑾二子論思宏益忠于所事恪矜己自用殘民以逞殞身覆族非不幸也




































續後漢書卷第二十七

上海郁松年原本

宋廬陵蕭常著

邑後學

胡芳秋校梓  
杜邦澐

吳載記第五

張紘

張紘字子綱廣陵人少游太學事博士韓宗受京氏易歐陽尙書又從外黃濮陽闔受韓詩禮記左氏春秋工文章善楷隸郡舉茂材公府辟皆不就避亂江東遂從孫策策表爲正議校尉與張昭竝參謀議策常令一人居守一人從行攻丹陽策身自督戰紘諫曰夫主將乃籌謨之所自出三軍之所繫命也願麾下重天授之姿副四海之望建安四年策遣紘奉章至許宮畱爲侍御史少府孔融等皆



親善曹操聞策死欲伐吳紘諫以爲乘人之喪旣非古義  
一有不克成讐棄好不如因而厚之操從其言卽表權爲  
討虜將軍領會稽太守操欲令紘輔權出爲會稽東部都  
尉旣至權以爲長史權母吳氏以權春秋方盛方外多難  
數語紘以輔翼之義每有異事密計及章表書記權常令  
紘與張昭草創紘從容侍燕微言正論時時規諷權亦重  
之未嘗稱其名常呼爲東部從攻合肥城久不拔紘進計  
曰古之圍城開其一面以疑眾心今圍之旣密攻之又急  
誠懼併命戮力死戰之寇固難卒拔及救未至可稍寬之  
以觀其變議者不同會救至無功而還紘建計宜都秣陵  
曰昔楚武王時名金陵地勢岡阜連石頭城故老皆云秦



始皇東巡會稽經此望氣者云金陵有王者之氣故掘斷連岡改名秣陵今地有其氣宜爲都邑權善其議未能從也會昭烈東過秣陵愛其形勢亦勸權居之權曰智者意同遂都焉權遣紘還吳迎家道病卒年六十臨卒子靖留箋曰自古有國有家者咸欲修德政以比隆盛世然卒莫之至者非無忠臣賢佐諳于治體也由主不勝其情不能用耳夫人情憚難而喜易好同而惡異與治道相反傳曰從善如登從惡如崩言善之難也人主甘異同之歡無假取於人而忠臣挾難進之術吐逆耳之言其不合也不亦宜乎惟明君悟之求賢如飢渴受諫而不厭抑情損欲以義割恩上無偏謬之授下無希冀之望宜加三思舍垢藏



疾以成仁覆之大權省書流涕紘著詩賦銘誄十餘篇初  
紘見稱枏櫨枕而愛其文而爲之賦陳琳在北見之語人  
曰此吾鄉里張子綱所作也後紘見琳武庫賦應機論與  
琳書淡嗟美之琳復書曰自僕在河北與天下隔此間爲  
文章者少易爲雄伯故僕受此過差之談非其實也今景  
興在此足下與子布在彼所謂小巫見大巫神氣盡矣子  
元官至南郡太守尙書初紘同郡秦松字文表陳端字子  
正與紘並見禮于策參與謀議皆早卒

步騭

步騭字子山臨淮淮陰人避亂江東與廣陵衛旌同年相  
善俱以種瓜自給書勤四體夜誦經傳靡不淹貫寬雅淡



沈遭時亂離能降志辱身會稽焦征羌郡之豪族賓客  
縱隲與旌欲求食其地懼爲所侵乃共修刺奉瓜以獻刺  
入移時旌欲委去隲止之曰所以來者畏其強也今而舍  
去欲以爲高祇取怨耳久之征羌開牖見之身隱几坐帳  
中設席置地坐隲旌于戶外旌愈恥之隲自若征羌作食  
身據大案肴食重沓以小盤蔬飯食隲旌旌不能食隲極  
飯至飽乃辭去旌怒隲曰何能忍此隲曰吾等貧賤是以  
主人以貧賤遇之固其宜也亦何所恥孫權爲討虜將軍  
召隲爲主記除海鹽長累遷鄱陽太守交州刺史征南中  
郎將士燮兄弟相率供命南土之賓自此始也加拜平戎  
將軍封廣信侯建安二十五年權遣呂岱代隲隲將交州



義士萬人出長沙建興元年遷右將軍左護軍改封臨湘  
四年假節屯漚口權僭號拜驃騎將軍領冀州牧是歲都  
督西陵中書呂乙典校文書多所糾舉臨上疏曰伏聞諸  
典校摘抉細微吹毛求瑕重投深誣欲陷人以成威福使  
人跼天踏地誰不戰栗獄以賄成輕忽人命歸咎于上爲  
國速怨仇疾明德自今蔽獄都下則宜諮顧雍武昌則陸  
遜潘濬平心專一務在得情又曰丞相雍上大將軍遜太  
常濬憂深責重志在竭誠可謂股肱心膂社稷之臣宜各  
委任不使他官監其所司責其成效課其負殿此三臣者  
思慮不到則已豈敢專擅威福以負所天乎又曰縣賞以  
顯善設刑以威姦任賢而使能審明于法術則何功不成



何事不濟若郡守百里各得其人共相經緯庶政豈不康哉權亦徐悟遂誅呂乙隲前後薦達屈滯解救患難書數十上權雖不能盡納然時采其言人賴以濟延熙九年代陸遜爲丞相猶誨育門生手不廢書被服居處如儒生然門內妻妾服飾綺麗頗以此獲譏在西陵二十年鄰敵服其威信性寬洪喜怒不形于色十一年卒子協嗣累加撫軍將軍協卒子璣嗣協弟闡爲西陵督後以謀叛誅潁川周昭著書稱隲及嚴畯等曰古今賢士大夫所以失名喪身傾家害國者其由非一然要其大歸四者而已急議論一也爭名勢二也重朋黨三也務欲速四也急議論則傷人爭名勢則敗友重朋黨則蔽主務欲速則失德此四者



不除未有能全者也當世君子能不然者亦比有之然論其絕異未若顧豫章諸葛使君步丞相嚴衛尉張奮威之爲美也語曰夫子恂恂然善誘人又曰成人之美不成人之惡豫章有之矣望之儼然卽之也溫聽其言也厲使君體之矣威而不猛恭而安丞相履之矣學不求祿心無苟得衛尉奮威蹈之矣此五君雖德實有差至于趨舍不犯四者則一揆也若乃當國家經軍旅馳騫之際立霸王之功此五君者未爲過人至其純粹履道求不苟得升降當世保全名行邈然絕俗實有所師故麤論其事以示後之君子周昭者字恭遠與韋昭薛瑩華覈竝述吳書後爲中書郎坐事下獄覈表救之休不聽死獄中



嚴峻

嚴峻字曼才彭城人少篤學好詩書三禮又好說文避亂江東與步騭諸葛瑾齊名友善性質直純厚其于人忠告善道志于有益張昭薦于孫權爲騎都尉從事中郎及橫江將軍魯肅卒權以峻代肅峻固辭以樸素書生不閑軍事非才而據咎悔必至世嘉其能以實讓權爲吳王及僭號常爲衛尉使于漢丞相諸葛亮善之每得祿賜散之親故家常不給累遷尙書令卒時年七十八著孝經傳潮水論又與裴元張承論管仲季路皆傳於世子凱爽凱官至升平少府元字彥黃下邳人亦有學行仕至大中大夫嘗與其子欽論齊桓晉文夷惠四人優劣欽荅所見各有文



理欽與太子登遊登稱其翰采時汝南程秉者字德樞亦以文學見禮于登爲太子太傅著周易摘尙書駁論語弼凡三萬餘言

闕澤

闕澤字德潤會稽山陰人少好學貧無書常爲傭書以供紙札博覽羣籍兼通厯數察孝廉除錢塘長孫權拜爲西曹掾及僭號爲尙書遷中書令加侍中延熙五年拜太子太傅領中書令如故澤以經傳文多乃斟酌諸家刊約禮文及諸注說以授二宮爲制行出入及見賓儀又著乾象厯注以正時日每朝廷大議輒咨訪之以儒學勤勞封都鄉侯性謙恭篤謹官府小吏呼召對問皆與抗禮人有過



矢口未嘗及容貌似不足者權嘗問書傳篇賦何者爲善  
澤欲諷諭以明治亂因對賈誼過秦論最善權覽讀焉呂  
乙姦罪覺有司奏以大辟或以爲宜加焚裂用彰元惡權  
以訪澤澤曰盛明之世不宜有此刑權從之六年冬卒虞  
翻嘗稱之曰闕生矯傑蓋蜀之揚雄又曰儒術德行亦今  
之董仲舒也澤州里先輩丹陽唐固字子正亦修身博學  
稱爲名儒著國語公羊穀梁傳注講授常數百人權拜固  
議郎自陸遜張溫賂統等皆拜之遷尙書僕射卒

薛綜

薛綜字敬文沛郡竹邑人少避地交州從劉熙學孫權召  
爲五官中郎將除合浦交趾太守入爲謁者僕射孫慮爲

鎮軍大將軍屯平州以綜爲長史外掌軍務內授經籍慮  
卒入爲尙書僕射公孫淵降而復叛權怒欲自伐之綜上  
疏陳三不可權遂止延熙中爲太子少傅領選曹尙書六  
年春卒所著詩賦難論數十萬言又定五宗圖述二京解  
皆傳于世子珣官至威南將軍征交趾還道病卒珣弟瑩  
字道言累遷散騎中常侍孫皓初爲左執法遷選曹尙書  
領太子少傅時何定建議鑿聖谿以通江淮皓令瑩督萬  
人往以多磐石難施功罷定誅皓追聖谿事徙瑩廣州右  
國史華覈上疏救之遂名還爲左國史著書八篇名曰新  
議

是儀



是儀字子羽北海營陵人本姓氏仕郡郡相孔融嘲儀言  
氏字民無上可易是遂改焉避亂會稽孫權召至親任專  
典機密拜騎都尉呂蒙謀襲關羽權以問儀儀是其計拜  
忠義校尉儀辭謝權曰孤雖非趙簡子卿安得不自屈爲  
周舍遣之皖就將軍劉邵欲誘致曹休休至大破之遷偏  
將軍入關省尙書又使教諸公子書學權遷建業太子登  
畱鎮武昌使輔太子敬之事必咨而後行進封都鄉侯後  
從登還建業拜侍中中執法平諸官事典校郎呂乙誣劾  
江夏太守刁嘉謗訕國政權怒收嘉繫獄悉驗問時同坐  
人皆畏乙竝言聞之儀獨言無聞于是窮詰累日權意愈  
厲眾皆爲之屏息儀對曰今刀鋸已在臣頸臣何敢爲嘉



隱自取夷滅爲不忠之鬼顧以聞知當有本末據實荅問  
辭不傾移權遂舍之嘉亦得免漢丞相諸葛亮薨權遣儀  
聘於漢申固誠款奉使稱旨尋拜尙書僕射魯南二宮初  
立儀以本職領魯王霸傅儀嫌二宮相近切上疏以爲二  
宮宜有降殺正上下之序明教化之本書三四上爲傅盡  
忠動輒規諫事上勤與人恭不受饋遺不治產業爲居室  
才自容鄰家有起大宅者權出望見問爲誰左右曰似是  
儀家也權曰儀儉必不爲此問之果非其見知類此性儉  
約敝衣麤食喜賑貧乏家無餘貲權聞幸其舍見食蔬飯  
爲親嘗之對之太息卽增俸給益田宅儀固辭以恩爲戚  
時時有所進達未嘗言人之短權嘗責其不言事無是非



對曰明主在上臣下守職懼于不稱誠不敢以愚管之言上干崇聽居官數十年無毫末之過呂乙厯白羣臣獨無以白儀權曰使人盡是儀安用法科爲年八十一卒

### 胡綜

胡綜字偉則汝南固始人少孤隨母避亂江東孫策領會稽綜年十四爲門下循行畱吳與權同席硯策死權以爲金曹從事從討黃祖除鄴長權爲車騎將軍居京召綜與是儀徐詳俱典軍國機務晉宗叛奔魏魏以爲蘄春太守數爲寇害權使綜與賀齊襲之生虜宗加建武中郎將黃龍見夏口權因僭號改元黃龍又作黃龍大牙常置中軍諸軍進退視其所向命綜賦之天子遣使來聘綜爲誓文



文義甚美權遷建業綜與徐詳並爲侍中封鄉侯兼左右  
領軍時魏降人或云魏都督吳質頗見猜嫌綜乃爲質作  
降文文多不載會質已入爲魏侍中青州降人隱蕃歸吳  
上書自陳所以來之意頗有辭理權問何如綜曰上書大  
言似東方朔巧捷詭辯似禰衡而才皆不及權又問可堪  
何官綜曰未可以治民且試以都輦小職權以蕃盛談刑  
獄用爲廷尉監左將軍朱據廷尉郝普稱蕃有王佐之才  
普尤與親善常歎其屈蕃謀叛覺普見責自殺據亦幾不  
免拜綜偏將軍兼左執法性嗜酒每飲酒歡呼極意或排  
推盃盤擊搏左右權愛其才弗責也自嗣事以來文書皆  
綜所作延熙六年卒子沖嗣有文翰爲中書令後仕晉爲



尚書郎吳郡太守徐詳者字子明吳郡烏程人先綜卒  
贊曰紘與昭號二張紘柔克昭純剛紘先死德不忘昭後  
死譽益彰不遭時事皇王臨峻澤竝流芳薛是胡時相望  
彼周昭善否臧著之傳言則詳

續後漢書卷第二十七

續後漢書

卷二十七

卷之三

卷之三

命右相吳潛太守余華清字子明吳潛漁野人共終亦



續後漢書卷第二十八

上海郁松年原本

宋廬陵蕭常著

邑後學

胡芳秋  
杜邦校梓

吳載記第六

周瑜

周瑜字公瑾廬江舒人從祖景景子忠皆漢太尉父異洛陽令瑜美丰儀與孫策同年友善初策父堅起兵討董卓徙家于舒瑜推道南大宅以舍策升堂拜母有無相通從父尚爲丹陽太守瑜往省之會策將東渡先馳書報瑜瑜將兵迎策策大喜曰吾事濟矣遂從攻橫江當利皆拔之乃擊秣陵破笮融薛禮轉下湖熟江乘進至曲阿劉繇奔走而策之眾已數萬矣策遣瑜還鎮丹陽頃之袁術遣從

弟允代尚爲太守而瑜與尚還壽春術欲以瑜爲將瑜觀術終無所成求爲居巢長術聽之遂自居巢還吳策聞瑜至親迎之授建威中郎將時年二十四吳中皆呼爲周郎策以瑜恩信著于廬江出備牛渚領春穀長策欲取荊州以瑜爲中護軍領江夏太守從攻皖拔之時得喬公二女皆有國色策自納大喬瑜納小喬策嘗從容戲瑜曰喬公二女雖流離得吾二人作壻亦足佳復進尋陽破劉勲討江夏定豫章廬陵畱鎮巴丘建安五年策死瑜還以中護軍與長史張昭共輔權七年曹操已破袁紹下書責權任子權與羣臣議張昭等不能決權與瑜詣母前定議瑜曰昔楚初封地不過百里肇基于郢卒據荆揚傳祚九百餘



年今將軍承父兄之資兼六郡之眾兵精糧足將士用命  
鑄山爲銅煮海爲鹽汎舟舉帆朝發夕至士風勁勇所向  
無敵有何所迫而欲送質質一入不得不與操相首尾與  
相首尾則名命不得不往便見制於人也豈與南面稱孤  
同哉不如勿遣徐觀其變若操能率義以正天下事之未  
晚若爲暴亂不戢自焚將軍韜勇以俟天命何送質之有  
母曰公瑾議是公瑾與伯符同年小一月耳我視之如子  
也汝其兄事之遂不送質十一年督孫瑜等討麻保二屯  
梟其渠帥俘萬餘人還備宮亭江夏太守黃祖遣將鄧龍  
將兵入柴桑瑜追擊生虜龍送吳十三年權討黃祖瑜爲  
前部大督九月曹操入荊州得船步兵數十萬將士聞之



皆恐灌問羣下所以應之之策議者咸謂操虎狼也託名漢相挾天子以征四方動以朝廷爲辭今日拒之事更不順且將軍大勢可以拒操者長江也今操得荊州水陸俱下長江之險已與我共之矣而勢力眾寡又不相伴不如迎之時瑜令鄱陽魯肅勸急呼還共商之瑜至權以議者之言告之瑜曰不然操雖託名漢相其實漢賊也將軍以神武雄才兼仗父兄之烈江東地方數千里兵精用足英雄樂附尙當橫行天下爲漢家除殘去穢況操自送死而可迎之耶請爲將軍籌之今使北土已安操無內憂能曠日持久與我較勝負于舟楫間乎北土旣未平加以馬超韓遂尙在關西爲操後患且舍鞍馬仗舟楫與吳越爭衡



本非北方所長又今盛寒無宿草驅北方士眾遠涉江湖  
之間不習水土必生疾病此數者用兵之患也而操皆冒  
行之將軍擒操宜在今日瑜請兵三萬進駐夏口保爲將  
軍破之權曰老賊欲廢漢自立久矣孤與老賊勢不兩立  
君言當擊正與孤合諸人各顧妻子挾私慮深失所望獨  
君及子敬與孤同耳此天以二君贊孤也時昭烈爲操所  
敗欲南渡江與魯肅遇于當陽遂協謀拒操因進往夏口  
遣諸葛亮詣權權遂遣瑜及程普等與昭烈并力拒操于  
赤壁操軍敗引次江北瑜等在南岸瑜部將黃蓋曰今賊  
眾我寡難與持久然觀操軍方連船艦首尾相接可燒而  
走也乃取艫艫鬪艦十艘實以薪草膏油灌其中裹以帷



幕上建牙旗先書報操給以欲降又預備走舸繫大船後因引次俱前操軍士皆延頸觀指言蓋降蓋放諸船同時發火時風猛甚悉延燒岸上營落頃之煙焰漲天人馬燒溺死者不可勝計操遂大敗走保南郡瑜與昭烈復追之操留曹仁等守江陵身率餘眾北走瑜與普又進至南郡與仁相對隔大江兵未交鋒瑜卽遣甘陵前據夷陵仁分兵圍寧寧告急瑜用呂蒙計留凌統守自與蒙救寧寧圍旣解乃渡屯北岸克期大戰瑜親跨馬櫟陳會流矢中右臂創甚便還仁聞瑜臥未起勒兵就陳瑜乃自立按行軍營激揚吏士仁由是棄城而走拜偏將軍領南郡太守以下雋漢昌劉陽州陵爲奉邑屯江陵昭烈以左將軍領荆



州牧治公安昭烈與權會于京瑜密疏請留之曰劉備以驍勇之姿而有關張熊虎之將必非久屈爲人用者愚謂宜徙備置吳盛爲築宮室多具美女玩好以娛其耳目分此二人各置一方使如瑜者得挾與攻戰大事可定也今猥割土地以資業之聚此三人俱在疆場恐蛟龍得雲雨終非池中物也權以曹操在北方當廣攬英雄故不納是時劉璋爲益州牧瑜乃詣京見權曰今曹操新折衄方憂在腹心未能與將軍連兵從事請與奮威俱進取蜀得蜀而并張魯因畱奮威固守其地與馬超爲援瑜還與將軍據襄陽以蹴操北方可圖也權許之還江陵爲行裝而道于巴丘病卒時年三十六初瑜見友于策其母又使權以



兄奉之時權位止將軍諸將賓客爲禮尙簡而瑜獨先執  
臣禮性度恢宏與人無忤惟與程普不睦普頗以年長凌  
瑜瑜不與較普後自敬服重視之乃語人曰與周公瑾交  
若飲醇醪不覺自醉曹操聞瑜年少有美才謂可以游說  
動乃密遣九江蔣幹說瑜幹以才辯見稱江淮間布衣幅  
巾自託私行詣瑜迎勞之謂曰子翼良苦遠涉江湖爲曹  
操作說客耶幹曰吾與足下州里中間別隔遙聞芳烈故  
來敘濶并觀雅規而云說客毋乃逆詐乎瑜曰吾雖不及  
夔曠聞絃賞音足知雅曲因延幹入爲具畢遣出就館三  
日與幹周旋營中行視倉庫軍資器仗還宴侍者環立豔  
服靚裝珍玩之物充牣于前因謂幹曰丈夫處世遇知己



之主外託君臣之義內結骨肉之恩言從謀行禍福其之  
假使蘇張更生鄭曼復出猶撫其背而折其辭豈足下幼  
生所能移乎幹但笑終無所言幹還稱瑜雅量高致非言  
辭所能間中州之士亦以此多之及卒權流涕曰公瑾有  
王佐之資今忽短世孤何賴哉後僭號語其下曰孤非周  
公瑾不帝矣瑜少精意音樂雖三爵之後其有舛誤瑜必  
知之知之必顧故時人語曰曲有誤周郎顧瑜兩男一女  
女配太子登男循娶權女拜騎都尉有父風早卒允亦娶  
權族女封都鄉侯以罪徙廬陵卒

魯肅

魯肅字子敬臨淮東城人少失父與祖母居家家饒于



財性好施與時天下已亂肅不治家事鬻生業以振貧乏  
結賓客甚得鄉邑歡心周瑜爲居巢長將數百人過候肅  
并求資糧肅家有兩困米各三千斛乃指一困與瑜瑜益  
奇之遂相結親袁術聞其名就辟東城長肅知術不足與  
立乃攜老稚將賓客南到居巢就瑜瑜之東渡因與偕行  
畱家曲阿會祖母亡還葬東城葬畢復至曲阿欲北行而  
瑜已徙肅到吳矣薦之于權權與語甚悅之因謂曰今漢  
室傾危四方雲擾孤承父兄餘業思立桓文之功君旣惠  
顧何以教之肅曰昔高帝區區欲事義帝而不獲者以項  
羽爲之障也今之曹操猶昔之項羽將軍何由得爲桓文  
乎肅竊料之漢室不可復興曹操不可卒除爲將軍計惟



有割據江東以觀天下之釁規模如此亦自無嫌何者北方誠多務也因其多務勦除黃祖進伐劉表竟長江所極據而有之然後建號帝王以圖天下此高帝之業也權曰今盡力一方冀以輔漢耳此言非所及也張昭非肅不能謙抑頗訾毀之云肅年少麤疎未可用權不以介意益貴重之賜其母衣服帷帳居處雜物富擬其舊劉表死肅進說曰荆楚與國接境外連江漢內阻上陵有金城之固沃野千里士民殷富若據而有之此帝王之資也今表新歿二子不睦諸將各懷向背加以劉元德天下雄傑與曹操有隙寄寓于表表知其能而不能用也若元德與彼協心上下齊一則宜安撫與結盟好如有乖離宜別圖之以濟



大事肅請奉命弔劉表二子并慰其軍中用事者及說元德使撫表眾同心一意共討曹操元德必喜而從命如其克諧天下事定矣今不速往恐爲操所先權卽遣肅行到夏口聞曹操已向荊州晨夜兼行比至南郡而表子琮已降操昭烈欲南渡江肅歡迎之到當陽長坂與昭烈具宣權意及陳江東強固勸昭烈與權并力昭烈大悅時諸葛亮從昭烈肅謂亮曰我子瑜友也卽共定交昭烈遂到夏口遣亮使權肅亦反命會權得曹操欲東之間與諸將議皆勸權迎之肅獨不言權起更衣肅追于宇下權知其意執其手曰卿欲何言肅曰眾人之議皆欲誤將軍不足與圖大事今肅可迎操耳將軍不可迎也何以言之今肅迎



操當以肅還付鄉黨品其名位猶不失下曹從事乘犢車從吏卒交游士林累官故不失州郡也將軍迎操欲安所歸願早定大計勿惑羣議權太息曰諸人之議皆失所望今卿開陳大計正與孤同此天以卿賜我也時周瑜在鄱陽肅勸權急迫還瑜至所言與肅合遂任瑜以行事以肅爲贊軍校尉助畫方略曹操敗走肅旣先還權命諸將迎肅肅將入閣拜權起禮之因謂曰子敬孤以所乘馬相迎足以顯卿否肅曰未也眾皆愕然旣坐徐言曰願將軍威加四海摠括九州克成帝業更以安車蒲輪徵肅始當顯耳權撫掌笑悅後昭烈詣京見權求都督荊州呂範勸畱昭烈肅曰不可將軍雖神武命世然曹操勍敵今雖得



荆州恩信未洽宜以借[元]德使安撫之以禦北方計之上也權從之操聞權以土地業昭烈方作書筆落于地周瑜病上疏稱肅知略足任乞以代己卽拜奮武校尉領瑜兵四千餘人肅初駐江陵後下屯陸口恩威竝行眾增至萬餘人拜漢昌太守偏將軍從攻皖城轉橫江將軍昭烈旣定益州權使人求長沙零桂昭烈未許肅屯兵益陽與關羽會昭烈遂割湘水爲界于是罷軍建安二十二年卒時年四十六肅爲人方嚴治軍整暇號令必行雖在行陳手不釋卷又善談論喜屬文思度[宏]遠有過人之明才畫與周瑜埒權僭號顧謂其下曰昔魯子敬常道此可謂明于事勢矣肅遺腹子淑張承謂終當遠到孫休初爲昭武將



軍都亭侯武昌督遷夏口督所至嚴整有方幹孫皓時卒  
子睦嗣

呂蒙

呂蒙字子明汝南富陂人少隨母南渡依姊夫鄧當當爲  
孫策將數討山越蒙年十五六隨當擊賊深入當顧見大  
驚呵之不能禁歸以告蒙母母恚欲罰之蒙曰貧賤難可  
居脫有功名富貴可致不探虎穴安得虎子母哀而舍之  
當死張昭薦蒙代爲別部司馬孫權嗣事料諸小將兵少  
者欲併合之蒙賒貫爲兵作絳衣行滕及簡閱戎備赫然  
軍人練習權大悅增其兵從討丹陽所向有功拜平北都  
尉領廣德長從征黃祖祖令都督陳就以水軍逆戰蒙勒



前鋒親梟就首將士乘勝進攻其城祖聞就死委城走兵  
追擒之權曰事之克由陳就先獲也拜橫野中郎將賜錢  
十萬是歲又與周瑜程普西破曹操于烏林圍曹仁于南  
郡益州將襲肅舉軍來附瑜表以肅軍益蒙蒙盛稱肅有  
膽用且慕化遠來不宜轉奪其兵權善其言遂還肅兵周  
瑜使甘寧前據夷陵曹仁分眾圍寧寧使人告急諸將以  
兵少不可分蒙謂瑜曰畱凌統守蒙與君行解圍勢亦不  
久蒙保統能十日守也又說瑜遣三百人柴斷險道賊走  
可得其馬從之軍到夷陵賊大敗夜走行遇柴道騎軍皆  
棄馬而奔兵追蹙獲馬三百匹於是將士形勢自倍乃渡  
江立屯與相攻擊曹仁敗走遂據南郡還拜偏將軍領尋



陽令魯肅代瑜之陸口過蒙屯下肅意尙輕之或說肅曰  
呂將軍功名日顯不可以故意待也遂詣蒙酒半蒙謂肅  
曰君受重任與關羽爲鄰必思有以備之肅率爾應曰臨  
時施宜蒙曰今東西雖爲一家而關羽實熊虎也計安可  
不預定因爲肅畫五策肅撫其背曰呂子明吾不知卿才  
略所及乃至此也蒙與成當宋定徐顧屯次比近三將死  
子弟幼弱權悉以兵屬蒙蒙固辭乃受又爲擇師傅輔導  
之其存心大類此曹操使謝奇爲蘄春典農屯皖田數爲  
邊患害蒙伺擊之奇卽斂退其部伍多詣蒙降後從權拒  
操于濡須數進奇計又勸夾水口立塢所以備警甚至初  
欲築塢諸將皆曰上岸擊賊洗足入船何用塢爲蒙曰兵



有利鈍戰無百勝脫有敵步騎感人不暇及水其得入船  
乎塢成操不能下而退操遣朱光爲廬江太守屯皖大開  
稻田又令閒人誘鄱陽賊帥使爲內應蒙曰皖田肥美若  
歲一成熟彼眾必增如是數歲操態見矣宜早除之乃陳  
其狀於是權自征皖問計于諸將皆勸作土山增攻具蒙  
趨進曰土山攻具必厯日乃成外救必至不可爲也且乘  
雨水以入若畱經日水必向盡還道艱難蒙竊危之今觀  
此城不甚固以三軍銳勢四方竝攻不移時可拔及水以  
歸此全勝之道也權從之乃薦甘寧爲升城督督攻在前  
蒙以精銳繼之黎明進攻蒙手執枹鼓士卒皆騰踴自升  
食時破之旣而張遼至夾石聞城已拔乃還權嘉其功卽



拜廬江太守蒙還尋陽而廬陵賊起諸將討擊無功權曰  
驚鳥累百不如一鶚令蒙討之蒙至誅其首惡餘皆釋之  
時關羽守荊土權令蒙西取長沙零桂三郡蒙遺書二郡  
卽歸服惟零陵太守郝普守城不下而昭烈自蜀親至公  
安遣羽爭三郡權時至陸口使肅將萬人屯益陽拒羽而  
飛書召蒙使舍零陵急還助肅而蒙以譎計降普矣蒙留  
孫河委以後務卽日引軍赴益陽權旣以昭烈通好乃歸  
普等割湘水以零陵還之以尋陽爲蒙奉邑師還從攻合  
肥旣徹兵爲張遼等所襲蒙與凌統以死捍衛後曹操又  
寇濡須權以蒙爲督據前所立塢置强弩萬張以拒之操  
屯營未就蒙急攻破之操遂走拜左護軍虎威將軍魯肅



卒代肅屯陸口又拜漢昌太守與關羽接境知關羽驍勇  
有策并心且居上流其勢難久初魯肅等以曹操尙存禍  
難方始宜相輔翼與之同仇不可失也及蒙代肅乃建策  
襲羽權從之到南郡傅士仁糜芳等皆降蒙入據其城盡  
得羽及將士家屬皆撫慰之令中軍無得干厯人家有所  
求取蒙麾下軍士取民家一笠覆官鎧蒙猶以爲犯令斬  
之於是震慄道不拾遺會權尋至羽自知勢窮乃走麥城  
權遂有荊州以蒙爲南郡太守封孱陵侯封爵未下會蒙  
疾權時在公安輿置內殿治護萬方病中瘳爲下赦令卒  
時年四十二蒙少不習書傳每陳事常口占爲箋疏皆得  
事情初權謂蒙及蔣欽曰卿等宜學問以自開益蒙曰軍



中常恐多務恐不容復讀書權曰孤豈欲卿等治經爲博士耶但當涉獵見往事耳卿言多事孰與孤孤少時歷讀詩書禮記左傳國語惟未讀易至嗣事以來省三史諸家兵法自以爲多有所益如卿二人性明悟學必得之宜急讀孫子六韜左傳國語及三史孔子言終日不食終夜不寢以思無益不如學也光武當兵馬之務手不釋卷卿何獨不自勉耶蒙始篤志不倦博聞強記雖耆儒有所不逮及魯肅聞其言語纚纚曰今者大弟學識該博非復吳下阿蒙矣蒙笑曰士別三日當刮目相待權每歎息謂呂蒙蔣欽進益如此不可及也富貴顯榮更能折節好學輕財尙義所行可述竝作國士不亦休乎嘗以部曲事爲江夏



太守蔡遺所劾蒙無恨意及豫章太守顧邵卒權問誰可代者蒙薦遺奉職佳吏權笑曰君欲爲祁奚耶於是用之甘寧麤暴好殺旣常失蒙意又時違權令權怒之蒙輒開說曰天下未定鬪將如寧難得宜優容之權遂厚寧卒得其用子霸嗣霸卒兄琮襲封琮卒弟睦嗣權後與陸遜論周瑜魯肅及蒙曰公瑾雄烈膽略兼人遂破曹操開拓荊州邈焉難繼君今繼之公瑾昔邀子敬來東致達於孤孤與語便及大略此一快也後曹操因獲劉琮張言方帥數十萬眾水陸俱下子布文表俱言宜遣使備檄迎之子敬卽駁言不可勸孤急呼公瑾迎而擊之此二快也且其計策出張蘇遠矣後雖勸吾借元德地是其一短不足以損



二長也周公不求備於一人故孤忘其短而貴其長常以  
比方鄧禹又子明少時孤謂不辭劇易果敢有膽而已及  
其長大學問開益籌略奇至次于公瑾但言議英發不及  
之耳圖取關羽勝于子敬子敬荅孤書云帝王之興皆有  
驅除羽不足忌此子敬內不能辦外爲大言耳孤亦恕之  
不足責也然其作軍屯營立辦令行禁止部分有常路無  
拾遺其法亦美也權之品藻如此

贊曰瑜肅建拒操之議孫權遞用之卒成大功然瑜昧遠  
遠圖不能乘勝佐昭烈以定中原乃欲越荆取蜀而蒙又  
復襲羽以取荊州使曹氏爲不討之賊可與言知哉肅請  
借地以業昭烈蓋知天下大勢在此而不在彼也而權反

以歸短于肅過矣



續後漢書卷第二十九

上海郁松年原本

宋廬陵蕭常著

邑後學胡芳秋杜邦浚校梓

吳載記第七

程普

程普字德謀右北平土垠人美風儀有略計善應對從孫堅破董卓于陽人堅死復從孫策東渡累有戰功策入會稽以爲吳郡都尉徙丹陽策嘗攻祖郎陷于重圍普與一騎扞蔽策驅馬疾呼以矛突賊賊披策因得出拜盪寇中郎將策死與張昭等共輔權安集三郡討未服者代太史慈備海昏與周瑜爲左右督破曹操于烏林又進攻南郡走曹仁拜裨將軍領江夏太守治沙羨先出諸將普最爲



長自權而下皆呼程公好施予喜士大夫周瑜卒代領南郡尋復領江夏遷盪寇將軍卒權封其子咨岐亭侯有韓當者字義公遼西令支人以便弓馬有膂力亦得幸于孫堅征伐有功爲別部司馬及策東渡從定三郡遷先登校尉後以中郎將與瑜普等拒破曹操又與呂蒙襲取南郡累遷威烈將軍封都亭侯建興初進封石城遷昭武將軍領冠軍太守加都督討丹陽賊破之會病卒

黃蓋

黃蓋字公覆零陵泉陵人少貧賤常以負薪餘閒學書疏講兵事察孝廉辟公府皆不應孫堅起義兵從堅西走董卓爲別部司馬堅死從策與權攻城陷陳常爲冠軍守石



城長縣吏比他邑特難檢制蓋乃署兩掾分主諸曹教曰  
令長不德徒以武功爲官今寇賊未平有軍旅之務一以  
文書委兩掾當檢攝諸曹糾摘謬誤兩掾所署事入誥出  
若有姦欺終不加鞭杖宜各盡心無爲眾先初皆畏威夙  
夜勤恪久之吏以蓋不治文書漸爲姦欺蓋亦嫌外懈怠  
時有所省各得兩掾不奉法事乃悉召諸掾吏賜酒肉因  
出教詰問兩掾具服皆叩頭謝蓋曰前已相敕終不以鞭  
杖相加非相欺也遂殺之縣中震慄轉春穀長尋陽令凡  
守九縣所在平理遷丹陽都尉抑強扶弱山越懷附爲人  
嚴毅而善撫眾士爭用命建安中從周瑜拒曹操建策火  
攻語詳瑜傳拜武鋒中郎將武陵蠻夷反攻城邑領太守



時郡兵纔五百自以不敵因開城門縱敵半入乃擊之斬首數百餘皆奔走誅其渠帥附從者赦之巴澧遠僻邑侯君長皆改操易節奉禮請見郡境遂清後長沙益陽爲山寇攻略蓋又平之加偏將軍卒蓋當官決事曾無畱滯郡人思之圖其像以祀及權僭號追錄其功賜子柄爵關內侯

蔣欽

蔣欽字公奕九江壽春人孫策東渡拜別部司馬從策定三郡及豫章累遷西部都尉討會稽東治賊呂合等徙討越中郎將從攻合肥張遼襲權于津北力戰有功遷盪寇將軍領濡須督召還拜津右護軍權嘗至其家見其母練



帳縹被妻妾布裘歎其貴善守約卽敕督御府爲母作錦被改易帷帳妻妾衣服悉皆錦繡初欽屯宣城出討豫章賊蕪湖令徐盛收欽屯吏表斬之權以欽在遠不許盛由是自嫌于欽曹操出濡須欽與呂蒙持諸軍節度盛常畏欽因事害己而欽每稱其善權謂欽曰盛數表卿卿今舉盛欲慕祁奚耶對曰臣聞公舉不挾私怨盛忠勤有膽略萬人督也今夫事未定當爲國訪才豈敢挾私憤以蔽賢乎權嘉之權攻關羽欽督水軍入沔還道病卒子壹封宣城侯徐盛者字文響瑯琊莒人避亂僑居于吳以氣勇聞孫權以爲別部司馬守柴桑長拒黃祖祖長子射帥數千人攻盛時吏卒不滿二百與相拒擊傷射卒千餘人已乃



開門出戰大破之射走不復爲寇權以爲校尉領蕪湖令  
復討臨城南阿山賊有功徙中郎將魏寇嘗大至橫江盛  
與諸將俱赴討時乘艨艟遇迅風船漂敵岸諸將恐懼不  
知所出盛獨將兵上突斫敵敵披靡迸走多所殺傷風止  
便還權大壯之及權稱藩于曹丕丕使邢貞拜權爲吳王  
貞有驕色張昭旣怒而盛亦憤惋顧謂同列曰盛等不能  
奮身出命爲國家并許雒而令吾君與貞盟不亦辱乎因  
涕泣橫流貞聞之謂其徒曰江東將相如此非久下人者  
也遷建武將軍封都亭侯領廬江太守曹休出洞口盛與  
呂範全琮渡江鎮守遭大風船人多喪盛收餘兵與休夾  
江休遣兵就船攻盛盛以少禦眾敵不能克遷安東將軍



封蕪湖侯曹丕大舉有渡江之志盛建計從建業築圍作  
薄落圍上設假樓江中浮船諸將以爲無益盛不聽固立  
之丕至廣陵望圍彌亘數百里而江水又盛歎曰魏雖有  
武騎盈千無所用也卽遁去諸將乃服卒子楷嗣

### 周泰

周泰字幼平九江下蔡人從孫策戰有功拜別部司馬權  
愛其爲人請以自隨策討六縣山賊權駐宣城使士自衛  
不能千人意尙忽略而山賊數千人奄至權始上馬而賊  
鋒刃已交于左右眾莫知所爲惟泰奮擊挺身衛權左右  
由泰竝能就戰賊旣解圍泰身被十二創良久乃蘇是日  
微泰權幾殆策深德之補春穀長從攻皖還復補宜春長

後與周瑜等拒曹操于赤壁走曹仁于南郡荊州平定將  
兵屯岑曹操出濡須泰卽赴擊操走畱督濡須拜平虜將  
軍時朱然徐盛等皆在所部心頗不服權特爲按行至濡  
須塢因宴諸將酒半權自行酒至泰所命泰解衣權自指  
其創痕問所始泰輒記昔戰鬪處以對權把其臂因流涕  
曰幼平卿爲孤兄弟戰如熊虎不惜驅命被創數十膚如  
刻劃孤亦何心不待卿以骨肉之恩委卿以兵馬之重乎  
明日遣使者授以御蓋盛等乃服尋拜奮威將軍封陵陽  
侯卒

陳武

陳武字子烈廬江松滋人孫策在壽春武往脩謁時年十



八長七尺七寸因從渡江拜別部司馬策破劉勲料以精銳乃以武爲督所向無前及權嗣業轉督五校仁厚好施鄉里遠近多往依之遷偏將軍建安二十二年從攻合肥戰歿子脩有父風年十九拜別部司馬時諸將新軍多逃叛而脩循撫倍至不失一人權奇之拜校尉建安末追錄功臣後封都亭侯爲解煩督卒弟表字文奧少知名與諸葛恪顧譚張休等竝侍東宮皆相親友尙書暨豔亦與表善後豔得罪時人畏禍及雖常與親厚者皆言疏薄表獨不然以此重之徙中庶子拜翼正都尉以父死敵求用爲將善于撫御人樂爲用時有盜官物者疑無難士施明考掠楚毒瀕死無辭廷尉以聞權以表得士心使自以意求



其情表卽破械沐浴易衣爲具飲食明乃首服具列支黨  
表以狀聞權嘉之欲全其名特貰明罪遷表無難右部督  
封都亭侯以繼舊爵表皆陳讓乞以傳脩子延權不許諸  
葛恪領丹陽太守討平山越以表領新安都尉與恪犄角  
初表所受賜戶二百家在會稽新安表簡視其人皆壯勇  
可充卒伍乃上疏還官以補精銳之闕不許表曰今除國  
賊報父仇以人爲本空枉此勁銳以爲僮僕非表志也皆  
料取以充部伍權令郡縣料正戶羸民以補其舊在官三  
年得兵萬餘人會鄱陽民吳遽等爲亂表卽越境赴討遽  
敗遂降陸遜拜偏將軍進封都鄉侯北鎮章坑年三十四  
卒家財盡于養士死之日妻子露立太子登爲起宅第子



敖年十七拜別部司馬敖卒脩子延復爲司馬表天資孝友事母謹慎見孝友傳始施明感表全已遷善改行遂成良將仕至將軍

董襲

董襲字元代會稽餘姚人長八尺武力絕人孫策至郡襲迎于高遷亭策使爲門下功曹時山陰宿賊黃龍羅周勃聚黨數千人從策出討親斬羅勃首累遷揚武都尉策死權年少初嗣事其母憂之間襲與張昭等江東可保否襲對曰江東有山川之固而討逆恩德在人討虜承基大小用命張昭秉眾事襲等爲爪牙此地利人和之時也萬無所憂眾咸壯其言鄱陽賊彭虎等數萬人襲與凌統步騭



蔣欽各分部討擊襲所向輒破旬日盡平拜威越校尉遷  
偏將軍權攻黃祖祖橫兩蒙衝挾守沔口以楫闔大繼繫  
石爲礮上有千人以弩交射飛矢雨下軍不能前襲與凌  
統俱爲前部各將敢死士百人人被兩甲乘大舸突入蒙  
衝裏襲親以刀斷兩繼蒙衝乃橫流大兵繼進祖卽開門  
走兵追斬之明日大會權舉觴屬襲曰今日之事斷繼之  
功也曹操寇濡須權使督五樓船駐濡須口夜半大風樓  
傾船覆左右散走舸急請襲出襲怒曰受命在此備賊何  
可委去敢復言者斬是夜船敗襲死

凌統

凌統字公績餘杭人父操從孫權攻黃祖中流矢死統時



年十五爲破賊都尉從權攻江夏爲前鋒與所厚健兒數十人共乘一船常去大軍數十里行入右江斬黃祖將張碩引軍兼道水陸並集時呂蒙貯其水軍而統先搏其城于是大獲爲承烈都尉與周瑜等破曹操走曹仁遷校尉雖在軍旅親賢接士輕財重義有國士風從攻合肥爲右部都督時權徹軍還前部已發魏將張遼等奄至津北權使追還前軍軍去已遠勢不相及統帥親近三百人陷圍扶扞權出敵已毀橋橋之屬者兩版權策馬馳去統復還戰左右皆死身亦被創所殺數十人度權已免乃還橋敗路絕統被甲潛行權旣御舟見之驚喜統創甚得卓氏良藥得不死拜偏將軍時有薦同郡盛暹於權者以爲梗概

大節有過于統權曰且令如統足矣名遲至統已臥聞之攝衣出執其手以入其愛善類如此統以山民尙多壯悍可以恩威誘也權令東占且討之得精兵萬餘人過本縣步入寺門見長吏恭敬盡禮親戚故人恩意益隆事畢常還會病卒權聞之拊牀而起哀不自勝使張承爲作銘誄二子烈封年各數歲養于宮中愛遇與諸子均賓客進見呼示之曰此吾虎子也及八九歲令葛光教之讀書十日一令乘馬追錄統功封烈亭侯

甘寧

甘寧字興霸巴郡臨江人少負氣任俠輕薄少年羣行特弓矢負甲帶鈴人聞鈴聲知其爲寧屬城長吏接遇稍薄



卽縱所部少年擾其部界凡二十餘年乃止頗讀諸子書  
往依劉表不見用復詣黃祖祖又以凡人畜之曾孫權伐  
祖祖軍敗走追兵急寧射殺權將凌操祖旣得免待之如  
初祖都督蘇飛數薦之祖不能用又使人誘其僮僕寧欲  
去恐不免飛知其意乃謂曰吾薦數矣而黃將軍不能用  
吾今白子爲邾長可自爲去就寧之縣招亡客并義從者  
得數百人于是奔吳周瑜呂蒙薦之于權權待之與舊臣  
等寧因進計曰今漢祚日微曹操跋扈終爲篡盜南荆之  
地山阜形勝江漢流通誠國之西勢劉表慮旣不遠兒子  
又劣非保業者宜早規取不可後操圖之圖之之計宜先  
取黃祖祖耆昏已甚軍無法制往必破之西據楚關大勢



彌廣卽可漸規巴蜀權浚納之張昭時在坐難曰吳下業  
業若軍果行殆必致亂寧謂昭曰國家以蕭何之任付君  
君居守而憂亂奚以希慕古人乎權舉酒屬寧曰興霸今  
年行討如此酒矣決以付卿卿當勉力方略何嫌于張長  
史之言乎權遂西果擒黃祖盡獲其眾遂授寧兵使屯當  
口初權攻祖先作兩函欲以盛祖及蘇飛首飛遣人告急  
于寧權爲諸將置酒寧避席叩頭血淚交流言飛疇昔恩  
意顧從將軍乞其首權感其言曰今爲君置之若走去何  
寧曰若爾寧當以頭代飛入函權乃赦之後周瑜破曹操  
于烏林攻曹仁于南郡未拔寧建計先徑取夷陵往卽得  
其城因據守之時所將兵才數百人并城中僅千人仁乃



遣五千人圍寧受攻累日敵設高樓雨射城中眾皆洩  
懼寧談笑自若遣使報瑜瑜用呂蒙計率諸將解圍從魯  
肅鎮益陽拒關羽羽選銳士五千人投縣上流十餘里淺  
灘欲夜渡肅與諸將議寧時有兵三百乃曰可復以五百  
人益吾吾往對之保羽聞吾咳唾聲不敢涉水涉水卽爲  
吾擒肅卽選千兵益寧寧乃夜往羽聞之不敢渡而結柴  
營權嘉其功拜西陵太守領陽新下雉兩縣從攻皖爲升  
城督手持練身緣城爲士吏先卒破獲朱光計功名呂蒙  
爲最寧次之拜折衝將軍曹操出濡須寧以兵二千爲前  
部督受命往斫敵前營權特給酒肴寧乃選帳下健兒百  
餘人賜之食食畢寧先以銀盃酌酒自飲兩盃乃酌與其



都督都督伏不可時持寧引白削置膝上呵曰汝見知于  
至尊孰與甘寧甘寧尚不惜死汝獨惜死乎都督懼卽起  
拜持酒次通酌軍士各一盃夜二鼓銜枚出斫敵斬數十  
級操軍大駭舉火如星寧已還營作鼓吹稱萬歲因夜見  
權權喜曰足驚老賊操遂遁去寧益見重貴權嘗曰操有  
張遼孤有甘興霸足相當也寧雖麤勇好殺然開爽有計  
略輕財好士能厚養健兒士卒亦樂爲用命建安二十年  
從攻合肥會疫癘軍旅皆已引去惟麾下虎士千并呂蒙  
蔣欽凌統及寧從權于津北張遼諜知之卽將步騎奄至  
寧引弓射敵與統等死戰寧厲聲問鼓吹何以不作壯氣  
毅然權嘉之凌統常憤寧殺其父操寧亦備之不與相見



權敕統勿仇徙寧屯于半洲卒

潘璋

潘璋字文珪東郡發干人孫權爲陽羨長璋從之使募士得百餘人遂以爲將討賊有功爲別部司馬後爲吳大市刺姦盜賊屏絕由是知名遷豫章西安長劉表在荊州兵數爲寇自璋至寇不犯境建昌寇起轉建昌加武猛校尉討平諸寇合肥之役張遼奄至諸將不備陳武鬪死宋謙徐盛皆披走璋獨居後便馳進橫馬斬謙盛兵走者二人兵皆還戰權甚壯之拜偏將軍屯半洲權攻關羽羽走璋追斬之權分宜都秭歸二縣爲固陵郡拜璋太守振威將軍封溧陽侯徙襄陽曹丕將夏侯尚等圍南郡分前部三

萬人作浮橋渡百里洲上時諸葛瑾楊粲竝會兵赴救未知所出而敵兵曰渡不絕璋曰賊勢始盛江水又淺未可與戰便將所領到敵兵上流五十里伐葦數百萬爲大筏欲順流放火燒敗浮橋作筏適畢伺水長當下尙卽日遁去璋下備陸口權僭號拜右將軍璋爲人麤猛禁令肅然所領兵不過數千而其所在常如萬人征伐止頓便立軍市他軍所無皆仰取焉然性奢汰末年彌甚服物僭擬吏士富者或因事殺之以沒其貲數不奉法有司舉劾權情其功輒原不問建興十一年卒

### 丁奉

丁奉字承淵廬江安豐人少以驍勇爲小將從璋及寧遜



等攻代常冠軍稍遷偏將軍孫亮時爲冠軍將軍封都亭侯曹芳使諸葛誕胡遵等攻東興諸葛恪帥軍拒之諸將皆曰敵聞太傅自來必走奉獨曰不然彼掃境而來必有成規無恃敵之不至恃吾有以勝之及恪上岸奉與唐咨呂據雷贊等俱從山西上奉曰今諸軍行遲若敵據便地則難與爭鋒矣乃辟諸軍使下道帥麾下三千人徑進時北風奉舉帆二日至遂據徐塘天寒雪敵營諸將置酒高會奉見其前部兵少謂其下曰取封侯正在今日乃使兵解鎧着冑持短兵敵人從而笑之不爲之備奉乃縱兵斫之大破敵前屯會據等亦至敵軍遂潰遷滅寇將軍進封都鄉侯曹髦將文欽來降以奉爲虎威將軍從孫峻至壽



春迎之與敵追軍戰于高亭跨馬持矛突入其陳斬首數  
百級獲其軍器進封安豐侯諸葛誕據壽春來降敵兵圍  
之遣朱異唐咨等往救復使奉與黎斐解圍奉爲先登屯  
于黎漿力戰有功拜左將軍孫休與張布謀誅孫綝布曰  
丁奉雖不能吏書而計略過人能斷大事休召奉告以本  
謀奉曰綝兄弟支黨甚眾恐人心不同不可卒制可因臘  
會有衛兵以誅之休納其策因會召綝卽至奉與布目左  
右斬之遷大將軍加左右都督孫皓立遷右大司馬左軍  
師卒

贊曰蓋將略吏能皆有可稱欽折節好學以公滅私盛憤  
惋于邢貞統降意于盛暹奉破強敵夷鉅姦舒徐不迫皆



江東翹楚不幸委質非其人不得與趙雲等方駕惜哉

續後漢書卷第二十九

續後漢書

卷二十九

七

東漢書不幸交實非其



續後漢書卷第三十

上海郁松年原本

宋廬陵蕭 常著

邑後學 胡芳秋 杜邦浚 校梓

吳載記第八

朱然

朱然字義封九真太守治姊子也姓施氏初治未有子養以爲子嘗與孫權同學書相親愛及權嗣事以爲餘姚長時年十九遷山陰令加折衝校尉督五縣權奇其能分丹陽爲臨川郡以爲太守會山賊大起討平之曹操寇濡須然備大塢及三關屯拜偏將軍建安二十四年從攻關羽別與璋追斬關羽遷昭武將軍封西安鄉侯呂蒙病革權謂誰可代卿者對曰朱然膽氣有餘可任蒙卒權假然節



鎮江陵拜征北將軍封永安侯曹丕遣曹真夏侯尚張郃等攻江陵丕自至宛爲援連屯圍城權遣孫盛督萬人備洲上立圍塢爲然外援郤渡兵攻盛盛不能拒卽退郤郤據洲上圍守然中外斷絕權遣潘璋楊粲等解圍不克時城中兵多腫病堪戰者才五千人真等起土山鑿地道立樓櫓矢注如雨將士皆失色然方厲士卒伺隙攻破兩屯真等攻圍凡六月未退江陵令姚泰領兵備城北門見外兵盛城中穀且盡因與敵通謀爲內應事覺然戮泰以徇真等不能克乃徹攻遁去由是名振敵國改封當陽建興六年權自率眾攻石陽及還師潘璋斷後夜出亂行敵追擊璋不能禁然卽還拒敵使前船得引旣遠而後發拜車



騎將軍右護軍十一年權與漢尅期大舉討曹叡權自向  
新城然與全琮各受斧鉞左右督會吏士疾病引還權使  
攻曹叡祖中敵將蒲忠胡質各將數千人要險斷然後時  
所督兵將先四出聞問不暇收集便將帳下見兵八百人  
逆忠忠戰不利質等亦走復攻祖中敵將李興等聞然淡  
入帥步騎六千斷其後然夜出逆戰軍以勝反先是歸義  
馬茂懷姦覺誅權淡忿之然臨行上疏曰馬茂小子敢負  
恩養臣今奉天威出征事若克捷欲以所獲耀遠近方舟  
塞江足解上下之忿惟識臣先言責臣後效權抑其表不  
出及羣臣入賀權出其表曰此家前有表孤以爲難必今  
果如其言可謂先見之明卽拜左大司馬右軍師然長不

滿七尺氣候分明內行脩潔終日欽欽常若在戰場臨急  
膽定雖時無事每朝夕嚴鼓兵在營前者咸行裝束就隊  
以此玩敵使不知所備故出輒有功延熙十二年卒年六  
十八子績字公緒以父任爲郎從潘濬討五溪以膽力稱  
累遷上大將軍都護督自巴上至西陵孫皓時拜左大  
司馬初然爲治行喪竟請復本姓權不許至績時表還爲  
施氏尋卒

朱桓

朱桓字休穆吳郡吳人權初除餘姚長時饑疫相承桓親  
省醫藥督餽粥士民感之鳩集吳會二郡遺散得萬餘人  
丹陽鄱陽山賊蠡起桓督諸將赴討應時平定遷裨將軍



封新城亭侯代周泰爲濡須督曹仁步騎數萬寇濡須仁  
欲以兵襲洲上揚聲欲東攻羨溪桓分兵赴羨溪旣發仁  
進軍拒濡須七十里桓使追還羨溪兵未到而仁兵奄至  
時所部兵在者才五千人諸將皆懼桓諭之曰凡兩軍相  
對勝負在將不在眾寡諸君聞曹仁用兵行師孰與朱桓  
兵法所以稱客倍而主人半者謂俱在平原無城池之守  
又謂士眾勇怯齊等故爾今仁旣非知勇加以士卒甚怯  
又人馬疲困跋涉千里桓與諸君共據高城南臨大江北  
背上陵以逸待勞爲主制客此百戰百勝之勢雖曹丕自  
來尙不足憂況仁等耶因偃旗仆鼓外示虛弱以誘仁仁  
果遣子泰攻濡須城分遣常雕督諸葛虔王雙等乘油船



別襲中洲中洲者部曲妻子所在地也仁自將萬人畱橐  
皋且爲泰後拒桓部兵將攻取油船或擊雕等身自拒泰  
泰燒營遁遂梟雕生虜雙等送武昌臨陳及溺死者千餘  
人權嘉其功封嘉興侯遷奮武將軍周魴誦誘曹休休將  
步騎十萬至皖城迎魴時陸遜爲元帥桓與全琮爲左右  
督各督三萬人擊休休知見欺自恃眾盛僥倖一戰桓曰  
休本以親戚見任非知勇名將今戰必敗敗必走當由夾  
石挂車此兩道皆險阨若以萬兵柴路則彼眾可盡而休  
可生虜臣請將所部以斷之若蒙天威得以休自效便可  
乘勝長驅進取壽春割有淮南以規許雒此萬世一時不  
可失也權先與陸遜議遜以爲不可故其策不用尋拜前



將軍曹叡廬江主簿呂習請兵迎已欲開門爲應桓與全琮迎之既至事覺引還城外有溪水去城一里許廣三十丈深八九尺淺者半之諸軍勒兵渡去桓自斷後時魏廬江太守李膺嚴整兵騎欲須諸軍半渡擊之及見桓節蓋在後卒不敢動是時全琮爲督權令偏將軍胡綜宣傳誥命參與軍事琮以軍出無獲議欲部分諸將有所掩襲桓素尚氣恥見部伍乃往見琮問行意感憤發怒琮欲自解因曰上自令胡綜爲督綜意以爲宜耳桓愈恚恨還乃使人呼綜欲殺之綜至有一人旁出語綜使還桓出不見綜知左右所爲斫殺之其佐軍進諫又殺之遂託狂疾詣建業治病權惜其才不問使子異攝領部曲令醫護視數月



復還屯權由自出祖送謂曰今寇虜尙存王途未一孤當  
與君共定天下欲令君督五萬人專當一面以圖進取想  
君疾未復發也桓曰天授聖姿當君臨四海猥委重任任  
臣以除姦逆臣疾當自愈桓性護前恥爲人下每臨敵節  
度不得如志輒嘆恚憤激然輕財重義與人一面數十年  
不忘部曲萬口妻子盡識之愛養吏士贍護親族俸祿資  
產皆與共之及疾舉營憂戚年六十二延熙元年卒子異  
字季文以父任爲郎累遷鎮南將軍曹芳遣胡遵諸葛誕  
等出東興異督水軍攻浮梁壞之魏軍大敗延熙末假節  
爲大都督救壽春不克還爲孫綝所害

呂範



吳範字子衡汝南細陽人避地壽春孫策見而異之遣迎母於江都常從策跋涉不避危急策每與升堂飲于母前從東渡到橫江當利破張英于糜下丹陽湖熟領湖熟相遷都督時下邳陳瑀自號吳郡太守駐海西與強賊嚴白虎相結策自將討虎別遣範與徐逸攻瑀于海西梟其大將陳牧又從攻祖郎于陵陽太史慈于甬里七縣平定拜征虜中郎將曹操至赤壁與周瑜等破之拜裨將軍昭烈會孫權于京範密請畱之遷平南將軍屯柴桑權攻關羽過範謂曰昔從卿言無此勞也今當上取之卿爲我守建業權破羽還都武昌拜建威將軍封宛陵侯領丹陽太守治建業督扶州以下至海曹休張遼臧霸等來寇範督徐



盛全琮孫韶以舟師拒休等於洞口遷前將軍假節改封  
南昌大風時遭船覆溺死者數千人軍還拜揚州牧州民  
如陸遜全琮及貴公子皆敬禮焉其居處服飾于時靡奢  
然勤事奉法故權悅其忠而略其侈又有白範與賀齊服  
用僭王者權曰昔管仲踰禮桓公優而容之無損於伯今  
子衡公苗身無夷吾之失但其器械精好舟車嚴整耳此  
適足作軍容何損于治哉初策使範典財計權時少年私  
有所求範必關白不敢專許當時以此見望權守陽羨長  
有所私用策料覆功曹周谷輒爲傳著簿書使無譴問權  
甚悅之及嗣事以範忠誠厚見信任以谷能欺更簿書不  
用也建興二年遷大司馬印綬未下而卒權還建業過其



墓呼曰子衡言及流涕祀以太牢時大會羣臣謂嚴畯曰  
昔孤以魯子敬比鄧禹呂子衡方吳漢聞卿諸人未平此  
論今定云何畯避席曰臣未解指趣謂肅範受饒褒歎過  
實權曰昔鄧仲華初見光武光武時受更始使撫河北行  
大司馬事耳未有帝王之志也禹勸之以復漢業是禹開  
初議之端子敬英爽有殊略孤一見與語便及大事與禹  
相若呂子衡忠亮篤直性雖喜奢然憂公爲先避袁術而  
歸吾兄每憂兄事乞爲都督辦護嚴整加以恪勤與吳漢  
何異故以二人方之指趣非私之也畯等乃服子據字世  
議以父任爲郎累遷中郎將數破山賊又從潘濬討五溪  
有功朱然攻樊據與異破城外圍還拜偏將軍入補馬關



右部督遷越騎校尉俄拜盪魏將軍權寢疾以爲太子右部督孫亮立拜右將軍東興之役赴討有功明年孫峻害諸葛恪遷據驃騎將軍帥師攻曹髦未及淮聞峻死以從弟綝代據大怒引軍還欲廢綝綝聞之使其黨逆于江都左右勸據降魏曰恥爲魏臣遂自殺

### 賀齊

賀齊字公苗會稽山陰人本姓慶氏避安帝父諱改焉少爲郡吏守鄒長縣吏斯從輕俠爲姦齊欲治之主簿諫曰從縣大族山越所附今日治之明日寇至矣齊聞大怒立斬之從族黨遂相糾合眾千餘人攻縣齊率吏民開城門突擊大破之威震山越轉守太末長孫策臨郡察齊孝廉



領南郡都尉破降候官賊張雅詹强等累遷威武中郎將  
討丹陽黠歙而歙賊帥金奇萬戶屯安勤毛甘萬戶屯烏  
聊山黠帥陳僕祖山等二萬戶屯林厯山山四面壁立高  
數十丈徑路險狹不容刀楯賊臨高下石不可攻將吏患  
之齊身視形便陰募輕捷士作鐵戈密于賊所不備處以  
戈拓斬山爲緣道夜令潛上乃多懸布以援下人得上百  
數人四面流布俱鳴鼓齊勒兵待之賊夜聞鼓聲四合謂  
大軍悉已得上驚懼惑亂不知所爲守路備險者皆走軍  
因得上大破僕等餘皆降散凡斬首七千復表分歙爲新  
定黎陽休陽黠歙凡六縣立新都郡以齊爲太守立府于  
始新加偏將軍初齊討諸賊賊中有善禁者每交戰官軍



刀劍不得拔矢皆還向戰輒不利齊曰吾開金有刃者可  
禁蟲有毒者可禁無刃之物無毒之蟲則不可禁彼雖禁  
必不能禁無刃之物乃多作勁木白楮選精卒五千人爲  
先登賊恃其禁不加嚴備于是宮軍以白楮擊之禁者果  
不能施行擊殺數萬計十六年郎稚合眾數千人起餘杭  
齊復破平表分餘杭爲臨水縣被命詣所在及還權出祖  
道賜駟車駿馬豫章彭材等眾萬餘人爲亂齊誅其首惡  
餘皆降服揀勁勇爲兵次爲縣戶遷奮武將軍從攻合肥  
時城中出戰徐盛被創失矛齊引兵奮擊得盛所失會張  
遼掩襲津北齊兵已渡卽還迎權權旣至大船遂宴諸將  
齊離席流涕曰至尊當持重今日之事幾至禍敗願以此



爲終身之戒權起拭其涕曰謹以刻心非但書紳而已郡  
陽賊尤突受曹操印綬化民爲盜陵陽始安涇縣皆應之  
齊與陸遜討擊斬首數千餘黨震服三縣皆降得精兵八  
千人拜安東將軍封山陰侯出鎮江上督扶州以上至皖  
章武二年曹休爲寇齊以道遠後至會洞口諸軍遭風流  
溺所亡幾半將士失色賴齊未濟偏軍獨全諸將依以爲  
聲勢齊性奢侈尤好軍事兵甲器械極爲精好所乘船雕  
刻丹鏤青蓋絳檐弓矢皆取上材蒙衝鬪艦之屬望之若  
山休等憚之遂遁去遷後將軍初晉宗爲戲口將以眾叛  
附曹丕不以爲蘄春太守圖襲安樂取其保質權以爲恥  
因軍初罷六月盛夏出其不意詔齊督糜芳鮮于丹等襲



靳春遂生虜宗後四年卒子達達弟景皆有令名景子邵  
字興伯孫休時爲吳郡太守皓立召爲左典軍遷中書令  
領太子太傅皓凶暴驕矜政事日弛邵上疏言甚剴切皓  
深恨之邵奉公守正近倖所憚乃共譖邵與樓元謗毀國  
事俱被責詰元徙南荒邵原復職尋亦被誅有子循

贊曰曹操以荀彧比張良而孫權亦以魯肅方鄧禹呂範  
方吳漢是欲以高光自處多見其不知量也諸葛亮王佐  
之才昭烈尊之如父師而未常擬之古人蓋帝王之于其  
臣自有契豈待言而後見哉



續後漢書卷第三十一

上海郁松年原本

宋廬陵蕭常著

邑後學胡芳秋杜邦浚校梓

吳載記第九

潘濬

潘濬字承明武陵漢壽人弱冠受學于宋忠山陽王粲見而異之出是知名荊州牧劉表辟爲部江夏從事時沙羨長賊穢不治濬按殺之一郡震慄轉湘鄉令治有能名昭烈領州以爲治中從事及入蜀留典州事孫權殺關羽并荊土將吏皆歸附濬獨稱疾不見權遣人興致之濬伏面著牀席不起涕泗交流哀哽不自勝權慰撫之曰承明昔觀丁父都俘也武王以爲軍帥彭仲爽申俘也文王以爲

令尹此二人楚國之先賢皆爲名臣卿獨未可降意將以孤異古人之量即使親近以手布拭其面濬起拜謝拜輔軍中郎將遷奮威將軍封亭侯權僭號拜少府進封瀏陽侯權數出射雉濬諫權曰相與別後時暫出耳不復如往日也濬曰天下未定機務方殷射雉非急有如弦絕括破皆能爲害願以臣故置之濬出見雉翳故在乃手毀之權自是不復射遷太常五溪蠻夷反權假濬節督諸軍討之賞罰必行法不可干俘馘萬計由是羣蠻悉衰弱一方寧定降人隱蕃以辯給爲時流所尙濬子翥亦與之遊濬聞之大怒責翥曰吾受國恩誓以死報爾輩在都當念恭敬親賢慕善何爲與降虜交以糧餉之在遠聞之心震面熱



惆悵累旬書到急就往使受杖一百貶責餘餉人咸怪之  
後蕃果以謀叛誅眾乃服時濬姨兄零陵蔣琬爲漢大將  
軍或間濬于武陵太守衛旆云濬遣使密與琬相聞旆以  
啟權權曰承明不爲此也卽封旆表示濬先是濬與陸遜  
俱駐武昌掌留事還復故校事呂乙竊弄威柄顧雍朱據  
等皆禁止黃門侍郎謝玄乘間問乙顧公事何如乙曰不  
能佳玄又問若此公免退誰當代乙未對玄曰得毋潘太  
常乎乙良久曰君語近之玄謂曰潘太常常切齒于君但  
道遠無因耳今日代顧公明日擊君乙大懼遂解散雍事  
濬求詣建業欲極言乙姦利至聞太子登已數言之而不  
見從乃大請百寮欲因會刃乙以身當之爲國除害乙密



聞之稱疾不至濬每進見無不以乙爲言由是乙寵漸衰  
後遂伏誅權引咎責躬因遜謝大臣語在權傳延熙二年  
卒翦字文龍爲騎都尉早卒翦弟祕累遷至尙書僕射代  
習溫爲荊州大公平甚得州里之譽

呂岱

呂岱字公定廣陵人避亂南渡孫權嗣事岱詣幕府出守  
吳丞權親斷諸縣囚繫岱處法應對甚稱權意召署錄事  
出補餘姚長會稽東治五縣賊呂合秦狼等爲亂權以岱  
爲督軍校尉與將軍蔣欽等討平之拜昭信中郎將督孫  
茂等從取長沙三郡留鎮長沙遷廬江太守代步騭爲交  
州刺史時桂陽潁陽賊王金合眾于南海界權令岱討之



生縛金送都遷安南將軍假節封都鄉侯交趾太守士燮  
卒權以其子徽爲安遠將軍領九真太守以校尉陳時代  
燮表分海南三郡爲交州以將軍戴良爲刺史海東四郡  
爲廣州岱自爲刺史遣良與時南入而徽不承命舉兵戍  
海口拒良等岱上疏請討之徽聞岱至卽率兄弟六人肉  
袒迎岱岱皆斬送其首罷廣州復爲交州如故岱既定交  
州復進討九真斬獲萬計又遣從事南宣國命旣徼外扶  
南林邑堂明諸王各遣使來貢權嘉之拜鎮南將軍建興  
九年召還鎮長沙漚口會武陵蠻蠢動岱與太常潘濬討  
之十二年屯陸口後徙蒲圻廬陵賊李桓路合會稽東冶  
賊隨春南海賊羅厲等一時竝至召岱督劉纂唐咨等分



部討擊皆破平之代潘濬領荊州文書與陸遜竝在武昌  
頃之廖式作亂零陵蒼梧鬱林諸郡騷動岱自表軌行星  
夜兼程權遣使追拜交州牧破斬式等郡縣悉平復還武  
昌時年已八十體力精強躬親吏事及陸遜卒諸葛恪代  
遜權乃分武昌爲兩部岱督右部自武昌上至蒲圻遷上  
大將軍拜子凱副軍校尉監兵蒲圻孫亮立拜大司馬岱  
潔己奉公所至可述初在交州厯年不餉家妻子飢寒權  
聞之太息以讓羣臣曰呂岱出身萬里爲國勤事家門內  
困而孤不及知股肱耳目其責安在于是加賜錢穀布帛  
歲有常數始岱親近吳郡徐原慷慨有才智岱知其賢遂  
薦之權官至侍御史原性忠壯好直言岱時有得失原輒



諫正又公言之人以告岱岱歎曰此吾所以貴德淵者也  
原死岱哭之慟曰德淵呂岱之益友今不幸岱復於何問  
過談者美之延熙十九年卒時年九十六子凱嗣

### 全琮

全琮字子璜吳郡錢塘人父柔靈帝時爲尚書右丞董卓  
之亂棄官歸尋拜會稽東部都尉孫策至吳柔舉兵先附  
策表爲丹陽都尉孫權爲車騎將軍以柔爲長史徙桂陽  
太守柔嘗使琮載米數千斛到吳有所市易琮至皆散之  
空船而還柔大怒琮頓首曰愚以所市非急而士大夫方  
有倒懸之患故以賑贍不及報柔更奇之時中州士人避  
亂而南依琮居者數百琮傾家給之權以爲奮武校尉使



討山越因開幕召得精兵萬餘人出屯牛渚稍遷偏將軍  
漢將軍關羽圍樊襄陽琮上疏陳羽可取之計及羽敗權  
謂曰今日之捷抑亦君之功也于是封華陽亭侯章武二  
年曹丕使其將以舟軍大出洞口權使呂範督諸將拒之  
敵以輕船鈔擊琮常帶甲俟隙不休頃之敵數千人出江  
中琮擊破之梟其將尹廬遷綏南將軍進封錢塘侯建興  
三年領九江太守與陸遜敗曹休于石亭遷衛將軍左護  
軍權以女妻之十一年督步騎五萬攻六安民散走諸將  
欲分兵捕之琮曰夫乘危徼倖舉不百全者非國家大體  
也今分兵捕民得失相半豈可全哉有如此不利虧損非小  
與其獲罪琮寧以身受之不敢徼功以負國也延熙九年



遷右大司馬左軍師琮爲人恭順善于規諫而言辭未嘗切忤初權將圖朱厓及夷洲皆先問琮琮曰以聖朝之威何向不克然殊方異域隔絕瘴海水土氣毒自古有之兵入民出必生疾病轉相污染往者懼不反所獲幾何猥虧江岸之兵以冀萬一之利愚臣竊所不安權不聽軍行幾歲死者十八九權浚悔之後以語琮琮曰當是時羣臣不諫者臣以爲不忠琮旣親重宗族子弟竝寵貴賜累千金然謙虛接士一無驕色延熙末卒子懌嗣

### 駱統

駱統字公緒會稽烏傷人父俊有文武才幹少爲郡吏察孝廉補尚書郎拜陳相爲袁術所殺統母改適爲華歆小



妻統時八歲與親客歸會稽其母送之拜辭升車不顧其母流涕于後其御者曰夫人猶在也統曰不欲增母思故不顧耳事適母甚謹時歲饑鄉里及遠方客至者統忍飢輟食食之其姊仁愛有行寡居無子見統臞瘠哀之素問其故統曰士大夫糟糠不厭我何心獨飽姊曰如是不告我而自苦若此乃以其私粟助之施孫權領會稽太守統年二十爲烏程相名爲功曹行騎都尉妻以從兄輔女統志在補察有所聞見夕不待旦嘗勸權以尊賢接士勤求損益饗賜之日可人人撫問密意誘諭使皆感恩戴義懷欲報之心權納用焉出爲建忠郎將領武射吏三千及凌統卒復領其兵是時徵役煩數重以疫癘民多損耗上



疏言方今長吏親民之職惟以辦具爲能取應目前之急少復以恩惠爲治官民政俗日以彫弊夫治疾及其未篤除患貴其未深願畱神思省權深納其言章武中曹仁攻濡須使常雕等襲中洲統與嚴圭等拒破之封新陽亭侯後爲濡須督數陳便宜書數十上所言皆切中時疾建興六年卒時年三十六

周魴

周魴字子魚吳郡陽羨人少好學舉孝廉爲寧國長錢塘賊帥彭式等作亂以魴爲錢塘侯相討平之遷丹陽西部都尉鄱陽彭綺攻沒屬城拜鄱陽太守與胡綜協致討遂生擒綺加昭義校尉權使譎誘曹叡將曹休休信之率步

騎十萬竟入皖鮪亦率眾從陸遜橫截休休眾冰裂瓦解  
斬獲萬數事捷軍旋權謂曰君之功當書竹帛加裨將軍  
賜爵關內侯賊率董嗣負阻鈔略豫章諸郡吾粲唐咨等  
敦守不支鮪表乞罷兵得以便宜從事遣諜授以方略狙  
誘殺嗣嗣弟懼詣陸遜降由是數郡皆得安集在郡十三  
年賞善罰惡恩威並著卒子處嗣

### 鍾離牧

鍾離牧字子幹會稽山陰人魯相意七世孫也父緒爲樓  
船都尉兄駟上計吏牧童戲時性遲訥駟常謂人曰牧必  
勝我不以爲然少喬居永興躬自墾田種稻二十餘畝  
將刈獲縣民有認其田者牧曰本以田荒故墾之耳遂以



其稻與其人縣長聞之召民係獄欲繩以法收爲之請長  
曰君慕承官自行義事僕爲民主當以法率下何得廢公  
憲而從君耶牧曰此是郡界緣君意故來暨住今以少稻  
而殺此民何心復畱遂出裝還山陰長自往止之爲釋係  
民民慚懼率妻子春所取稻得米六十斛送還致牧閉門  
不受民輸置道旁無有取者牧由此顯名延熙五年由郎  
中補太子輔義都尉遷南海太守進爲丞相長史轉司直  
遷中書令會建安郡陽新都三郡山民作亂出爲監軍使  
者討平之封秦亭侯拜越騎校尉漢亡武陵五溪夷與蜀  
接界懼其叛亂乃以牧爲平魏將軍領武陵太守曹奐遣  
漢葭縣長郭純試守武陵誘致諸夷邑君或起應純又進



攻酉陽縣郡中震懼牧問府吏何以禦之皆曰諸夷負險不可以兵進宜遣恩信吏宣教慰勞牧曰不然外境內侵誑誘人民及其根柢未浹而撲取之此救火貴急之勢也敕外廼嚴掾吏沮議者軍法從事撫夷將軍高尙說牧曰晉潘太常督兵五萬然後討之又是有漢爲援諸夷率化今旣無往日之援而郭純已據遷陵而明府以三千兵浹入尙未見其利也牧曰非常之事何得尋舊卽帥所領晨夜進緣山險行垂二千里從塞上斬惡民懷二心者魁帥百餘人及其支黨千餘級純等遁去五溪平遷公安督揚武將軍封都鄉侯徙濡須督復以前將軍領武陵太守卒官家無貲財士民思之子禕嗣



留贊


留贊字正明會稽長山人少爲郡吏與黃巾賊率吳桓戰手斬桓贊一足被創遂屈不信性剛烈好讀兵書及三史每覽古良將戰攻之略輒對長歎因謂其所親曰今天下大亂英雄並起愿觀前世富貴非有常人而我屈楚居閭巷之間存亡無以異今欲割引吾足幸不死冀復見用死則已矣親戚皆難之有間贊乃以刀自割其筋血流滂沱氣絕良久家人驚怖徐引其足足信創愈因能行凌統與語奇之乃薦于權遂被試用數有戰功稍遷屯騎校尉時政得失每切規諫好直言不阿旨權以此憚之諸葛恪出東興贊爲前部戰先陷陳大敗敵軍還左將軍孫峻侵淮



南授贊節拜左護軍未至壽春道病峻令贊將軍資重先行還敵將蔣班以步騎四千來追贊病因不能軍知必敗乃解曲蓋印綬付弟之子以歸曰吾自爲將破敵舉旗未嘗負敗今病因兵羸眾寡不敵汝速去俱死無益適以快敵耳弟子不肖贊拔刀欲斫之乃去初贊爲將必先被髮叫天因抗音而歌左右應之畢乃進戰戰無不克及是歎曰吾戰有常術今病因若此命也遂被害時年七十三聞者痛惜焉二子略平竝爲大將

贊曰濬逞威於舒燮岱濫刑于士氏魴譎詐以成功牧驕傲以取名固不足道然濬切齒姦人岱傾心益友而贊不以疾廢而志于勲業者亦可信也










































續後漢書卷第三十二

上海郁松年原本

宋廬陵蕭常著

邑後學

胡芳秋  
杜邦浚

校梓

吳載記第十

陸遜

陸遜字伯言吳郡吳人本名議世爲江東大族祖紆敏而好學仕至城門校尉父駿九江都尉遜少時從祖康爲廬江太守往依焉袁術攻康康遣遜及親戚還吳遜年長于康子績爲之經紀門戶孫權爲將軍遜年二十一始仕幕府出爲海昌屯田都尉竝領縣事歲薦荒開倉賑民勸農桑百姓蒙利時吳會稽丹陽民多逃匿山澤間遜陳便宜乞募爲兵以所募新兵討擊會稽賊潘臨鄱陽尤突等皆



討平之拜定威校尉屯利浦權以兄策女妻之數訪世務  
遜建議曰方今英雄碁峙豺狼窺望欲寧禍亂非眾不濟  
而山寇舊惡依阻深險夫腹心未平難以圖遠可大部伍  
取其精銳權納其策以爲帳下右部督會丹陽賊費棧受  
曹操印綬扇動山越爲內應權遣遜討之棧支黨多遜兵  
少乃益施牙幢分布鼓角夜潛出谷間鼓噪而前應時破  
散遂部伍東三郡强者爲兵羸者補戶得精兵數萬人宿  
惡除盜所過肅清還屯蕪湖會稽太守淳于式表遜枉取  
人民所在愁擾遜後詣都稱式佳吏權曰式白君而君薦  
之何也對曰式意欲養民是以白遜若遜復毀式以亂聖  
聽不可長也權曰此誠長者之言顧人不爲耳呂蒙託疾



詣建業遜謂曰關羽接境如何遠下蒙曰誠如所言然吾疾篤遜曰羽矜氣凌人始有大功意驕志逸但務北進未嫌于我若聞公病必益無備今出其不意自可擒制宜善爲計蒙至都權問誰可代卿者對曰遜意思深長才堪負重觀其規爲終可大任而未有遠名非羽所忌若用之當令外自韜隱內察形便然後可克拜偏將軍右部督代蒙遜至陸口書與羽推尊之羽見其有謙下自託意無他嫌遜具啓形勢有可擒之機權乃潛軍而上使遜爲呂蒙前部至卽克公安南郡封華亭侯諸城皆下遂殺羽遷右護軍鎮西將軍進封叟侯天子東征權命遜爲大都督與朱然潘璋等拒王師王師敗績加拜輔國將軍領荊州牧改



封江陵侯時車駕在白帝徐盛潘璋等爭先犯蹕權以問  
遜遜與朱然駱統以爲曹丕大合士眾外託助國內蓄姦  
心謹決計還無幾丕軍果至三方受敵少帝踐祚權遣使  
聘漢丞相諸葛亮凡事所宜輒令遜遙咨于亮并刻權印  
置遜所權每與亮書常過示遜輕重可否有所不安便令  
改之以印封行權使鄱陽太守周飭譎誘曹叡將曹休休  
以眾入皖乃以遜爲大都督逆休休旣覺恥見給乃自恃  
眾盛請戰遜自爲中部令朱桓全琮爲左右翼三道俱進  
果衝休伏兵因驅走之追亡逐北徑至夾石斬獲萬計車  
乘萬兩軍資器械山積休還疽發背死諸軍振旅過武昌  
權以御蓋覆遜出入殿門遣還西陵俄拜上大將軍右都



護是歲權詣建業畱其太子及尙書九官徵遜輔太子并  
典荊州及豫章三郡事董督軍國時建昌侯慮于堂前作  
鬪雞欄頗施小巧遜正色曰君侯宜勤覽經典以自益用  
此何爲慮卽毀之射聲校尉松于公子中最親而兵不整  
遜卽髡其職吏南陽謝景善劉廙之先刑後禮之論遜呵  
景曰禮之長于刑久矣廙以細辯而詭先聖之教君今傳  
東宮宜道仁義以彰德音彼不經之談不須講也遜雖身  
在外乃心于國上疏陳時事以科法嚴峻爲言權欲發兵  
取夷洲及朱厓皆以咨遜遜上疏言朱厓絕險民猶禽獸  
得其民不足濟事無其兵不足虧眾今江東見眾自足圖  
事但當蓄力而後動耳臣以爲養士民寬其租稅眾克在



和義以勸勇則河渭可平矣建興十四年權北侵使遜與諸葛瑾攻襄陽遜遣親人韓扁齎表奉報還遇敵酒中鈔邏得扁瑾聞之甚懼書與遜云賊得韓扁具知我虛實且水乾宜急去遜未荅方催人種葑荳與諸將奕棊射戲如常瑾曰伯言有知略其當有以自來見遜遜曰賊知大駕已還無所顧憂得專力于吾又已守要害之處兵將意動且當自定以安之設施既定然後出耳今便退賊謂吾怖仍來相憾必敗之勢也乃密與瑾計令瑾督舟船遜悉上兵馬以向襄陽城敵素憚遜遽還赴城瑾引船出遜徐整部伍張拓聲勢步驟趨船敵不敢至曹叡江夏太守遂式頗爲邊害而與北舊將文聘子休素有隙遜聞之卽僞作



荅式書置界上式兵得書以示式式惶懼遂送妻子還雒  
由是吏士不復附竟以此免罷中郎將周祇請于鄱陽召  
募權以問遜遜謂此郡民易搖難安恐召亂而祇固陳取  
之郡民吳遽等果作亂殺祇攻諸縣豫章廬陵宿惡民竝  
應之遜聞卽討擊遽等相率降遜料得精兵八千人三郡  
平時中書典校呂乙竊弄威柄遜與太常潘濬憂之言則  
流涕後權誅乙浚以自責語在權傳時謝淵謝玄各陳便  
宜欲興利改作以事下遜遜議曰國以民爲本強由民力  
財由民出夫民困國富民瘠國強者未之有也故爲國者  
得民則治失之則亂若不蒙利而用以立效亦難爲也是  
以詩歎宜民宜人受祿于天願垂寬厚寧濟百姓數年之



問國用小豐然後圖之代顧雍爲丞相太子與其弟霸交隙遜上疏陳嫡庶之分不可不正權不聽而遜外孫顧譚顧承姚信以親附太子枉見流徙太子太傅吾粲坐數與遜交書下獄死權累遣使責讓遜遜憤恚卒時年六十三家無餘貲初暨豔建營府之論遜戒之以爲必及于禍又謂諸葛恪曰在我前者吾必奉之同升在我下者則扶持之今君氣凌其上意蔑于下非安德之基也又廣陵楊竺少有聲名而遜謂終敗勸竺兄穆與之別族其先見類如此長子延早歿次子抗嗣孫休時諡曰昭

### 陸抗

陸抗字幼節孫策外孫也父卒時年二十拜建武校尉送



葬東還詣都權以楊竺所白遜二十事問抗禁絕賓客中  
使臨詰抗抗事事條對權意漸解遷立節中郎將與諸葛  
恪換鎮柴桑抗臨去繕治城圍葺理牆屋園圃桑果皆不  
妄取恪入屯儼然若新而恪柴桑故屯頗有壞損深以爲  
愧後詣都治疾疾差當還權涕泣與別謂曰吾前聽用讒  
言與汝父大義不篤以此負汝前後所問一焚滅之勿令  
人見也尋拜奮威將軍曹髦將諸葛亮舉壽春降拜抗柴  
桑督赴壽春破敵軍遷征北將軍都督西陵孫皓初加拜  
鎮軍大將軍施績卒拜都督信陵夷道樂鄉公安諸軍事  
治樂鄉抗聞皓政令多闕憂之乃上疏陳便宜十七條時  
何定弄權宦官與政抗上疏諍諫西陵督步闡叛遣使降

晉抗聞之卽部分諸軍令將軍左奕吾彥蔡貢等經赴西陵救諸軍更築嚴圍自赤溪至故市內以圍圍外以禦寇晝夜督厲如敵已至眾甚苦之諸將咸諫曰今及三軍之銳亟以攻圍比晉救至圍必可拔何事於圍而敝士民之力乎抗曰此城處勢旣固糧穀又足其所繕修備禦之具皆抗所宿規今反身攻之旣非可卒克且救必至至而無備表裏受敵何以禦之諸將每欲攻圍抗皆不許宜都太守雷譚言至懇切抗不得已聽令一攻軍果無利圍備始合晉羊祜率軍向江陵諸將皆謂抗不宜上抗曰江陵城固兵足無所憂假令敵沒江陵必不能守所損者小如使西陵槃結則南山羣夷皆當擾動則所憂無已吾寧棄江



陵而赴西陵初江陵平行道路通利抗統敕江陵督張威作大堰遏水以絕寇叛祐欲因所遏水以浮船運糧揚聲將破堰以通步軍抗聞使咸急破之諸將皆諫不聽祐至當陽間堰敗乃改船以車運大費功力晉巴東監軍徐允帥水師詣建平荊州刺史楊肇至西陵抗令張咸固守其城公安督孫遵巡南岸禦祐水軍督雷慮鎮西將軍朱琬拒允身率三軍憑圍對肇將軍朱喬營都督俞贊亡詣肇抗曰贊軍中舊吏知吾虛實吾常慮夷兵素不簡練若敵攻國必先此處卽夜易夷民皆以舊將充之明日肇果攻夷兵處抗命旋軍擊之矢石雨下肇眾傷死者相屬肇至經月計屈夜遁抗欲追之而慮闡項領伺間兵不得分乃



鳴鼓戒嚴若將迫者肇洶懼悉解甲挺走抗使輕兵躡之肇大敗祐等皆走遂拔西陵誅夷闡族及其大將吏餘皆請赦之全活者數萬口修治城圍東還樂鄉貌無矜色加拜都護抗嘗遺祐酒飲之不疑抗有疾祐饋之藥抗亦推心服之時謂華元子反復見于今抗聞武昌薛瑩徵下獄上疏救之曰俊乂國家之良寶社稷之貴資周禮有議賢之辟春秋有宥善之義比聞薛瑩卒見逮錄甚失民望宜垂天恩原赦瑩罪哀矜庶獄天下幸甚不納俄拜大司馬荊州牧明年夏疾病上疏曰西陵建平國之蕃表旣處下流受敵二境若敵汎舟順流舳艫千里星奔電邁俄頃而至非可恃援他部以救倒懸也此乃社稷安危之機非徒



封疆侵陵小害也臣父遜昔在西垂陳言以爲西陵國之西  
門雖云易守亦復易失有如不守非但失一郡荊州非吾  
有也如其有虞當傾國爭之臣往在西得涉遜跡前乞精  
兵三萬而至者循常未可遣赴自步闡以後益見損耗今  
臣所統千里受敵四處外禦強對內懷百蠻而上下見兵  
才有數萬羸敝日久難以待變臣愚以爲諸王幼沖未統  
國事無用兵馬黃門宦豎開列占募兵民怨役逋逃入占  
乞特旨簡閱一切料出以補疆場受敵常處使臣所部足  
滿八萬省息眾務信其賞罰若兵不增此制不改而欲濟  
大事此臣所深憂也臣死之日願以西方爲屬則臣死且  
不朽秋遂卒子晏嗣晏及弟景元機雲分領其兵其後晉



伐吳王濬順流而下所至輒克終如抗慮景字士仁仕至偏將軍封毗陵侯澡身好學著書數十篇爲王濬兵所害機雲仕晉

陸瑁

陸瑁字子璋遜弟也少好學篤義蔣纂袁迪等貧有志操皆依瑁以居割少分多與同豐約同郡徐原與瑁初無雅故臨終遺書託以弱孤瑁爲墳墓教育其子從父績早亡二男一女皆幼無歸瑁收視長養至于成人州郡辟舉皆不受時尙書暨豔盛明臧否差斷三署頗揚人曖昧之失瑁以書規之豔不能用卒至于敗建興初公車徵拜議郎選曹尙書孫權忿公孫淵之反覆欲自伐之瑁上疏以爲



不可辭多因不載權載覽瑁書嘉其辭理端切遂止  
二年卒子喜字文仲亦該通典籍好人倫孫皓時爲選曹  
尙書後仕晉

### 陸凱

陸凱字敬風遂族子也章武初爲永興諸暨長所至有治  
迹拜建武都尉雖在軍旅手不廢書好太元論演其義以  
筮輒驗延熙中除儋耳太守討朱厓斬獲有功遷建武校  
尉尋拜巴丘督偏將軍都鄉侯轉武昌右部督與諸將赴  
壽春還累遷盪魏綏遠將軍孫休立拜征北將軍假節皓  
初遷鎮西大將軍都督巴丘領荊州牧進封嘉興侯左丞  
相皓不好人視己羣臣侍見睛莫敢迕凱說皓曰夫君臣



無不相識之道若卒有不虞不知所赴皓聽凱自視時徙武昌揚土百姓泝流供給以爲患苦又政事多謬黎元窮困凱上疏曰臣聞有道之君以樂樂民無道之君以樂樂身樂民者其樂彌長樂身者不久而亡夫民者國之根也誠宜重其食愛其命民安則君安民樂則君樂自頃年以來君威傷於桀紂君明闇于姦雄君惠閉于羣孽無災而民命盡無爲而國財空公卿媚上以求寵困民以求饒導君于不義敗政于淫俗臣竊痛心又言武昌土地危險而瘠确非王都安國養民之處且童謠云寧飲建業水不食武昌魚寧還建業死不止武昌居童謠之言生于天心乃以安居而比死足明天意知民所苦也其指陳得失甚愷



切時何定佞巧貴倖用事凱面責之曰卿見前後事主不忠傾亂國政寧有壽終者乎何以專爲姦邪穢塵天聽宜自反厲不然方見卿有不測之禍矣定大恨之凱終不以爲意乃心公家義形于色表疏皆指事不飾忠懇內發俄疾病皓遣中書令董朝問所欲言凱陳何定不可用不宜委以國事奚熙小吏建起浦里田欲復嚴宓故迹亦不可聽姚信樓元賀邵張悌郭連薛瑩滕修及族弟喜抗或清白忠勤或多才卓越皆社稷之楨榦國家之良輔願畱神思訪以時務卒時年七十二皓嘗遣親近趙欽口詔報凱前表曰孤動遵先帝有何不平卿所諫又非也建業宮不利故避之而西宮室宇摧朽須謀移都何以不可徙乎凱

上疏指陳皓不遵先帝者二十事子禪爲太子中庶子皓  
追忿凱直陳徙禪家建安

贊曰遜工于制勝而謬于謀國知襲關羽以取荊州而不  
知佐漢以定中原才有餘而知不足故也抗策西陵算無  
遺慮凱奮不顧死而納忠于暴君亦難矣哉



續後漢書卷第三十三上

上海郁松年原本

宋廬陵蕭常著

邑後學

胡芳秋  
杜邦浚校梓

吳載記第十一上

虞翻

虞翻字仲翔會稽餘姚人四世祖廣零陵太守曾祖承平  
輿令祖鳳父歆曰南太守世受孟氏易最有師法翻少好  
學有高志太守王朗命爲功曹策略地三會稽翻時居父  
喪朗旣敗走策從請爲功曹待以交友之禮策嘗討山越  
斬其渠帥悉令左右分行逐賊獨騎與翻遇山中翻問左  
右安之策曰悉行逐賊翻曰危事也令策下馬曰此草溪  
卒有緩急馬所不及但牽之執弓矢以步翻善用矛請前



行得平地勸策乘馬策曰卿無馬奈何翻曰翻能步行日  
可三百里自征伐以來吏卒無及翻者明府試躍馬翻能  
疏步隨之行及大道得一鼓吏策取角自鳴之部曲識聲  
遠近皆集遂從平定三郡策討黃祖旋軍欲取豫章使翻  
往說其太守華歆歆降還計功行賞因謂翻曰孤昔再至  
壽春見馬日磾及中國士大夫語吾東方人多才耳但恨  
學問不博孤意以爲不然卿博學洽聞故前欲令卿一詣  
許交見朝士以折中國妄語兒卿不欲行便使子綱恐子  
綱不能結兒輩舌也翻曰翻乃明府家寶而以示人人倘  
畱之則明府失良佐矣故前不行耳策笑曰然遂遣還郡  
尋爲富春長州舉茂材漢名爲侍御史皆不就司空曹操



表辟之翻曰盜跖欲以餘財污良家耶拒而不受翻與少府孔融書并示以所注易融復書曰聞延陵之理樂觀吾子之治易乃知東南之美非徒會稽之竹箭也孫權以爲騎都尉數犯顏諫諍權不悅又性不詭隨多見謗毀坐徙丹陽涇縣呂蒙圖取關羽稱疾還建業以翻兼通醫術請以自隨亦欲假此以釋翻也羽旣敗遁去權使筮之得兌下坎上節五爻變之臨翻曰不出二日必當斬頭果如其言權旣與魏和遣于禁還翻諫曰禁敗數十萬眾身爲降虜又不能死還之雖無所損猶爲放盜不如斬以令三軍示爲人臣有二心者權不聽羣臣送禁翻曰卿勿謂吳無人吾謀適不用耳權爲吳王大宴羣臣自起行酒翻伏地



佯醉不持權去翻起坐權大怒欲手劍之坐者莫不惶懼  
惟大司農劉基抱權諫曰大王以三爵之後手殺善士雖  
翻有罪天下孰知之且大王以能容賢蓄眾故海內望風  
今一朝棄之可乎權曰曹操尙殺孔文舉孤于虞翻何有  
基曰操輕害士人天下非之大王躬行德義欲與堯舜比  
隆何自比操乎由是得免權因敕左右曰自今酒後言殺  
皆不得殺翻嘗乘舟與麋芳遇先驅曰避將軍翻厲聲曰  
失忠與信何以事君傾人二城而稱將軍可乎芳闔戶不  
應翻後乘車又經芳營門吏閉門車不得過翻怒曰當閉  
反開當開反閉豈得事宜耶芳聞之有慙色性疏直數有  
酒失權與張昭論及神仙翻指昭曰彼皆死人而謂仙人



世豈有仙人也哉權積怒于是徙翻交州雖處罪放而講學不倦門徒常數百人爲易老子論語訓注皆傳于世初翻欲注易奏疏曰臣生值衰亂長于軍旅習經于枹鼓之間承先師之說依經立注又臣郡吏陳桃夢臣與道士相遇披髮被鹿裘布易六爻撓其三以飲臣臣乞盡吞之道士言易道在天三爻足矣豈臣受命應當知經而所覽諸家解不離俗義有不當輒悉改定以就其正又曰經之大者莫過于易自漢初以來讀易者解之率少孝靈之世潁川荀諝號爲知易臣得其注愈于俗儒至釋西南得朋東北喪朋顛倒反逆了不可曉又言鄭元解尚書違失事因臣聞周公制禮以辨上下孔子曰有君臣然後有上下有



上下然後禮義有所措是故尊君卑臣禮之大同也伏見  
元所注尙書顧命以康王執珪古月字從誤作同旣不覺  
定復訓爲杯謂之酒杯成王疾困憑几洮頰以爲澣衣成  
事洮字虛更作濯字以從其非又古大篆𠂔字讀當爲桺  
古桺𠂔同字而以爲昧分𠂔三苗𠂔古別字又訓𠂔言𠂔  
猶別也若此之類誠可怪也又馬融亦以爲同者大同天  
下今經益金作銅字訓詁言天子副璽雖皆不得猶愈于  
元又元所注五經違義尤甚者百六十七事不可不正行  
乎學校傳乎將來臣竊恥之翻放去南方每云自恨疏節  
骨體不媚犯上獲罪當長沒海隅生無可與語死以青蠅  
爲弔客使天下有一人知己者足以不恨以典籍自慰依



易設象以占吉凶又以宋氏解元頗有舛謬更爲立法并著明揚釋宋以理其滯在南十餘年年七十卒後權遣將士至遼東海中風濤多所漂沒權深悔之乃曰昔趙簡子稱諸君之唯唯不如周舍之諤諤翻諒直盡言國之周舍也向使翻在必無此役趣下交州召翻還會翻已卒十一子第四汜字世洪最知名孫休時累遷散騎中常侍後爲監軍使者討扶嚴有功拜交州刺史冠軍將軍餘姚侯汜弟忠字世方好獎拔人物識吳郡陸機于童穉稱上虞魏遷於無名之初終皆遠致爲著聞之士仕宜都太守弟聳字世龍清虛無欲進退以禮累遷廷尉湘東河間太守弟曷字世文少儻官至廷尉尙書後仕晉爲濟陰太守



張溫

張溫字惠恕吳郡吳人父允爲孫權東曹掾溫少有節操  
神視爽邁權聞之問羣臣曰溫當今誰比劉基曰可輩全  
琮顧雍曰當今無輩權曰如是張允不死矣徵至瞻視祥  
華觀者傾竦改容加禮拜議郎選曹尙書徙太子太傅時  
年三十二以輔義中郎將使漢權曰卿不宜遠出恐諸葛  
孔明不知吾所以與曹氏通之意以故屈卿行溫至益州  
詣闕拜章曰陛下以聰明之姿上契往古總百揆于良佐  
遐邇望風莫不忻賴吳國清澄江潯願從有道平一字內  
委心協規有如河水謹奉所齎函書布於執事漢廷諸公  
重其才還頃之使入豫章部伍出兵事未究權旣陰銜溫



稱美漢政又疾其聲名太盛恐終不爲己用思有以中傷之會暨黠事起因并及溫黠字子休與溫同郡溫薦爲選曹郎遷尙書黠性狷厲好清議疾時郎署淆雜欲臧否區別彈射百僚覈選三署率皆貶降數等其守故者十不能一居位貪鄙志趨卑污者皆以爲軍吏置營府以處之而怨忿之聲積浸潤之譖行矣時多言黠及選曹郎徐彪專用私情憎愛不公黠彪皆自殺溫素與黠彪同意權卽幽溫有司下令數其罪斥還本郡以給廨吏後六年病卒初餘姚虞俊見溫名盛歎曰張惠恕才多知少華而不實怨之所聚有覆家之禍吾見其兆矣諸葛亮聞俊之言意未之信及溫廢斥乃歎俊之明見亮初聞溫敗未知其故思



之數日曰吾得之矣其人于清濁太明善惡太分第祇白  
皆有才與溫俱廢

韋昭

韋昭字宏嗣吳郡雲陽人也少好學能屬文爲尚書郎任  
太子中庶子時蔡穎亦官東宮好博奕太子和以爲無益  
命昭著論以譏之其辭曰君子恥當年而功不立疾歿世  
而名不稱故曰學如不及猶恐失之是以古之志士悼年  
齒之流邁而懼名稱之不立故晨興夕寢不遑寧息經之  
以歲月累之以日力若甯越之勤董生之篤漸積德義之  
淵栖遲道藝之域且以西伯之聖姬公之才猶有日昃待  
旦之勞故能隆興周道垂名億載況在臣庶而可以已乎



歷觀古今立功名之士皆勞身苦體契濶勤思平居不墮其業窮困不易其素是以卜式立志于耕牧而黃霸受道於囹圄終有顯榮之福以成不朽之名今世之人不務經術好玩博奕廢事墮業忘寢與食窮日盡明繼之以燭人事曠而不修賓旅闕而不接雖有太牢之饌韶夏之樂不暇存也然其所志不出一枰之上所務不過方罫之間勝敵無封爵之賞獲地無兼土之實技非六藝用非經國立身者不階其術徵選者不由其道求之于戰陳則非孫吳之倫也考之于道藝則非孔氏之門也以變詐爲務則非忠信之事也以刼殺爲名則非仁者之意也而妨日廢業終無所補是何異設木而擊之置石而投之哉宜勉至道



愛惜功名以佐明時使名書史籍勲在盟府乃君子之上  
務當今之急先也夫一木之杵孰與方國之封枯棊三百  
孰與萬人之將假令移博奕之力而用之於詩書是有顏  
閔之志也用之於知計是有良平之思也用之於資貨是  
有猗頓之富也用之於射藝是有將帥之備也如此則功  
名立而鄙賤遠矣後爲黃門侍郎孫亮初諸葛恪表爲太  
史令譏吳書華覈薛瑩皆與參訂孫休時爲中書郎博士  
祭酒休令昭依劉向故事校羣書又欲令侍講而左將軍  
張布近習寵幸憚昭以古今正義正休于己不利固爭不  
可及孫皓入繼封高陵亭侯遷中書僕射職省爲侍中常  
領左國史時所在承旨言祥瑞皓以問昭昭對曰此家人



筐篚中物耳又皓欲爲父和作紀昭執以和不登大位宜  
名爲傳皓愈怒昭益懼自陳衰老求去侍史二官皓不聽  
時有疾病醫藥監護持之愈急皓宴羣臣無不竟日無間  
能否以七升爲限昭素飲不過三升初見優禮常蒙裁減  
或賜茶薺以當酒至其隙開更見偏強輒以爲罪又酒後  
使侍臣難折公卿以嘲弄侵刻發摘私短爲歡或有酒過  
及犯忌諱輒見收繫甚者誅戮昭以爲外相毀傷內長尤  
恨非佳事也故止難問經義言論而已皓以爲違命不忠  
積忿繫之獄昭因獄吏上辭曰世間有古厯注其所載記  
多虛謬尋按傳記考同異采撫耳目所及以作洞紀起自  
庖犧至于秦漢凡三卷當起黃武以來別作一卷事尙未



成又見劉熙所作釋名信佳然物類眾多難得詳究故時  
有得失而爵位之事又有非是愚以官爵今之所急不宜  
乖誤自忘至微又作官職訓及辯釋名各一卷欲表上之  
鈔寫始畢會以無狀幽囚待命泯沒之日謹先死上祕府  
乞垂恩省昭冀以救免而皓更怪其書之垢益以詰責而  
華覈連上疏救曰昔李陵敗降匈奴司馬遷爲陵游說漢  
武以遷有良史之才欲使畢成所譏忍不加誅書卒成立  
垂於無窮今昭於吳亦漢之史遷也所譏吳書雖已有紀  
綱然序贊未述昔班固作漢書文辭典雅後劉珍劉毅等  
作漢記遠不及固敘傳尤劣今吳書當垂千載編次諸史  
後之才士論次善惡非得良材如昭者實不可使闕不朽



之書昭年已七十餘數無幾乞赦一等之罪爲終身徒仍  
成其書傳之百世皓不許竟被誅徙其家零陵子隆亦有  
文學

王蕃

王蕃字永元廬江人博覽載籍爲尚書郎去官孫休時與  
賀正薛瑩虞汜俱爲散騎中常侍竝加駙馬都尉時論清  
之嘗使漢漢廷諸公稱焉還爲夏口監軍孫皓初蕃與樓  
元等爲常侍中書丞陳聲皓之嬖佞數譖毀之蕃氣節俱  
高不能阿旨時時忤意皓以爲恨會丁忠使晉還皓大會  
羣臣蕃沈醉頓伏皓不悅輦致于外俄召入酒未解蕃素  
威重行止自若皓大怒叱左右斬之于殿下衛將軍滕牧

征西將軍畱平爲請不能得時年三十九樓元者字承先  
沛郡蘄人孫皓以爲散騎中常侍累遷大司農時禁中主  
者自用親近爲之或言親密近職宜用士人皓因敕有司  
求忠清之士以充其選遂用元爲宮下督主殿中事元從  
九卿持刀侍衛正身率眾論事切直數忤皓或誣元與賀  
邵相逢駐車耳語大笑謗訕政事遂被詰責徙廣州東觀  
令華覈上疏乞赦元罪責其後效皓疾其名聲復徙元及  
子據付交趾將張奕使以戰自效陰敕奕鳩殺之據至交  
趾病死奕以元賢者不忍加害會奕暴卒元始見其敕書  
遂自殺



華嚴字永先吳郡武進人以文學爲祕府郎遷中書丞孫  
皓初封徐陵亭侯皓營新宮時盛夏興功農守竝廢嚴上  
疏諫曰月令季夏之月不可以興土功不可以起兵動眾  
舉大事必有天殃六月戊己土行正王旣不可犯又農月  
時不可失昔魯隱公夏城中丘春秋書之垂爲後戒今築  
宮爲長世之宏基而犯天地之大禁愚所未安又懼所召  
民役或有未至討之則廢役興事不討則日月滋蔓若悉  
至則大眾聚會鮮無疾病且人心安則念善苦則怨叛江  
南精兵北土所難欲以十卒當東一人天下未定深可憂  
惜如此宮成死叛五千則北軍更增五萬若到萬人則倍  
益十萬病者有死亡之損叛者傳不善之語此大敵所喜

也皓不納遷東觀令領右國史上疏辭讓皓荅曰得表以東觀儒林之府當講校文藝處定疑難漢時皆名學碩儒乃任其職以卿研精墳典博覽多聞當飛翰騁藻光贊時事以越揚班張蔡之儔宜勉修厥職前後陳便宜薦賢能解釋罪愆書累百上皆有補益文多不載後以微譴免數歲卒

### 吾粲

吾粲字孔休吳郡烏程人孫河表爲曲阿丞遷長史治有能名與同郡陸遜卜靜等齊名孫權爲車騎將軍召爲主簿出爲山陰令還爲參軍校尉與呂範賀齊等俱以舟師拒曹休于洞口值天大風諸船縋繼皆斷絕漂着北岸或



遭覆沒其大船尙存水中人皆攀緣號呼他吏士恐船傾覆皆以矛戈撞繫不受粲與黃淵獨令舟人承取之左右以爲船重必敗粲曰船敗當俱死耳人窮奈何棄之活百餘人還遷會稽太守召處士謝譚以疾不詣粲教曰夫應龍以屈伸爲神鳳皇以時鳴爲貴何必隱形于天外潛鱗于重淵者哉拜昭義中郎將與呂岱討平山越入爲屯騎校尉少府遷太子太傅遭孫和孫霸之變抗言執正明庶嫡之分欲使魯王霸出駐夏口遣楊竺不得令在都邑又數以消息語遜遜時駐武昌連表諍諫由此爲霸竺等所譖害下獄死同郡朱據者字子範風姿秀偉膂力過人精于論難章武中補侍御史時選曹尙書暨豔疾貪污在位



欲沙汰之據謂天下未定宜以功掩過棄瑕錄用舉清厲  
濁足以沮勸若一時貶黜懼有後患豔不聽卒敗權追思  
呂蒙張溫以爲據才兼文武可以繼之由是拜建義校尉  
領兵屯湖熟權以女妻之拜左將軍封雲陽侯謙虛禮士  
輕財好施建興末始鑄大錢一當五百據部曲應受三萬  
緡工王遂詐而受之典校呂乙疑據實取考問主者死于  
杖下據哀其無辜厚棺斂之乙又表據吏爲據隱故厚其  
斂權數責之據無以自明藉草待罪數月典軍吏劉自覺  
之言王遂所取權大感悟曰朱據見枉況吏民乎乃窮治  
乙罪賞助百萬延熙九年遷驃騎將軍遭二宮之變擁護  
太子言則懇至義形于色守之以死左遷新都郡丞未到



中書令孫宏譖之因權寢疾矯詔賜死二子熊損孫亮時爲全琮妻孫氏所譖皆遇害

滕允

滕允字承嗣北海劇人伯父耽父胄與劉繇同州里遭亂渡江依繇繇敗歸孫氏時孫權爲車騎將軍拜耽右司馬以寬厚稱胄善屬文權待以賓禮軍國書疏賞令損益潤色之不幸早卒權稱吳王追錄舊恩封允爲都亭侯允有節操美風儀權以女妻之年三十起爲丹陽太守徙吳郡會稽所在見稱每聽訟察言觀色務盡情理權寢疾徵爲太常與諸葛恪等受遺輔政孫亮初加衛將軍恪將悉眾伐魏允諫曰君受伊霍之託入安本朝出摧強敵天下莫



不震動萬姓之心冀蒙君而休息今以勞役之後興師出  
眾民疲力屈遠主有備若攻城不克埜略無獲是喪前勞  
而招後責也不如按甲息兵觀時而動且兵者大事事以  
眾濟苟眾不悅君獨安之恪不以爲然以允爲都下督統  
留都事允晝接賓客夜省文書或通宵不寐孫峻旣害恪  
進允爵高密侯峻雖與允內不相悅而外相優容峻卒以  
軍國事付其從弟綝呂據聞之大怒與諸督將連名薦允  
爲丞相綝更以允爲大司馬代呂岱鎮武昌據引兵還使  
人報允欲共廢綝綝聞之遣兄慮以兵逆據復遣華融丁  
晏告允取據并喻允宜速去允自以禍將及因畱融晏勸  
兵自衛綝表言允反使將軍劉承率兵圍之允笑談自若



或勸允引兵至蒼龍門將士見公出必委絺就公時夜半  
允與據期又難舉兵向宮乃令部曲說呂侯已在近道故  
皆爲允盡死無離散者比曉據不至絺兵大合遂遇害夷  
其族將士死者數十人後絺伏誅孫休令具禮改葬  
贊曰易曰天地閉賢人隱當孫曹割據時天地之否極矣  
而一時之士不能高舉遠引或以猜忌斥或以忠諫死其  
不免十八九亦其有以自取之也悲夫

續後漢書卷第三十三上

糸衣海三  
卷三三三  
三

糸衣海三  
卷三三三  
三



續後漢書卷第三十三下

上海郁松年原本

宋廬陵蕭常著

邑後學

胡芳秋杜邦浚

校梓

吳載記第十一下

趙咨

趙咨字德度南陽人博聞強識有專對才累遷中大夫權使使于曹丕丕善之曰吳王頗知學乎咨曰吳王浮江萬艘帶甲百萬任賢使能志在經略時有餘閒博覽經傳採拾精華不效書生尋章摘句而已丕曰吳可征乎對曰大國有征伐之兵小國有備禦之固又曰吳難魏否對曰帶甲百萬江漢爲池何難之有又曰吳如大夫者幾人對曰聰明特達入九十人如臣者車載斗量不可勝計又曰吳

王何等主也對曰聰明仁智雄略之主丕問其故曰納肅  
于凡品是其聰也拔蒙于行陣是其明也獲于禁而不害  
是其仁也取荊州而兵不血刃是其智也據三州虎視天  
下是其雄也屈身于大國是其略也不奇其對權聞而嘉  
之拜騎都尉咨曰觀北方終不能守盟今日之計朝廷承  
漢四百之際應東南之運宜改年號正服色以應天順民  
權納之

沈珩

沈珩字仲山吳郡人少綜經籍尤善春秋內外傳權以珩  
有專對才乃遣使于曹丕丕謂曰吳嫌魏東向乎對曰不  
嫌丕曰何也對曰信恃舊盟言歸于好是以不嫌若魏淪



盟亦自有豫備又問聞太子當來信然乎對曰臣在東朝  
朝不坐宴不與若此之語所未聞也不善乃引珩自近談  
笑竟日珩隨事應荅無所屈滯珩還言于權曰臣聞侍中  
劉睦數爲賊盡計終不保其能久臣聞兵家舊論不恃敵  
之不我犯恃我之不犯敵也今爲朝廷慮且當省息他役  
惟務農桑以廣軍實繕治舟車增作戰備撫養民兵使各  
得所尊延英雋獎厲將士則天下可圖矣以奉使稱旨封  
永安鄉侯官至少府

鄭泉

鄭泉字文淵陳郡人博學有大志孫權以爲郎中嘗謂曰  
卿好眾中面諫或失禮敬寧畏龍鱗乎對曰臣聞君明臣



直今遭不諱之朝實恃洪恩不畏龍鱗後侍宴權欲怖之  
使捉出付有司趣治罪泉臨出屢顧權呼笑曰卿言不畏  
龍鱗何爲出而屢反顧乎曰雖恃恩覆知無所憂至當出  
閣感惟威靈不能不顧耳使聘于漢帝問曰吳王何以不  
荅吾書得無以吾正名不宜乎泉曰曹操父子陵轢漢室  
終篡其位陛下以宗室之親有維城之固不荷戈執殳爲  
海內率先而于是自名未合天下之正義是以寡君不能  
復書耳性嗜酒每曰願得美酒五百斛四時甘味置兩頭  
反覆飲之懣卽止而啖肴核酒有斗升減隨卽益之不亦  
快乎臨卒謂所親曰必葬我陶家之側庶百歲之後化而  
成土幸見取爲酒壺實獲我心



馮熙

馮熙字子柔潁川人異之後也孫權爲車騎將軍拜東曹掾遷立信都尉昭烈皇帝崩使熙聘弔還爲中大夫後使于曹丕丕曰吳王若欲修宿好何爲復遣使于漢熙曰西使直報問耳非有他謀又曰聞吳國比年災旱人物雕瘁以大夫之明觀之何如對曰吳王性識聰明善于任使賦政施役每事必咨敬禮賓旅親賢愛士賞不釋怨仇罰必加有罪臣下感恩懷德惟忠與義帶甲百萬積粟如山稻田沃野民無饑歲所謂金城湯池富強之國也以臣觀之輕重之分未可量也不悅以陳羣與熙同郡使誘之陷以重利熙不爲回送至摩陂欲困苦之後又召還未至熙



懼見逼不從則危身辱命乃引刀自刺御者覺之得不死  
權聞之垂涕曰此與蘇武何異竟死于雒陽

### 陳化

陳化字元耀汝南人博覽羣書氣質剛毅長七尺九寸雅  
有威重爲郎中令使于曹丕丕宴之謂吳魏峙立誰當平  
一字內者乎化曰易稱帝出乎震竊聞先哲知命舊說黃  
旗紫蓋運在東南丕曰昔文王以西伯王天下豈復在東  
化曰周之初基泰伯在東是以文王興于西丕笑而無以  
應心善其對使畢當還禮遺甚腆權以化使命光國除尙  
書令頃之遷太常復兼尙書令正色立朝敕子弟廢田業  
勿治產仰官稟祿不與百姓爭利妻早卒以古事爲鑑不



復娶權聞而貴之以其年壯敕宗正妻以宗女化以疾力辭權不違其志年踰七十上疏乞骸骨遂家于章安卒長子熾字公熙少有志操全琮表稱任大將軍被召道卒

### 李衡

李衡字叔平本襄陽兵家子避亂渡江占籍武昌聞羊衡有知人之鑑往見之衡曰多事之世尙書郎曹郎才也時校事呂乙竊弄威柄大臣畏偏莫敢有言衡曰非李衡無能困之遂共薦爲郎權引見衡口陳乙姦利數千言權有愧色無幾乙敗而衡大見用後爲諸葛恪司馬恪死出爲丹陽太守先是孫休在郡衡至數以法繩之妻習每諫之衡不從曾休立衡憂懼謂其妻曰不用卿言以至于此欲



奔雒陽妻曰不可君本庶民耳先帝相拔過重旣數加無  
禮于瑯琊王而復逆自猜嫌逃叛求活以此北歸何面目  
見士大夫乎衡曰計將安出妻曰王素好善慕名方欲自  
顯于天下終不以私嫌殺君可自囚于獄表列前失竝求  
受罪如此乃當還見優饒非直活而已衡從之休聞之曰  
衡以往事之嫌自拘有司夫射鈞斬祛在君爲君其遣衡  
還郡勿令自疑尋加威遠將軍授以榮戟衡每欲治產業  
妻輒不聽後密遣客十人于武陵龍陽洲上作宅種柑橘  
千株臨終敕其子曰汝母惡我治家故窮如是吾州里有  
千頭木奴不責汝衣食歲得一匹絹亦可足用旣卒其子  
以白其母母曰此當是種柑橘也汝家失十戶客七八年



矣必汝父遣爲宅汝父常稱太史公言江陵千樹橘當封君家吾荅曰人患無德義不患不富若貴而能貧方好耳用此何爲吳末甘橘皆成歲得絹數千匹家道益饒云時有谷利者亦起于微賤少給事權左右建安二年合肥之役師還權乘駿馬在津橋北追兵卒至橋南已徹丈餘利使權持鞍緩轡利于後着鞭以助馬勢遂得超渡權旣免德之封都亭侯利以謹直親近性忠果明亮言不苟且權甚愛信之權嘗于武昌造大船成名曰長安試泛之于釣臺泝時風猛甚利令柁工趨樊口權曰當趨羅州利拔刀向柁工曰不趨樊口者斬工卽轉柁入樊風愈猛不可行遂還權曰阿利何怯也利跪曰大王萬乘之主輕于不測

之淵戲猛浪之中船樓裝高假或危顛奈社稷何是以利  
輒敢以死爭權自是益貴重之常呼爲谷而不名

贊曰谷珩泉化爲主將命使事無闕所謂正固足以幹事  
衡勇于摧姦利敢以弼違而陳壽皆不爲之傳至于曹氏  
之黨如華歆之弑逆賈詡之殘鷙國淵之禍賊爲之委曲  
覆護而妄譽其抑揚之際顧不謬哉

續後漢書卷第三十三下



續後漢書卷第三十四

上海郁松年原本

宋廬陵蕭常著

邑後學

胡芳秋校梓  
杜邦浚

魏載記第一

或謂常曰子之不與魏以禪者何曰禪名也有其實而名隨之實不至而強與之名其可哉曹氏代漢以篡而特假禪之名以文之耳有識君子固嘗切齒且著論以非之矣而世俗之人惑于偏見或以禪之名歸之也禮蹴路馬芻有誅孔子惜衛以繁纓假人蹴芻細故也繁纓微物也聖人必嚴爲之辭者謂其漸不可長且爲後世慮也曹氏代漢之心非一日也始殺其賢者次及其大臣次及其宗族其後弑及主后與其皇子始而九錫之請繼而旄頭鐘虡



又繼而出警入蹕其後冕有十二旒而繁陽之臺築矣山陽之號加矣元惡雖斃狂童嗣逆釁積于人存事成于身後良有以也蹴芻之誅繁纓之惜聖人慮後世若是之深易曰履霜堅冰至其漸非一日之積也嘗讀史至獻帝垂恩相舍之言命在何時之語使人氣拂膺者累日是可以禪之名與之乎或又謂晉宋齊梁之相代皆是篡也或者且以正統歸之子獨于曹氏靳者何也曰不然晉宋齊梁之亡民心無所繫則凡君我者非正統所存乎曹氏之篡昭烈固無恙也漢氏未殄民心未解曹氏旣以禪自名或者又欲以正統歸之其忍哉或又謂孫權之與曹操無大相遇子之書嚴于責操而恕于待權者何曰春秋誅首惡



操其始禍者也權之初本以誅操復漢爲辭魏旣僭號自顧力不能討而恥居其下姑自王以夸示其國人耳其本心或不爾也要必有能辨之者

### 曹操

曹操字孟德小字阿瞞沛國譙人祖騰安帝時爲黃門從官順帝在東宮鄧太后使騰侍書及帝卽位遷中常侍帝崩無子太尉李固大鴻臚杜喬等以清河王蒜賢明而于屬最親欲立之而大將軍梁冀忌其賢且長恐不爲己利時冀吾侯志在京師又娶冀妹欲立志而眾議又附固等冀憤恨不知所出騰與其黨夜往說冀曰將軍秉攝樞機賓客縱橫多過失清河王賢明果立則將軍變禍不久矣



不如立蠡吾侯富貴可長保也冀然其言奮怒立蠡吾侯  
是爲桓帝帝立以騰有定策功封費亭侯遷大長秋加特  
進騰用事凡三十年勢燄熏炙蜀郡太守因計吏納賄于  
騰益州刺史种暘發其姦因以劾騰帝不省父嵩不知所  
出或云夏侯氏子騰勾養焉靈帝時襲父封遷大司農密  
賂中官及輸西園錢一億萬驟進太尉避亂瑯邪爲陶謙  
麾下所殺操少機警有權數而任俠放蕩常私入中常侍  
張讓家讓覺之踰垣而走汝南許劭名知人操詣劭求爲  
已目劭鄙之不荅乃以他事脅之劭不得已曰君清平之  
姦賊亂世之英雄操大說舉孝廉爲郎除洛陽北部尉繕  
治四門造五色棒懸門各十餘有犯禁者皆棒殺之遷頓



上令召拜議郎除濟南相遷典軍校尉董卓之亂乃變姓名東歸道過故人呂伯奢會伯奢出其子爲具觴客操聞其食器聲以爲圖已手劍夜殺八人旣而曰寧我負人無人負我是歲至陳畱合義兵將以討卓中平六年也初平元年袁術韓馥等義兵起推袁紹爲盟主操行奮武將軍卓聞兵起挾天子遷長安卓畱屯洛陽操至滎陽汴水與卓將徐榮戰不利夜遁二年夏卓還長安操引兵入東郡三年王允誅卓卓將李傕郭汜等殺允專政青州黃巾入兗州殺刺史劉岱濟北相鮑信等率州吏迎操爲兗州牧收其精銳遂破黃巾降之號青州兵四年引兵攻陶謙復父嵩之怨破彭城傅揚拔取慮睢陵夏丘皆屠之凡殺男



女數十萬人泗水爲之不流自是五縣城堡無復行迹初三輔遭李傕之亂百姓流離依謙者熾焉興平元年復擊謙略地至東海所過多所殘賊會張邈與陳宮迎呂布郡縣多應之荀彧程昱保鄆城范東阿二縣固守操進兵攻布布先以騎犯青州兵陣亂操隊馬傷左手二年敗布東緡分兵平諸縣布東奔冬操自爲兗州牧是歲長安亂天子東遷建安元年荀彧爲操謀迎天子挾之以令天下夏六月車駕至操自爲鎮東將軍襲費亭侯秋車駕還洛陽操自領司隸校尉錄尚書事殺侍中趙忠尚書馮碩等以其不附已也九月以帝遷都于許矯詔拜司空行車騎將軍百官總已以聽又自進封武平侯是歲韓浩議始興屯



曰于許下二年春操至宛張繡降操納其族父張濟妻繡  
恨之乃以兵襲操操敗爲流矢所中長子昂弟子安民皆  
死遂去無陰繡來追操擊破之繡奔穰與劉表合操語其  
下曰吾降繡失不取其質以至于此所以敗也三年春操  
還許置軍師祭酒十月攻呂布于下邳殺之四年春與張  
楊將眭固戰于犬城大破之殺固還軍敖倉以魏种爲河  
內太守屬以河北事初操舉种孝廉及兖州叛操曰惟魏  
种不棄孤也後聞种走大怒曰种不南走越北走胡不置  
汝也旣下射犬生擒之曰惟其才也釋縛而用之大將軍  
袁紹憤操劫制天子帥師征之移檄州郡紹遂進兵攻許  
操分兵守官渡五年春車騎將軍董承偏將軍王服校尉



种輯受帝密詔誅操事泄操殺承等夷其族操與袁紹相持于官渡兵不滿萬眾寡不敵欲還許荀彧以爲紹能聚人而不能用公挾天子以制天下何往不利操從之與紹相拒連月然眾少糧盡士卒罷乏操謂運者曰卻十五日爲汝破紹不復勞汝矣冬紹遣車運穀使淳于瓊等將兵衛之會紹謀士許攸奔操說操襲擊瓊斬之紹軍因大潰紹及子譚棄軍去盡亡其眾操得許下及軍中人書皆焚之六年南攻昭烈昭烈往從劉表于荊州七年春操軍譙袁紹卒操攻紹子譚尙皆遁八年秋操令曰喪亂以來後生不見仁義禮遜之風其令郡國各修文學縣滿五百戶置校官九年袁譚袁尙相攻操往救譚攻尙尙走中山遂



定鄴臨祀紹墓哭之流涕操之圍鄴譚略取安平甘陵渤海河間十年廢齊北海阜陵下邳常山甘陵濟陰平原八王除其國將攻三郡烏桓鑿平虜泉州二渠以通海運十二年伐烏桓海道不通用田疇計出盧龍塞東趨柳城斬遼西單于蹋頓及名王以下胡漢降者二十餘萬口遼東單于等與袁尙袁熙奔遼東九月遼東太守公孫康卽斬尙熙及速僕丸等傳其首十三年作元武池以肄舟師罷三公官操自爲丞相殺太中大夫孔融夷其族南攻劉表會表卒子琮降時昭烈在荊州聞操至走夏口使諸葛亮結孫權拒操權遣其將周瑜等水軍數萬會昭烈十二月昭烈率吳師與操戰于赤壁操大敗昭烈與吳師水陸俱



進追至南郡操軍復飢疫死者大半留曹仁等守江陵孫  
權攻合肥十四年仁爲周瑜所圍死傷甚眾仁棄城走于  
是盡失荊州秋操以水軍自渦入淮出肥水軍合肥十二  
月還譙十五年作銅雀臺于鄴十六年自以其子丕爲五  
官中郎將置官屬爲丞相副秋西攻馬超破之十七年矯  
天子之命命已贊拜不名入朝不趨劍履上殿殺尙書令  
荀彧十八年夏使漢御史大夫郗慮矯詔策已爲魏國公  
封十郡加賜九錫董昭之謀也始建魏社稷以三女爲漢  
帝貴人作金虎臺十九年春耕籍田安定太守母丘興將  
之官操戒之曰羌胡欲與中國通自當遣使來切勿遣人  
往善人難得必將教羌胡妄有請求因欲以自利不從便



爲失異俗之意從之則無益于事興至郡遣校尉范陵至  
羌中陵因教羌使請已爲屬國都尉操曰吾預知當爾非  
聖也但更事多耳又矯命命己在諸侯王上改金璽赤紱  
秋征孫權不利而還自帝都許守位而已宿衛兵侍皆曹  
氏之人議郎趙彥之死人尤岌岌朝不謀夕操嘗以事至  
殿中帝不任其憤因曰君能相輔則幸甚不爾幸垂恩相  
舍操失色俛仰求出舊儀三公領兵朝見令虎賁執刀挾  
之操出顧左右汗流浹背自是不敢復朝請初董承女爲  
帝貴人有姦累請不能得自是皇后伏氏懷懼因與父完  
書言操殘逼之狀令密圖之完不敢發至是事泄大怒遂  
逼帝廢后帝不從乃使御史大夫郗慮尙書令華歆勒兵



入宮弒后死者數百人并弒二皇子十二月又矯詔命已  
置旄頭宮殿設鐘簴二十年以其女爲帝后西攻張魯至  
陽平魯眾潰奔巴中操軍入南鄭孫權帥師圍合肥操又  
矯詔命已承制封拜諸侯守相始置名號侯關中侯關外  
侯五大夫與舊列侯關內侯凡六等以賞戰功十一月張  
魯降丞相主簿司馬懿言于操曰劉元德新得益州人心  
未附而遠爭江陵此機不可失也今克漢中益州震動以  
兵臨之勢必瓦解聖人不能爲時亦不可失時操不從曰  
人苦不知足旣得隴復望蜀耶昭烈取巴中操使夏侯淵  
張郃等屯漢中十二月操自南鄭還郃等侵巴界昭烈遣  
其將張飛與郃戰于瓦口郃等大敗二十一年夏自進爵



爲王又自命己女稱公主以鍾繇爲魏相國秋殺瑯邪王  
熙冬攻孫權至譙二十二年進屯江西郝溪權于濡須拒  
之三月軍還留夏侯惇曹仁張遼等屯居巢夏矯詔命己  
設天子旌旗入蹕出警作泮宮以軍師華歆爲御史大夫  
冬復矯命己冕十二旒乘金根車駕六馬設五時副車又  
自以子丕爲魏太子二十三年春漢太醫令吉本與少府  
耿紀司直韋晃京兆金禕等以家世仕漢憤操竊國謀起  
義兵迎天子以誅操南援昭烈以圖興復時操在鄴留長  
史王必典兵許下本第邈帥家僮千餘夜燒門攻必必傷  
會天明眾散本等皆遇害紀臨刑呼曰逆賊曹操恨吾不  
自行竟爲羣兒所悞必尋以劊死召漢百官詣鄴令救火



者左不救火者右眾以救火者必無罪皆附左操以不救火者非助亂救火者乃附惡者皆殺之夏遣其子彰討代郡烏丸破之二十四年昭烈大破夏侯淵于陽平臨陣殺淵操自長安出斜谷抵漢中遂至陽平昭烈使諸將守險不戰以困操軍操軍士亡者日益多昭烈遣其將趙雲擊操操軍大敗墜漢水死者不計其數操懼遂拔餘軍走長安于是盡失巴漢地初操欲還不敢自言乃下令曰雞肋官屬不知所謂主簿楊脩便嚴裝人驚問脩曰夫雞肋食之無味棄之可惜以此知其欲還也秋操自以其妻卞氏爲王后遣于禁等七軍凡數萬人助曹仁拒關羽于樊盡爲羽所殺生擒禁等遂圍仁遣徐晃等救之九月其相國



西曹掾魏諷憤操欲篡漢與長樂衛尉陳禕等謀誅之事  
泄爲操所殺死者數十人冬操軍摩陂爲曹仁徐晃等援  
二十五年正月操自摩陂至洛陽死時年六十六操御軍  
三十年手不廢書嘗著兵書十餘萬言諸將攻戰皆以新  
書從事又注孫武兵書性猜忌諸將計畫出已右者必以  
法誅之故人舊怨必報無餘其所刑殺輒對之流涕終不  
少貸沛相袁忠沛國桓邵陳畱邊讓等或以公事或以語  
言過失皆族其家有幸姬侍晝寢枕之臥告須臾覺我姬  
見其臥安未卽覺及寤棒殺之嘗對敵廩穀不足私謂主  
者曰奈何主者曰可小斛以足之操曰善後軍中言欺其  
眾乃謂主者曰要當借君死以厭眾遂斬之取其首徇曰



行小斛盜官穀其慘酷機變皆此類也不纂漢僞諡武皇帝

贊曰閹寺之禍尙矣然未有竊人之國而代之者也夫以趙高之亂姦鋒逆鋏若不可挫而滅者曾未旋踵而身伏鉄質蓋天下之重豈容刀鋸餘醜劫而有哉予觀曹騰之事竊悲東京之禍有自來矣方李固之欲立清河也權臣雖恣睢而理有所奪意若少沮及騰之說一入則虎視鸚張無所顧忌而蠡吾侯立矣自是皇綱解紐騰愈得志大權在己植本益固而其養子至位據鼎司富埒帝室操遂因之弑后幽主窮凶極惡毒流天下卒移漢祚自古閹寺之禍莫慘于此一時義士皆欲挫而滅之而婁興丞仆蓋



其假大義以欺世盜國既久人爲之用而不知有漢勢固然也易曰履霜堅冰至其所由來者漸矣可不戒哉

### 曹丕

曹丕字子桓其母卞氏倡也建安十六年操當國以爲五官中郎將副丞相操稱魏王立爲王太子二十五年操死代爲丞相以賈詡爲太尉華歆爲相國王朗爲御史大夫夏侯惇爲大將軍其宦人爲官者不得過諸署令三月改元延康丕欲篡懼天下豪傑舉兵見討乃使其黨諷漢羣臣逼帝禪已其侍中劉廙辛毗劉曄桓階陳矯陳羣等爭陳符命勸進丕陽不敢當十月辛未僭卽尊位于繁陽改元黃初大赦禮畢顧謂其黨曰舜禹之事吾知之矣以漢



帝爲山陽公十二月營洛陽宮因遷居焉丕自爲詔賜其  
征南將軍夏侯尚曰卿腹心重將特當任使作威作福殺  
人活人會其中郎將蔣濟自外至丕問以所聞見對曰未  
有他善但聞亡國之語耳丕忿然作色而問其故濟具以  
告丕卽遣人追取其詔其長水校尉戴陵諫不宜弋獵丕  
大怒抵陵罪減死一等章武元年春丕郊祀天地改許縣  
爲許昌縣以魏郡東部爲陽平郡西部爲廣平郡以議郎  
孔羨爲宗聖侯奉孔子祠初復五銖錢夏四月昭烈卽皇  
帝位于成都改元章武丕殺其妻甄氏秋孫權遣使通好  
以漢太尉楊彪爲光祿大夫初彪以曹氏竊國自以累世  
爲漢三公恥事之稱足彎不能行及是丕使人強起之策



凌雲臺二年初令選士不限年秋冀州大饑九月自許昌  
南攻孫權無功而還權遣將追斬丕將尹盧等穿靈芝池  
建興元年春築南巡臺于宛夏四月昭烈崩皇太子卽位  
改元二年夏立太學八月爲水軍泛龍舟循蔡潁浮淮遂  
至廣陵望大江歎曰魏雖有武士千羣無所用之乃還三  
年八月以舟師自譙循渦入淮從陸道至徐築東巡臺冬  
至廣陵故城臨江觀兵大寒水冰舟不得入江丕望波濤  
洶湧歎曰嗟乎此天之所以限南北也四年春至許昌城  
南門無故自壞丕心惡之不果入還洛陽築九華臺五月  
丕疾篤召其中軍大將軍曹真鎮軍大將軍陳羣征東大  
將軍曹休撫軍大將軍司馬懿輔其子叡是月丕死時年

四十僞諡文帝丕好學所著述垂百篇又使諸儒選集經傳隨類相從凡千餘篇名曰皇覽嘗嘉漢文帝寬仁有賢聖之風諸儒或以爲漢文雖賢通達國體不如賈誼由是著太宗論謂賈誼之才敏籌畫國政特賢臣之器管晏之姿豈若孝文大人之量哉蓋欲以孝文自況疾其臣勝已也故有此作初丕得立爲太子抱辛毗頸而喜曰辛君知我喜否毗歸以告其女憲英憲英者有高識歎曰太子代君主宗廟社稷者也代君不可以不戚主國不可以不懼宜戚而喜何以能久曹氏其不昌乎

曹叡

曹叡字元仲丕死嗣僞位以鍾繇爲太傅華歆爲太尉王



郤爲司徒陳羣爲司空司馬懿爲驃騎大將軍明年改  
元太建興五年二月耕籍田行五銖錢初營宗廟六年  
春分新城之上庸武靈巫縣爲上庸郡錫縣爲錫郡漢丞  
相亮以王師來討天水南安安定三郡皆應之遣曹真張  
郃等拒王師秋曹休帥眾侵吳至石亭大爲吳陸遜所敗  
俘斬數萬人十二月丞相亮復來討圍陳倉斬將王雙遣  
曹真等拒王師七年冬改平望觀爲聽訟觀八年以其父  
丕典論刻石於廟門之外秋遣曹真司馬懿等犯漢中九  
月伊洛溢真等聞王師起乃遁是歲作合肥新城九年春  
丞相亮復以王師來討攻天水郡使司馬懿張郃拒王師  
亮與郃戰于青封殺之懿等遁還十年秋至摩陂作許昌



宮起景福承光殿十一年春以龍見摩陂井中改元青龍  
名摩陂爲龍陂遣將軍蘇尙董弼等攻鮮卑軻比能六將  
皆殘孫權攻合肥新城十二年三月漢獻帝崩夏丞相亮  
以王師來討出斜谷屯渭南使司馬懿拒王師五月孫權  
入居巢湖口向合肥新城又遣其將軍陸遜孫韶入淮沔  
九月丞相亮薨于渭南十三年大治洛陽宮起昭陽太極  
殿築總章觀百姓失農時叡性慘急有稽程者每親詰問  
言未絕口身首已分其臣下皆切諫不聽鑿陂池于芳林  
園中于列殿之北立八坊令宮人以次處其中凡數千人  
畝荒于酒色罕居前殿乃選女子知書者六人爲女尙書  
使典省外奏事處當畫可畱意玩飾賜予無度帑藏匱竭



又奪士女前已嫁爲吏民妻者還以配戰士旣聽以生口  
自贖又選有姿色者內之掖庭改崇華殿爲九華龍殿十  
四年制崇文觀肅慎氏貢楮矢十五年三月改元景初以  
建丑之月爲正改太和厯曰景初厯五月有司奏以祖操  
爲太祖父不爲高祖叡爲烈祖識者知其預凶事省錫郡  
秋孫權遣其將朱然圍江夏冬營洛陽南委粟山爲圍丘  
延熙元年春司馬懿攻遼東夏置汝陰郡二年正月叡死  
時年三十六遺令以曹爽司馬懿輔其子芳僞諡明帝

曹芳

曹芳字蘭卿叡無子養以爲子莫知其所從來初封齊王  
叡死嗣僞位以司馬懿爲太傅都督諸軍事復以建寅之



月爲正明年芳改元正始延熙三年銷御府金銀雜物以  
充軍用四年春以太牢祀孔子以顏回配夏孫權使其將  
朱然等圍襄陽之樊城使司馬懿拒之七年春使曹爽夏  
侯元寇漢中天子遣大將軍費禕禦之爽等遁去九年冬  
以太牢祀孔子十年分河東之汾北十縣置平陽郡十二  
年謁其父叡墓司馬懿與曹爽爭權殺爽及其弟羲訓尙  
書丁謐何晏鄧颺桓範等皆夷其族自是大權歸于懿父  
子芳應虛位而已夏四月改元嘉平十三年王昶襲敗孫  
權將施績于江陵十四年王凌憤司馬懿欲誅之不克司  
馬懿死其子師自爲撫軍大將軍錄尙書事十五年冬王  
昶胡遵母丘儉等攻孫亮諸葛恪大敗之于東關死者數



萬十六年夏諸葛恪圍合肥新城十七年秋司馬師廢芳而立髦時年二十三

曹髦

曹髦字彥士丕之孫霖之子也初封高貴鄉公司馬師既廢芳立之改元正元十八年母丘儉文欽等憤師專政起兵討之不克欽奔江南儉死之司馬師死以弟昭爲大將軍秋漢大將軍姜維以王師來討攻狄道雍州刺史王經與王經戰于洮西經等大敗死者萬計十九年夏諸葛誕等懷司馬昭盜國起兵討之不克景耀三年夏髦見威權日去不勝其憤乃召其侍中王沈王經王業語之曰司馬昭之心路人所知也吾不能坐受廢辱今日當與卿等討

之王經以爲未可而沈業馳告昭髦帥殿中宿衛蒼頭官  
僮出雲龍門昭黨賈充令帳下督成濟以戈弑髦于車中  
時年二十昭矯曹叡妻郭氏令追廢之

曹奐

曹奐字景明操孫宇之子也初名璜封常道鄉公司馬昭  
既弑髦迎奐立之改元景元六年冬漢亡奐以其僞位遜  
昭之子炎是爲晉武帝奐遷于金墉城時年二十自丕篡  
逆至是凡四十六年

贊曰操父子以鼠竊狗盜之知窺攘神器術窮力殫僅乃  
得之自以爲子孫無窮之業而不知三馬闖然已躡其後  
矣丕庸叡凶芳幽髦弑改移私家卒以不祀傳有之君以



此始亦以此終孰謂天理爲不明

續後漢書卷第三十四

續後漢書

卷第三十四

古





續後漢書卷第三十五

上海郁松年原本

宋廬陵蕭 常著

邑後學

胡芳秋杜邦浚

校梓

魏載記第二

曹彰

曹彰字子文操子也少善射膂力絕人志氣慷慨操嘗抑之曰汝不讀書慕聖道好乘馬擊劒此一夫之勇何足貴也操彰讀書彰謂左右曰大丈夫將十萬騎馳沙漠驅戎狄立功建號耳何能讀書作博士耶建安二十三年代郡烏桓擾邊以爲北中郎將討之操戒曰居家爲父子受事爲君臣動以王法從事女其戒之彰至涿郡大破烏桓軍還歸功諸將操喜拊其鬚曰黃鬚兒竟大奇也不纂漢以

爲任城王建興初卒

曹植

曹植字子建年十歲善屬文操見之謂曰汝倩人耶植曰  
言出爲論下筆成章願當面試何以倩人銅雀臺成操使  
諸子賦之植援筆立就操甚異之建安十六年封平原侯  
十九年徙封臨淄操攻孫權使畱守鄴而丁儀丁廙楊脩  
等爲之羽翼幾代丕者數矣然率意而行飲酒無度不矯  
情自飾左右竝爲之游說故遂定爲嗣二十四年曹仁爲  
關羽所困操以植爲南中郎將欲遣佐仁呼植有所戒飭  
醉不能受命遂罷之丕旣受命殺丁儀丁廙有司希旨言  
植醉酒悖慢請治罪貶安鄉侯改封鄴城尋進爵爲王明



年徙封雍丘上疏稱謝獻詩二篇丕嘉其文又嘗上疏求  
自試曹叡時徙封東阿又徙封陳畱冀試用終不能得悵  
然絕望時法制旣嚴僚屬皆賈豎下材所給使令又皆老  
疾十一年中凡三徙國鬱鬱發病死時年四十一諡曰思

曹沖

曹沖字倉舒丕之異母弟也孫權嘗致巨象操欲知其輕  
重訪之僚屬皆不能對沖時五六歲曰置象于大舟而刻  
其水痕稱他物以載之則輕重可知矣操大悅時操所乘  
馬鞍爲鼠所齧庫吏懼必死沖教以後三日可自歸乃以  
刀穿其單衣如鼠齧者謬爲失意有憂色操問之沖曰世  
謂鼠齧衣者其主不吉今單衣見齧是以憂操曰此妄言

耳無傷也俄而庫吏以齧鞍聞操笑曰兒衣在側尙齧沈  
馬鞍乎一無所問其機警皆類此操性殘暴嗜殺沖從旁  
微爲辨析賴以全活者爲多年十三卒操哀甚丕每寬慰  
操曰此我之不幸汝曹之大幸也

曹仁

曹仁字子孝操從弟也爲別部司馬天子都許操以仁數  
有戰功遷廣陽太守不之郡操旣取河北圍壺關令曰城  
拔皆坑之連月不下仁曰圍城必示之活門所以開其生  
路也今吾告之必死人將自爲守頓兵堅城之下攻必死  
之敵非良計也操從之城降以功封都亭侯從操取荊州  
畱屯江陵孫權將周瑜來攻仁力屈遁還尋行征南將軍



屯樊關羽攻樊遣于禁等救之時漢水暴溢禁等七軍皆降羽羽圍城數重外內斷絕糧且盡仁激厲將士會徐晃救至圍解曹丕募漢封陳侯拜大將軍移屯臨潁遷大司馬復督諸軍屯合肥建興元年卒

曹洪

曹洪字子廉亦操從弟操爲董卓將徐榮所敗失馬賊追急洪以馬授操俱去還譙丕僭位遷驃騎將軍封野王侯始洪家富而吝嗇丕少時有所假求不如所欲深恨之至是以客犯法下獄當死羣臣救之不能得丕母謂丕妻郭氏曰曹洪今日死吾明日敕丕廢汝于是泣請于丕乃得免削爵放歸曹叡初爲後將軍徙封樂城卒



曹休

曹休字文烈操族子也操嘗曰此吾家千里駒待之加子  
昭烈遣將軍吳蘭等屯下辨操遣曹洪攻之以休參洪軍  
事昭烈遣張飛屯固山欲斷軍後眾方狐疑休曰彼實斷  
道當伏軍潛行先張聲勢此其不能也宜及其未集急擊  
蘭蘭破則飛自卻矣洪從之飛引去操拔漢中諸軍還長  
安拜中領軍丕篡漢累封安陽鄉侯遷征東大將軍擊吳  
將呂範于洞浦破之曹叅初徙封長平遷大司馬都督揚  
州孫權使其鄱陽太守周魴誘休休以軍十萬深入大爲  
陸遜所破棄甲兵輜重不可勝計因憤惋疽發背死

曹真



曹真字子丹操之族子父邵操起兵時爲州郡所殺操哀其孤收養與諸子同嘗獵爲虎所逐顧射虎應弦而斃操壯其勇使將虎豹騎時夏侯淵戰沒於陽平操憂之以真督徐晃等拒昭烈別將高詳于陽平操自至漢中援出諸軍使真至武都援曹洪等還屯陳倉丕篡漢累遷上軍大將軍封東鄉侯與夏侯尚攻孫權至于牛渚丕死與陳羣司馬懿等輔曹叡進封邵陵遷大將軍漢丞相攻祁山真與張郃等敗漢將馬謖真以亮懲祁山之役他日來攻必于陳倉乃使郝昭守之明年亮果圍陳倉以有備而還遷大司馬數請兵寇漢中叡從之建興八年秋真發長安從子午道入司馬懿泝漢水當會南鄭別將或從斜谷進或



從武威入會大雨三十餘日棧道斷絕且聞漢師起乃遁  
還明年卒子爽嗣

爽字昭伯累遷武衛將軍曹叡病引爽入卧內拜大將軍  
督中外諸軍錄尚書事叡死與司馬懿等輔曹芳加侍中  
改封武安用其黨丁謐計轉司馬懿太傅陽尊之而內欲  
機權已出弟羲中領軍訓武衛將軍彥散騎常侍其餘諸  
弟皆以列侯出入禁闕貴寵莫比先是南陽何晏鄧颺李  
勝沛國丁謐東平畢軌咸有時名曹叡抑其浮華皆出之  
及爽秉政乃竝進用以爲心腹颺等欲令爽立威名于天  
下勸使寇漢中延熙七年大發兵七萬人與征南將軍夏  
侯懿從駱谷入時關中轉輸不能供牛馬驢騾多死入谷



行數百里王師阻險爽兵不得進參軍楊偉爲爽陳形勢  
宜急還不然將敗颺與偉爭于爽前偉曰颺等將敗事可  
斬也爽不悅司馬懿書與夏侯元曰昔武皇再入漢中幾  
至大敗君所知也今興平路至險漢已先據其地若進不  
獲戰退見邀絕覆軍必矣將何以任其責元懼言于爽漢  
大將軍費禕復進軍據三嶺以要爽爽拔其眾去關右由  
是虛耗颺謚爲尙書軌司隸校尉勝河南尹晏等專政州  
郡望風莫敢逆旨爽飲食車服皆擬于芳尙方珍玩充物  
其家爲窟室綺疏四周與晏等縱游其中羲以爲憂屢諫  
不納十二年正月曹芳謁其父叡墓爽兄弟皆從司馬懿  
拒之于雒水浮橋列爽之罪于芳盡免爽等官于是收爽



義訓晏颺等皆斬之夷其族

鄧颺字元茂初爲尚書郎兼中書郎與李勝等爲浮華坐廢後爲侍中尚書性貪吝人求薦達視其貨之多寡時爲之語曰以官易富鄧元茂

丁謐字彥靖父斐嘗事操謐博觀書傳頗有才略曹爽素與親厚及輔政遂擢爲尚書爲人外若疏略而內實忌克何晏字平叔大將軍進之孫也以操子壻封關內侯性喜動粉白不去手行步顧影以才秀知名好老莊作道德論及諸文賦爲尚書典選多舉其故舊初與夏侯元司馬師等名盛一時晏嘗曰惟淡也故能通天下之志夏侯太初以之惟幾也故能成天下之務司馬子元以之惟神也故



不疾而速不行而至吾聞其語矣未見其人也蓋欲以神  
自況其高自位置如此方晏與颺謚爲尙書也時謂臺中  
三狗二狗崖柴不可當一狗憑默作疽囊默爽小字也言  
三狗皆欲齧人而晏怙勢尤甚

畢軌字昭先曹叡時爲黃門郎遷荊州刺史入爲司隸校  
尉與爽有雅故所言多聽

李勝字公昭少游京師有才知亦與爽善爽輔政累遷河  
南尹

桓範字元則世爲冠族建安末爲羽林左監以有文學與  
王象等典集皇覽曹芳時爲大司農以清謹稱嘗鈔漢書  
中雜事以意斟酌之名曰世要以示蔣濟濟不冝覽範心

恨之曹爽以範鄉里耆宿特敬之而不親張當者黃門也  
與爽交通故皆及于難自爽死大權悉歸司馬懿父子曹  
氏日削馴至于亡

### 夏侯惇

夏侯惇字元讓沛國譙人年十四有辱其師者惇殺之以  
烈氣聞爲操司馬領東郡太守操攻陶謙畱守濮陽呂布  
遣將僞降執惇責其貨賂軍中震怒部將韓浩勸兵屯營  
門召軍吏按甲不得妄動諸營乃定遂詣惇所叱持質者  
曰汝等凶逆乃敢執劫大將復欲望生耶吾受命討賊寧  
能以一將軍之故而縱汝乎因涕泣謂惇曰當奈國法何  
促召兵擊持質者持質者皇遽叩頭言吾儕乞資用去耳



浩皆斬之惇既免操聞謂浩曰卿此可爲萬世法乃著令  
今以後有持質者皆當并擊勿顧由是劫質者遂絕從操  
攻呂布爲流矢所中傷左目加建武將軍封高安鄉侯操  
平河北爲大將軍時諸將皆受魏官獨惇漢官乃上疏自  
陳卽拜前將軍尋卒

### 夏侯淵

夏侯淵字妙才惇之族弟也曹操使督諸將擊廬江叛者  
又擊斬袍罕宋建等操下令曰宋建爲亂三十餘年淵一  
舉滅之虎步關右所向無前仲尼有言曰吾與汝不如也  
以淵行都護將軍督張郃徐晃等平巴郡操還鄴畱淵守  
漢中拜征西將軍二十三年昭烈軍陽平關淵帥諸將拒

守連年二十四年正月昭烈遣黃忠帥師夜燒圍鹿角淵  
使張郃護東圍自將輕兵護南圍郃軍敗淵分兵助郃爲  
漢兵所襲死于陳子霸曹芳時爲右將軍封博昌亭侯素  
爲曹爽所厚聞爽爲司馬懿所殺遂降漢漢以爲車騎將  
軍

夏侯尚

夏侯尚字伯仁淵從子也曹丕與爲布衣交爲五官將文  
學封平陵亭侯遷中領軍丕篡漢更封平陵鄉侯累遷征  
南大將軍建興三年卒

夏侯元

夏侯元字太初少知名弱冠爲散騎常侍曹芳初爽輔政



元爽之姑子也累遷中護軍司馬懿嘗問時政元議以爲  
官才用人國之柄也故銓衡專于臺閣上之分也孝行存  
乎閭巷優劣任之鄉人下之敘也夫欲清教審選在明其  
分敘不使相涉而已何者上過其分則恐所由之不本而  
于勢馳騫之路開下踰其敘則恐天爵之外通而機權之  
門多矣夫天爵下通是庶人議柄也機權多門是紛亂之  
原也自州郡中正品度官才已有年載緬緬紛紛未聞整  
齊豈非分敘參差各失其要之所由哉若令中正官但攷  
行倫輩倫輩當行斯可官矣何者孝行著于家門豈不忠  
恪于在官乎仁恕稱于九族豈不達于爲政乎義斷行于  
鄉黨豈不堪于任事乎數者之類取于中正雖不處其官



名斯任官可知矣行有大小比有高下則在任之流亦煥然明矣奚必使中正干銓衡之機于下而執機柄者有所委仗于上上下下交侵以生紛錯哉且臺閣臨下考功校否眾職之屬各有官長旦夕相考莫究于此閭閻之議以意裁處而使巨宰失位眾人驅駭欲風俗清靜其可得乎豈若使各官長則各以其屬能否獻之臺閣臺閣則據官長能否之第參以鄉閭德行之次擬其倫比勿使偏頗中正則惟考其行迹別其高下審定輩數勿使升降臺閣總之如其簡用或有參錯則其責自在有司官長所第中正輩擬比隨次率而用之如其不稱責負在外則內外相參得失有所互相形檢孰能相飾則人心定而事理得庶可以



靜風俗而審官才矣又古之建官所以濟育羣生統理名物故爲之君長以司牧之司牧之主欲一而專一則官任定而上下安專則職業脩而事不煩夫事簡業脩上下相安而不治者未之有也先王建國分疆畫界各守土境則非重累羈絆之體也下考商周五等之敘徒有大小貴賤之差亦無君官臣民而有二統互相牽制者也夫官統不一則職業不修職業不修則事何得而簡事而不簡則民何得而靜民之不靜則邪惡竝興而姦僞滋長矣先王達其如此故專其職司而一其統業始自秦世不師聖道私以御職姦以待下懼宰官之不修立監牧以董之畏監督之容曲設司察以糾之宰牧相累監察相司人懷異心上



下殊務漢承秦緒莫能釐正魏氏草創日不暇及五等之  
典雖難卒復可麤立儀準以一治制今之長吏皆君吏民  
橫重以郡守累以刺史若郡所攝惟在大較則與州同無  
爲重複宜省郡守但任刺史刺史職存則監察不廢郡吏  
萬數還親農業以省繁費豐財殖穀一也大縣之才皆堪  
郡守是非之訟每生意異順從則安直已則爭夫和羹之  
美在于合異上下之益在能相濟順從乃安此琴瑟一聲  
也蕩而除之則官省事簡二也又幹郡之吏職監諸縣營  
護黨親鄉邑舊故如有不副而因公掣頓民之困弊咎生  
于此若皆并合則亂原自塞三也今乘衰敝民人凋落賢  
才鮮少任事者寡吏者民命而常頑鄙今如并之選清良



者造職則化流民安四也使萬戶之縣名之郡守五千以上名之都尉千戶以下令長如故自長以下考課選用轉以能陞所牧亦增此進才效功之敘也若經制一定則官才有次治功齊明五也若省郡守縣皆逕達事不壅隔官無畱滯三代之風雖未可必簡一之化庶幾可致頃之爲征西將軍都督雍涼州諸軍事與曹爽興略谷之役人皆譏之司馬懿旣殺爽召元爲鴻臚數年爲太常元絀內不得志中書令李豐雖爲大將軍司馬師所親厚然私心屬元遂結曹芳妻父光祿張緝謀以元輔政豐旣內握機權又與緝俱馮翊人故緝信之延熙十七年二月當拜貴人豐等欲因此時有陞戟可以誅師以元代之師微聞其計

以他事請豐豐不知而往師因責豐豐知不免正色曰卿  
父子懷姦將傾社稷惜吾力劣不能相擒滅耳師卽殺之  
并害元緝等皆夷其族元臨刑顏色不變舉動自若年四  
十六元嘗著樂毅張良論辭旨通達皆行于世初中領軍  
高陽許允與元親善師害元并徙允樂浪道死

清河王經者字彥偉與允俱稱冀州名士延熙中爲尙書  
曹髦欲討司馬昭謀于王經與王沈王業沈業馳告昭經  
留髦所昭旣弑髦并族經經被逮辭母母笑而應曰人誰  
不死往所以止汝者恐不得其所也以此并命何恨之有  
晉武帝太始初詔曰尙書王經雖陷大戮然守志可嘉門  
戶埋沒意愍之其以經孫爲郎中



贊曰王經不附司馬昭可謂知死所矣其母知有名義  
笑地下雖古烈婦何以加茲

卷之三

三










































續後漢書卷第三十六

上海郁松年原本

宋廬陵蕭常著

邑後學胡芳秋校梓

魏載記第三

荀彧

荀彧字文若潁川潁陰人祖淑朗陵令父緄濟南相時宦  
寺用事中常侍唐衡者尤桀黠欲以女妻汝南傅公明公  
明恥之不娶因以妻彧永漢元年舉孝廉爲守宮令董卓  
之亂求出補吏除亢父令棄官去冀州牧同郡韓馥遣將  
迎之彧至而袁紹已奪馥冀州待彧以上賓之禮初平二  
年彧辭紹從曹操于東郡操與語大悅曰吾子房也以爲  
奮武司馬興平初擊陶謙使守鄆城任以畱事會張邈陳

宮以兗州歸呂布諸城皆應之或勒兵設備故能自保又與程昱謀使說范東阿卒全三城以待操陶謙死操欲取徐州還乃定布或諫曰昔高祖保關中光武據河內皆深固根本以制天下進可以勝敵退可以堅守故雖有困敗而終濟大業將軍本以兗州首事故能平定山東此實天下之要地而將軍之關河也若不先定之則根本將何寄乎宜急討陳宮使不得西顧約食蓄穀一舉而布可破也破布然後討袁術以臨淮泗今舍布而東民心益危雖鄆城范衛可全其餘非已之有若攻徐州不克將軍其安歸乎操乃止大收麥復與布戰布敗走兗州平建安元年獻帝自河東還洛陽或以韓暹楊奉新將天子到洛未可卒



制或勸操曰昔高祖東伐爲義帝縞素而天下歸心今車駕旋軫義士有存本之思百姓感舊而增哀誠因此時奉主上以從民望大順也秉至公以服雄杰大略也扶宏義以致英俊大德也四方雖有逆節其何能爲韓暹楊奉安足恤哉若不時定使豪傑生心後雖欲爲無及矣操從之及帝都許操爲車騎將軍或爲漢侍中守尙書令操每攻戰在外凡軍國事皆與或籌焉又進荀攸鍾繇郭嘉等爲操謀臣袁紹旣并河朔有驕氣而操敗于張繡紹與操書其辭不假借操謂或曰今欲討不服而力不敵何如或曰今與公爭天下者維袁紹耳紹外寬內忌公明達不拘此度勝也紹遲重少決失在後機公能斷大事應變無方此



謀勝也紹御軍汝令不立雖眾難用公法令旣明士卒致死此武勝也紹飾知以收名譽公推誠不爲虛美此德勝也夫以四勝輔天子扶義征伐誰敢不從紹雖強其何能爲操說乃說操先取呂布而後攻紹操從之三年遂擒布定徐州五年紹帥眾攻操操與相拒紹兵勢甚盛或曰紹兵雖多而不整田豐剛而犯上許攸貪而不治審配專而無謀逢紀果而自用顏良文醜匹夫之勇可一戰而擒也後皆如其策操保官渡紹圍之操軍餉不繼書與或議還許或報曰今軍食雖少未若楚漢在滎陽成臯間也是時劉項莫肯先退者以爲先退則先屈公搃其喉已半歲矣情見勢竭必將有變此用奇之時不可失也操從之以奇



兵襲破紹操欲南擊劉表或曰今紹敗其眾離心不因而定之而遠兵江漢若紹收其餘燼乘虛以出則公之事去矣操乃止八年封萬歲亭侯九年操拔鄴自領冀州牧或說操宜復置九州冀部所統既廣天下服矣操將從之或曰若是則冀州當得河東馮翊扶風西河幽并之地所奪者眾人心易動一日生變天下未易圖也願公先定河北然後修復舊京南臨荊州責王貢之不入天下咸知公意人人自安天下大定乃議古制操從其言十二年操將攻劉表問計于或曰今兩河旣平荆漢知亡矣可聲出宛葉而間行輕進以掩其不意操遂行會表死遂取荊州十七年董昭建議欲進操國公九錫備物密以訪或或曰曹公



本與義兵以董正漢朝雖勲庸榮著猶秉忠貞之節君子  
愛人以德不宜如此操由是不悅會公孫權表或勞軍于  
譙因畱或以待中參丞相軍事操軍向須濡或病畱壽春  
操饋之食發視乃空器于是飲藥而死年五十初董承等  
受帝密旨誅操事泄操殺承等伏后與父完書言操殘逼  
之狀帝方爲承等報怨完以示或或惡之隱而不言完妻  
弟樊普封以示操或恐事覺因勸操以女配帝操曰伏后  
在吾女何得配上或曰伏后往嘗與父書惡言及公可因  
此廢操曰卿昔何不言或佯驚曰已嘗爲公言之操曰此  
豈小事而吾忘之耶以此憾之而外示優容及董昭九錫  
之議或意不同積前憤殺之然弑后之謀實自或發



董昭

董昭字公仁濟陰定陶人袁紹以爲魏郡太守背紹歸張  
楊楊以爲騎都尉復嬖縫楊奉等使共迎曹操操爲鎮東  
將軍昭爲符節令又爲操畫策挾天子以令諸侯且使請  
車駕幸許累遷魏郡太守操定鄴除諫議大夫從操征烏  
丸操患糧餉不繼乃建議鑿平虜泉州二渠以通海運操  
表封千秋亭侯轉司空祭酒日夜爲操謀所以代漢曹丕  
篡漢遷大鴻臚轉侍中封都鄉侯遷太僕曹叡初進封樂  
平遷衛尉拜司徒卒年八十一

華歆

華歆字子魚平原高唐人舉孝廉爲郎以病去官何進輔

續後漢書

卷三十六

四



政名爲尙書郎董卓遷帝長安歆求爲下邦令不許遂抵  
南陽從袁術于穰會太傅馬日磾安集關東辟爲掾詔拜  
豫章太守爲政不煩孫策略地江東遣太史慈招撫劉繇  
餘眾因使察歆所爲慈語策曰子魚非籌略士無他方規  
自守而已無能爲也又丹陽僮芝據廬陵鄱陽民帥別立  
宗部不受子魚所遣長吏言我已別立郡須漢遣真太守  
來當迎之耳子魚不惟不能諧附廬陵鄱陽近自海昏有  
上繚壁五六千家相結作宗伍調遣一人亦不可得惟坐  
視之策遂有并兼之志及策兵次枬上歆迎降曹操在官  
渡表天子徵歆權不卽遣歆請曰將軍始奉王命令留僕  
是養無用之物非良計也權乃遣之旣至拜議郎參軍事



入爲尙書代荀彧爲尙書令先是伏后與父完書言操殘逼之狀至十九年操始知逼帝廢后帝不許操遣歆與御史大夫鄒慮勒兵入宮收后后閉戶入壁中歆壞戶發壁手牽后出后被髮徒跣執帝手曰不能復相活耶帝曰吾亦不知命在何時顧謂慮鄒公天下寧有是事邪遂弒后并弒二皇子丕爲魏王以歆爲相國及篡漢改司徒封安樂鄉侯曹叅初進封博平轉太尉建興九年卒

### 鄒慮

鄒慮字鳴豫山陽高平人荀彧薦之於操操以爲御史大夫操常疾孔融有時譽慮希操旨奏免融官復誣以非而族之其陰險禍賊類如此

贊曰唐人杜牧稱彧勸操取兗州則比之高光官渡之役則比之楚漢及事已就乃欲要名于漢氏譬之教盜穴牆發篋而不與同挈不謂之盜可乎世皆以牧之言爲確論而范曄謂彧有殺身成仁之義近世司馬光亦以其功過管仲且以仁許之曄不足道也而光亦爲之雖然彧之罪終不以二人之言而少掩夫人苟犯天下大義雖顏孟爲之辭世且不直之況曄輩乎華歆鄒慮以名德白居梟獍其行前史無一言譏其非者吁可怪哉

荀攸

荀攸字公達彧從子也何進秉政召海內名士攸至拜黃門侍郎董卓之亂攸與議郎鄭泰何密侍中种輯越騎校



尉伍瓊等謀殺卓事垂就而卓覺以容攸繫獄容自殺攸  
言語飲食自若會卓死得免曹操以天子都許名爲尙書  
與語大悅謂荀彧鍾繇曰公達非常人也吾得與之計事  
天下何憂哉以爲軍師建安三年從操攻張繡攸曰繡與  
劉表相恃爲強然繡以游軍仰食于表表不能供也勢必  
離不如緩以待之可誘而致也若急之其勢必相救援不  
從表果救之軍敗于穰操曰不用君言至此操攻呂布于  
下邳布固守操軍欲還攸與郭嘉說曰布勇而無謀三戰  
皆北其銳氣衰矣三軍以將爲主衰則軍無奮意陳宮有  
智而遲今及布氣之未復宮之計未定急攻之可拔也乃  
引沂泗灌城城潰禽布袁紹遣郭圖等攻東郡太守劉延



于白馬紹引至黎陽操救延循河而西紹渡河追操至延  
津操與紹將文醜戰敗之皆攸計也操與紹相持官渡攸  
謂操曰紹運車且至其將韓萇銳而輕敵擊可破也操問  
誰可使者攸曰徐晃乃遣晃及史渙要擊破之會紹許攸  
叛紹來奔言紹遣淳于瓊等將兵迎運糧可擊而取眾皆  
疑惟攸與賈詡贊其計操自往破之斬瓊等紹以故敗操  
欲攻劉表而紹子譚尙爭冀州譚遣辛毗求救操將許之  
其屬皆以表爲強宜先表而後譚尙攸曰天下方有事而  
劉表坐保江漢之間其無四方之志可知矣袁氏據四州  
之地帶甲十萬今兄弟交惡勢不兩全若有所并則力專  
力專則難圖及其亂而取之天下定矣此時不可失也操



乃許譚和遂破尙其後復斬譚於南皮冀州平操表封陵  
樹亭侯轉中軍師操稱魏王爲尙書令操每稱之曰公達  
外愚內知外怯內勇外弱內強不伐善無施勞知可及愚  
不可及雖顏子甯武不能過也與鍾繇善繇言我每有所  
行反復思之自謂無以易以咨公達輒復過人意從攻孫  
權道病卒

賈詡

賈詡字文和武威姑臧人董卓入洛陽許以太尉掾遷討  
虜校尉卓壻牛輔屯陝詡在輔軍卓敗輔亦死其黨李傕  
郭汜等散兵間行歸鄉里詡曰聞長安中欲盡誅涼州人  
而諸君棄眾單行卽一亭長能束君矣不如率眾西向長

安爲董公報仇眾以爲然催等旣陷長安殺王允等乘輿  
蒙塵公卿戮辱民庶死者十八九而曹操等階之竊國皆  
自詡一言始時論其惡又甚于卓詡爲左馮翊催等欲侯  
之詡曰此救命之計何功之有固辭又以爲尙書僕射翊  
曰僕射官之師長翊名不素重非所以服人也縱詡昧于  
榮利奈國朝何催復以詡爲宣義將軍催旣敗復從張繡  
爲繡畫計歸曹操操以爲執金吾封都亭侯參司空軍事  
建安十三年操旣得荊州欲順流攻吳詡曰明公威名遠  
著若乘舊楚之饒撫百姓使安土樂業江東可不勞眾而  
服操不從軍大敗時子丕爲五官將而操屬意于中子植  
嘗屏人問詡詡不對操曰與卿言而不荅何也曰有所畏



耳操曰何思曰思袁本初劉景升父子也操笑曰止丕篡漢卽拜太尉封魏壽鄉侯孫權聞而笑曰魏雖乏人何至用是人年七十七卒許攸者字子遠旣叛紹歸操與詡及荀攸等皆爲操謀臣然恃功驕慢嘗于廣坐呼操小字曰阿瞞汝非我那得冀州操曰汝言是也然內不樂竟陰使人殺之又有國淵者樂安人字子尼挾數任術操辟爲司空掾累遷魏郡太守時有投謗書操憤之必欲得其主名淵請出其本書而不宜露其書多引二京賦淵刺功曹得三人臨遣訓以所學末及二京賦曰此博物之書也世人忽略少有其師可求能讀者從受之又密諭旨旬日得能讀者遂往受業吏因請作箋比方其書與所投者正同攝

問其服其譎險類此

程昱

程昱字仲德東郡東阿人長八尺三寸美鬚髯曹操至兗州與語悅之以爲壽張令操攻徐州使與荀彧留守鄆城張邈等迎呂布郡縣響應惟鄆城范東阿不動布軍降者言陳宮欲自將兵取東阿又使泚疑取范吏民皆恐或謂昱今兗州惟有此三城宮等以重兵臨之非有以深結其心三城必動君民之望歸而說之昱乃過范說其令靳允曰聞呂布執君之母弟妻子孝子誠不可爲心今天下大亂豪杰竝起必有命世能息天下之亂者此知者所詳擇也呂布麤中少親剛而無禮匹夫之雄耳宮等以勢假合



不能相君也兵雖眾必無成曹使君知略不世出君若固  
范我守東阿則田單之功可立也允曰不敢有二時汎疑  
已在縣允卽伏兵殺之歸勒兵守昱又別遣騎絕倉亭津  
宮至不得渡東阿令棗祗亦帥吏民堅守卒完三城以待  
操還執其手曰微子吾無歸路矣乃表爲東平相屯范時  
操與布戰于濮陽數不利又蝗蟲起乃各引去操欲與紹  
連和紹欲使操遣家居鄴操新失兗州軍食且盡將許之  
昱適還曰昱聞將軍欲遣家與袁紹連和有之乎願將軍  
更慮之操乃止天子都許以昱爲尙書令操攻荊州昭烈  
如吳論者以孫權必害昭烈昱曰劉元德有英名關羽張  
飛皆萬人敵權必資之以禦我難解勢分不可得殺也權



果多臨昭烈兵以禦操其後中夏漸平操撫昱背曰兖州之敗不用君言吾何以至此宗人奉牛酒大會昱曰知足不辱吾可退矣乃闔門不出操稱魏王以爲衛尉與中尉邢貞爭威儀免子丕篡漢復爲衛尉封安鄉侯方欲以爲公會卒時年八十初操乏食昱略其本縣供三日糧雜以人脯由是大失素譽

### 郭嘉

郭嘉字奉孝潁川陽翟人荀彧薦之于操操與論天下事曰使孤成大業者必此人也表爲司空軍祭酒與昱齊名攻呂布三戰破之布退固守時士卒敝疲操欲引還嘉說操急攻之遂擒布比操破袁譚尙皆其計也封洧陽亭侯



又說操攻袁熙及三郡烏丸皆大破之斬蹋頓名王以下  
尙及兄熙走遼東死嘉有算略達于事情操常曰惟奉孝  
爲能知孤意還白柳城卒時年三十八後操攻荊州還巴  
丘旣大敗而軍疾疫歎曰奉孝在不使孤至此

### 劉曄

劉曄字子揚淮南成德人光武子阜陵王延之後也許劭  
名知人嘗稱其佐世之才曹操辟爲司空倉曹掾操攻張  
魯至漢中山峻難登軍食頗乏卽日引歸令曄督諸軍使  
以次出曄策魯可克馳白操不如進攻操從之魯走漢中  
遂平曄進曰明公今舉漢中蜀人望風破膽可傳檄而定  
劉元德人杰有度而思遲得蜀日淺蜀人未附以公之明

因而攻之無不克也若小緩之諸葛亮明于治國而爲相  
關羽張飛勇冠三軍而爲將人心既定據險守固則不可  
犯矣今不取後必爲患操不從居七日益州降者言蜀中  
一日數十驚守將雖斬之不能安也操問曄曰今可擊否  
曰今已小定未可也乃還建安末昭烈宜都太守孟達來  
奔達容止可觀丕器之以爲新城太守曄以達有苟得之  
志而恃才任術必不能感恩懷義新城與吳漢接境必爲  
國患後果謀歸漢章武二年爲侍中曹叡初封東亭侯遷  
大鴻臚卒子陶善縱橫有才而薄于行官至平原太守

蔣濟

蔣濟字子通楚國平阿人爲州別駕嘗以公事至譙操謂



曰昔孤與袁本初對官渡徙燕白馬民民不得走賊亦不得鈔今欲徙淮南民何如濟曰是時兵弱敵強不徙必失之今百姓樂土實不願徙懼必不安操不從而江淮十餘萬眾皆驚走吳後齊使鄴操迎笑曰本使避賊乃更驅盡之拜丹陽太守操攻孫權還以溫恢爲揚州刺史濟爲別駕辟丞相主簿關羽圍樊襄陽操以獻帝在許近敵欲徙都洛與司馬懿說曰關羽得志孫權必不願也可使人勸權躡其後許割江南以封之則樊圍自解操如其言權因襲殺羽子丕篡漢爲東中郎將上萬幾論丕善之入爲散騎常侍與曹仁南侵仁欲攻濡須洲濟曰敵居西岸列船上流而兵入洲是爲內地獄危亡之道也仁不從果敗仁



卒復爲東中郎將代領其眾召爲尙書不欲至廣陵濟表  
水道難通又上三洲論以諷不從戰船數千皆滯不得  
行議者欲畱兵屯田濟以爲東近湖北臨淮若水盛時敵  
易爲寇不可安屯不從之不還到精湖水稍盡畱船付濟  
濟更鑿地作四五道蹴船令聚預作土豚遏斷湖水皆引  
後船一時湖水開過入淮中不謂濟曰事不可曉吾前決  
謂分半燒船于山陽池中卿于後致之略與吾俱至譙又  
每有所陳實合吾意自今討伐計畫善思論之曹叡初遷  
中護軍加散騎常侍曹芳嗣僞位爲領軍將軍封昌陵亭  
侯遷太尉初侍中高堂隆以魏爲舜後濟以爲舜本姓嬀  
其苗曰田非曹氏之先著文以詰難曹爽之在伊南也濟



與書言司馬懿之意不過免官而已既而懿夷爽族進封都鄉侯辭不許常恨其言之失發病卒

贊曰董卓國之賊天下所共仇而詡爲之報東京之亡禍根于此及辭李傕尙書之命則以朝廷爲解是欲以虛辭蓋實惡將誰欺耶昱脯人肉以啖操軍此盜賊所不忍爲者曠傾心曹氏而忘其宗國其昭歆之徒與

續後漢書卷第三十六

續後漢書

卷三十六

三





續後漢書卷第三十七

上海郁松年原本

宋廬陵蕭 常著

邑後學 胡芳秋 杜邦浚 校梓

魏載記第四

鍾繇

鍾繇字元常潁川長社人舉孝廉爲尚書郎累遷黃門侍郎獻帝在西京李傕郭汜亂長安關東隔絕操領兗州遣使上書天子傕汜欲拒絕之繇說傕汜納其使由是操使命得通荀彧旣數稱其才聞其說傕汜操益虛心天子得出長安繇與尚書郎韓斌有力焉後遷尚書僕射封東武亭侯是時關中諸將馬騰韓遂各擁強兵操方有事山東以關中爲憂乃表繇以侍中守司隸校尉持節督關中諸



軍委以便宜不拘常法繇至移書騰遂等爲陳禍福騰遂各遣子入侍操在官渡繇送馬二千匹給軍操與書曰關右平定朝廷無西顧憂公之勲也昔蕭何鎮守關中足食成軍亦適當耳其後匈奴攻平陽繇帥諸軍圍之未拔而袁尙所置河東太守郭援以眾至銳甚諸將議欲釋之去繇曰援之來關中陰與之通若棄而示弱所在之民誰非軍讐縱吾欲歸其得至乎此爲未戰先自敗也且援好勝必易吾軍若渡汾爲營及其未至擊之可大克也後果輕渡未半急擊大破之斬援降單于自天子西遷洛陽人民單盡繇徙關中民又招亡叛以充之數年戶口稍實操攻關中得以爲資操爲魏王以爲大理遷相國子丕篡漢遷



太尉封爲平陽鄉侯曹叡初進封定陵遷太傅初操時議死刑可宮割者繇請復肉刑議者以爲非遂已至丕欲復肉刑以有軍事復寢至是繇上疏請如孝景之令其當棄市欲斬右趾者許之其黥劓宮刑左趾者自如孝文易以髡笞人年二十至四十雖斬其足猶任生育今天下人少于孝文之世計其所全歲三千人張蒼除肉刑所殺歲以萬數臣欲復肉刑歲生三千人王朗議以爲繇欲輕減大辟之條以增益刑之數此卽起偃爲豎化死爲生然臣以爲五刑之屬著在科律自有減死一等之法不死卽爲減施行已久不待遠假斧鑿于彼肉刑前世仁者不忍肉刑之慘酷是以廢而不用今復行之恐非所以宣洪化



也今欲按繇所欲輕之死刑使減死之髡刑嫌其輕者可  
倍其居作之歲數內有以生易死不貲之恩外無以刑易  
笞駭耳之聲議者多與朗同遂寢尋卒子毓嗣毓字稚叔  
機捷談笑有父風累遷黃門侍郎時大興宮室民疲於役  
毓諫以爲水旱可俟豐年又言宜復關內開荒地使民肆  
力於農事遂施行曹爽舉眾寇漢中王師禦之不得進毓  
以書諭止遂失爽意出爲魏郡太守爽死入爲廷尉建議  
君父已沒臣子得爲理謗及士爲侯其妻不得復配嫁後  
爲青州刺史加後將軍遷徐州卒弟會字士季敏慧夙成  
及壯有才藝而博學精練名理由是知名爲中書侍郎曹  
髦初同馬師攻母上儉會典知機密司馬昭輔政爲黃門



侍郎封東武亭侯遷司隸校尉雖在外司時政損益無不兼綜然恃權害物嵇康等小小嫌隙皆致之死凡昭所以傾曹氏會謀爲多炎興元年昭使率眾與鄧艾犯漢漢亡會誣殺艾尋以謀反誅會嘗論易無互體著書二十篇名曰道論實刑名家也有嚴幹者善春秋公羊而繇好左氏謂左氏爲太官謂公羊爲賣餅家數與幹辨析長短繇機捷善持論而幹呐口或絀而無以應繇謂幹曰公羊竟爲左氏服矣幹曰直故吏爲明使君服耳公羊高未冝也

### 陳羣

陳羣字長文潁川許昌人祖寔父紀叔謚皆有盛名爲兒時寔常奇之曰此兒必興吾宗昭烈臨豫州辟爲別駕時

陶謙死徐州迎昭烈昭烈欲往羣說曰袁術尙強今必與之爭呂布若襲將軍之後將軍雖得徐州事必無成昭烈不從遂東與袁術戰布果襲下邳遣兵助術昭烈軍敗恨不用陳羣言舉茂才不行曹操辟爲司空西曹掾薦廣陵陳矯丹陽戴乾操皆用之除蕭贊令後以司徒掾舉高第爲治書侍御史參丞相軍事操稱魏王遷御史中丞操欲復肉刑曰安得通理達於古今者使平斯事乎昔陳鴻臚以爲死刑有可加于仁恩者正謂此也汝能申其父之說乎羣曰臣父紀以爲漢除肉刑而增加笞本興仁惻而死

者更眾所謂名輕而實重者也名輕則易犯實重則傷民書曰惟敬五刑以成三德易著剝削滅趾之法所以弼政



輔教懲惡息殺也若用古刑使淫者下蠶室盜者刖其足則永無淫放穿窬之姦矣夫三千之屬雖未可悉復若斯數者時之所患宜先施行漢律所殺殊死之罪仁所不及也其餘逮死者可以刑殺如此則所刑之與所生足以相質矣以笞死之法易不殺之刑是重人肢體而輕人軀命也時鍾繇與羣議同王朗及議者以爲未可行操善羣言以有軍事故寢轉侍中領丞相東西曹掾子丕待以交友之禮時人曰自吾有回門人以親代父爲相封羣昌武亭侯遷尚書及夏漢遷僕射加侍中徙尚書令進封潁鄉侯丕侵吳以爲中領軍還爲鎮軍大將軍領中護軍錄尚書事丕病羣與曹真司馬懿等受遺詔輔政叡初進封潁陰



項之爲司空上疏宜崇德布化惠恤羣庶曹眞請數道犯漢從斜谷入羣以爲昔攻張魯多收豆麥以益軍糧魯未下而食猶乏旣無所因且斜谷阻險難以進退轉運必先鈔截多畱兵守要則損戰士不可不熟慮也叡從其議眞又請從子午道羣又陳不便并言軍事用度之計叡以羣議下眞眞不從遂行霖雨積日羣又以爲宜召眞還從之時盛夏營宮室百姓失農時羣上疏曰禹承唐虞之盛猶卑宮室而惡衣服况今喪亂之後人民絕少比文景之世不過一大郡且邊境不寧將士勞苦若有水旱之患國之深憂也宜講武勸農以待強敵今舍此而先宮室懼百姓遂困將何以應敵建興十四年卒祖終太丘長父大鴻臚



羣官至三公而德望每不及先人時以爲公慚卿卿慚長子泰字元伯仕至尙書右僕射與司馬師及其弟昭皆友善昭嘗問沛國武陔曰元伯何如其父陔曰通雅博暢能以天下聲教爲己任不如也明達簡至立功立事則又過之初羣以吏部不能審天下之士于是制九品官人之法令郡國各置中正州置大中正皆取本土之人任朝廷官德充才盛者爲之使銓次等級以爲九品有言行修著則升之道義虧闕則降之吏部憑之以補授百官後行之寢久中正或非其人姦弊日滋至晉劉毅始陳中正之設有入損請除武帝善其言不能革

陳矯

陳矯字季弼廣陵東陽人太守陳登請爲功曹郡爲孫權所圍登使求救於曹操說操曰鄙郡雖小形便之國也若蒙救援使爲外藩則吳人挫謀未從之國望風景附崇德養威此王業也操奇矯欲留之矯辭曰敝邑倒懸奔走告急縱無申胥之效敢忘宏演之義乎操乃遣兵救登吳兵退操辟爲司空掾累遷魏郡西部都尉曲周民父病以牛禱具奏并棄市矯曰此孝子也上疏救之遷魏郡太守時繫囚千數厯年不決者矯至悉覽文牘一時論決轉西曹屬從操至漢中還爲尙書未至鄴操死乃與羣僚立子丕使嗣相位丕旣篡漢轉吏部封高陵亭侯遷尙書令曹叡初進東鄉叡嘗卒至尙書門矯曰欲何之叡曰欲按行文



書耳矯曰此臣職分若臣不稱職則請就黜叡慙而退叡  
嘗以社稷爲憂問曰司馬懿可謂社稷之臣乎矯曰朝廷  
之望未可知也加侍中光祿大夫遷司徒卒有徐宣者字  
寶堅亦矯同郡齊名而所好不協然俱器于太守陳登操  
辟爲司空掾從操至壽春會馬超亂操欲西伐謂官屬曰  
今當遠征而北方未定以爲後憂宜得清公厚德以鎮統  
之乃以宣爲左護軍留統諸軍還爲東曹掾子丕僭號爲  
御史中丞累遷司隸校尉散騎常侍曹叡初封爲津陽亭  
侯左僕射加侍中光祿大夫叡至許昌使統留事及還主  
者奉承文書叡曰吾省與僕射何異不視上疏陳威刑太  
過又諫作宮殿窮盡民力皆見嘉納嘗曰七十有懸車之



義今已六十八可以去矣乃固辭疾不許建興末卒時又有衛臻者字公振陳畱襄邑人與矯等同事曹丕丕篡漢封安國亭侯羣臣多頌魏德多抑損前朝臻獨明禪授之義稱揚漢美丕數目臻曰天下之珍當與山陽共之累遷司徒卒

盧毓

盧毓字子家涿郡人父植有名當世崔烈舉毓爲冀州主簿方時草創多逃逋故重士亡法罪及妻子亡士妻白等始適夫家數日不與夫相見大理奏棄市毓駁曰夫女子之情以接見而恩生成夫婦而義重故詩云未見君子我心傷悲旣見君子我心則夷又禮未廟見而死歸葬于女



氏之黨以未成婦也今白等生有未見之悲死有非婦之  
痛而吏議欲肆之大辟則同牢合巹之後罪以何加且記  
附從輕言附人之罪以輕者爲比苟以白等皆受聘禮已  
入門庭刑之爲可殺之爲重操是之由是爲法曹議令史  
子丕集漢爲黃門侍郎歷濟陰相梁譙二郡太守以忤旨  
左遷唯陽典農校尉心在利民躬親臨視百姓賴之入爲  
侍中先是散騎常侍劉劭定律未就毓疏上論古今科律  
之意以爲法宜一正不宜兩端使姦吏得容私遷吏部尙  
書使自選代曰得如卿者乃可毓舉鄭沖叡曰文和吾亦  
知更舉吾所未聞者乃舉阮武孫邕叡于是用邕初諸葛  
誕鄧颺等有名富世有四聰入達之目叡疾之時舉中書



郎叡曰得人與否在廬生耳選舉勿取有名有名如畫地作餅不可啖也毓曰名不足以致異人而可以得常士常士畏教慕善然後有名非所當疾也愚情旣不足以識異人又主者正以循名案常爲職但當有以驗其後古者敷奏以言明試以功今考績之法廢而以毀譽相進退故真僞淆雜虛實相蒙叡納其言卽令劉劭作考課法劭因作都官考課法七十二條毓選舉先性行而後言才黃門侍郎李豐嘗以問毓毓曰才所以爲善也故大才成大善小才成小善今稱其有才而不能爲善是才不中器也豐等服其言曹爽秉政將植其黨徙毓僕射以何晏代之頃之出爲廷尉司隸畢軌又誣奏其罪免官眾論交訟之乃爲



光祿勳爽等敗復爲吏部尙書進封高樂亭侯轉僕射加  
光祿大夫曹髦初進封大梁鄉侯母丘儉等起兵欲誅司  
馬師師率眾攻之使綱紀後事遷司空進封容城延熙末  
卒

杜畿

杜畿字伯侯京兆杜陵人御史大夫延年之後舉孝廉除  
漢中府丞會天下大亂棄官客荊州荀彧薦之于曹操操  
以爲司空司直遷護羌校尉領西平太守王邑被徵河東  
人衛固范先外以請邑爲名而內與袁紹甥高幹通謀操  
謂荀彧曰關西諸將恃險征之必亂張晟寇殺澠間南通  
劉表固等因之吾恐天下爲患河東被山帶河四鄰多變



今天下之要地也君爲我舉蕭何寇恂以鎮之荀彧曰杜  
畿其人也於是追拜河東太守冒艱險至郡卒平衛范之  
亂時天下郡縣皆殘破河東最先定少耗滅畿崇寬惠不  
苛擾民有訟與陳大義遣歸締思之若有所不盡更來詣  
府父老相責怒曰有君如此奈何不從其教自是少訟舉  
孝子順孫貞婦復其繇役課民蓄牝牛草馬下逮雞豚犬  
豕而皆有章程百姓力農家家豐實乃曰民富矣不可不  
教也於是冬月講武又開官學親執經教授郡中化之曹  
操與馬超夾渭而軍軍食一仰河東及敵破餘蓄尙三十  
餘萬斛增秩中二千石操攻漢中遣五千人運運者相勉  
曰人生有一死不可負我府君無一人敢亡者其得民心



如此操稱魏王以爲尙書令曰昔蕭何定關中寇恂平河  
內卿有其功將授卿以納言之職顧念河東我股肱郡且  
煩公臥鎮之在河東十六年課爲天下最丕冀漢封豐樂  
亭侯累遷尙書僕射丕如許昌令畿居守作御樓船于陶  
河試船遇風溺死子恕字務伯曹叡時爲散騎黃門侍郎  
辛毗等器重之公卿以下大議時政所宜損益恕以爲古  
之刺史奉宣六條以清靜爲名威風著稱可勿復領兵以  
專民事居無何鎮北將軍呂昭又領冀州上疏曰安民之  
術莫尙于豐財豐財者務本而節用也方今六合未一戎  
馬亟駕此熊虎之士展力之秋然搢紳之儒抗論以孫吳  
爲首州郡牧守忽恤民之術修將帥之事農桑之民競于



戈之業不可謂務本帑藏歲空而制度歲廣民力歲衰而賦役歲興不可謂節用今國家奄有十州之地承喪亂之餘計其戶口不如往昔一州然而三邊未寧以一州之民而經營九州之地豈可不加意愛惜其力哉臣前以爲州郡興兵則專心軍功不勤民事宜別置將守以盡治理今復以冀州寵秩呂昭冀州戶口最盛田多墾闢又有桑棗之饒國家徵求之府不可任以兵事也若謂北方當須鎮守自可專置大將以鎮安之計所置吏士之費與兼官無異且天下猶人之體腹心充實四肢雖病終無大患今充豫司冀亦天下之腹心也是以愚臣悽悽實願四州之牧守獨修務本之業以堪四肢之重時又議考課之制以考



內外眾官恕以爲用不盡其人雖才且無益所存非所務  
所務非世要乃上疏曰世有亂人而無亂法若使法可專  
任則唐虞不須稷契之佐商周無貴伊呂之輔矣今奏考  
功者陳周漢之法爲綴京房之本旨可謂考課之要臣以  
爲未盡善也其欲使州郡考士必由四科皆有事效然後  
察舉試辟公府親民長吏轉以功次補郡守者或就增秩  
賜爵此最考課之急務也至于公卿及內職大臣亦俱以  
其職考之其有夙夜在官恪謹特立當官不撓貴勢執平  
不阿所私危言危行以處朝廷者明主所宜察也誠使容  
身保位無放退之辜而盡節在公抱見疑之勢公義不修  
而私議成俗雖仲尼爲謀猶不能盡一才况世俗之人乎



今之學者師申商而在法術競以儒家爲迂濶不周世用最世俗之流弊也後考課不行在朝八年論議抗直出爲宏農太守數歲轉趙相以疾去官起爲河東太守遷涿北都督護軍復以疾去恕所在務存大體而已其惠愛得百姓歡心不及于畿後以不得附貴勢屢更外任爲幽州刺史加建威將軍護烏丸校尉以公事爲鎮北將軍程喜所劾免爲庶人徙章武郡著體論八篇興性論一篇卒于徙所有子預

### 鄭渾

鄭渾字文公河南開封人高祖父眾父興俱爲名儒兄泰與荀攸等謀誅董卓不克爲揚州刺史卒渾避亂渡江



依華歆曹操聞其篤行召爲掾遷下蔡邵陵令天下未定  
民皆剽輕不務殖產生子率不舉渾所至課使耕桑重去  
子之法民稍豐給所有男女皆以鄭爲字遷京兆尹以百  
姓新集爲制移居之法使兼複者與單輕者相伍溫信者  
與孤老爲比勤稼穡明禁令由是民安于農而盜賊止息  
復入爲丞相掾丕篡漢爲侍御史加駙馬都尉遷陽平沛  
郡太守郡界下涇苦水澇百姓飢乏渾于蕭相二縣興陂  
遏開稻田郡人皆以爲不便渾曰地勢洿下宜灌溉終有  
魚稻經久之計此豐民之本也躬率吏民興功一冬而成  
比年豐入頃畝歲增民賴其利刻石頌之號曰鄭陂轉山  
陽魏郡太守其治倣此郡下乏材木乃課樹榆爲籬復種



五果榆皆成籓五果豐實入魏郡界村落齊整如一財足  
用饒曹叡善之遷將作大匠自建安迄咸熙燉煌太守淮  
南倉慈孝仁京兆太守濟北顏斐文材宏農太守太原令  
狐邵孔叔濟南相魯國孔父元雋魏郡太守陳國吳瓘清  
河太守樂安任燠皆有政績爲良二千石

贊曰曹操資禍賊視殺人如刈草菅繇羣等復導之復肉  
刑助紂爲虐莫甚于此幸其議格不然禍豈有旣哉繇謂  
名不足以致異人而可以得常士斯言得之矣



續後漢書卷第三十八

上海郁松年原本

宋廬陵蕭常著

邑後學胡芳秋杜邦浚校梓

魏載記第五

王朗

王朗字景興東海郟人以通經爲郎師事太尉楊賜賜卒  
棄官行服徐州牧陶謙舉朗茂材時獻帝在長安關東兵  
起朗爲謙治中與別駕趙昱等說謙曰春秋之義求諸侯  
莫如勤王今天子越在西京宜遣使奉承王命謙乃遣昱  
奉表至長安天子嘉其意拜謙安東將軍以昱爲廣陵太  
守朗會稽太守孫策渡江略地功曹虞翻以爲力不能拒  
不如避之朗不從與策戰敗續浮海至東治策追擊之又



大破乃詣策降自稱擒虜策以其儒雅不加害雖罹窮困  
朝不謀夕而收卹親舊分多割少行義甚著曹操表召之  
旣至拜諫議大夫參司空軍事操爲魏王累遷大理罪疑  
從輕時鍾繇明察當法俱以治獄稱丕嗣相位遷御史大  
夫封安陵亭侯旣篡漢拜司空進封樂平鄉侯時有鵜鵠  
集靈芝池令公卿舉獨行君子朗薦光祿大夫楊彪丕欲  
攻孫權上書諫不可丕不從無功而還曹叡初進封蘭陵  
上疏諫修宮室轉司徒卒著易春秋孝經周官傳奏議論  
記皆傳于世子肅字子雍年十八從朱忠讀太元而更爲  
之解遷散騎常侍曹叡時曹真寇漢中肅上疏諫又言宜  
遵舊禮爲大臣發哀薦果宗廟事皆施行又上疏陳政本



曰除無事之位損不急之祿止浮食之費并從容之官官  
必有職任其事事必受祿祿以代耕乃往古之常式當  
今之所宜行也唐虞之時設官分職申命公卿各以其事  
然後惟龍爲納言猶今之尙書也以出內帝命而已甘誓  
曰六事之人明卿亦典事者也周官則備矣及漢之初公  
卿皆以事升朝高祖躬追反走之周昌武帝遙可奉奏之  
汲黯宣帝令公卿五日一朝成帝始置尙書五人自是凌  
遲朝禮遂闕可復五日一朝之儀使公卿尙書各以事進  
廢禮復興所謂名美而實厚者也獻帝崩肅上疏以爲漢  
總帝皇之號曰皇帝有別稱帝無別稱皇則皇是其差輕  
者也故當高祖之時土無二王其父在而使稱皇明非二



王之嫌也今以贈終可止稱皇以配其諡叡不從乃追諡  
孝獻皇帝後領祕書監兼崇文觀祭酒叡嘗問漢桓帝時  
白馬令李雲上書言帝者諦也是帝欲不諦安得不死肅  
對曰但爲失逆順之節原其本意皆欲盡心補國且帝者  
之威過於雷霆殺一匹夫無異螻蟻寬而宥之以示容受  
直言故臣以爲殺之未必爲是也叡又問司馬遷以受刑  
之故內懷隱切著史記非貶孝武令人切齒對曰遷善敘  
事有良史之才謂之實錄武帝聞其述史記取孝景及已  
本紀覽之于是大怒削而投之于今此兩紀有錄無書後  
遭李陵事遂下遷蠶室此爲隱切在孝武而不在史遷也  
時盛修宮室民失農業或後期約刑殺倉卒肅上疏曰孟



軻稱殺一不辜而得天下仁者不爲也漢時有犯罪驚乘輿馬者張釋之奏使罰金帝怪其輕釋之曰方其時上使誅之則已今下廷尉廷尉天下之平也一傾之天下用法皆爲輕重民安得措其手足臣以爲大失其義非忠臣所宜陳也廷尉天子之吏也猶不可以失平而天子之身反可惑謬乎斯重于爲己而輕于爲君不忠之甚也周公曰天子無戲言言則史書之工誦之士稱之言猶不戲而況行之乎故釋之之言不可不察周公之戒不可不法也累遷太常曹芳時曹爽輔政任何晏鄧颺等肅與蔣濟桓範論及時政肅正色曰此輩卽宏恭石顯之屬復稱說邪爽聞之戒晏等曰當共謹之公卿已比諸君前世惡人矣坐



宗廟事免爲光祿勳時有二魚集武庫之屋有司以爲吉祥肅曰魚生于淵而亢于屋介鱗之物失其所矣邊將其殆有棄甲之憂乎其後果有東關之敗司馬師旣廢曹芳使肅迎曹髦于元城而立之累遷中領軍加散騎常侍幸門生縑經者以百數初肅善賈馬之學而不好鄭氏采會異同爲尙書詩論語三禮左氏解及譌定父朗所作易傳皆列于學其所論駁朝廷典制郊祀宗廟喪紀輕重凡百餘篇時樂安孫炎叔然受學鄭元之門稱東州大儒召爲祕書監不就肅集聖證論以譏短元炎駁而釋之及作周易春秋例毛詩禮記春秋三傳國語爾雅諸注又注書十餘篇自漢末徵士燭煌周生烈曹叡時大司農宏農董遇



等亦歷注經傳頗傳于世

王弼

王弼字輔嗣山陽人祖凱侍中粲之從兄父業荊州牧劉表之甥仕至謁者僕射弼幼敏慧年十餘好老氏已能辨晰父爲曹叡尚書郎裴徽爲吏部郎弼未冠往造焉徽異之問曰夫無者誠萬物之所資也然聖人莫可致言而老子申之無已者何弼曰聖人體無無又不可以訓老子是有者也故常言無所不足何晏甚奇之歎曰仲尼稱後生可畏若斯人可與言天人之際乎淮南劉陶善談論爲時所推每與弼語未嘗不自屈弼天下才杰出論難有據當其所得莫能挫也性和易樂安閒解音律其論道賦會文



辭不如何晏超詣隱奧多于晏也頗以所長驕人故時爲  
士君子所疾與鍾會善會議論以校練爲宗然每服弼之  
高致晏每謂聖人無喜怒哀樂其論甚精會等述之弼以  
爲不然夫聖人茂于人者神明同于人者五情也神明茂  
故能體中和以通無五情同故不能無喜怒哀樂以應物  
然則聖人之情應物而無累于物者也今以其無累便謂  
不復應物失之多矣弼嘗注易潁川荀融難弼大衍義又  
注老子爲之指略頗有理致又注道略論太原王濟好談  
老莊嘗云見弼易注所悟者多曹芳時爲尙書郎卒年二  
十四

贊曰景興以德義自將能勉陶謙以春秋勤王之舉而撓



節于孫氏屈身于曹操不足道也禮爲舊君服示不忘本故鄭季不忍名籍以苟富貴田橫之客能以禮葬橫至今稱爲長者肅父子嘗逮事漢獻帝之崩曹叡欲焚迎崇之禮于帝固無所加損爲肅者贊其決可也旣不克爲反欲黜其帝號以媚所事其刻薄寡恩如此眞小人哉

### 王粲

王粲字仲宣山陽高平人曾祖龔祖暢皆爲漢三公父謙爲大將軍何進長史獻帝西遷粲徙長安中郎將蔡邕見而奇之時邕以才學顯貴重朝廷賓客滿座聞粲至門倒屣迎之年旣稚弱軀幹短小一座盡驚邕曰此王公孫有異才吾不如也吾家書籍當盡與之年十七司徒辟詔除



黃門侍郎以時方便皆不就乃之荊州依劉表表以其貌寢不甚加禮表卒勸其子琮歸曹操操操辟爲丞相掾關內侯操置酒漢濱粲奉觴稱操德美以爲三王之舉正人醜其險佞操稱魏王以爲侍中時舊儀廢弛初立法度皆粲典之初粲與人讀道旁碑人問卿能諳誦否粲朗誦之不失一字又嘗觀人圍棋局壞粲爲復之棋者以祀益局更使以他局爲之不悞一道又精于算作算術善屬文舉筆立就無所竄定人以爲宿構然正復精意覃思亦不能加也建安二十三年從操攻孫權道病卒時年四十一始丕爲五官將與其弟植皆好文學粲與北海徐幹廣陵陳琳陳曹阮瑀汝南應瑒東平劉楨竝相友善幹爲司空軍謀



祭酒五官將文學琳前爲何進主簿進欲誅宦官太后不聽乃召四方猛將引兵向京城欲以脅太后琳諫曰易制卽鹿無虞諺有掩目捕雀夫微物尙不可欺以得志況國之大事以詐立乎今將軍總皇威握兵要龍驤虎步高下在心以此而行何異鼓洪爐而燎毛髮但當行權立斷違經合道天人順之而反釋其利器更徵于他大兵旣合强者爲雄所謂倒持太阿授人以柄必不能成功且爲亂階進不納竟及于禍琳避難冀州袁紹使典文章袁氏敗歸曹操責曰昔卿爲本初遺書但可罪狀孤何乃上及父祖琳謝曰箭在弦上不得不發耳操愛其才而不之罪與瑀竝爲司空軍謀祭酒管記室軍國書檄多琳瑀所作嘗



作諸書及檄草成以呈操先是操苦頭風是日疾發臥讀琳所作蹶然而起曰是能愈我病數加厚賜琳徙門下督瑀爲倉曹掾瑒楨亦爲丞相掾轉五官將文學楨以不敬被刑刑竟署吏咸著文賦數十篇瑀以十七年卒琳幹瑒楨竝于二十二年卒丕書與元城令吳質曰昔年多疫親故多罹其災徐陳應劉一時多折觀古今文人類不護細行鮮能以名節自立而偉長獨懷文抱質恬淡寡欲有箕山之志可謂彬彬君子矣著中論二十餘篇辭文典確足以傳後學爲不朽矣德璉常斐然有述作意其才學足以著書雅志不遂良可痛惜孔璋章表殊健微爲繁富公幹有逸氣但未適耳其五言詩之善者妙絕時人元瑜書記



翩翩致足樂也仲宣獨善于詞賦惜其體弱不足以起其  
意至其善處古人無以遠過皆一時之雋也不嘗作輿論  
并孔融而言以爲七子自潁川邯鄲淳繁欽陳畱路粹沛  
國丁儀丁廙宏農楊修河內荀緯等亦有文采而不在七  
人之列粹爲操軍謀祭酒誣奏孔融人畏其筆瑒弟璩字  
休璉亦以文章顯吳質者字季重濟陰人爲丕植所善官  
至鎮威將軍假節督河北諸軍事封列侯又有譙郡嵇康  
下邳桓威亦著稱于時康字叔夜文詞壯麗好言老莊而  
尙奇任俠爲司馬昭所害晉史自有傳威出孤微年十八  
著渾輿經依道以見意後爲安成令瑀子籍仕晉

衛覲



衛覲字伯儒河東安邑人少以才學稱曹操辟爲司空掾  
遷治書侍御史使益州以道梗不通畱關中時關中民散  
徙他郡者漸還本土諸將多引爲部曲覲與荀彧書曰夫  
鹽國之大寶也宜如舊置使監賣以其直益市牛以給民  
勸耕積粟以豐殖關中遠民聞之必日夜思歸又使司隸  
畱治關中以爲之主則諸將日削官民日盛此強本弱枝  
之訓也或以白操操從之始遣謁者僕射監鹽官司隸治  
宏農關中服從召覲還遷尙書操稱王以爲侍中與王粲  
竝典制度丕嗣還爲漢侍郎勸贊禪代之事且爲文告之  
辭丕旣篡漢復爲尙書封陽吉亭侯曹叡初進封閭鄉覲  
奏曰律法者國家之所重而私議之所輕獄吏者百姓之



所懸命而選用之所卑王政之敝未必不由此也請置  
博士轉相教授事遂施行時百姓凋敝而役務方殷魏主  
疏言當今之務宜量入爲出而上方所造愈更增廣修庭  
日崇帑藏日竭昔漢武信求神仙之道謂當得雲表之靈  
以餐玉屑故立仙掌以承之今無求于露而空設之不資  
于用而靡費無益皆所宜裁制也受命典制作又爲魏官  
儀凡所撰述數十篇好古文鳥篆隸草無不善以病卒子  
瓊爲鎮西將軍餘事見晉史建安末尙書右丞潘勗散騎  
常侍王象與覲竝以文章顯又有劉廙者字恭嗣亦有名  
于時仕至侍中著書數十篇與丁儀共論刑禮皆傳于世

劉劭



劉劭字孔才廣平邯鄲人建安中爲計吏詣許太史言正  
旦當日食劭時在尙書令荀彧所在坐者數十人或云當  
廢朝或云宜卻會劭曰梓稗古之良史猶占水火錯失天  
時禮記曰諸侯旅見天子及門不得終禮者四日蝕在一  
然則聖人垂訓不爲變故廢朝禮者或災消異伏或推衍  
謬誤也彧善其言敕朝會如舊日亦不蝕曹丕纂漢爲尙  
書郎散騎侍郎曹丕令集羣書以類相從作皇覽彧時出  
爲陳畱太守召拜騎都尉著律略論遷散騎常侍嘗作趙  
都賦彧善之令賦許都洛都時外興軍旅內營宮室劭作  
二賦俱譏諫焉孫權圍合肥時東方吏士皆分休滿寵表  
請中軍兵并已休將士須集擊之劭議以爲吳師初至心



專氣銳寵以兵少求須兵至未有所失臣以爲可先遣步  
兵五千精騎三千揚聲耀勢騎到合肥疏其行隊多其旗  
鼓引出賊後遏其歸路要其糧道彼聞軍至騎斷其後必  
震怖遁走可不戰而破矣叡從之兵至合肥權果遁走叡  
令作都官考課七十二條又作說略一篇又以爲宜制禮  
作樂著樂論十四篇事成未上而叡死不及施行子芳初  
執經講學賜爵關內侯所撰述法論人物志之類百餘篇  
卒同時東海繆襲陳畱蘇林京兆韋誕譙國夏侯惠任城  
孫該河東杜摯等亦著文賦皆至大官

傅嘏

傅嘏字蘭石北地泥陽人介子之後也弱冠知名司空陳

羣辟爲司空掾時劉劭作考課法事下三府叅難曰按考  
課論雖欲尋前代黜陟之文然其制度闕亡禮之存者惟  
不周典外建侯伯藩屏九服內立列司管齊六職士有常  
員官有常則百揆均任四民殊業故考績可理而黜陟易  
通也自建安以來至于今日日不暇給經邦治戎權法竝  
用百官羣司軍國通任隨時之宜以應政機以古施今事  
雜義殊難得而通也所以然者制宜經遠或不切近法應  
時務不足垂後夫建官均職清理名物所以立本也循名  
考實糾勵成規所以治末也本綱末紀而造制未呈國略  
不崇而考課是先恐不足以料賢愚之分精幽明之理也  
昔先王之擇才必本行于州閭講道于庠序行具而謂之



賢道修則謂之能鄉老獻賢能之書于王王拜受之使長使治此先王取才之義也方今未有六鄉之舉其選才之職專任吏部按品狀則實才未必當任功伐則德行未爲敘如此則殿最之課未盡人才述綜王度敷贊國式體深義廣難得而詳也曹芳時除尙書郎遷黃門侍郎與何晏不平免官起爲司馬懿從事中郎懿殺曹爽以爲河南尹遷尙書叅嘗以爲秦始罷侯置守設官分職不與古同漢氏因之以至于今然儒生學士咸欲錯綜以三代之禮理宏制遠不應時務事與制違名實未副厯代不至于治蓋由是也欲改定官制一依古義今時多艱未能遽革叅嘗論才性同異鍾會集而論之曹髦初封武鄉亭侯母上儉

文欽等欲起兵誅司馬師師眾拒之或以師不宜自行  
惟嘏及王肅勸其行師以嘏守尚書僕射與俱東欽儉敗  
嘏有謀焉及師卒嘏祕不發喪以師之命名其弟昭于許  
昌領其兵竟還洛陽昭輔政嘏進封陽鄉卒年四十七有  
子祗

崔林

崔林字德儒清河武城人少時晚成宗族莫知惟從兄  
異之曹操并冀州以爲鄔長後攻壺關問長史德政最者  
并州刺史張陟以林對于是擢爲冀州主簿遷御史中丞  
丕篡漢爲尚書出爲幽州刺史時北中郎將吳質統河北  
軍事涿郡太守王雄謂林別駕曰吳中郎將上所親重仗



節統事州郡莫不奉牋致敬而崔使君不與相聞若以邊  
塞不修斬卿使君寧能護耶別駕具以白林林曰刺史視  
去此州如脫屣寧當相累耶此州與胡虜接宜鎮之以靜  
擾之則動其逆心特爲國家生北顧憂在官一期寇盜屏  
息猶以不事上司左遷河間太守清論多爲林怨也遷大  
鴻臚曹叡初轉光祿勳司隸校尉爲政推誠簡易務存大  
體是以去後每輒見思散騎常侍劉劭作者考課論制下百  
官議林議曰按周官考課其文備矣自康王以來遂以陵  
遲此卽考課之法存乎其人也及漢之季豈在乎吏部之  
職不密哉今之制度不爲疎濶惟在守一勿失而已若朝  
臣能受仲山甫之重式是百辟則孰敢不肅時司空司徒



竝缺散騎侍郎孟康薦林忠直清儉公輔之器遂爲司空  
封安陽亭侯魏氏三公封侯自林始頃之進封鄉侯魯相  
上言漢立孔子廟裒成侯歲時奉祀辟雍行禮必祭先師  
王家出穀春秋祭祀今宗聖侯奉祀未有命祭之禮宜給  
牲牢長吏奉祀尊爲貴神制三府議博士傳祇以春秋傳  
言立在祀典則孔子是也宗聖適足繼絕世彰盛德耳至  
于顯立言崇明德則宜如魯相所上林議以爲宗聖侯亦  
以王命祀不爲未有命也周公封黃帝堯舜之後及立三  
恪禹湯之世不列于時復特命他官祭也今周公以上達  
于三王忽焉不祀而其禮經亦存其言獨祀孔子者以世  
近故也以大夫之後特受無疆之祀禮過古帝義逾湯文



可謂崇本報德矣無復重祀于非族也曹芳初卒

贊曰人之推尊其師所以尊其道也聖如孔子爲萬世仁義禮樂之主則其所以推尊之禮宜如何韓愈氏有言自天子至郡邑守長通得祀而徧天下者惟孔子與社稷社祭土稷祭穀勾龍與棄特其配享者曷若孔子用王者禮巍然中處天子而下北面拜跪若親弟子然非以其德被萬世所以推尊之者固應爾耶方曹氏割據時魯相請官別給牲牢長吏奉祀可謂知所本耶彼崔林者何人乃云自周公以上至于三王且不與祀秩孔子以大夫而受無疆之祀其禮過矣且有重祀非族之譏是足與語推尊之意哉唐人歸崇敬亦謂天子不當北面請東向以殺太重



腐儒所見大要相若忘本甚矣吾藝祖皇帝嘗至相國浮  
圖問左右當拜不或對以人主不當拜已而幸國學卽北  
面再拜其尊師重道足以興起人心爲後世法惜二子不  
獲身見其事以發其甕中之天

楊俊

楊俊字季才河內獲嘉人受學陳留漢書器重之後以  
時方多亂而河內處四達之衝必爲戰場乃扶攜老弱詣  
京密山間同行者百餘家振卹貧乏宗族知故爲人所略  
作奴婢者凡六家皆傾財贖之轉徙并州本郡王象少孤  
特年十七入爲人奴隸牧羊而私讀書因被筆楚俊嘉其  
才質憐之卽贖象置其家爲之聘妻納產然後與別曹操



以爲丞相掾舉茂才除安陵令遷南陽太守宣德教立學  
校吏民稱之徙爲征南將軍操爲魏王遷中尉丕篡漢復  
守南陽時王象爲散騎常侍薦俊吏名顯著宜還本朝宣  
力輦轂俊自少以人倫自任同郡審固陳畱衛恂皆出自  
兵伍俊資拔獎致咸作佳士固後厯郡守恂御史其明鑒  
行誼多此類初曹植與俊善丕銜之後至宛以市不豐樂  
發怒偏令自殺王象者字義伯與同郡荀瑋等俱爲丕所  
禮及王粲陳琳等亡新進中惟象才最高累遷散騎常侍  
封列侯領祕書監使撰皇覽合四十餘部部有數十篇通  
八百餘萬字象旣性和厚文又溫雅以故當時稱爲名儒  
丕以舊忿殺俊象叩頭流血論救丕曰吾知楊俊與卿本

綱目卷之三  
三  
末今聽卿是無我也俊死象以不能救俊爲恨發病卒

### 高堂隆

高堂隆字升平泰山平陽人魯高堂生之後也少爲諸生  
太守薛悌召爲督郵郡督軍與悌爭論名悌而呼之隆按  
劍叱督曰昔魯定公見侮仲尼厯階趙彈秦箏相如進缶  
臨臣名君義之所討也督軍天色悌驚起止之後去吏避  
地濟南建安十八年曹操召爲丞相軍議掾出爲堂陽長  
曹叡時爲給事中博士累遷散騎常侍時大治殿舍西取  
長安大鐘隆引伶州鳩對周景王鑄鐘以爲諫遷侍中請  
改正朔易服色殊徽號異器械叡從其議改青龍五年春  
三月爲景初元年孟夏四月易服色尚黃犧牲用白從地



正也遷光祿勳時叡崇宮室飾觀閣鑿大行之石英采谷城之文石起景陽山建昭陽殿鑄黃龍鳳皇奇瑋之獸百役竝興作者萬數公卿以下至于諸生莫不展力歆至躬自掘土以率之天作淫雨冀州大水漂沒人民隆上疏極諫以爲始皇不築道德之基而築阿房之宮不憂蕭牆之變而修長城之役當其君臣爲此計也亦欲立萬世之業使子孫長有天下豈意一朝匹夫大呼而天下傾覆哉是以亡國之主自謂不亡然後至于亡賢聖之君自謂將亡然後至于不亡今所與腹心者非三司九列則臺閣近臣宜在無諱而不敢以告是則具臣非鯁輔也昔李斯教秦二世曰爲人主而不悉睢命之曰天下桎梏二世用之秦

綱目卷之三  
遂以亡斯亦滅族是以史遷譏其不正諫而爲世戒書奏  
叡謂中書監令曰觀隆此奏吾甚懼焉隆疾篤又口占上  
疏力諫卒初蔣濟請封禪叡曰聞濟斯言使吾汗出流足  
事寢厯歲後欲議行其事使隆譔定禮儀未成及隆歿叡  
歎曰天不欲成吾事高堂生舍我而亡也



續後漢書卷第三十九

上海郁松年原本

宋廬陵蕭常著

邑後學

胡芳秋校梓  
杜邦浚

魏載記第六

崔烈

崔烈字季珪清河東武城人少好擊劍尙武年二十三鄉移爲正始感激讀論語韓詩受學于鄭元以琴書自娛袁紹辟爲騎都尉紹治兵于黎陽次于延津烈諫曰天子在許民望助順不如守境述職以寧區宇不聽遂敗于官渡曹操破袁氏自領冀州辟爲別駕從事操攻并州畱傅子丕于鄴操爲丞相烈爲東西曹掾屬徵事及爲魏公除尙書時丕弟植有才而愛操欲有所立而狐疑未決以函令

密訪于外惟劉露板荅曰立子以長五官將仁孝聰明宜承正統劉請以死守之植劉之兄子壻也操喜其公遷中尉劉鬚長四尺有威重朝野瞻望總齊清議多所甄拔嘗薦鮑 馬 楊訓雖才不足而清貞自守操卽禮辟之後操僭稱魏王訓發表稱贊德美時人或笑其希世浮僞謂劉爲失所舉劉從訓取表草視之與訓書曰省表事佳耳時乎時乎會當有變時劉本意譏論者好譴呵而不尋情理有白劉此書傲世怨謗者操怒曰謬言生女耳耳非佳話會當有變時意旨不遜於是罰爲徒隸使人視之神色不撓操愈怒曰劉雖被刑而通賓客虬鬚直視若有所愠遂殺之劉名知人從弟林少未知名劉曰此所謂大器晚成終



必遠到初見涿郡孫禮盧毓曰孫疏亮亢烈剛簡能斷盧  
清警明理百鍊不消皆公才也三人後皆至鼎輔友人公  
孫育宋階蚤卒剡撫其孤若己子其鑒識篤義類如此操  
性忌刻有所不堪者魯國孔融南陽許攸婁圭等皆以非  
罪見殺而剡與融最爲世所痛惜

毛玠

毛玠字孝先陳畱平上人曹操至兗州辟爲治中從事語  
操曰今朝廷播遷生民廢業公家無經歲之儲百姓無固  
安之志難以持久袁紹劉表雖地廣民強皆無經遠之謀  
未有樹基建本者也夫兵義者勝守位以才宜奉天子以  
令不臣脩耕植蓄軍資如此則霸業可成操納其言遷丞

相東曹掾與崔烈竝典選其所用皆清正之士雖有盛名而行不由本者終莫得進務以儉率人由是天下士莫不以廉節自勵雖貴寵之臣輿服不敢過度長吏至圻面羸服常乘柴車軍吏入府朝服徒行至有身攜壺漿入官寺者操歎曰用人如此使天下人自治吾復何爲哉子丕爲五官將屬玠以所親玠曰老臣以能守職幸得免戾不奉命操還自鄴議欲并省職司玠請謁不行時人疾之咸欲省東曹乃共白舊西曹爲上東曹次之宜省東曹操知其意令曰日出于東月盛于東凡人言方亦復先東遂省西曹初操平檣城班所獲器物以素屏風素馮几遺玠曰君有古人之風故遺君以古人之服玠雖位通員布衣蔬



食撫育兄遺孤注篤祿賜以族宗族家無贏資遷右軍節  
操稱魏王除尚書僕射復典選舉時子丕雖長而弟植有  
寵玠密白近者袁紹以嫡庶不分覆宗絕祀廢立大事非  
所宜問後會黎條玠起更衣操目之曰此所謂國之司直  
者也魏圖既死玠內不悅有白玠出見鯨面反者其妻子  
沒爲官奴婢玠言使天不雨者蓋此也操大怒收玠付獄  
桓階和洽救之免官卒于家

贊曰聖人作易畫卦蓋至于節而後制行之意寓焉夫節  
坎上兌下坎爲水兌爲澤澤上之水不出夫澤瀦而無泄  
則無以潤下泄而不已則涸矣節之義所由著也其始曰  
苦節不可貞至其終則又曰苦節貞凶蓋節之義不貴夫

過過則人情有所不堪是爲苦節故曰不可以爲正雖正而凶矣夫一概難堪之行聖人所不爲安可通行乎天下聖人不求異于人如此[劉]玠二子疾時侈靡方其典選一切以儉節取人士大夫至垢面羸服身持壺漿以入府寺既不足以激天下之貪而矯爲不情相師成風在當時已不能免議者之云云古人處事求爲可繼二子雖有志厲俗而矯枉過直不得中道是豈足與語聖人議德行之意云

鮑勛

鮑勛字叔業泰山平陽人父信靈帝時爲騎都尉濟北和黃巾入境以救曹操遇害操以舊恩辟勛爲三和掾建安



二十二年爲太子中庶子累遷魏郡西部都尉子丕妻  
氏弟爲曲周縣吏盜官布法應棄市操時在譙丕留鄴數  
手書爲之請勛不敢擅縱具列上勛前在東宮守正不撓  
丕固不悅及是悲望滋甚會郡界休兵有失期者密令中  
尉奏免勛官久之拜侍御史丕篡漢兼侍中每陳今之所  
急惟在兵農臺榭苑囿宜以爲後時丕出游獵勛上疏力  
諫丕手毀其疏而竟行獵問侍臣曰獵之爲樂何如入  
侍中劉曄對曰獵勝于樂勛抗辭曰夫樂上通神明下和  
人理故移風易俗莫善于樂而獵驅逐原野傷生育之理  
劉曄佞諛不忠阿順過戲之言昔梁丘據取媚于遄臺曄  
之謂也請有司議罪丕怒罷還卽出勛爲右中郎將陳羣

司馬懿竝舉勛爲宮正宮正御史中丞也不不得已而用之百僚嚴憚不欲攻孫權勛諫以爲不可丕益忿之左遷治書執法丕自壽春還屯陳畱郡界太守孫邕過勛時營壘未成但立標埒邕邪行不由正道軍容吏劉曜欲劾之勛以塹壘未成救止軍還雒陽曜有罪勛奏黜遣而曜密白勛私解邕事收付廷尉廷尉議正刑五歲三官駁依律罰金二斤丕大怒曰勛應死而汝等縱之收三官以下付刺姦當令十鼠同穴太尉鍾繇竝言勛父信有功于國請貰其罪丕不許殺之後二旬丕亦死人莫不爲勛飲恨

徐邈

徐邈字景山燕國薊人曹操以爲東曹議令也操稱魏王



爲尙書郎時法禁酒而邈私飲酣醉校士趙達問以曹事  
邈曰中聖人達白之操大怒將軍鮮于輔進曰平日醉  
謂酒清者爲聖人濁者爲賢人邈素脩謹偶醉言耳竟坐  
免丕篡漢爲譙相累遷潁川典農中郎將所在著稱賜爵  
關內侯丕至許昌問邈曰頗復中聖人否對曰昔子反斃  
于穀陽御叔罰于飲酒臣嗜同二子不能自懲時復中之  
然宿疇以醜見傳而臣以醉見識丕大笑顧左右曰名不  
虛立遷撫軍大將軍軍師曹叡初爲涼州刺史風化大行  
百姓歸心討叛羌有功封都亭侯加建威將軍賞賜皆散  
之將士妻子衣食不給還爲大司農遷司隸校尉百僚憚  
之後拜司空歎曰三公論道之官無其人則缺豈可以老

病忝之哉固辭延熙中卒盧欽著書稱其美曰徐公志高  
行潔才博氣猛其施之也高而不狷潔而不介博而守約  
猛而能寬聖人以清爲難而徐公之所易也或問欽徐公  
當操之時人以爲通自在涼州及還京師人以爲介何也  
欽荅曰往者毛孝先崔季珪等用事貴清素之士于時皆  
變易車服以求名而徐公不改其常故人以爲通比來天  
下奢靡轉相倣效而徐公雅尙自若不與俗同故前日之  
通乃今日之介也是世人之無常而徐公之有常也欽之  
論如此

胡質

胡質字文德楚國壽春人父敏字通達以方正稱質少與



蔣濟朱績俱知名于江淮間曹操問濟曰胡適達長者有子若孫否濟曰有子曰質規模大略不及于父至于精夏綜事過之操名爲賴王令將軍張遼與其護軍武周有隙遼欲請質爲保佐質辭以疾他日謂質曰僕委意于君何以相辜如此質曰古人之交也取多知其不貪奔北知其不怯聞流言而不信故可終也武伯南身爲雅士往者將軍稱之不容于口今以睚眦之恨乃成嫌隙況質才薄豈能終好是以不願也遼悟與周如初子丕篡漢徙吏部郎爲常山太守遷任東莞士盧顯爲人所殺質曰此士無讐而有少妻所以死也悉見其比居年少書吏李若見問而色動遂窮詰若卽首服每軍功賞賜皆推之將士在郡九

年吏民便安遷征東將軍假節都督青徐諸軍事廣農積  
穀有兼年之儲置東征臺且田且守性沈實內察不以其  
節檢物所去見思延熙十三年卒家無贏貲惟有賜衣書  
篋而已有子威

桓階

桓階字伯緒長沙臨湘人太守孫堅舉階孝廉除尚書郎  
父喪還鄉里會堅擊劉表戰死階詣表乞堅喪表義而與  
之曹操與袁紹相拒于官渡劉表舉州應紹階說其太守  
張羨曰夫舉事而不本于義未有不敗者也故齊桓率諸  
侯以尊周晉文逐叔帶以納王今袁氏反此而劉牧應之  
取禍之道也明府必欲立功明義全福遠禍不宜與之同



也羨曰然則何向而可曰曹操雖弱奉王命而討有罪誰敢不服今若舉四郡爲之內應不亦可乎羨乃舉長沙及旁三郡拒表遣使詣操操說會操軍未得南而表攻羨羨病死城陷階自匿久之表辟爲從事因辭疾去操定荊州聞其爲羨謀異之辟爲丞相主簿操稱魏王爲虎賁中郎將侍中時子植有寵階數陳丕德優齒長宜爲儲副公規密諫前後懇摯遷尙書典選舉丕篡漢遷尙書令封高鄉亭侯加侍中階疾丕親臨視謂曰吾方託六尺之孤于卿勉之徙封安樂鄉尋拜太常卒

裴潛

裴潛字文行河東聞喜人避亂荊州劉表待以賓禮潛謂

所親王粲司馬芝曰劉牧非伯王之才乃欲西北自處其  
敗無日矣曹操定荊州辟參丞相軍事時代郡大亂操以  
爲太守烏丸王及其大人凡三人各稱單于專制郡事前  
守莫能治正操欲授潛兵以鎮討之辭曰代郡戶口繁夥  
士馬控弦以萬數單于自知放橫日久內不自安今將兵  
住必懼而拒境少則不見憚宜以計圖之遂單車之郡單  
于驚喜潛撫之以靜單于以下脫帽稽顙悉還前後所略  
婦女財物潛按誅郡中大吏與單于爲表裏者十餘人北  
邊大震百姓歸心在郡三年還爲丞相理曹掾操稱其治  
代之功潛曰潛于百姓雖寬于諸胡爲峻今繼者必以潛  
爲過嚴而事加寬惠過寬必弛旣弛又將攝之以法此訟



爭所由起也以勢料之代必復叛于是操淡海還潛之迹  
後數十日三單于反問至操乃遣其子彰討之出爲沛相  
遷兗州刺史子丕篡漢爲散騎常侍除魏郡潁川典農中  
郎將奏通貢舉比之郡國曹叡初入爲尙書封青陽亭侯  
累遷尙書令奏正分職料簡名實出事使斷官府者百五  
十餘條延熙中卒性廉謹每之官不與妻子俱行爲兗州  
時嘗作一胡牀及去畱以挂柱家人或并日而食其家教  
有似石奮自漢末少能及者然而無所薦進世稱其潔而  
己子秀時有何夔梁習者皆陳郡人與潛俱參曹操軍事  
夔字叔龍爲操東曹掾言于操曰軍興以來制度草創用  
人未詳其本是以各引其類而忘道德夔聞以賢制爵則

民慎德以庸制祿則民興功自今所用宜先核之鄉閭使長幼順敘無相踰越顯忠直之賞明公實之報則賢不肖別矣又宜脩保舉故不以實之令使有司別受其負在朝廷之臣時受教與曹竝選者各任其責上以觀朝臣之節下以塞爭競之源則天下幸甚操稱善拜尙書僕射遷太子太傅子丕時封成陽亭侯子曾嗣

梁習字子虞爲操西曹令史累遷并州刺史勸課農桑令行禁止貢達名士咸顯于世長老以爲自所聞識未有及者建安十八年州并屬冀州更拜議郎曹丕初復置并州仍爲刺史封中門亭侯治行爲一時最在州二十餘年居處窮約無方面珍物名爲大司農子叡時卒初濟陰王思



與習俱爲西曹令史思因白事失操旨操大怒召主者將加重辟時思近出習往代對已被收繫思乃馳還自陳已罪操歎習之不言思之識分曰何意吾軍中有二義士乎後同時爲刺史思領豫州亦能吏然煩碎無大體不如習

司馬朗

司馬朗字伯達河內溫人懿之兄也九歲人有稱其父字者朗曰慢人親者不敬其親者也客謝之十二試經爲童子郎監試者以其軀幹魁梧而疑之朗曰朗之內外累世長大損年以求蚤成非吾志也監試者異之其後天下大亂歲饑人相食朗收卹宗族教訓禮節不爲衰世解業年二十二曹操辟爲司空掾出爲堂陽長其治務寬惠不行



鞭朴而民不犯禁先是民有徙籍都內者後縣調當作船  
徙民恐其不辦乃相率私還助之其誠感如此入爲丞相  
主簿朗以爲天下土崩之勢由秦滅五等之制而郡國無  
蒐狩習戰之備今雖未可復行可令州郡竝制兵外備四  
夷內威不軌又以爲宜復井田往者以民各有累世之業  
難中奪之今承大亂之後民人分散土業無主皆爲公田  
宜及此時復之議雖未及施行然州郡領兵議自朗始遷  
兖州刺史政化大行百姓稱之建安二十二年與夏侯惇  
臧霸等伐孫權到居巢會大疫遇疾卒時年四十七同邑  
司馬芝者字子華少爲諸生避亂荊州于魯陽山遇賊同  
行者皆棄老弱定芝獨坐守老母賊至以刃臨之芝叩頭



曰母老惟在諸君賊相謂曰此孝子也殺之不義卒免于禍以鹿車載母居南方十餘年躬耕守節曹操取荊州以爲管長時天下大亂多不奉法郡主簿劉節豪俠賓客千餘家出爲盜賊入亂吏治會郡檄縣發兵而節客王同等當爲兵掾吏白節家未嘗給繇芝不聽兵已集郡而節果藏同等陰令督郵以軍興詭責縣掾史恐乞代同行芝馳檄濟南具陳節罪太守郝光素敬信芝卽以節代同行青州謂芝以郡主簿爲兵累遷大理正有盜官練置都廩上者吏疑女工收繫之獄芝曰夫刑法之失失在苛暴今贓物先獲而後訊其辭若不勝其掠或至誣服誣服之情不可以折獄且簡而易從大人之化不失有罪庸世之治耳

今有所疑以隆易從之義不亦可乎操從其議歷甘陵沛  
陽平大守所至有稱入爲河南尹抑強植弱私謁不行中  
官嘗欲以事託之而不敢言因其妻之伯父董昭昭猶憚  
之不爲通門下循行有疑門幹盜簪幹不服芝教曰凡物  
有相若而難辨者人非離婁鮮能不惑就其實然循行何  
忍重惜一簪輕傷同類乎寢勿問曹叡時賜爵關內侯居  
官十一年數議科條所不便者尋以公事免復爲大司農  
性亮直不矜廉隅與賓客談論有不可意面折其短退無  
異言卒官子岐累遷廷尉剛正有父風











































續後漢書卷第四十

上海郁松年原本

宋廬陵蕭常著

邑後學  
胡芳秋校

魏載記第七

田疇

田疇字子泰右北平無終人好讀書善擊劍董卓遷帝長安幽州牧劉虞歎曰賊臣作亂朝廷播蕩身爲宗室遺老今欲奉使展效臣節安得不辱命之士乎眾以疇對時年二十二虞備禮見之辟爲從事具車騎將行疇乃選其家客與年少之慕從者二十騎俱往旣取道乃更上西關出塞傍北山直趨朔方從間道到長安致命詔拜騎都尉疇以天子方蒙塵不敢佩荷榮寵固辭不受朝廷高其義三



府竝辟皆不就旣還虞已爲公孫瓚所害乃謁虞墓卒事  
哭泣而去瓚聞之大怒曰汝何哭劉虞墓而不送章報于  
我疇對曰漢室衰頹人懷異心惟劉公不失忠節章報所  
言于將軍不美恐非樂聞故不進也且將軍方舉大事以  
求所欲旣滅無罪之君又讐守義之臣臣恐燕趙之士皆  
將蹈東海而死耳豈忍從將軍者乎瓚壯其對釋不害猶  
拘之軍中或說瓚曰田疇義士君弗能禮而又囚之恐失  
眾心乃縱遣疇得北歸帥宗族及他附從者數百人掃地  
而盟曰君仇不報吾不可立于世矣遂入徐無山中營溪  
險平敞地而居躬耕以養父母百姓歸之五千餘家乃爲  
要東使不相犯又制爲昏嫁之禮興學校以講授眾皆便



之至道不拾遺北邊翕然服其威信袁紹父子數遣使辟  
召皆不行疇嘗忿烏丸每賊殺其郡之冠蓋有欲討之意  
建安十二年會曹操伐烏丸未至遣使辟疇遂隨使者至  
軍署司空戶曹掾令曰田子泰非吾所宜吏者卽舉茂才  
拜疇令不行從軍至無終時方夏水潦而瀕海滂下渟滯  
不通虜亦遮守蹊要軍不得進操患之以問疇疇曰此道  
秋夏常水淺不通車馬深不載舟船舊北平郡治在平岡  
道出盧龍達於柳城自魏武以來陷壞斷絕垂二百載而  
尙有微徑可通今虜以大軍當由無終不得進而懈弛無  
備若回軍從盧龍口越白檀之險出空虛之地路近而便  
襲其不備蹋頓之首可不戰而致也操從之乃引軍還而



署大木表于水際路旁曰方今夏暑道路不通且俟秋冬復進軍虜候騎見之誠以爲軍去也操乃令疇將兵爲鄉導上徐無山出盧龍厯平岡登白狼堆去柳城二百餘里虜乃覺單于自臨陳大敗之斬獲追奔遂至柳城軍還入塞論功封亭侯疇自以始由避難帥眾遁逃志義不立反以爲利非本意也固辭操知其誠許之遼東斬送袁尙首操令三軍敢有哭者斬疇以嘗爲尙所辟乃往弔祭操亦不問從攻荊州還操追念疇功復申前命疇上疏陳誠以死自誓操不聽至于數四終不受疇素與夏侯惇善操令以私情諭之無告我意也惇問之曰疇負義逃竄之人耳蒙恩得全豈可賣盧龍之塞以易賞祿哉縱國私疇疇獨



不愧于心乎將軍雅知疇者猶復如此若必不得已請效  
死于前言未卒涕泗橫流惇具以告操知不可屈乃拜議  
郎年四十六卒

王修

王修字叔治北海營陵人年七歲母以社日亡來歲里中  
社修念母哭泣哀甚里中爲之輟社年二十游學南陽止  
張奉舍奉舉家疾無相視者修親隱卹之疾愈乃去初平  
中孔融召爲主簿守高密令高密孫氏素豪俠客數犯法  
民有被劫者賊入孫氏吏不能執修將吏民圍之孫氏拒  
守吏民畏憚不敢近乃令吏民敢有不攻者與同罪孫氏  
懼乃出賊自是豪強懾服舉孝廉遜邴原融不聽會時方



亂道梗不行頃之郡中有反者修聞夜奔赴融所賊初發融謂左右曰能冒難來惟王修耳言終而修至時膠東多盜復令守膠東令至則斬其強宗公沙盧等撫慰其餘由是盜賊衰息融每有難雖休于家無不卽至融常賴修以免袁譚在青州辟爲治中從事別駕劉獻數毀短修後獻以事當死修理之得免人以此多之轉別駕袁尙攻譚譚軍敗修率吏民往救譚欲攻尙修諫曰兄弟還相攻擊敗亡之道也譚不說然知其忠節後又問修計將何出修曰夫兄弟左右手也譬人將鬪而斷其右手而曰我必勝可乎夫棄兄弟而弗親天下其誰親之屬有讒人交構其間以求一朝之利願明使君勿聽也若斬佞臣數人復相親



睦可以得志天下譚不聽後曹操攻譚于南皮修時轉餉  
在樂安聞譚急將所領兵馳赴至高密聞譚死下馬號慟  
曰無君焉歸遂詣操乞收葬譚操聽之袁氏政寬在職勢  
者多蓄聚操破鄴籍審配等家貲以萬數及破南皮閱修  
家穀不滿十斛有書數百卷操歎曰士不妄有名乃辟爲  
司空掾行司金中郎將遷魏郡太守仆強植弱信賞必罰  
百姓稱之操稱魏王爲大司農郎中令時議行肉刑修以  
爲未可徙奉常嚴才謀變夜攻掖門修聞亂將官屬至宮  
門操在銅雀臺望見曰彼來者必王叔治也相國鍾繇謂  
修曰舊京城有變九卿各居其府修曰食其祿焉避其難  
居府雖舊制非赴難之義頃之病卒子儀字文表高亮雅

正爲司馬昭安東司馬以抗直爲昭所害儀子裒字偉元  
少立操尙痛父非命終身不仕事皆見晉史

### 常林

常林字伯槐河內溫人年七歲有父黨造門問林伯先在  
否汝何不拜對曰臨子字父何拜之有性嗜學帶經耕鋤  
其妻饁之雖在田中相敬如賓少單貧非勤所及不取于  
人刺史梁習薦州境名士楊俊王淩王象荀偉及林子曹  
操操皆以爲縣長林宰南和以政最超遷博陵太守幽州  
刺史所至著稱子丕篡漢遷少府封樂陽亭侯轉大司農  
曹叡初進封高陽鄉侯徙光祿勳太常司馬懿以林鄉里  
耆德每爲之拜或曰司馬公貴重君宜止之林曰司馬公



自欲崇長幼之序爲後生之法貴非吾之所畏拜非吾之所制也時論以林操尙清峻欲置之公輔林遂稱疾篤拜光祿大夫年八十三卒時馮翊吉茂河間沐竝鉅鹿時苗皆與林齊名茂字叔暢好學不恥惡衣惡食而恥一物之不知建安初與扶風蘇則隱居南山州舉茂才除臨汾令居官清靜吏民不忍欺累遷議郎卒竝字德信爲人公而果不畏強禦曹操召爲軍謀掾曹芳時爲三府長史孫權將朱然諸葛瑾攻圍樊城遣船兵于峴山東斫材牂柯軍人作食有先熟者呼後熟者共食後熟者不往呼者曰汝欲作沐德信耶其名流遠方如此當時不知皆以爲前世人也累遷濟陰太守召拜議郎年六十餘自作終制以戒

其子苗字德胃清白自守性尤疾惡爲壽春令令行風靡  
始之官乘輦車犢牛歲餘牛生一犢謂主簿曰令來時無  
此犢犢乃淮南所生吏曰六畜不識父自當隨母苗不聽  
時人以爲矯由此名聞天下累遷典農中郎將然性剛褊  
初爲壽春時嘗謁治中蔣濟濟嗜酒適醉不能見苗恚忿  
刻木爲人書曰酒徒蔣濟置牆下朝夕射之後濟官太尉  
亦不以苗毀己爲嫌

### 和洽

和洽字陽士汝南西平人避亂客武陵曹操略地荊州辟  
爲丞相掾時毛玠崔<sub>烈</sub>典選舉先尙儉節洽曰天下大器  
在位與人不可以節拘也儉素過中自以處身則可以此



律人所失或多今朝廷之議吏有衣新衣乘好車者謂之不清長吏形容不飾衣裘敝壞者謂之廉潔至今士大夫故垢汚其衣藏其輿服朝府大吏至自絜壺飧以入官寺夫立教觀俗貴處中庸爲可繼也今崇一概難堪之行以檢殊塗勉而爲之必至罷瘁古之大教務在通人情而已凡激詭之行則容隱僞矣操稱魏王拜侍中後有白毛玠謗毀操者操怒甚洽陳玠素行有本求按實其事且曰玠誠有謗主之言當肆之市朝若無此事言者加誣大臣以誤主聽二者不加檢覈臣竊不安操克張魯洽陳便宜以時拔軍徙民可省置守之費操不卽從其後竟徙民棄漢中出爲郿中令子丕篡漢爲光祿勳封安城亭侯曹叡初

進封西陵鄉侯時散騎常侍高堂隆奏時風不至而有休  
廢之氣必有司不勤職事以失天常也叡于是引咎博咨  
異同洽以民希耕少浮食者多國以民爲本民以穀爲命  
自春夏以來民窮于役農業有廢百姓囂然時風不至未  
必不由此也消伏之術莫大于節儉轉太常清貧守約至  
賣田宅以自給叡聞之加賜粟帛卒

### 楊阜

楊阜字義山天水冀人以討馬超之功曹操賜爵關內侯  
累遷武都太守郡濱漢中阜卽依冀遂故事安之而已會  
昭烈取漢中以逼下辨操以武都孤遠欲徙其民恐其戀  
土阜威信素著前後徙民使居京兆扶風者萬餘家徙郡



小槐里百姓襁負從之爲政務舉大綱下不忍欺曹丕問  
劉曄等武都太守何如人也皆稱阜有公輔之節未及召  
用而不死曹叡初徵爲城門校尉叡嘗著帽被縹綾半袞  
阜問曰此于禮何法服也叡默然自是不法服不見阜遷  
將作大匠時大治宮室發美女以充後庭數出弋獵大雨  
雹上疏諫叡嘉納遷少府又上疏曰昔邵信臣爲少府于  
無事之世而奏罷浮食今者軍用不足益宜節用叡令羣  
臣議政令不便于民者阜以爲致治在于任賢興國本于  
務農若舍賢而任所私則忘治之甚者也廣開宮館高爲  
臺榭以妨民務此害農之甚者也文俗之吏爲政不通治  
體苟好煩苛此亂民之甚者也百工不厚其器而競作奇

巧以合上意此傷本之盛者也當今之急宜去四甚竝詔公卿郡國舉賢良方正之士而選用之此亦求賢之一端也又上疏欲省宮人之不見幸者乃召御府吏問後宮人數吏守舊令對曰禁密不得宣露臯怒杖吏一百數之曰國家不與九卿爲密反與小吏爲密乎叡聞而愈敬憚之尋死

辛毗

辛毗字佐治潁川陽翟人隨兄評從袁紹紹卒其子尙攻其兄譚于平原譚使毗求援于曹操時操將攻荊州次西平毗見操致譚意操大悅後數日更欲先攻荊州使譚尙自相敝他日置酒毗知操意變以語郭嘉嘉以白操操謂



毗曰譚可信尙必可克否毗曰明公無問信與詐也直當  
論其勢耳袁氏兄弟本相攻非謂他人能間其間乃謂天  
下可定于已也今一旦求救于明公乃可知也顯甫見顯  
思困而不能取此力竭也兵革敗于外謀臣誅于內兄弟  
讒閹國分爲二連年攻伐加以饑饉天災見于上人事應  
于下此乃天亡尙之時也今往攻鄴尙不還救卽不能自  
守還救則譚踵其後以明公之威應窮困之敵擊罷敝之  
寇無異迅風之振秋葉天以袁尙與明公明公不取而伐  
荊州荊州豐樂國未有豐仲虺有言取亂侮亡今二袁不  
務遠略而內相圖可謂亂矣居者無食行者無糧可謂亡  
矣朝不謀夕民命靡繼而不綏之欲待他年他年或登又

自知亡而改修厥德失所以用兵之要矣今因其請救而撫之利莫大焉且四方之寇莫大于河北河北平則六軍盛而天下震操曰善乃許譚平次于黎陽明年攻鄴克之表毗爲議郎久之操遣都護曹洪屯下辨使毗與曹休參其軍事還爲丞相長史子丕篡漢遷侍中賜爵關內侯丕欲徙冀州士家十萬戶實河南時旱蝗羣司以爲不可而丕意甚銳毗入諫丕曰卿謂我徙之非邪毗曰誠以爲非也不曰吾不與卿議矣毗曰臣所言非私也社稷之慮也安得怒臣丕不荅起入內毗隨而引其裾丕奮衣而入良久出曰佐治卿持我何太急邪毗曰今徙旣失民心又無以食之遂徙其半嘗從丕射雉丕曰射雉樂乎曰于陛下



樂甚而于羣下甚苦丕默然後爲之希出丕欲攻孫權毗  
諫曰方今天下新定土廣民希夫廟算而後出軍猶臨事  
而懼況今廟算有闕而欲用之未見其利也不從竟無  
功而還曹叡立進封潁鄉時中書監劉放令孫資用事羣  
臣莫不趨之毗獨不往其子敞以爲言毗正色曰吾之立  
身自有本末就與孫劉不平不過令吾不作三公而已何  
害之有大丈夫欲爲公而毀其高節者邪竟爲孫劉所毀  
出爲衛尉叡方營殿舍百姓勞怨又欲平北邙而于其上  
作臺觀以望孟津毗諫曰天地之性高高下下今而反之  
旣非其理加以勞人民不堪命叡乃止丞相諸葛亮以王  
師來討出渭南先是司馬懿數請拒之叡終不聽至是使

毗持節爲懿軍師節度諸軍以抗王師會亮薨復還爲衛尉卒

贊曰疇初立義而不能踐言于後修始若不負袁氏而終于從操林名德自居洽議論不矯而託身非所臯蓋忠於所事者毗賣二袁于曹操以爲進身之階此姦人之雄烏足道哉



續後漢書卷第四十一

上海郁松年原本

朱廬陵蕭 常著

邑後學 胡芳秋 杜邦浚 校梓

魏載記第八

賈逵

賈逵字梁道河東襄陵人初爲郡吏守絳邑長郭援之攻河東所過城邑皆下逵獨堅守援攻之不拔乃引單于并兵急攻城將潰絳父老與援要不害逵旣下援聞其名欲使爲將以兵劫逵不爲動左右引逵使叩頭逵叱曰安有國家長吏爲賊叩頭援怒將斬之絳吏民聞將殺逵皆乘城呼曰負要殺我賢君願俱死耳左右義逵多爲請乃囚于壺關置土窖中以車輪覆其上使人固守逵從土窖中

謂守者曰此間無健兒耶而使義士死于此乎有祝公道者與達并故人適聞其聲憐其守正乃夜潛往引出破械遣夫初達過皮氏曰爭地先據者勝及圍急知不免乃使人間行送印綬歸郡且曰急據皮氏援旣并絳將進兵達恐其先得皮氏乃以它計疑援謀士祝奧援由是留七日郡從達言故得不敗援旣亡乃知前出已者爲祝公道公道河南人後坐法當死達救之力不能得爲之改服後舉茂才除澠池令以喪祖父去官曹操攻馬超至密農曰此西道之要以達領太守與語說之謂左右曰使天下二千石皆如賈達吾何憂尋爲丞相主簿操攻漢中先遣達至斜谷觀形勢道逢水衡載囚人數十車達以軍事急斬竟



重者一人而釋其餘操善之拜諫議大夫與夏侯尚並掌  
軍事子丕代操爲丞相以爲魏郡太守從丕至黎陽津渡  
者亂行斬之乃整至譙以爲豫州刺史時大亂之後州郡  
多不相攝達曰州本以御史出監諸郡以六條詔書察長  
吏二千石以下故其狀皆言嚴能鷹揚有督察之才不言  
安靜寬仁有豈悌之德也今長吏慢法盜賊公行州知而  
不糾天下復何取正乎其二千石以下阿縱不如法者皆  
奏免之丕曰眞刺史州南與吳接達明斥候繕甲兵爲守  
戰備敵不敢犯外修軍政內治民事邊鄙汝造新陂又斷  
山澗長谿水造小弋陽陂又通運渠二百餘里所謂賈侯  
渠是也俄與諸軍攻孫權破呂範于洞浦封陽里亭侯加



建威將軍曹叡時孫權在東關東關當豫州南去江四百餘里權每出兵攻魏輒西從江夏東從廬江而魏之出師亦由淮沛是時州軍在項汝南弋陽諸郡守境而已權無北方之虞東西有急并軍相救故常少敗達以爲宜開直道臨江若權自守則二方無救若二方無救則東關可取乃移屯潦口陳攻取之計叡善之使督滿寵胡質等四軍從西陽直向東關曹休從皖司馬懿從江陵南侵達至五將山休表求深入叡令懿駐軍達東與休合進達度吳無東關之備必并兵于皖休深入與敵戰必敗乃部署諸將水陸竝進行二百里得生口言休大敗權遣兵斷夾石諸將不知所出或欲待後軍達曰休兵敗于外路絕于內進



不能戰退不能還安危之機不及終日敵以軍無後繼故  
至此今疾進出其不意此所謂先人以奪其心也敵見吾  
軍必走若待後軍敵已斷險兵雖多何益乃兼道而行多  
設旗鼓爲疑兵敵見達兵遂退達據夾石以兵糧給休休  
軍乃振初達與休不相能曹丕欲假達節休曰達性剛素  
侮易諸將不可爲督丕乃止及夾石之敗微達休無噍類  
病篤謂左右曰受國厚恩恨不得斬孫權以報子充字公  
閭爲中護軍爲司馬昭弒曹髦者

蘇則

蘇則字文師扶風武功人少以學舉孝廉茂才辟公府皆  
不就性剛直疾惡慕汲黯之爲人厯酒泉安定武都太守



所在有威名曹操攻張魯過其郡與語說之徙爲金城太守時喪亂之後吏民流徙飢窮則極意撫循流民來歸旬月得數千人勸之力穡是歲大稔西平麴演等叛討平之加護羌校尉關內侯進封都亭侯召拜侍中與董昭同僚昭嘗臥枕則膝則推下之曰蘇則之膝非佞人之枕也初則與丕弟植聞丕代漢皆悲哭時丕但聞植所爲而不聞則也嘗從容語其下曰吾應天授禪而聞有哭者何也則謂爲見問鬚髯盡張欲正論以對侍中傅巽肘則曰不謂卿也乃止丕問則曰前破酒泉張掖西域通使燉煌獻徑寸珠可復求市否對曰若化洽中國德流沙漠不求自至求而得之不足貴也不默然後從丕獵槎桎拔失鹿丕大



怒據胡牀拔刀悉收督吏將斬之則曰臣聞古之聖王不以禽獸害人今以獵戲多殺羣吏臣以爲不可敢以死請  
不曰卿直臣也皆赦之然以此見憚左遷東平相道病卒

### 任峻

任峻字伯達河南中牟人時天下大亂與同郡張奮舉郡  
歸曹操操以爲騎都尉妻以從妹每出戰峻常居以給軍  
時歲饑軍食不足羽林監棗祗建置屯田操以峻爲典農  
中郎將祗爲屯田都尉數年中所在積粟倉廩皆實官渡  
之役峻典糧賊數鈔絕糧道乃使千乘爲一部十道方行  
爲複陳以營衛之敵不敢近軍國之饒始于棗祗而成于  
峻操以峻有功封都亭侯遷長水校尉峻寬厚有度而見

理明每有所陳操常稱善建安九年卒棗祇者潁川人本姓棘其先避仇改焉仕至陳畱太守孫據字道彥仕晉

張既

張既字德容馮翊高陵人舉茂才除新豐令治爲三輔第一曹操以爲議郎使參鍾繇軍事累遷京兆尹招懷流民興復縣邑百姓懷之操稱魏王召爲尙書出爲雍州刺史操謂曰還君本州可謂衣錦晝行矣從攻張魯說操拔漢中民數萬家以實長安其後操欲拔漢中守軍恐昭烈北取武都氏以逼關中以問既既曰可勸使北就穀避敵前至者厚其賞則先者知利後必慕之操從其策乃自到漢中引出諸軍令既之武都徙氏五萬餘落出居扶風天水



界是時不置涼州自三輔抵西域皆屬雍州子丕時初置涼州以安定太守鄒岐爲刺史張掖張進執郡守舉兵拒岐酒泉黃華西平麴演各逐太守舉兵以應之旣進兵爲護羌校尉蘇則聲勢故則得以有功進爵都鄉侯涼州盧水胡叛河西大擾丕憂之曰非旣莫能安涼乃以旣代鄒岐爲刺史旣至大破胡斬首獲生以萬數丕說進封西鄉酒泉蘇衡與羌豪鄒戴及丁令胡萬餘騎攻邊旣與夏侯儒擊破之遂上疏請與儒治左城築障塞以備胡西羌恐帥眾二萬餘落降旣臨二州十餘年善政藹聞其所禮辟扶風龐延天水楊阜安定胡遵酒泉龐清燉煌張恭周生烈等後皆爲時用建興初年卒子緝字敬仲以女妻曹芳



拜光祿大夫位特進愼司馬師專國與中書令李豐等謀誅之事泄遇害語在夏侯元傳

杜襲

杜襲字子緒潁川定陵人鍾繇表爲議郎荀彧薦于曹操操以爲丞相軍謀祭酒操稱魏王以爲侍中與王粲和洽竝列從攻張魯道拜駙馬都尉留督漢中軍事綏懷開導百姓自樂出徙雒鄴者八萬餘口夏侯淵爲昭烈所殺軍喪元帥將士失色襲與張郃等糾攝軍事權宜以郃爲督以一眾心操還當選留府長史鎮守長安而所選多不當操曰釋騏驎而不乘焉皇皇而更索遂以爲留府長史時關中營帥許攸擁部曲不附操而有謾言操大怒欲攻之



羣下皆諫操橫刀于膝不聽襲入欲諫操逆謂之曰吾計已定卿勿復言襲曰方今豺狼當道而狐狸是先人謂公避強攻弱進不爲勇退不爲仁臣聞千鈞之弓不爲鼯鼠發機萬石之鐘不爲莛撞起音今區區許攸何足勞神武哉操遂厚撫攸攸卽歸附子丕篡漢爲督軍糧御史武平亭侯入爲尙書曹叡時進封平陽鄉侯卒有趙儼者字伯然避亂荊州與襲同居處通有無建安二年詣操操以爲朗陵長曹芳時積官至司空初儼與襲及辛毗陳羣皆同郡知名時號辛陳杜趙云

### 高柔

高柔字文惠陳畱人曹操以爲刺姦令史議法平允夙



夜匪懈至擁膝抱文書而寢操夜嘗出微察諸吏見柔假寐徐解裘覆之而去尋爲丞相倉曹屬轉理曹掾子丕篡漢賜爵關內侯加治書執法遷廷尉丕以宿憾欲枉法殺鮑勛柔固執不從曹叡初封延壽亭侯時大興宮殿百姓勞役博采美女以充後宮柔上疏諫叡嘉納護軍營士竇禮近出不還主將以爲亡表言逐捕沒其妻盈及男女爲官奴婢盈連至州府訴冤莫有省者乃詣廷尉柔問曰汝何知夫不亡盈泣對曰夫少單特養一老嫗爲母事之甚謹又哀兒女非輕狡不顧家者柔復問曰汝夫不與人有怨乎對曰夫良善與人無仇又曰汝夫不與人交錢財乎對曰嘗出錢與同營士焦子文屢求不獲時子文適繫獄



柔乃引子文問所坐徐曰汝頗曾舉人錢不予文曰自以單貧初不假貸于人柔察其色動乃曰汝昔曾舉竇禮錢何言不耶子文情駭應對失敘柔曰汝已殺禮宜卽首服子文情得叩頭具首殺禮本末藏瘞所在乃以其事聞于叡復盈母子爲平民仍頒其獄于境內以禮爲戒在官二十三年轉太常旬日遷司空復徙司徒曹髦立封安國侯轉太尉卒時年九十有王觀者字偉臺東都廩丘人與柔同時仕進累遷涿郡太守曹叡時會郡縣條爲劇中平者主者欲言郡爲中平觀曰何不爲劇主者曰若郡爲外劇恐于明府有任子之責觀曰夫君所以爲民也今郡在外劇則于役條當有所降差豈可以太守之私而負一郡之



民乎後送任子詣鄴時觀惟一子而又幼弱其公如此累遷少府曹髦時封中鄉亭侯轉右僕射曹奐初遷司空卒

### 劉放

劉放字子棄涿郡人漢廣陽順王子西鄉侯宏後也遭亂依漁陽王松後說松歸曹操又爲松答操書其文甚麗操旣善之又聞其說松由是辟參司空軍事操稱魏王與太原孫資俱爲祕書郎參丞相軍事子丕篡漢放資爲左右丞數月放徙爲令收祕書爲中書以放爲監資爲令各加給事中放關內侯資關中侯竝掌機密曹叡立尤見寵任同加散騎常侍放西鄉侯資樂陽亭侯漢丞相諸葛亮出屯南鄭議者以爲可大發兵就攻之叡以問資資曰昔武



皇攻南鄭取張魯陽平之役危而後濟又自往救出夏侯  
淵軍數言南鄭直爲天獄中斜谷道爲五百里石穴耳言  
其險喜出淵軍之辭也今若進軍南鄭道旣險阻計用  
精兵又轉運鎮守南方四州遏禦水賊凡用十五六萬人  
後當更有所發興天下騷動費力廣大此誠陛下所宜深  
慮叡乃止資進封左鄉侯放善爲書檄一時命令多出其  
手孫權與諸葛亮約同舉伐魏邊侯得權書放乃改易其  
辭而傳合之與征東將軍滿寵若欲歸誠封以示亮亮膽  
其書與權將步騭等騭以示權權懼亮自疑深自解說是  
歲俱加侍中光祿大夫遼東平以參謀議各進爵封本縣  
放方城資中都會曹叡病欲以曹宇爲大將軍及領軍將



軍夏侯獻武衛將軍曹爽屯騎校尉曹肇驍騎將軍秦朗  
共輔政宇性恭良陳誠固辭叡引放資入臥內問曰燕王  
正爾爲放資對曰燕王自知不堪大任故耳叡曰爽可代  
宇否放資因贊成之又力陳宜速召太尉司馬懿以綱維  
皇室叡納其言卽以黃紙授放資放資旣出叡意復變令  
止獨召爽與放資俱受遺令遂免宇獻肇朗官太尉懿亦  
至登牀受遺令已而叡死先是放資久典機密獻肇不能  
平殿中有雞栖樹二人相謂此亦久矣其能復幾指謂放  
資放資懼故勸叡召司馬懿及稱贊曹爽而抑退獻肇等  
曹氏之亡禍基于此曹芳旣立加放左光祿大夫資右光  
祿大夫金印紫綬儀同三司放轉驃騎將軍資衛將軍領



監令如故後各年老辭位以列侯朝朔望位特進爽死復以資爲侍中領中書令建興十三年放卒資復句免尋卒放資旣善阿旨又未嘗顯言得失抑辛毗而助王忌以是獲譏于世然亦密陳損益不專道諛云放子正資子宏爲南陽太守宏子楚字子荆

贊曰蘇則聞獻帝之廢而悲不自勝詰董昭之佞而義形于色凜凜有古烈士風然終不免撓節于曹氏惜哉

續後漢書卷第四十一

續後漢書

卷四十一

九





續後漢書卷第四十二

上海郁松年原本

宋廬陵蕭常著

邑後學胡芳秋杜邦浚校梓

魏載記第九

張遼

張遼字文遠雁門馬邑人本聶壹之後以避仇變姓呂布以爲騎都尉布敗歸曹操以中堅將軍從攻袁譚袁尙譚尙破復平遼東柳毅等還鄴操自出迎引與共載拜盪寇將軍從攻袁尙于桺城卒與虜遇遼請戰氣銳甚操壯之自以所持麾授遼遂大破之斬單于蹋頓初操將攻桺城遼諫曰夫許天下之會也今天子在許而公遠出若劉表遣劉元德襲許據之以號令四方公之事去矣操策表必



不能任元德遂行時荊州未定復遣屯長社臨發軍中夜有謀變者火起一軍盡擾遼謂左右勿動是不一營盡反必有造變者欲以亂動人耳乃令軍中其不反者安坐遼將親兵數十人中陳而立有頃乃定卽得首謀者殺之陳蘭梅成以氐六縣叛操遣于禁臧霸等討成遼督張郃朱蓋等討蘭成僞降禁禁還成遂將其眾與蘭合轉入瀾山瀾中有天柱山高二十餘里道險狹步徑纔通蘭等壁其上遼欲進兵諸將以爲道險難入遼曰此所謂一與一勇者得前耳遂進至山下攻之斬蘭成盡俘其眾操論諸將功曰登天山履峻險以取蘭成盪寇功也使與樂進李典等將七千餘人屯合肥操攻張魯教與護軍薛脩署南邊



曰賊至乃發俄而孫權帥眾十萬圍合肥乃其發教曰若  
孫權至者張李二將軍出戰樂將軍守護軍勿得與戰諸  
將皆疑遼曰公遠征在外比救至彼破我必矣及其未合  
逆擊之折其威勢以安眾心然後可守也成敗之機在此  
一戰諸君何疑李典意與遼同于是夜募敢從之士得八  
百人椎牛饗士明日出戰平旦遼被甲執戟先登陷陳殺  
數十人斬二將大呼自名衝壘入至權麾下權大驚眾皆  
走高隴以長戟自衛望見遼所將兵少乃聚圍遼數重遼  
左右麾圍直前急擊圍開遼將麾下數十人得出餘眾號  
呼曰將軍棄我乎遼復還突圍援出餘眾自旦戰至日中  
吳人奪氣還修守備眾心乃安諸將咸服權駐合肥十餘



日城不可拔乃引去遼帥諸將追擊幾獲之拜征東將軍  
建安二十一年操至合肥按行遼戰處歎息良久增其軍  
徙屯居巢子丕篡漢封晉陽侯嘗問所以破吳狀顧左右  
曰此亦古之名虎也爲起第舍又特爲其母作殿後復與  
諸將破權將呂範卒于江都樂進者字文謙陽平衛國人  
軀幹短小以膽力稱從操爲帳下吏操表爲陷陳都尉封  
廣昌亭侯與遼屯合肥有功增封邑建安二十三年卒李  
典者字曼成山陽鉅野人操以爲裨將軍劉表使昭烈北  
伐至葉操遣典從夏侯惇拒之昭烈燒屯去惇帥諸將追  
之典曰敵無故退疑必有伏南道狹險草木蔽翳不可追  
也惇不聽與于禁追之典畱守惇等果遇伏大敗會典救



至昭烈乃去遷捕虜將軍封都亭侯典宗族部曲三千餘  
家居乘氏請徙魏郡操笑曰卿欲慕耿純耶遷破虜將軍  
合肥之役典與遼進皆素不睦遼恐其不與已同意典慨  
然曰此國家大事顧君計何如耳吾不可以私憾而忘公  
義乃帥眾與遼破走敵軍典好學問貴儒雅不與諸將爭  
功敬賢士大夫恂恂若不及軍中稱其長者年三十六卒  
臧霸者字宣高泰山華人與遼等皆從呂布布敗歸操以  
爲瑯琊相操之在兗州以徐翕毛暉爲將兗州亂翕暉皆  
叛既定二人亡命投霸操謂昭烈語霸送二人首霸曰霸  
所以能自立者以不爲此也霸受曹公生全之恩不敢違  
命然王伯之君可以義告願將軍爲之辭昭烈以霸之言



三  
告操操歎息謂霸曰此古人之事而君能行之孤之願也  
乃以翕暉爲郡守時操與袁紹相拒而霸數以精兵入青  
州故操得專事紹不以東方爲憂封都亭侯加威虜將軍  
遷徐州刺史與遼東拒孫權于濡須口拜揚威將軍假節  
復與夏侯惇等屯居巢子丕時遷鎮東將軍進封開陽侯  
封良成與曹休破呂範于洞浦召爲執金吾位特進卒

張郃

張郃字儁乂河間鄭人爲袁紹中郎將官渡之役紹使與  
高覽攻曹操營郃叛紹歸操紹眾于是大潰操以爲偏將  
軍從攻袁尚于鄴拔之操旣降張魯留郃與夏侯淵守漢  
中拒昭烈淵沒于陳郃還陽平是時新失元帥恐爲敵所



乘三軍失色乃推郃爲軍主眾心始安操聞遽自至漢中引出諸軍郃還屯陳倉子丕篡漢以爲左將軍封鄭侯曹叡時漢丞相諸葛亮出祁山郃與亮前鋒馬謖戰于街亭敗之後亮復出祁山至木門與亮戰軍敗死馬于禁者字文則泰山鉅平人累拜虎威將軍與郃及張遼等討梅成陳蘭成降已而復叛奔蘭遼等與蘭相持軍食少禁運餉前後相屬遂擒蘭等時禁與張郃及張遼樂進徐晃俱爲名將操每攻伐迭爲軍鋒建安二十四年關羽圍曹仁于樊使禁帥諸軍往救仁會大霖雨平地水數丈禁七軍皆歿禁遂降羽操聞之曰吾知禁三十年何意臨危處難不及龐德耶後孫權襲殺羽禁復爲吳所得子丕篡漢權遣



禁還不令詣

鄴謂禁

于祠屋畫關羽戰克龐德憤

怒禁降服之狀禁

甚發病卒徐晃者字公明河東

楊人累遷平寇將

晃與夏侯淵拒昭烈于陽平復

遣助曹仁攻關羽屯宛會于禁等皆歿羽圍仁于樊又圍

呂常于襄陽晃以羽難與爭鋒遂屯陽陵陂操遣徐商呂

建等詣晃乃稍前去敵圍三丈所未攻操又遣朱蓋等十

二營詣晃羽自將步騎出戰晃擊之羽退遂追逐與俱入

圍敗之操問之曰吾用兵三十年及所聞古之善用兵未

有長驅徑入敵圍者舉卮酒與晃曰全樊襄陽將軍之功

也時諸軍皆集操按行諸營士卒皆離陳觀而晃軍營獨

整將士駐陳不動操歎曰徐將軍可謂有周亞夫之風矣

整將士駐陳不動操歎曰徐將軍可謂有周亞夫之風矣



子丕初進封楊侯性儉約畏慎將軍常遠斥候先爲不可勝然後戰追奔爭利士不暇食曹叡時卒

### 龐德

龐德字令明南安狁道人爲郡吏從馬騰討叛羌有功遷校尉曹操使鍾繇帥關中諸將討袁譚將郭援德爲軍鋒親斬援首拜中郎將封都亭侯後歸操操聞其勇拜立義將軍與曹仁等共屯樊攻關羽與羽戰射羽中額常乘白馬羽軍謂之白馬將軍皆憚之仁使德屯樊北十里會霖雨漢水暴溢平地五六丈德與諸將避水隄上羽以大船四面射之自平旦至日中短兵接戰益怒而水浸盛吏士皆降德乘小船欲還水盛船覆爲羽所殺有許褚典韋閭



溫龐清者與德同時皆驍勇忠于曹氏者褚字仲康譙國譙人長八尺腰帶十圍勇力絕人漢末聚族里堅壁以禦寇時葛陂賊萬餘人攻其壁糧且盡僞與賊和以牛易食賊取牛牛輒奔還褚乃出陳前一手拽牛尾行百餘步賊眾驚不敢取牛而去曹操徇淮汝褚以眾歸操操見而壯之曰此吾樊噲也卽日拜都尉從操討韓遂馬超于潼關操將北渡臨濟河先渡兵獨與褚及虎士百餘人畱南岸斷後超將步騎萬餘人來追褚扶操上船敵戰急矢下如雨軍爭濟船欲沒褚斬攀船者左手舉馬鞍蔽操船工中流矢死褚右手進泝船僅得渡是日微褚操幾不免後操與超單馬會語惟褚獨從超負其勇陰欲刺突操素聞褚



勇疑從騎卽褚乃曰公有虎侯者安在操顧指褚褚瞋目  
盼之超不敢動後數日會戰大敗超等遷武衛中郎將武  
衛之號自此始軍中以褚力如虎而癡故號虎癡是以超  
呼爲虎侯曹丕篡漢封萬歲亭侯遷武衛將軍子叡初進  
封牟鄉卒韋陳畱已吾人膂力過人有志節從操戰常先  
登陷陳由都尉遷校尉好持大雙戟與長刀軍中爲之語  
曰帳下壯士有典君提一雙戟八十斤後與張繡戰被創  
瞋目大罵而死溫字伯儉天水西城人以涼州別駕守上  
邽令馬超奔上邽郡人任養等舉眾迎超溫止之不能禁  
乃馳還州超復圍州所治冀城甚急州遣溫密往告急于  
夏侯淵敵圍數重乃夜從水中潛出明日敵見其迹追之



執以還超謂曰今成敗可見足下爲孤城請救而執于人  
手義何所施若從吾言語城中東方無救此轉禍爲福之  
計也不然今爲戮矣溫僞許之超乃載詣城下溫大呼大  
軍不過三日至勉之城中皆泣稱萬歲超怒數之曰足下  
不爲命計耶溫不應超攻城久不下故徐誘溫冀其改意  
復謂曰城中故人有欲與我同者不溫又不應遂切責之  
溫曰事君有死無二而卿乃欲長者出不義之言吾豈苟  
生者乎超遂殺之清字子冀酒泉表氏人初以涼州從事  
守破羌長會武成太守張猛反殺刺史邯鄲商令曰敢有  
臨商喪死不赦清聞之棄官奔走號哭喪所乃詣猛裹匕  
首欲因見以殺猛猛知其義士赦遣之不赦由是以忠烈



聞太守徐揖請爲主簿郡人黃昂反圍城請踰城告急于張掖燉煌二郡初疑未可發兵消欲伏劍二郡感其義遂爲發兵未至城陷揖死消乃收斂送喪還本郡行服三年乃還曹操聞之辟爲掾累遷西海太守中散大夫卒初消外祖父趙安爲同縣李壽所殺消舅三人同時病死壽家喜消母娥自傷父讐不報乃帷車袖劍白日刺壽于都亭前徐詣縣曰父仇已報請就戮祿福長壽陽尹嘉義之會赦得免州郡刊石表閭

### 文聘

文聘字仲業南陽宛人爲劉表大將使禦北方表死其子琮嗣曹操攻荊州琮舉州降呼聘欲與俱聘曰聘不能全

州當待罪而已操既濟漢乃詣操操曰來何遲耶聘曰先日不能輔劉荊州以奉國家荊州既沒常欲據守漢川保全境土生不負于孤弱死無媿于地下而計不得已以至于此實懷悲慚無顏早見獻歛流涕操爲之愴然曰仲業卿真忠臣也厚遇之操先定荊州江夏與吳接民心不安乃以聘爲太守委以邊事有功封延壽亭侯加討逆將軍子丕篡漢進封長安鄉侯遷後將軍進封新野侯孫權以五萬眾圍聘于石陽甚急聘堅守不動權疑之語其下曰北方以此人忠臣故委之以此郡今吾至而不動此不有密圖必當有外救遂去之在江夏數十年威振敵國卒呂虔者字子恪任城人爲泰山太守操使督青州諸郡兵討



東萊李條等有功在泰山十餘年甚有威惠封益壽亭侯  
遷徐州刺史威虜將軍辟瑯琊王祥爲別駕民事一以委  
之世多其能任賢曹叡時卒

### 滿寵

滿寵字伯甯山陽昌邑人曹操辟爲西曹屬轉許令時操  
欲殺天下舊德宿望故太尉楊彪以非罪收付縣獄荀彧  
孔融竝屬寵但當受辭勿加考掠寵一無所報考訊如法  
數日求見操曰楊彪考訊母它辭語當殺者宜先彰其罪  
此人有海內名若罪不白必大失民望竊爲明公惜之操  
乃釋彪初融等聞其考掠皆怒及因是得釋更善寵曹叡  
時爲征東將軍封昌邑侯時無歲不有吳師寵上疏曰合



肥城南臨江湖北遠壽春敵攻圍之得據水爲勢官軍救之當先破賊大輩然後圍乃解賊往甚易而兵往救之甚難宜移城內之兵其西三十里有奇險可依更立城固守此爲引賊平地而恟其歸路于計爲便尙書趙咨是其策遂從之是歲權自出圍新城以其遠水積二十日不敢舍舟而去召爲太尉卒子偉以格度知名有田豫郭淮者皆與寵同時立功豫字國讓漁陽雍奴人昭烈甚奇之昭烈爲豫州刺史豫以母老求歸昭烈涕泣與別曰恨不與君共成大事也曹操辟爲軍謀掾累遷弋陽太守所至稱治佐曹彰平定代郡遷南陽太守子丕篡漢使持節護烏丸校尉牽招解雋并護鮮卑轉汝南太守加殄夷將軍孫權



帥眾號十萬攻新城滿寵欲帥諸軍救之豫以爲敵悉眾  
大舉非圖小利欲質新城以致大軍耳宜聽使攻城挫其  
銳氣不當與爭鋒也城不可拔眾必罷怠怠而擊之可大  
克也若敵見計必不攻城勢將自走若便進兵適墮其計  
豫以狀聞叡從之會孫權師退久之徵爲衛尉屢告老司  
馬懿以書論之荅曰年七十而以居位譬猶鐘鳴漏盡而  
夜行不休遂固稱病篤拜大中大夫食祿卿卒時年八十  
二淮字伯濟太原陽曲人舉孝廉除平原府丞曹操畱夏  
侯淵拒昭烈以淮爲司馬淵戰沒軍中洶洶淮收散卒推  
張郃爲軍主眾乃安曹叡時丞相諸葛亮來伐出斜谷竝  
田于蘭坑時司馬懿屯渭南淮策亮必爭北原宜先據之



議者多謂不然淮曰若亮跨渭登原連兵北山隔絕隴道  
搖蕩民夷非吾利也懿善之淮遂屯北原塹壘未成王師  
大至淮逆擊之後數日亮盛兵西行諸將皆謂欲攻西圍  
淮獨謂此見形于西欲使吾兵重應之必攻陽遂耳是夕  
果攻陽遂以有備而退延熙七年夏侯[元]等寇漢中淮督  
諸軍爲前鋒度勢不利輒拔軍遁故不大敗封都鄉侯遷  
征西將軍都督雍涼諸軍事進車騎將軍儀同三司進封  
陽曲侯曹髦時卒

王浚

王浚字彥雲太原祁人叔父允爲漢司徒舉孝廉再遷中  
山太守曹操辟爲丞相掾子丕篡漢拜散騎常侍出爲充



州刺史拒吳師有功封宜城亭侯加建武將軍轉青州刺史布政施教賞善罰惡百姓稱之從曹休南侵休與敵師過于夾石休軍大敗凌力戰決圍休得免徙豫州刺史得軍民驩心始至豫州旌先賢之後求未顯之士各有條教初凌與司馬朗賈逵友善及臨宛豫繼其名迹曹芳時爲征東將軍都督揚州以行商功進封南鄉遷車騎將軍儀同三司就遷司空司馬懿旣殺曹爽進凌大尉自是大權盡歸于懿曹芳擁虛位而已凌每切齒且謂芳昏弱故受制于懿時令狐愚以才能爲兗州刺史凌甥也凌乃與愚密謀起兵誅懿廢芳而立操子彪謂彪長而才會愚病死凌旣失援復遣其將軍楊劭以事密告兗州刺史黃華華



等乃以其事白懿懿遂帥眾攻凌懿軍奄至百尺凌不知所出乃乘船單出迎懿懿遣人護送京師凌至項過賈逵祠呼曰賈梁道王凌固忠于魏社稷者惟有神知之遂飲藥死懿至壽春盡殺凌黨夷其族并殺彪等是歲八月懿疾夢凌逵爲厲甚惡之後數歲文欽母丘儉諸葛誕等相繼起義欲誅懿子師昭皆不克儉字仲恭河東聞喜人父興爲武威太守有功封爲高陽鄉侯儉襲爵爲平原侯文學曹叡時累遷幽州刺史度遼將軍以定遼東功進封安邑遷左將軍假節監豫州諸軍事領豫州刺史轉鎮南將軍換鎮東都督揚州時司馬師廢曹芳儉憤其不臣與揚州刺史前將軍文欽起兵誅之延熙十八年正月以曹



叡妻郭氏令移郡國罪狀師且爲壇于壽春城西與諸將  
插血同盟帥兵五六萬人與文欽等渡淮北討師師帥中  
外軍拒儉等使其監軍王基爲前鋒據南頓儉軍不利有  
尹大目者幼爲曹氏家奴常在曹芳側師與俱行大目知  
師畏憤成疾一目突出乃曰大目昔爲文欽所信乞追語  
令罷兵師卽遣之大目單騎被鎧追欽遙與語大目心實  
主曹氏謂曰君侯何苦不復忍數日中邪欲使欽解其意  
欽不悟乃更厲聲罵大目曰汝曹氏家人不念報恩反與  
司馬師作逆不顧上天天不佑汝乃張弓傳矢欲射之大  
目泣曰世事敗矣善自努力是日欽敗儉聞之遂遁眾潰  
爲安風人所殺中外聞之莫不悵惜儉子甸字子邦有重



名曹芳之廢也。旬謂儉曰：大人居方嶽重任，國傾覆而晏然自若，將負四海之責。儉然之。及儉起兵，司馬師問旬所在，知其不行，曰：旬不來。儉無能爲也。儉初起兵，遣其子宗等西入吳，文欽亦奔吳。吳以爲都護假節鎮北大將軍譙侯誕字公休，琅琊陽都人，累遷鎮東將軍、都督揚州諸軍事，封山陽亭侯。徙豫州。儉之敗也，壽春中十萬餘口懼誅，悉流迸山澤或亡入吳。以誕久在淮南，乃復以爲鎮東大將軍，儀同三司，都督揚州。誕以懿父子專政，擅誅殺而王凌、母丘儉等皆起義不克，反爲所夷滅。心每不平。延熙末，舉兵誅司馬昭，軍敗被害。麾下數百人坐不降昭，悉斬之。皆曰：爲諸葛公死，無恨。其得人心如此。晉習鑿齒著論曰：



儉感曹叡之顧命故爲此役君子謂儉事雖不克可謂忠矣夫竭節而赴義者我也成之與敗者時也我苟無時雖成何可必乎忘我而不自必乃所以爲忠也古人有言死者復生生者不愧若儉者可謂不愧矣

王昶

王昶字文舒太原晉陽人少與同郡王淩俱知名淩年長兄事之爲曹丕文學丕旣篡漢再遷雒陽典農勸民稼穡墾田特多遷兗州刺史子叡初加揚烈將軍著治論略依古制而合于時務者二十餘篇又著兵書十餘篇言奇正之用上之名其兄之子及其子以見意兄子默字處靜沈字處道其子渾字元冲深字道冲且爲書戒之其略曰吾



與時人從事雖出處不同然有所取潁川郭伯益好尙通  
達敏而有知其爲人因曠不足輕貴有餘得其人重之如  
山不得其人輕之如艸吾以所知親之昵之不願兒子爲  
之北海徐偉長不沾高名不求苟得淡然自守惟道是務  
其有所是非則託古人以見意當時無所褒貶吾敬之重  
之願兒子師之東平劉公幹博學有高才然性行不均少  
所拘忌得失足以相補吾愛之重之不願兒子效之安樂  
任昭先純粹履道內敏外恕推遜恭謙處不避滂沱而能  
勇在朝忘身吾友之善之願兒子遵之若引而伸之觸類  
而長之汝其庶幾舉一隅耳及其用財先九族其施舍務  
周急其出入存故老其議論貴無貶其進仕尙忠節其取



人務道實其處勢戒驕淫其貧賤慎無戚其進退念合宜其行事加九思如此而已矣吾復何憂哉曹芳時累轉徐州刺史封武觀亭侯遷征南將軍假節都督荆豫諸軍事昶以爲國有常眾戰無常勝地有常險守無常勢今屯宛去襄陽三百餘里諸軍散屯船在宣池有急不足相赴乃表徙治新野廣農墾殖倉廩充滿司馬懿旣殺曹爽乃博問大臣得失昶陳治略五事其一欲崇道篤學抑絕浮華其二用考試以謹黜陟其三欲令居官者久于其職其四欲約官實祿以勵廉恥其五欲絕侈靡務崇節儉以破敵功遷征南大將軍儀同三司進封京陵侯後母上儉諸葛誕等憤司馬師專國欲起兵誅之昶附師爲之盡力儉等

既遇害進驃騎將軍遷司空卒兄子沈與司馬昭謀弑曹髦者

### 王基

王基字伯興東萊曲城人刺史王淩辟爲別駕尋擢中書侍郎曹叡盛修宮室基上疏切諫散騎常侍王肅著經傳解及論定朝儀改易鄭元舊說而基據依元義常與抗衡出爲安豐太守郡接吳境爲政清嚴設備甚謹敵不敢犯加討寇將軍吳嘗大發兵集建業宣言欲北伐揚州刺史諸葛誕使基策之基曰昔孫權再至合肥一至江夏其後全琮出廬江朱然攻襄陽皆無功而還今陸遜等已死而權且老自出則懼內鬻卒起遣將則舊將已歿新將未信



此不過用補定卒乘還自保耳權果不及出著時要論譏切時政徵爲河南尹除尙書出爲荊州刺史加揚烈將軍從王和南侵基別襲步協于夷陵收其米三十餘萬斛遷其降民置夷陵縣賜爵關內侯曹髦初進封常樂亭侯母上儉起兵欲誅司馬師師以基爲行監軍假節統許昌軍與儉等戰有功加鎮南將軍都督豫州諸葛誕敗轉征東將軍都督揚州進封東武轉征南將軍都督荊州基自附于司馬昭昭亦厚遇之曹奐初卒

### 鄧艾書

鄧艾字士載義陽棘陽人年十二遭亂隨母至潁川讀故太丘長陳寔碑言文爲世範行爲士則遂名範字士則後



宗族有與同名者故改焉爲都尉學士以口吃不能作幹  
佐爲稻田守叢艸吏每見高山大澤輒規度指畫軍營去  
處時人多笑焉爲典農上計吏司馬懿見而奇之辟爲掾  
遷尙書郎時欲廣田蓄穀爲滅敵資使艾行陳項以東至  
壽春艾以爲田良水少不足以盡地利宜開河渠引水灌  
溉又通漕運乃著濟河論以諭其旨又以爲昔破黃巾因  
爲屯田積穀許下以制四方今軍攻淮南運兵過半陳蔡  
之間土下田良可省許昌左右諸稻田并水東下令淮北  
屯二萬人淮南屯三萬人十二分休常有四萬人且田且  
守水豐常收三倍于西計除眾費歲完五百萬斛以爲軍  
資六七年間可積三千萬斛于淮上此則十萬之眾五年



食也司馬懿善之事皆施行延熙四年乃開廣漕渠每東南有事汎舟而下達于江淮資糧有儲而無水害皆艾所建也十二年與郭淮等拒漢將軍姜維後以破文欽功封方城鄉侯行安西將軍解雍州刺史王經圍于狄道曹真時司馬昭令諸將犯漢昭指授節度使艾與漢大將軍姜維相綴維聞鍾會諸軍已入漢中引還守劔閣艾從陰平道行無人之境七百餘里鑿山通道造橋閣以度山高谷深又糧餉且匱頻于危殆乃以羶自裹推轉而下將士皆攀木緣崖魚貫而進先登至江油漢守將馬邈等降漢衛將軍諸葛瞻自涪還綿竹列陳待艾艾大破之漢遂亡艾承制拜官淡自矜伐謂漢士大夫曰姜維自一時雄兒與

某相值故窮耳識者笑之鍾會等皆白艾所爲悖逆檻車  
徵之艾父子旣囚會至成都先送艾然後作亂會已死監  
軍衛瓘遣田續斬之于綿竹子忠俱死餘子在雒陽者悉  
誅之

贊曰淩儉欽誕數子不附司馬氏而甘于一死可謂忠于  
所事者昶與沈附晉傾曹而沈之子叡復叛晉而謀不軌  
所謂世濟凶德艾與會果于犯順隕身赤族非不幸也

常曩侍孝節先公讀史至陳壽蜀志而先公廢卷不懌  
曰漢其蜀乎小人哉陳壽也于是常生十四年雖未成  
人亦麤知古今治亂興亡之大略因請曰昭烈漢之支  
屬繼獻帝而作豈當號爲蜀歟抑陳壽因其所都之地



而名之歟將改仕晉氏而黜其故國本號也先公言壽  
之父以罪爲諸葛亮所髡而壽之身復爲亮子瞻所笞  
又仕漢久不得志庸是貶其號而詆訕其君臣且以尊  
魏也然壽之史行於世幾千載無一人正其謬而改作  
者吾老矣竊有志焉而日者謂我歲行戌亥間將死果  
爾吾其已矣成吾志者其汝也夫常忍涕而識之旣冠  
楷于時學而未遑然亦未始一日不往來于申後三十  
年歲在戊申偶抱病累月病愈因追憶先公之所以屬  
郭允強成書雖正其名而私竊自揆學不淹貫文不雅  
馴大懼不足以成先公之志安知後人之議常不猶常  
之議壽也哉先公諱昌齡字椿年後更諱壽朋博極羣

書爲時儒宗既卒門人私謚孝節先生云



續後漢書義例一卷

凡後漢書有傳者茲不復出事偶相涉則隨事而書

凡書一歲之事必有先後若舊史所載首尾失序無所考  
正則書于歲末曰是歲某人某事

凡記事必繫之日不曰蓋陳壽崇魏而黜漢略而不書無  
他書可考今止書月與時魏雖書日漢既不日魏豈得

獨日

凡記事舊史不載歲時月日不可書之于紀

謂歲時日月  
四者俱不著

今互見列傳庶不沒其實

凡天子諸侯之使通曰聘或曰如然如昭于聘漢使他國  
則曰如吳使漢則曰來聘

凡皇后崩則書皇后某氏崩皇太后則不書氏此蓋班史舊例

凡書薨卒眎官職之崇卑宰輔諸王大司馬大將軍衛將軍則曰薨車騎驃騎左右前後將軍與夫加號大將軍若征北平江大將軍之類亦書薨尙書令九卿則書卒若建安二十五年後將軍黃忠書卒時昭烈未稱尊號故也

凡吳魏僭竊之君書薨則太重書殂則尤重書卒則又若引而進之今止書死

凡事之不繫乎治亂不關乎名教與夫迹涉怪誕者略而不書

凡地名見于音義郡不著而縣著蓋縣名旣多又且重複



覽者未暇徧省不可不著所隸之郡若郡則不復贅言  
凡音義所釋地名其言故者皆指先漢

三

一  
二  
三  
四  
五  
六  
七  
八  
九  
十



續後漢書音義第一

上海郁松年原本

宋廬陵蕭 常著

邑後學 杜邦校梓

紀一上子貞元朔二年封陸城侯

陸城亭名隸涿郡按前漢書表貞以元朔二年

封而陳壽蜀書作元符六年誤也若此

延熙 音羽葆車聚

五采羽名為葆車上公孫瓚

才贊切後漢書有傳黃巾賊帥張角起

魏郡

按陳壽志與後漢書皆云鉅鹿人而起于魏魏與鉅鹿

為郡部今

下邳 音皮故東海縣東京永平十五年為侯國

高唐

平原袁紹 字本初後漢書有傳平原令 治平原郡孔融屯都昌 後漢

書有傳都陶謙表為豫州刺史

謙時為徐州牧後漢書有

小沛

即沛縣以有沛郡故曰小沛猶槐里之小槐里弋陽

沛荀彧

音欲後漢書雖有傳而彧專為曹氏腹心程昱

續後漢書

音義第一



麋竺

民夷切涉六切

袁公路近在壽春

術字公路後漢書有傳壽春九江縣史家例凡稱某

人必書其名其或稱字則記時人之所稱耳無特稱其字者春秋書季子之類非常例如陳壽書司馬仲達劉景升等類從時人所稱可如稱陳仲弓盧子使君所吏昭烈遂幹宋仲子任定祖之類非是今皆正之

領徐州

徐州領五郡

李催郭汜

催古洛切汜音似汜一名多其事跡詳見後漢書董卓傳

塢

鳥古切

陝

失冉切宏農縣即

新豐

京兆縣乘輿承正安邑東河

縣盱眙淮陰

盱音虛貽音夷並下邳縣

下邳相曹豹

裴松之引典略云下邳相曹豹而陳

壽昭烈傳書下邳守將蓋為相必

呂布

後漢書有傳失其孥音

有守兵謂之將亦可今從典略

宜城

南郡縣後升為

郡遷都于許

潁川縣即春秋許國

表為豫州牧

昭烈凡三

韓暹

要擊

要平聲

袁術僭號于淮南

時術在九江郡壽春縣

術走渡淮

奔其

雷薄陳蘭

越騎校尉和輯

蜀志作長水後漢書作越騎今從後漢續漢志注如淳曰越人



自附以為騎故曰越騎晉灼曰取其才力超越拔米武

青巾左校尉為越騎校尉劉昭曰越人非善騎者晉說是

王服陳壽改從容此嵩上音俾車胄天加紹去鄭

劉表字景升荆州牧官渡臨市水是為官渡袁紹曹操壘

尚存今在鄭州中牟縣北鄆道元水經注荑蕩渠經曹公壘北

渡在汴州中牟縣北鄆道元水經注荑蕩渠經曹公壘北

有城北俗謂之中牟臺新野縣南陽博望縣如廂策至

髀肉音烏丸北狄種柳城遼西樊襄陽城外當陽南郡江

陵南郡走漢津音泗漢水出嶓冢山曰夏口江夏沙羨縣

口有津史記蘇秦說楚威王楚東有夏州左傳楚莊王代

陳鄉取一人焉以歸謂之夏州今夏口城有洲名夏口

赤壁在黃舟艦倚減切油江口油水名出武陵故京口城

隸丹劉璋字季玉據蜀張魯據漢中後漢龐統蒲光亦說

陽式蒯操以譎古穴五伯音浩漢縣倉卒七忽司隸校尉

續後漢書音義第一

二



音效又白水廣漢縣成都蜀縣葭萌廣漢縣後厚施去聲秣陵丹

縣本名金陵秦始皇改建安中孫青泥近襄陽劉瓚古回繇

權又改建業晉避愍帝諱改建康竹廣漢雒城廣漢縣魚豢云漢以火行忌水故東京去水

可易白帝南郡巫縣西有白帝城公孫述所築此城故名曰白帝

城後隸巴東郡巴東即今夔州城去州十里杜子美江州

詩云白帝夔州名異城夔州即魚復昭烈改曰永安江州

巴縣故巴國有江陽犍為縣後旄頭音毛史記鼎星曰旄

塗山禹所娶江陽犍為縣後旄頭音毛史記鼎星曰旄

麾仗白羽仗班弓箭左筆右罕鐘簾名橫曰切鐘鼓之附釋

執筆者冠熊皮冠謂之旄頭鐘簾名橫曰切鐘鼓之附釋

作箕並音荀樹或梓潼音童廣漢縣益陽長沙張邵音合宕

渠徒浪南鄭漢中下辨武都金瑋廣漢陽平在漢中紀一

下沔水出武都南入江如淳曰北謂漢水定軍興勢漢中

有定軍山興斜谷弋奢切斜谷出武功縣衙領北至郿入

勢定軍山興斜谷弋奢切斜谷出武功縣衙領北至郿入

勢定軍山興斜谷弋奢切斜谷出武功縣衙領北至郿入



注曰褒斜谷在長安西南南曰上庸漢中縣後蒯切苦怪

射援本姓謝其先與北地諸謝同族始祖謝服為安定王

廢孺子嬰隗器上五鬼切犍為渠延切故沔陽漢中不泉

為安定公隗器下音期切犍為渠延切故沔陽漢中不泉

堅堯切殺人而懸其首按說文梟不孝疾如丑刃縱橫從

鳥也日至捕梟磔之以比惡逆之人不孝疾如丑刃縱橫從

去聲竝濟陰魏諷注引世語云浦人王昶家誠云近

讀梁郊之郊陸渾故國後將軍黃忠卒昭烈未稱尊號故

向舉音趙作音光祿勳黃柱今本皆作權誤也按權未漢

水孔安國禹貢注云泉始出嶓冢山為漾水東流為沔水

都為漢養音漾續漢志注引巴漢志云漢水出氏道縣至武

氏道之養山南都賦注曰漢水源出隴西經武都至武關

山歷南陽界出沔口入江巴漢志又云西源出隴西嶓冢

出隴西嶓冢山曰漾水而東曰沔水又東曰漢水至南鄭

有褒水入又有文水入又東有旬水入又東過順陽有濟



水自號北來山又有淮水自房陵淮山東乾氏脩言天仁

流入至荆山會諸水南入江順陽在南陽乾氏神也

覆孚救昭穆如音韶一作侶或云本柴燔燎以告天燔瘞上

煩下于嚮祚或作昨下裕祭高皇帝以下裴松之云昭烈雖

志切于英賢作輔宗廟制度必有憲章而記載昭烈良可恨

也陸議名後更巫秭歸竝南郡秭歸巴東置歸州取歸為名

武昌故鄧江夏縣孫權更夷陵夷道竝南縣獠亭音交虎聲

也恨山胡登切與恒同音義故武陵縣魚復音腹巴縣春

傳文十年魚永安之唐初為信州又為夔州漢嘉故蜀

縣陽嘉二年臨邛渠庸切蜀縣邛水出嚴疾革紀力陳名

改後升郡音翦字叔茂長陵人初平中為尚書典選舉董卓

忽趙戢數行有所私授戢拒不聽長安亂客荆州曹操辟

之終相國鍾繇長史餘馬謖所六街亭漢陽郡略陽縣有

事詳見後漢書王允傳馬謖切街亭漢陽郡略陽縣有



郡有街泉縣東京改紀二諱禪音遜禪  
天水為漢陽縣省臨牂柯江故名顏師古曰牂柯繫於

鼎六年開應劭曰臨牂柯江故名顏師古曰牂柯繫於

也華陽國志楚頃襄王遣莊躋伐夜郎軍至且蘭緣船于

岸而步既滅夜郎以且蘭牂柯縣且有居切雍閭上去聲越

改名牂柯音七且蘭牂柯縣且有居切雍閭上去聲越

傷先藥犄角說文偏引也一腳旃麾義同音知氏音廖立力

切郡山今在岷州蓋天水臨洮之武都陰平郡名非廣陳

倉扶風石亭近建業陵也漢樂二城成固沔陽成固皆漢

中西城漢中縣建安二十四年曹操分子午谷莽時開莽

縣云從杜陵直絕南山通梁漢道名子午谷順帝初詔益

州刺史罷子午道通褒斜路三秦記子午長安正南山名

秦嶺谷一名樊川褒斜漢中谷陽谷在雍涼青封即木阜

名南曰褒北曰斜首尾七百夏水出父城渭南扶風渭費

陵九江合肥東南至此與淮合故曰合肥渭南水之南費

禪扶味湔有音箋蜀縣岷山在西江水所出縣前觀阪聲

續後漢書音義第一



汶水音問汶江之氏王符健丁奚切堅之族璿音祖中音

稅之租襄陽記曰在上黃界去襄陽一百五十里魏夷王

權敷兄弟三人部曲萬餘家屯此分布在中廬宜城西山

郢沔二谷中土地平費禕至漢中漢中治宦人黃皓始與

政陳壽景耀元年書黃皓始專政按董允傳延熙

九年允卒皓已與政專與之積也當書九年洮西

之繁蜀縣涪陵巴音浮西平涼州郡名晉志曰漢置郡不著

安古候漢壽故廣漢葭萌縣昭烈改為漢壽晉志曰昭烈

日漢壽又立漢德縣合五縣為梓南安中平五年分漢陽

童郡晉武帝泰始中又為晉壽梓南安置南安郡漢陽郎

故天狄道襄武臨洮竝隴上邽音圭隴西縣以有下邽

水谷近上壽春九江駱谷漢中之北境曹爽鍾會入寇由此

屬近芒水安近長侯和在洮鄧艾牛蓋切表一曲阿吳縣故

屋屬芒水安近長侯和在洮鄧艾牛蓋切表一曲阿吳縣故

鳥程吳沙羨音夷江汝潁汝南潁川二郡倉亭在兖州近西平南

鳥程吳沙羨音夷江汝潁汝南潁川二郡倉亭在兖州近西平南

鳥程吳沙羨音夷江汝潁汝南潁川二郡倉亭在兖州近西平南

鳥程吳沙羨音夷江汝潁汝南潁川二郡倉亭在兖州近西平南



縣上饒鄱陽南皮渤海石頭城在建業濡須在歷陽皖城廬江五

口在漢中譙沛縣南昌豫章縣表二拓地音托數圻音方習鑿齒

晉尚書郎李昇皮戀切甄氏音真改夷陵為西陵此非江斬春音其廣

陵廣陵縣錫音陽漢中縣左傳文十由拳吳縣古橋李左

橋李秦始皇改改摩陂為龍陂在潁川城音朱江

記曰縣楚滅和徙其君于此因以為名先漢衡山王吳芮

所都後漢順帝紀永和二年盜殺邾長章懷太子注故城

在今復州改禾興為嘉興吳縣故由拳孫權黃龍三年扶

竟陵縣東舒廬江句容丹陽縣音雲陽吳縣後改曲

郡堂邑廣陵縣故東興東興城在巢湖即東關南去江四

廬江縣孫綝丑今切分宜都置建平郡建平今歸州陸抗曰劉

龔音儼自張栻音式字敬夫紹興宰相魏忠獻公列傳一

續後漢書音義第一五



嬪嬙上皮民切切嬪賓振切昭烈臨豫州駐小沛時以小沛劉

焉璋之父後子瑁音冒縱橫竝去聲隃遠隃音逾朝請青徑切璩渠音

列傳二東陽故臨淮縣東養耆上上聲猶豫上夷切災疹音

又陳元方名紀羣趙元達名昱琅邪人亦馬足于堅切賁育上音

子古璧音韓子助名未詳飲餞飲從去聲荒思讀從去聲推之土緩切

恩施讀從去聲應仲遠名劭瑒病甃不能行善論縱橫下二字南

徽音此南曰列傳三上父珪字君貢從父才用切從至如南陽

隆中漢晉春秋曰亮家于南陽之鄧石韜孟達韜字廣元

梁父吟梁父泰山下小山古樂府有梁父吟蓋亮所作其

正相似問是誰家田強古治氏力可排南山文能絕地

紀一朝被讒言二桃殺三士誰能為此謀相國齊晏子三

士謂陳開強顧治子公崔州平烈之龐德公襄陽人統司

孫捷事詳見晏子春秋



馬徽

字德操

欲信大義

信音

伯業

音霸古者止稱

重耳

音重

重之

出守江夏

應劭曰海水自江別至南郡華容為夏水

陵

在今安州雲夢縣東南建興四年

孫權

攻江夏圍石陽石陽江夏縣

宛字南陽縣柴桑

豫章

漢南漢水之南

魯縞

音縞并力去聲於戲讀作秦宓音密

縣

漢南卽荆州

魯縞

音縞并力去聲於戲讀作秦宓音密

云祕

密之宓廣

五梁

其姓溟池音顛益州縣前後羽葆聚

韻云

今作密字

五梁

名也溟池音顛益州縣前後羽葆聚

綵羽

名羽葆羽葆謂之纛前後羽葆

姚伯音罷弊罷音郭

倂之

楚國先賢傳倂之名演南陽人

渡瀘前志瀘惟水出

音劬

咨諏

子侯秦嶺

在長長安京兆縣先咸陽秦名咸陽

新城

武帝元鼎

郿

扶風箕谷

今和卒聞九忽西縣漢陽蹻

三年

又改渭城

郿

扶風箕谷

今和卒聞九忽西縣漢陽蹻

足

去搖切寶嬰

但宗切

列傳三下并日

必正鳥巢在今滑

城東

曹操

幾敗北山

陳壽作伯山恐非操嘗敗漢中從蜀

袁紹

戰處

幾敗北山

而言則漢中以北為北山趙雲傳曹

續後漢書

音義第一

六

操運米北山下卽漢中也又張魯傳注董昭奏曰武皇帝  
承武都降人之辭云張魯易攻陽平城下南北山相遠不  
可守及往不如所聞又魯聞陽平已陷乃奔南山入巴中  
則知陽平爲北山矣唐德宗在興元興元卽漢中問陸贄  
曰近有卑官自北山來者率非良散關在長安之西路出  
士由興元視漢中以北爲北山  
漢中出散關建威巴漢西北境近武木牛流馬亮集載木  
則直抵陳倉建威都陽平見姜維傳  
曰木牛方腹曲頭一腳四足頭入領中舌著于腹載多而  
行少可以大用不可少使特行者數十里羣行者二十里  
曲者爲牛頭雙者爲牛腳橫者爲牛領轉者爲牛足覆者  
爲牛背方者爲牛角細者爲牛鞅攝者爲牛曲者爲牛肋刻者爲牛  
齒立者爲牛角細者爲牛鞅攝者爲牛曲者爲牛肋刻者爲牛  
行六尺牛行四步載一歲糧日行二十里而人不勞也  
流馬尺寸之數肋長三尺五寸廣三寸厚二寸二分去  
同前軸孔分墨去頭四寸徑中二寸前腳孔分墨二寸去  
前軸孔四寸五分廣一寸後軸孔去前軸孔分墨二寸去  
分孔長二寸廣一寸後軸孔去前軸孔分墨二寸去  
小與前同後腳孔分墨去後軸孔三寸五分大小與前同  
後杠孔去後腳孔分墨二寸七分後載剋去後杠孔分墨  
四寸五分前杠長一尺八寸廣二寸厚一寸五分後杠與  
等版方囊二枚厚八分長二尺七寸高一尺六寸五分廣



一尺六寸每枚受米二斛三斗從上杠孔去肋下七寸前  
 後同上杠孔去下杠孔分墨一尺三寸孔長一寸五分廣  
 七分八孔同前後四腳廣二寸厚一寸五分形制如象耳  
 長四寸徑面四寸三分孔徑中二腳杠長二尺一寸廣一  
 寸五分厚一寸  
 鹵城定安有鹵城畏蜀如虎時司馬懿畏亮不  
 曰公畏蜀如虎奈無當城近鹵木門即青封不躡謂不圍潤  
 天下笑何懿病之城近鹵木門即青封不躡謂不圍潤  
 上音青下胡岡五丈原武功縣挑戰徒子遺巾切輟音  
 切圖亦潤也五丈原武功縣挑戰徒子遺巾切輟音  
 國婦人之飾巾首死諸葛走生仲達司馬懿悉仰于官去  
 飾也輟婦人喪冠死諸葛走生仲達司馬懿悉仰于官  
 聲景升季玉劉表字景升八陳圖陳亮造八陣圖于魚復平  
 沙之上疊石為八行行相去二丈溫見之曰常山蛇勢也  
 文武皆莫能識之後漢書竇憲傳班固燕然銘曰勒以八  
 陣莅以威神章懷太子注曰兵法有八陣圖則非  
 亮所創蓋古制也故傳曰黃帝太公丘井法也

續後漢書音義第一

續後漢書

音義第一





續後漢書音義第二

上海郁松年原本

宋廬陵蕭常著

邑後學胡芳秋校梓

列傳四解人

音駭白馬東郡縣

艘蘇肯切

襄陽太守

故南郡縣今升為郡盪

寇徒浪切

臂創

初康切

鏃于木切

刮骨

古察切劈匹歷切

炙之夜樊襄切

城外臨沮

子居切爾

祉切止

鞭撻

瓜加切閭中

巴潼關之西

六國時名陰晉前志曰高帝改曰冀漢陽

於邑

音鳥驃騎

上匹

釐音胎

故扶風縣東京省

虓音肴

又儀觀

觀去聲外水

妙切

為釐鄉

卽周先世所都

虓虛交切

儀觀

觀去聲外水

外水

直趨成都

內水則可至

涪南

宋武帝欲取蜀與朱

鄰石謀曰劉敬宜往而又料我當出其不意猶從內水來

必重兵以守涪

以備內道若向黃武正

墮其計今以大眾

自外水取成都疑兵出內水此制敵之奇也

譙縱果備內

道福戍涪城

五長道業

長上聲

昌門

吳城末陽

桂陽縣

當為璋

為去聲卒至

續後漢書

音義第二

一



卒不當去聲中流矢去聲新都廣漢縣內涪水音納資中鍵為縣雍涼

上于切廣拓音托磔涉格切折節時徹切牛鞞音俾健江原蜀縣說璋

式銳益州太守益州太守益州郡名武帝平西南夷未服者置儋石

之儲都甘切又都濫切府藏去聲為官市為于偽切涯涘七

于計枹鼓枹鼓風無切所府藏去聲為官市為于偽切涯涘七

切叵測叵測普火切列傳六頰音改頰吻文粉切孔佃音瑒雉

音暢疏宕疏宕徒浪切急難如契闊契闊上氣切圯族部彼切四塞思責切正

禮劉繇景興景興王朗東甌古國東漢郡國志會兒孝德音宋

忠字仲歛音吸羸郡太守故泰山縣曹操跌宕音迭任安字定

葉公失音李宏字仲受淤去聲見瑰上賢切以簿擊頰簿手也禹

生石紐帝王世紀曰繇納有莘氏女曰修己生禹于石紐其



地名劉兒呼坪阜坦  
也音劣廣柔隸蜀郡  
鄆邸閣督音皮  
丁玄陰化二人名

張舒豔塞創平聲  
列傳七便辟下匹亦切  
始與政音預下南

安樊爲岑述字元  
何駛音自校之比校位分  
聲操行竝去名

聞音鴻臚切如髡苦昆  
雙柏益州殷觀去聲  
閣宇久處操行

未必檢倭上七切  
列傳八宜都房陵上庸西城  
宜都故夷道

郡置宜都郡房陵上庸西  
鼓吹去聲容觀儀觀同  
篆音使稱

竝去聲然傲音江陽爲縣  
老革皮去毛曰革古以革爲甲故  
稱兵革老革猶言老兵蓋怒

罵之荒悖音佩振威劉璋爲振  
分子之厚子之厚恩施之

于已故下文又  
蒞醢字或作蒞別俾列闕茸上貪甲切  
妻

音妻漢狐忠即狐篤後  
朱提音銖時提又音如匙見蘇林

郡固陵建安中劉璋分巴郡墊江以上爲巴郡江州至臨

江爲永寧郡刑忍至魚復爲固陵郡尋改永寧爲



巴郡固陵為巴東郡巴郡為五百隸卒問過責加殄殲音

泣音炫希更軍事更平聲蚬救兼切馬岱音蹴狷狹音狷從

容平聲落度讀作落魄音薄又音託列傳九泉陵零陵廣都

蜀什邾音十方屬琬之欲切未弭迷俾切首難乃且切總帥士卒切

憤憤古對切郿莫耿切改觀去聲衛音道晡音通環甲音患李福父權

字伯西充國巴縣本名充國後以列傳十閔水閔中臨醪

賁康降上音來下獠力矯切數為音朔還統兩郡事陳壽作

郡屬吳無還統之理時弋領巴東郎永安不強其往宿留

上音秀下墮虛圭切韓嵩字德高義陽人鍾元常字繇墊江音堞

巴德陽廣漢縣有劔閣為璋使為使耆帥上音其下趨趙

上音谷下麤精粗罷倦音苦角切南安即天水鄰相為



于爲操自比周文王陳羣桓階夏侯惇等勸進操曰施于

文王矣事見魏略適從音列傳十一景附英請三巴先是劉璋分

巴西凡三郡是謂三巴水經劉璋分三巴有中巴有巴

瀘朴胡文選荀彧傲吳將俊部曲陳壽曹操傳並云巴七

瀘其姓名也曹操既滅張魯以杜濩爲巴西太守相屬

建寧故益州郡先零音昆明故西南犍音紫江建寧庾降

音來杭去蜀三千餘里時未有寧州號爲南雲南太守建

中立都督以總攝之晉泰始中始分置寧州

二年分建寧永漢昌巴西定祚音昨越味音昧建旄牛蜀

昌置雲南郡在邛崃怵首律切亭傳專遍昀毗上古屬以之欲剽急匹

與戎音過當去瑛音列傳十二永南季常李邵馬教中

言教就也丁仲切洮西洮水石營董亭自蜀往南安天鍾題近狄



怨譴音漬 沈嶺駱谷之北 長城沈嶺之東蓋 西安建威武衛石

門武城建昌臨遠皆巴漢之境光紀十一年注武衛即下

城石門即龍門杜甫龍門鎮詩 沓中漢中北境姜維求其

陰平景谷陰平郡名非廣漢之 公休太初諸葛誕字公休

義眉山名在今眉州 四世祖皓字叔 譚粲上音 亟戰音 列傳十三

訟鬪與激切 謹昨音責 蹶蹶上音 譚承字公 彈射市亦

以累免累力切 李譔離免切又離戀切作 父仁字德 奧祕祕

密此蓋 躊躇上直由切 厲揭其冀切 夷庚吳晉往來之道左

夷庚注吳晉與模音 縱橫如狙詐 狙崔孺切又音覲 要

上音 鞅斯呂韓商鞅李斯呂 鑠式灼切 隆窳音愈 朱陽朱夏

言朱 望舒月 冲質桓靈東京 九德郎書皋陶 薛氏三計黥



反時故楚令尹薛公言上中下計見布傳詘音輕切輕竹利粥讀作唐葉猶言唐陽

盱淮南子禹以洪水身請于桑林湯以旱容裔自適九方

善相馬見淮南子薛燭善相瓠梁善鼓瑟齊隸附文

客能拊體作楚客潛寇以保荆楚將子發與齊帥相拒

雞鳴脫大難簪子發使歸之齊帥師雍門桓譚新論雍門周善鼓琴以

大駭卽通去見淮南子韓哀呂氏春秋韓哀善御王褒聖主得賢盧敖淮南子盧

韓哀臣頌云王良執靶韓哀附輿靶音霸敖淮南子盧

一士漢目而互準豐上而殺下軒軒然迎風而舞顧見敖

慢然而下其臂遜于碑陰敖就視之方捲龜殼而食蛤梨

敖與之語若士者齧然而商較音列傳十四江油故廣漢

笑舉臂竦身立于雲中南中七郡建寧興古雲南永周獨

道後為蜀陰平廣漢陰南中七郡昌漢嘉越嶲汶山周獨

縣之津要立異議時不虞鄧艾克江油入陰平朝野洵懼帝使羣臣

賣後莫書

音義第二

四



不可帝猶疑于入南周復上疏陳四不可且言天命有歸  
雖堯舜不能與其子帝素懦不武遽從周議遂至于亡時  
炎興元年十一月也明年正月鍾會鄧艾皆敗自國亡至  
鍾鄧之誅才四十餘日使不聽周之議君臣固守或至南  
中以俟援兵豈至于亡孫綽孫盛著說以咎周孫綽曰譙  
是以君于漢歎息焉  
歸魏可乎曰自爲天子而請命于人何恥之漢乎夫爲社  
稷死則死之爲社稷亡則亡之先主正魏之篡不與同天  
矣推其過于父俛首而事仇可謂苟存豈大居正之道哉  
良可慨也○孫盛曰春秋之義國君死社稷卿大夫死位  
況稱天子而可辱于人乎周謂萬乘之君偷生苟免違禮  
希利微覲微榮惑矣且以事勢言之理有未盡何也禪雖  
庸主實無桀紂之惡戰雖屢北未有土崩之亂縱不能君  
臣固守背城借一白可退次東鄙以須後圖是時羅憲以  
重兵據白帝霍弋以強兵鎮夜郎蜀土險狹山水峻隔絕  
巘激湍非步卒所涉若悉收舟楫保據江州徵兵南方乞  
師東國如此則姜廖五將自然雲從吳之三帥承命電赴  
何投寄之無所而慮于必亡耶魏師之來襄國大舉欲迫  
則舟楫無資欲留則師老多虞且屈伸有會情勢代起徐  
因思奮之民以攻驕惰之卒此越王所以敗闔廬田單所  
以摧騎劫也何爲匆匆遽自囚虜下堅壁于敵人致斫石  
之至恨哉葛生云事之不濟則已耳安能復爲之下壯哉



斯言可以立懦夫之氣觀古燕齊荆越之敗或國覆主  
 或魚懸鳥竄終能立功定事紹復社稷豈曰天時亦人謀  
 也禪既庸主周亦駕臣方之申包胥田單范蠡大夫種不  
 亦遠乎綽盛二人皆晉人其論如此故備著之五將謂姜  
 維廖化張翼董厥等吳之朝請七正宦寺如字又廟音疎  
 三帥謂丁奉施續丁封等  
 遠于願切容說于月切列傳十五李密眉必切案至音厚厚蓐義與蓐同  
 無間言去聲戢音不強屈兩切列傳十六禪虛圭切日磾音低以  
 剗初康切傳形音同或陰平以降胡烈廣漢縣非鄧艾由陰  
 聲聞音漢昌巴西縣閬中令遼東縣兼可兼謂創初康切句驪東夷  
 有高王宮其先王名宮國人以尊本上祖諸葛靚音靜字  
 句驪其似先王故名王宮任故廣平國縣雋汝鵠切  
 之殖醢側朱切列傳十七贈贈扶奉切任故廣平國縣雋汝鵠切  
 子殖醢側朱切列傳十七贈贈扶奉切任故廣平國縣雋汝鵠切  
 也勝陸渾縣大陽河東縣在大河之陽故名有吳城周  
 所易之市切瓜牛廬言其狹小如蝸殼祝衄女六牂音藏  
 滅音瓜古通用祝衄女六牂音藏



皇上音古甫謚字士安伯重重平聲甌甌下音專內書謂老

之書釋異論無所勝平聲慰薦音精精平界切怒乃睥睨上音備

不正視言讀從列傳十八周羣父舒舒字叔更直更平聲孛音

鶉尾荆楚分野于王氣夫識之以厭于涉手推吐回鈴

下蒼頭傳斬紀近屬我上之厯山潘陽肆夷至

厯利音未蹇必益魑魅魑魍音咎寨安德平原列人鉅鹿

斥魏常譚義同傳日者除羨切



續後漢書音義第三

上海郁松年原本

宋廬陵蕭 常著

邑後學 杜胡芳秋 杜邦浚校梓

吳載記一富春

後以避晉簡文帝鄭太后諱改富陽孫鹽

濱

故臨淮縣

宛城

音宛南

斬斷

丁貫

苴

子朱

數責

上乙區

星

上雅

零桂

零陵桂

王叡

字通曜晉太

張咨

字子議

魯陽

南陽縣前志注古魯縣御龍氏所遷顏師古曰即淮南所云魯陽公與韓戰日反三舍者公仇稱公仇

名行陳

上戶郎切

廟幘

上吉

冠豕

間

上音

陽人

聚名在河

也今汝州梁縣西史記秦遷也東周君于陽人即其地也鼻而懸其首華雄上戶調發去

聲縣示

上明

大谷

近雒

小鱣

側降

周隅

音隅

峴

胡典舒

廬江

曲阿

吳江都

廣陵

黃祖

劉表

吳會

言吳地

壽春

九江

碑低

喬粧

戎堆

好叛

上去

厯陽

九江

劉繇

音由

東治

會稽縣

續後漢書

音義第三

一



地更置庚音上繚力皎切在海昏海昏諫宗民民相宗而為

其長曰卒與客遇七忽切創甚上初切陽羨會稽縣沙羨音夷丹陽

故鄣郡顏師古注地里志以丹陽為楚之先熊繹所封非也楚之封丹水之陽其地在南郡續漢郡國志南郡枝江有

丹陽聚即前志楊字從木晉樂安鄱陽縣黟音伊歙音攝張甚

志云山出赤桺故名從阜非是上去聲夷陵南郡當塗九江縣故屬沛帝王世紀曰陸口在

上之遺操書上音語其下上音巴丘即巴陵麥城常陽縣

麥城改鄂為武昌卽鄂徐陵在江北戲口在江北石陽江夏縣周

魴音防石亭在廬江六安廬江縣丹徒吳縣古朱方後改瑋瑁上

下芍陂上音鵲安城汝南縣堂邑涂塘涂水名在堂邑堂邑

陵吳載記二樂嘉近項城壽囊臯音拓姑臯又高亭壽春

安豐廬江縣江都廣陵縣刁元上音詰難上氣吉切數至音朔



漬梅上子藏吏上去首服上音子靚音靖鑊里未詳虎林未詳

塞永昌二亭皆建在君為君為去聲半野建業近境射鉤上市直切下古

侯見吏上賢切候官故閩越地武帝滅其國徙其人名東治

中隸立子寧為太子苻奕訢音如太元璽音如迨璽音如迨

之迨音如迨璽音如迨璽音如迨璽音如迨璽音如迨

之擁裴松之曰傳稱名以制義義以出禮禮以體政政以

正名是以政成而民聽易則生亂休欲令難犯亦何患無

前修詒咄笑于後代不亦異乎璽音違明誥于吳古迴切犯

汜潢上音扶嚴交趾微夷車浚上尺切太康四年死于雒陽吳

錄皓以四年死時年四十二世紀皓以赤烏五年壬羊衛

道盛水金馬孟盛音成馬孟封備音斧校習讀作比故鄣音章

丹陽錢塘故會稽縣東京隸吳有武固陵會稽近境查瀆在會稽



趨具

上音促

高遷

會稽有遷亭即所謂柯亭見後漢書蔡邕傳

周昕

音忻字大明

嵩

音蒿

黎漿

近壽春南合肥北

溧陽

丹陽縣

牛渚

秣陵南境在當塗縣俗謂之采石磯江東之津要梁

侯景自橫江濟于采石韓擒虎自橫江宵濟采石近今蕪湖

肄夷忌

相遲

恥異切

巴上

廬陵

縣在今峽口之下

重安

零陵縣

舒仲膺

名邵初伯膺親友為人所刺仲膺為報怨事覺兄弟爭死

人皆

義之

陵陽

丹陽縣

嬌

虛圭切

京城

即京

椒丘

近豫章見

疆場

益音

識之

音志

吳載記三

騶

音偉

劫質

音志

窄融

上音窄

自覆

夫救切

聞合

浦

薊

胡悔切又于鄙切

雄長

上聲

帶鍵

居言切載弓矢器左傳右屬藥鍵

蕪湖

丹陽

宣城

丹陽縣

涇

丹陽縣

山越

越人之居者

寧識

音志

神亭

慈前與策闢處

近曲

把腕

烏貫切

艾

豫章縣吳公子慶忌所居

西安

豫章縣見

樓芬

扶雲切

複

屋棟

當歸

藥名

吳載記四

有衰

倉圭切

殺

色介切

袒免

上音坦

將

問切

校下

教切

飲羣臣

上音切

禍衡

字正平後漢書有傳

婁上

虞

並倉切

鄉服

稽縣

鄉服



音權酤障管之利王莽設六管之令謂沽酒賣鹽鐵器鑄

利為身為國于偽妻以上去丁譖音雲陽升為郡阿伯言陸

字折頰音猿狖又音臼陽丹陽縣佃皖口音輔車尺加切詩疏

膚頰下之別名也易咸其輔頰舌明輔近頰而非頰也蓋

輔頰下之別名車所以載牙輔為外表頰為內骨二者相

為表裏故曰相依爾雅輔頰也車所以載以內船音復難

大齒韓愈云左車第二牙無故動搖脫去廬江儋耳海南

之者難去聲東關即東興堤新城魏人所築潯陽廬江縣

吳載記五隲止日隱几上去聲食隲上去聲海鹽吳縣漚口在長

呂岱摘抉一決切跼躄上具玉切負殿典見要其平聲顧豫章

諸葛使君步丞相嚴衛尉張奮威豫章謂卻使君謂瑾丞

謂承恂恂然周昭引魯語絃建計宜都秣陵即建業枏櫨木

多癭癭其文委曲可愛人或取以為枕今轉呼苦鑑半

癭為櫨一曰古杉木根盤錯有文俗呼為花櫨闕切



洲甘寧潘璋屯兵于此羽吁羽縹縹關關曳曳門門下下循循行行賤賤職職游游黃黃龍龍大大牙牙

旗吳載記六橫江當利破之江北孫策征劉繇濟于橫江大

也橫江當利乃東渡擊湖湖熟熟縣縣江江乘乘丹丹陽陽居居巢巢廬廬江江春春穀穀

秣秣陵陵則則知知在在江江北北巴巴上上廬廬江江鄧鄧南南郡郡縣縣送送質質音音宮宮亭亭

丹丹陽陽尋尋陽陽廬廬江江縣縣本本作作巴巴上上廬廬江江鄧鄧南南郡郡縣縣送送質質音音宮宮亭亭

縣縣漢漢郡郡國國志志尋尋陽陽南南有有九九江江東東合合為為大大江江注注云云慧慧遠遠廬廬山山

記記曰曰山山在在尋尋陽陽南南濱濱宮宮亭亭湖湖北北對對小小江江又又曰曰廬廬山山南南嶺嶺臨臨

宮宮亭亭湖湖蓋蓋在在尋尋陽陽尋尋陽陽隸隸廬廬江江郡郡郡郡跨跨江江之之南南北北尋尋陽陽在在

今今江江南南周周瑜瑜備備宮宮亭亭江江夏夏太太守守黃黃祖祖遣遣鄧鄧龍龍入入柴柴桑桑瑜瑜追追

討討虜虜龍龍于于柴柴桑桑豫豫章章縣縣豫豫章章與與尋尋陽陽接接境境并并力力音音蒙蒙衝衝船船

按按今今宮宮亭亭與與彭彭蠡蠡相相接接猶猶洞洞庭庭之之于于青青草草并并力力音音蒙蒙衝衝船船

名名艇艇掃掃高高紿紿徒徒改改舸舸堪堪我我漲漲天天聲聲去去創創甚甚上上初初下下雋雋漢漢昌昌

劉劉陽陽州州陵陵雋雋字字遠遠切切劉劉或或從從水水下下雋雋劉劉陽陽京京卽卽京京折折切切女女

切切奮奮威威張張蹴蹴操操上上此此道道於於巴巴上上蓋蓋巴巴陵陵非非廬廬口口折折切切女女

幹幹字字子子游游說說音音稅稅下下夔夔曠曠后后夔夔酈酈叟叟食食兩兩困困區區軫軫卒卒除除上上



忽勦除上子切愕眙丑吏切益陽長沙縣行陳戶郎切賒貲音世

也屬貸行滕音滕廣德丹陽縣枹鼓音孚夾石皖城章

鄉城近麥開拓音托文表秦松字吳載記七令支音零下巨思

切石城丹陽縣巴澧即天門郡之練音練縹竝洽切又祖長子

射音亦見後漢書洞即洞浦在九薄落即孫權黃武三年

至江乘立木為之衣以葦蓆加采下蔡故沛縣前志注故

左傳成七年吳入州來夫差宜春豫章縣岑詳枿閭切盛

大繼息列切度權上徒切餘杭吳縣屬者之欲切當口當陽水入盛

祖及上音陽新下雉竝江白削也建昌豫章縣仰取上去聲

涂塘在東關高亭在壽吳載記八山陰會稽分丹陽為臨川

郡非豫章亂行戶郎切見兵上去聲識臣音志湖熟吳縣陵陽丹陽縣

續後漢書 音義第三 四



勇里

在會稽句章句踐欲遷吳王于勇東剡會稽斯從其姓

太末

太音闕會稽縣臨水吳縣建安十六年孫權白梃項

切奢綺

奢靡絳襜赤占安樂未保質音剡切音吳載記九

都南郡

殷于姦趣音衛旂同大公平中即大蒲圻江夏六

安廬江

魴音防寧國丹陽縣晉置宣狙誘上趨童亂音永興

會稽

君慕承宮事見後酉陽武陵趣嚴于六遷陵武陵魁

帥士季

屈楚必益切幾復音車重輜車譎音吳載記十祖

紆字叔

父駿字季海昌陸氏祠堂象贊曰利浦丹陽費棧

上扶味切

劉廙音益又見眾音葑荳未詳疑逢式音謝淵

謝玄

會稽典錄淵字休德少有暨豐欺冀切又音冀吳王

今作几一切

吳越間有此姓元樂鄉在南陽比晉上音大

和姓纂音言

上元中改為同氏樂鄉冠軍比晉上音大



堰音宴洵懼許拱切入占之劍切諸暨音既會巴上督陵巴吳

記十一上平興音南縣子綱張紘字延陵謂吳季札疏直上平聲荀

謂爽之唯唯音偉汜音泛鬲音丙倜儻上音廝吏音斯義馬者韋昭曰廝義也析

薪為廝炊烹為韋昭陳壽避司馬昭諱改作曜而漸漬平

去聲下聲不墮許規切枰音平遠矣去聲參訂丁正切茶薺音舛茶之

以當酒當去聲郢胡卦切舉音與覈音核正王于況切慤與慤同義綆音梗

肩楊竺音策藉草七夜切比曉音備吳載記十一下餘閒音珎行

繫音洛又音安殊音啗從鑒切摩陂在潁川郊縣後改龍陂禮遺于為切琅

琊王音為君音渭榮戟音破鈞臺泝音泝柁工徒賀切樊口樊水自此

江使事音士覆護字佑切

續後漢書音義第三





上海郁松年原本

邑後學杜邦俊校梓

三  
國

或用

南

全縣

三年

城南

資土

月日錄

效



三臺中臺外臺憲臺五宗上自高祖下至元孫三族父族母族妻族楊彪

有傳後漢書睚眦上五戒切榜楚上比孟切譙蒲校官學官

中山名國鄴魏縣安平冀州名平虜泉州二渠入平虜渠自呼沱河

洵河入路河皆通海泉州漢陽縣續漢郡國志雁門鹵城

故隸代郡山海經云秦戲之山無草木多金玉呼沱水出

馬魏志建安十一年操鑿渠盧龍北平郡北境有北平盧

白呼沱河入派河洵音鉤盧龍北平郡北境有北平盧

龍後改柳城遼西渦肥水上烏禾切入更事上平岌

肥如遼西柳城遼西渦肥水上烏禾切入更事上平岌

逆及切恐不任音俛仰上一朝請音倭汝甚切置名號侯

懼不安貌壬俛仰上一朝請音倭汝甚切置名號侯

至五大夫與舊列侯關內侯凡六等以賞軍功魏書云置

十八級關中侯爵十七級皆金印紫綬又置關外侯爵十

六級銅印龜鈕墨綬五大夫十五級銅印環鈕亦墨綬皆

不食租與舊列侯關內侯凡六等既得隴復望蜀操自度

裴松之以爲今之虛封自此始既得隴復望蜀

得蜀故爲虛辭以示謙題而徇所以鈇質音孚質與鑽富

抑與後難助之令同題而徇所以鈇質音孚質與鑽富



埒音劣婁興亟仆婁讀作屢亟仆音赴倡倡優其宦人官不

得過諸署令不自以其祖由宦寺篡國因懲其禍故為此制十月辛未陳壽作十一月庚午

受禪碑作十月辛未歐陽公云當以碑為正見集古錄受

階等奏太史令引獻帝傳曰辛未魏王登壇受命陳壽魏志云

黃初元年十一月癸卯下令丙午至曲蠡漢帝遣張音禪位庚午受禪

十一月癸酉以山陽奉漢帝癸酉去癸卯三十一日豈一

月而三十一日其誤明矣僭即尊位於繁陽先川部頽陰縣有繁陽亭

禪位於己因南至頽陰陽不與知張音等奉璽綬于不不

篡位於此以其地為繁昌縣北征記曰地在許之南七十

里有臺七丈方五十步即臺南有殺其妻甄氏真足攀力全

壇高二丈方三十步強起其兩帑藏徒黨切內之掖庭納母丘無不勝音金墉

城在洛魏載記二倩人上土壺關上黨臨頽頽川丁謐音

興平路險在漢要爽音崖柴竝去作疽囊甚言皇遽倉皇

續後漢書音義第四二



枹罕上音孚品度徒學切滋長張兩切大較猶言大槪高陽許允故

縣應劭曰在高河之陽東京隸河間國下文言與清魏載

記三緄古本朗陵汝南傅公明不娶宦者之為守宮令漢

制守宮令一人秩六百石丞一人二百石主御紙筆墨及

或宦者壻亢父任城奮武司馬操為奮武將軍搯其喉厄

捉情見音現宛葉竝南下邳京兆穰人羊切郗慮音瓠壤戶怪

自毀曰壞徒跣徒謂徒步跣謂梟獍其行上音驕下音鏡

獍惡獸先食母仰食上去聲陳宮字公白馬東郡黎陽魏縣延

津郡國志注陳畱酸棗縣北有延津操與袁紹韓音南

皮縣屬之欲壽張故東郡壽良縣世祖倉亭津兗州之

東漢陽東郡縣古罷憊音皮內地獄音納精湖廣陵魏載記四

阿昆吾國



韓斌

音彬

平陽

河東縣應劭曰堯都也在平河之陽

必易吾軍

音異

毓

音育

大官

主飲

食蕭贊令

竝

音浦縣贊當作鄭鄘二字竝才何切

景附

請切

宏演之義

劉向新序齊威公不救懿公求昏于衛衛公不許衛為狄所滅威公不救懿公死屍為狄人所食惟有其外

其臣宏演適使它國反致命于肝曰君為其內臣為其外

乃列腹內肝而死威公聞之曰衛有臣如此寡人無有乃

救衛而山周

鉅鹿縣後隸魏郡西部

與山陽其之

曹丕廢獻帝為山陽公

合

音謹

謂同器而食

四聰入達

陳志作四窗通鑑作四聰對

等西人屬四聰

誕等八人為入達新論曰明堂入聰四達

此言四聰亦取其明達

時

牝牛

音牝

樓樓

音樓又龍朱陽

平故東郡縣

蕭相

竝沛

沔下

音比

年

上去聲

長子

音長短之

魏載記五鵠鵬

上音啼曹丕黃初四年鵠鵬集于靈芝池

自并從容之官

上音併從此恭切謂周生烈生性烈其名

續後漢書

音義第四

三



也蹶然音適茲秋安戎汝南邯鄲音寒閔亡巾切又音義國農潮

縣有鄆長上一古切一期音基京密竝河安陵扶風堂陽故

鹿縣後魏載記六露板猶言虬鬚音求羸服羸敗憑几上皮

遺玠上去廷尉主刑獄貫音世頓丘東郡比居上義切東莞官音

琅邪繁夥胡果胡牀今繩魁梧音悟官練練音魏載記七傍

北山傍去徐無山北平縣徐無徐無縣之山也要束要約蔣正雷切

白檀漁陽鄉導音向平岡白狼竝北平縣前高密北海懾叶

切膠東濟南饁之上音叶餉南和鉅鹿輦車上音本車上

車言小槐里扶風有槐里小半褻與袖音義同數之上音色

顯甫顯思譚尙北邙洛陽魏載記八絳邑河東郭援袁氏

與援要約土窖音教皮氏河東間行間道小弋陽汝南有弋陽



其近東關即東興廬江項汝南并軍上平聲五將山在淮河之

地敗奔五將山按堅都長安倉卒安得至淮漢書地里

志左馮翊谷縣有五狀山堅所奔當是五狀非五將也

夾石北境每易音異噍類齊要切西平郡名涼州與推下上吐

回倭人之枕讀從上聲上桃切涉酒不為卿偽切燉煌上吐

昆槎極上則加切斜音質複音伏新豐京兆縣三輔秦都咸陽置

切漢分馮翊三輔京兆馬皇皇切依堅許攸非叛袁紹鼯鼠上音

尹左馮翊右扶風倉曹屬理曹掾續漢百官志東西曹掾

廷撞上音廷莖也倉曹屬理曹掾北四百石餘掾比三百

石屬比二百石合史百石漢以為亡逃亡州府州謂刺史

書音義曰正口掾副日屬關中侯曹操增置南鄭為天獄

姬于怒切任子任猶言保任關中侯以賞戰士南鄭為天獄

斜谷為石穴謂溪險傅合上音撓節女教切魏載記九卒與

虞遇上七忽切長社潁川潞山音潛廬江縣潞登天山即潞中

音義第四

四





